













20753/A

20755

20753/A  
20755



22535

Amc Temp.  
9/60







CONSPECTVS  
**THERAPIAE**  
GENERALIS,

*CVM NOTIS*

IN

**MATERIAM MEDICAM**

TABVLIS XX

**METHODO STAHLIANA**

CONSCRIPTVS

A

**D. IOANNE IVNCKERO,**

MED. PRACTICO ORPHANOTROPHEI HALENSIS.



---

HALAE MAGDEBVRGICAE,  
**IMPENSIS ORPHANOTROPHEI, MDCCXXV.**

22535 (1)

THE  
GENERAL  
CONCEPTS

WATTSIAN MEDICAL  
LIBRARY



JOHN WATTS  
MEDICAL LIBRARY



WATTSIAN MEDICAL LIBRARY





*PRAEFATIO*  
LECTORI BENEVOLO  
FELICITATEM.



Olidam cuiusque morbi cu-  
rationem intelligere si quis  
cupiat, nunquam eo per-  
venturus videtur, nisi an-  
tea doctrinam generales  
medendi fontes recludentem probe sibi  
a 2 degu-



degustandam imbibendamque cogitarit. Qua de causa facile, petentibus amicis, impulsus sum ad primam hanc medicinæ practicæ partem, e scriptis præcipue *Stahlianis* collectam, specialibus tabulis Medicis subiungendam, & quo facilius perceptu esset, eodem vestitam habitu in usum maxime tironum publicandam. Hoc igitur instituto iam prodit hæc therapia generalis, de cuius argumento ut eo planius beneuolo lectori constaret, sequentibus paucis eum commonendum esse putavi. Primum euacuationes Chirurgicas ut arteriotomiam, venæ sectionem, scarificationem, hirudinum applicationem, setaceorum, fonticulorum, vesicatoriorum usum &c. quoniam in tabulis meis Chirurgicis iam satis fuse & dilucide pertractatæ sunt, de industria hic omisi, ne opusculum superuacaneo



can eo labore auctum existimaretur. Deinde cum therapia generalis amplissimum illum materiæ medicæ apparatus proponere ac recensere debeat; non alienum ab hoc loco videbatur, de eo quædam differere; tum ut illis, qui nomina, classes & virtutes remediorum in vnum compendium redacta conspiciere auebant, gratificarer, tum ut ipse in posterum eo labore, figillatim obeundo, possem supersedere. Inde ergo exstiterunt notæ cuiusvis tabulæ observationibus insertæ, quibus plurima naturæ & artis præsidia medica, (omnia enim percurrere nimis longum erat) probatissimorum auctorum ductum & meam experientiam secutus, breuiter explicanda & partim commendanda suscepi. In quibus nemo mirabitur, me a vulgari celebrandi more abstinuisse, multasque



in varia pharmaca congestas affatim laudes reseculisse, cum fere nusquam alibi maior credulitas, vanitas & superstitio, quam in tralaticiis medicæ huius supellectilis commendationibus appareant. Equidem non inficior præclaras dotes compluribus rebus diuina benignitate ingenitas esse, vti passim ipse commonstrauit; sed permultæ adhuc plane ignotæ sunt, aut paucissimis solum perspectæ habentur; quæ donec apertius in lucem prolata firmis documentis stabiliantur, licebit interea defectum & ambiguitatem ostendere atque a temeraria quorundam tentaminum imitatione audaciores dehortari. Quod dum facio & notissimas simul herbarum aliorumque concretorum vires excutere annitor, vehementer opto, vt materia medica densis adhuc magna ex parte tenebris circum-



cumfusa in plurimorum salutem luculentior in dies euadat, valde gauisurus, si quis ea, quæ a me aliisque in dubium vocata aut reiecta sint, in certiores vsum communem traducere docuerit. Sed satis de hoc. Si vero quis rationem desideret, cur certæ classi quædam herbæ aut radices attributæ sint, quas pro palmaria facultate æquius fuisset in aliam collocari; ille, quæso, dissensum medicorum & magnam sæpe rei obscuritatem meditetur, ac, si velit, meam de ea sententiam in observationibus tabulæ subiectis legat, vbi si forte dubia illa herba haud recensita occurrat, eadem alibi sufficientis, quem adieci, indicis ope poterit euolui. Cæterum formulas cuiusvis tabulæ adnectere superfluum erat, cum earum conspectum iam superiore anno ediderim, commodæ appendicis  
instar



instar huic opusculo , si placeat , infer-  
 viturum. Stili autem disparitas, quam  
 amici mei opera passim induxit atque e-  
 mendare temporis angustia vetuit , ne-  
 minem offendet , qui solidiorum rerum  
 ad medicinam pertinentium studio du-  
 citur, atque in his tradendis non verbo-  
 rum elegantiam nec vbique Tulliana-  
 rum phrasium æqualitatem, sed diligen-  
 tiam & perspicuum ordinem requirit.  
 Quæ vltima cum nouerim me , quo-  
 ad eius fieri potuit, obseruasse , a so-  
 la dictione non minuetur exspe-  
 ctatum compendii emolu-  
 mentum.





TABVLA I.  
DE  
**THERAPIA GENERALI**  
**GENERATIM.**

**I. DEFINITIO.**

Therapia generalis est pars medicinæ practicæ, quæ fontes aperit generaliores ad corpus sanum conseruandum, & læsum restituendum, per remedia selecta atque probata, conueniente methodo & regimine propinanda.

**II. DIFFERENTIA.**

1. Therapie seu praxis generalis respicit vel *conseruationem sanitatis*, quæ *hygieine* vocatur, vel *curationem* ipsorum *morborum*.
2. In hoc negotio tria præcipue momenta consideramus, quorum primum *indicans*, alterum *indicatio*, & tertium *indicatum* adpellatur.
3. *Indicans* designat morbum eiusque fundamentum ætiologicum, seu causam, contra quam agendum est.
4. *Indicatio* docet modum & regulas ad auxilium tale inueniendum, quo morbus possit expugnari.
5. *Indicatum* denotat ipsum remedium & consilium, per quod finis ille salutaris obtineri debet.

**III. MODVS OPERANDI MEDICAMENTOR. GENERATIM.**

1. Operationem medicamentorum ab ipsa natura gubernari,



ri, innumeræ confirmant obseruationes. Licet enim non negemus, subesse interdum actioni eorum aliquid mechanici, a naturæ arbitrio non dependentis, tanti tamen hoc non est habendum, vt operandi modus illi maxime adscribi mereatur. A potiori enim fit denominatio, & natura vtitur remedio ad finem suum. Vnde non raro contingit, vt remedium quoddam longe alius effectus excipiat, quam quem physica medicamento indoles ordinarie producit, e. g. vt stomachica purgent, digestiua emesin ciant, immo anodyna & sopientia excitare & commouere videantur.

2. Sunt quidem plurimi, qui ex regulis mechanicis & morbi symptomata & medicamentorum operationem deriuant, atque in hunc finem in quolibet morbo supponunt materiam variæ (sed tamen propriè incognitæ) figuræ, siue hamatæ, siue serpentinæ, siue cuiuscumque alius, ad eius modi operationes idoneæ; sed quem ad modum illa morbifera materia non nisi in magna abundantia adesse conici potest, præcipue in morbis omnes corporis partes infestantibus, e. g. spasticis, conuulsivis; ita magna profecto copia secundum talem hypothesein remedia essent propinanda, cui tamen rei ipsa praxi sua contrarium faciunt. Certe si medicamentum efficaciam suam edere deberet vi particularum suarum, quarum figuræ exacte oppositæ essent figuris materiæ morbiferæ, tanta sane portione porrigenda essent, vt quæuis particula morbifera oppositam particulam medicamenti obtundentis inueniret. Sed quis non videt vanas speculationes? hac enim ratione non guttulæ, sed vnciæ & libræ, non grana, non scrupuli, sed pondera propinanda forent.

3. Infiniti sane labores, scrupuli & anxietates Medicum premerent, si ex legibus mechanicis curationem exacte suscipere & dimetiri in animum induceret. Non tantum enim de figura, sed & de numero eius modi particularum certus esse deberet, vt dosin medicamenti æqua proportionè adhibere posset. Hariolari deberet, quot

par-



particulæ vnius cuiusque medicamenti in primis viis retinerentur, & cum aluinis excretionibus eiicerentur, vt portionem illam, quæ periret, atque humores non intraret, refarcire posset. Si enim quid deficeret, effectus optatus non sequeretur. Contra si quid nimii propinaret, tunc vi earundem regularum mechanicarum nouum corpori damnum inferret.

4. Sola *opii* efficacia has speculationes satis superque refutare potest. Vnicum enim illius granum, dextre adhibitum, dolores omnes, licet totum corpus occupent, ad tempus solet sedare, licet nulla proportio sit huius particulæ cum multis illis materiis per totum corpus dispersis. Item pauca grana *croci martis adstringentis* hæmoptysin sedant ante, quam humores ingressa sint. Vbi incredibile est & omnem plane captum superat, pauca illa grana, multis humorum libris immixta, retinere posse vim quamdam, qua tam longe lateque mechanice solum operentur. Nec fieri potest, vt exilissima illa portio, quæ cum vna tantum parte comunicatur, efficacia quadam physica omnes totius partis fibras ita adficiat, vt earum omnium vel contractio vel relaxatio subsequatur. Adstringentium enim vim perire, si particulæ dispergantur & diluantur, notissimum est.

5. Præter ea hunc mechanicum operandi modum non mediocriter refutat *effectus*. Quod si enim hæc hypothesi vera & indubia foret, vtique curatio morborum spem nostram nunquam frustraretur, & tam certa stabilisque esse deberet, quam certissimum est, pistorem ex farina & reliquis panem præparare. Sed quid ad hæc experientia? alia omnia loquitur & errorem satis refellit.

6. Si necessitate physica seu mechanica operatio absolueretur, *unum eundemque* semper effectum præstarent. Sed quis nescit alium immo contrarium, e. g. emetica non numquam catharsin & vice versa edere, adstringentia non numquam hæmorrhagias augere; Opium in adfuetis alacritatem proferre, licet maiori a Turcis copia adsumatur, neglecto autem vsu illius torporem accedere.



7. Medicamenta sæpe effectum præstant, licet corporis machinam non attingant, e. g. sunt, qui vomunt, quando vomitorium vel pilulas vident, immo de iis tantum audiunt. Huc pertinet etiam *sympatheticorum* effectus, quorum nonnulla corpus plane non attingunt, & tamen virtutem suam in corpora longissime remota extendunt, quamquam æger aliquot milliaria a Medico seiunctus sit, si modo vrinam vel sanguinem mittat & regimen tempore denominato seruet. Effluuiorum figuratæ particulæ, quas corpus ægrotantis repetere vulgo fingunt, in longo hoc itinere absorbentur & immutantur, vel indiuiduum illud prætereunt, atque aliud ingrediuntur. Quæ enim copia effluuiorum requiretur, vt atmosphæram per aliquot milliaria implerent, & ad ægri corpus pertingerent? ad minimum longe superarent pondere totam massam, ex qua exspirarunt.

8. Itaque statuimus, medicamina *præcipue* operari *excitando sensum vitalem*, vnde natura vel refocillatur, seu roboratur, vel sopitur, vel ad certum motum inuitatur; id quod non tantum de medicamentis intra corpus adsumtis, sed & de sympatheticis & amuletis valet. Quod enim sensus rerum absentium etiam adficiat hominem, per vulgus notum est. Huc pertinet sensus ille anxietatis & compressionis cordis, quando consanguineus quidam in disito quodam loco ægrotat, vel aliud infortunium subit, vel mortuus est. In sympathia particula quædam sanguinis vel vrinæ a remedio tangitur & adficitur. Ex hoc contactu vtrarumque materiarum sensus quidam in ægrotum redundat, & natura motus huic sensui consentaneos instituit. Hinc quo sensibiliores ægroti, eo felicius succedit sympathetica medela.

9. Vbi autem omnino medicamina mechanice operari videntur, ibi naturæ synergia constanter adiungitur. Motus enim ille, qui a medicamento in ipsa humorum crassi perficitur, est tantum intestinus, & hic quidem a remedio dependet, sed curationem haud absoluit, nisi natura superaddat motum tonico-progressiuum. Porro  
vide.



videmus, stimulum medicamento esse inefficacem, immo ne venena quidem amplius singulares motus inferre ad-  
suetis, & sic in arbitrio animæ quodam modo positum  
est, an stimulo obedire velit, nec ne. Quid notius  
quam emetica, cathartica, sudorifera effectu sæpius  
nullo propinari? Non numquam natura stimulans re-  
medium suscipit, motum etiam instituit, sed in alium  
locum, quam Medicus respicit, transfert. Vnde e.g.  
mensures per insolitas vias non raro erumpunt.

10. Ergo operantur primario sensum naturæ vitalem adfici-  
endo. Non numquam *mixta* operatio observatur, ita  
ut partim a motibus naturæ actiuis dependeat, partim  
a motibus in crasi humorum per medicamentum exci-  
tatis, id autem quod natura in hac mixtura contribuit,  
præcipuum est, & sanitatis restitutio speranda a motibus  
naturæ per indirectum a medicamenti excitatis, non  
æque ab iis, qui directe in humoribus efficiuntur.

#### IV. METHODVS MEDENDI GENERALIS.

Quem ad modum tres præcipue causæ sunt morborum,  
videlicet *quantitas, qualitas & motus*: ita therapia  
generalis tres commendat methodos, nempe *euacu-  
antem, alterantem & moderantem*.

- I. *Methodus euacuans* quantitati imminuendæ destinatur,  
estque

- 1) vel *chirurgica*, ad quam spectant

a) Arteriotomia.

b) Venæ sectio.

c) Scarificatio.

d) Hirudinum

e) Fonticulorum

f) Vesicatoriorum

g) Setaceorum

h) Trepanatio.

- i) Paracentesis & quæcumque aliæ operationes eua-  
cuantes, de quibus in *tabulis chirurgicis* expo-  
suimus.



2) vel *pharmaceutica*, ad quam pertinent

- a) Emesis.
- b) Catharsis.
- c) Diaphoresis.
- d) Diuresis.
- e) Apophlegmatismus per nares.
- f) Apophlegmatismus per os.
- g) Saliuatio.
- h) Expectoratio.
- i) Promotio hæmorrhagiarum naturalium.

2. *Methodus alterans*, indicitur a vitiosa qualitate. Huc pertinent

- 1) *Incrassatio* humorum nimis fluidorum.
- 2) *Resolutio* humorum nimis spissorum.
- 3) *Correctio* humorum peregrinorum prauitate peccantium.
- 4) *Adstrictio* partium nimis laxarum.
- 5) *Relaxatio* partium nimium strictarum.

3. *Methodus moderans*, motuum vitiiis medetur, & completur

- 1) Vel motuum *excitationem*, quando deficiunt.
- 2) Vel eorum *placationem*, quando iusto vehementiores sunt.
- 3) His subiungimus curationem per *specificas*: licet enim hæc curatio ad priora medicationum genera etiam quodam modo possit referri, ad motus tamen corrigendos potissimum accommodata videtur.

4. Notandum autem est quam maxime, Medicum morbos non profligare, sed tamquam ministrum manus quasi obstetricantes solum admouere. Natura autem præses est motuum vitalium, & energia sua, contra morbos luctante, Medico synergo, tamquam certissimus hodegus viam commonstrat.

5. Itaque palmarium therapie fundamentum in hac naturæ autocratia collocandum est. Hæc enim corpus, vtut sanum, quotidie purgat a sordibus illis, quæ in illo partim generantur, partim aliunde in ipsum introducuntur.

6. Hæc



6. Hæc corporis sani therapia, quam STAHLIVS peculiari differtatione enucleavit, respicit

- 1) vel *quantitatem*, quam natura per varias hæmorrhagiarum vel aliarum fluxionum species imminuere adlaborat.
- 2) vel *qualitatem* vitiosam, quam a laudabilibus humoribus per apta organa separat & conueniente loco excernit.
- 3) Atque hæc omnia præstat per motum tonicum & progressuum. Hæc enim ratione humores, ad spissitudinem pronos, conseruat fluidos, & quoduis noxium e corpore proscribit; in partibus autem solidis inquinamenta mucida, quæ transitus humorum relinquit, hoc perpetuo adpulsu abstergit, ne obstructions exoriantur. Denique defectum per nouam adpositionem, quam nutritionem vocamus, compensat.

7. Eadem methodo natura corpus *læsum* restaurat; & quem ad modum in statu ordinario ordinariis motibus vtitur; ita in statu extraordinario hi motus, ob præceptum discrimen vel damnum, in extraordinarium gradum intenduntur.

8. Licet autem autocratia naturæ plurimis morbis superandis par sit, optatus tamen effectus innumeris fere difficultatibus premitur. Atque inter has eminent præcipue sequentes:

- 1) Corruptio illa, quæ per lapsum introducta est, & non tantum in morales, sed & vitales actiones late diffusa vbique se conspiciendam præbet. Ex hoc enim fonte fluunt tam *malitia* quam *ignorantia*, atque hæc in pathemata animi grauissima, modo iracundiam, modo terrorem, modo timorem, modo tristitiam &c, erumpunt, quæ motus vitales non possunt non misere confundere.
- 2) Individualis temperamenti teneritudo, sensibilitas & impatientia, quæ efficiunt, vt ægroti incommoda sua morbosa decente modo perferre recusent. Quibus



bus accedit multorum peruersa educatio, indulgentia & prauis exemplis corrupta, inbibitorum errorum tenacissima & leuissimæ molestiæ prorsus intolerans.

- 3) Motus erronei in consuetudinem & habitum deducti.
  - 4) Præposteræ medicationes & vitia diætæ.
  - 5) Tacemus impedimenta, quæ ex ipsius corporis parte obicem ponunt. Vnde non mirandum, si natura finem salutarem non semper adsequatur.
9. Ex hac consideratione indiget adistente ministro, cuius primaria requisita & officia sequentibus exhibemus:
- 1) Cognitionem corporis & vitæ naturalis sufficientem sibi adquirat.
  - 2) Præcipue autem ex motibus probe obseruet & dignoscatur operationem & intentionem ipsius naturæ. Doctrina enim de motibus lux quasi & anima est cognitionis medicæ.
  - 3) Scopum intentioni naturæ congruentem sibi præfigat, & si tuto fieri potest, eadem organa, easdem vias & eadem tempora, quæ a natura indicantur, eligat.
  - 4) Quoniam autem post lapsum proprium est animæ nostræ, vt motus suos nimium vel intendat vel remittat, meminerit Medicus, motuum horum errantium medicinam præcipuum caput praxeos absolueret; de qua re mox, vbi de symptomatibus dicendum erit, plura commendabimus.
  - 5) Fontem & scaturiginem morbi magis quam symptomata respiciat, & hac ratione curationem solidam præferat superficialiæ.
  - 6) Materiæ peccantis indolem hunc in finem probe consideret.
  - 7) Euacuatio materiæ peccantis quoniam scopo medico proxime respondet, artifex hanc primario respiciat. Vt autem eo facilius & commodius hæc excretio succedat, præparationem materiæ non numquam præmittendam esse meminerit, secundum aureum Hippocra-



*pocratis aphorismum 22. sect. 1. Concocta expurgare decet, non cruda, nisi quidem turgeant; raro autem turgent.*

- 8) Quantumcumque autem præparata & correcta fuerit materia peccans, illam nihilo minus euacuandam esse, firmissime credat. In gratiam enim cum humoribus laudabilibus tantum abest ut redeat, ut potius impuritates augeat, & salutarium excretionum cursum interpellet.
- 9) Remota materia peccante, motus nisi sponte cessent, prudente ratione sistat. Vbi autem non satis certus est artifex, omnem materiam peccantem esse sublatam, tum præstat correctionem materiæ sulphureo-acris, motus irritantis, respicere, vel specificè sopientia adhibere, quam adstringentibus aut sensum obnubilantibus vias occludere & excretionem impedire.
- 10) Symptomata *actiua*, quæ morbo a natura opponuntur, prudentissime æstimet, & a symptomatibus *passiuis*, a materiali noxa dependentibus, sollicitè distinguat.
- 11) Præter ea symptomata *actiua essentialia* ab *accidentalibus* quauis occasione discernat, & illa, tamquam necessaria, vel promoueat (si quidem deficient) vel (si excedant) prudentissime mitiget, aut, quam diu fieri potest, toleret; hæc autem, si vtilia sint, promoueat, noxia remoueat, superflua vel prudenter resecet, vel toleret. Præstat enim aliquid superflui, utut molesti, tolerare, quam naturam turbare, & ipsius motus absolute suppressere.
- 12) Vbique autem rationem habeat temperamenti, sexus ætatis, educationis, sensibilitatis individualis & consuetudinis. Hæc enim quid valeant, & qua ratione rerum scenam turbent, sub *cautelis* fusius explicabimus.
- 13) Extra necessitatis casum ab omni *violencia* & *curis heroicis* abstineat; moderata enim durant, & natura non cogi nec irritari, sed amice inuitari & blande demul-



ceri amat. Atque hoc obtinetur per remedia blanda & sensui naturæ iucunda. Eius modi gratus sensus non raro efficit, ut turbata & aberrans natura mox in ordinem redeat, & primæ doses medicamenti optatissimum sæpius effectum ostendant.

- 14) Contra non ita facilis sit ad curationes pacificas seu sedationes motuum adhibendas. Vnde talia remedia non propinet, quæ vel directe vel indirecte motus secretorios & excretorios turbent, e.g. adstringentia, opiata. Non minus & illa, quæ dubii sunt effectus, excludat.
- 15) Quod ad remedia attinet selectum, eumque curtum, multitudini præferat: simplices enim effectus multum impediuntur per diffusas compositiones; id quod STAHLIUS in *dissertatione de multitudinis remedium abusu* fusius docuit. Quod autem multa remedia in hoc tractatu indicauerimus, id non eo factum est, quasi illa omnia in usum recipienda existimarem, sed, ut hoc compendium paullo perfectius & materia medica sat multis & perspicuis notis illustrata prodiret.
- 16) Quod ad proportionem quantitatis medicamentorum attinet, meminerit artifex,
  - a) ingentem materiæ corrigendæ portionem sufficientem remedii usum postulare: pauca enim grana facilis digestiui non incidunt magnam visceri, mucis portionem.
  - b) Alterationem autem motuum parcioribus medicamentis obtineri: pauca enim grana tartari emetici motus intendere & pauca grana remedii opii eosdem mitigare possunt.
  - c) Doses paruas & repetitas copiosis & nauseosis esse præferendas.
  - d) Remedia non facile esse mutanda, sed iusta methodo continuanda.
- 17) Diætam, cuius morbo conuenientem, præscribat, & præcipue in acutis moneat,

a) ut



- a) vt in locum quietum reponatur ægrotus.
  - b) Ad cibum sumendum non cogatur.
  - c) Potus sufficiens & dilutus ei porrigatur.
  - d) Regimen nimis calidum excludatur.
  - e) Animus tranquillus reddatur & conferuetur. In hunc finem reconciliationem cum Deo, tamquam verum tranquillitatis fundamentum, commendet: fiducia enim, quæ ex hoc fonte fluit, magnæ virtutis est; contra memoria & conscientia male ætorum motus vitales insigniter turbat.
- 18) Altissimi præsidium in omnibus morbis, vtut exiguis re vera veneretur: sine huius enim verbo benediciente neque panis vitam naturalem sustentat, neque herba aut emplastrum morbos persanat. Quod si vero signa, quæ periculum minitantur, omnino appareant, ab his ne deterreatur, sed in Deum exitum morbi quietus deuoluat.

## V. CAUTELAE ET OBSERVATIONES PRACTICAE.

1. Quoniam artifex in corpus viuum absolutam non habet potestatem, exceptis paucioribus, iisque externis & chirurgicis adfectibus, sed tantum *συνεργός* & minister naturæ habendus est, firmissime credat ille, princeps therapeuticæ sapientiæ momentum in eo consistere, vt non tantum energiam magistri atque illius vires, motus & intentiones perspiciat, sed & imbecillitates & errores ipsius dignoscat, quo symptomata noxia a salutari- bus, de quibus sub methodo diximus, discernere possit. Confer STAHLII dissertat. *de potestate artis medicæ*, & altera *de necessitate artis medicæ*.
2. Autocratiam naturæ antiquorum multi, iique principes Medici professi sunt, e. g. HIPPOCRATES: *multi curantur sine Medico*. Item CELSVS: *magni morbi curantur abstinentia & quiete*. Vnde dolendum est, hanc artis cynosuram a recentiorum plerisque præter videri. Quædamna in praxin medicam exinde redundauerint, restaurator antiquæ huius veritatis STAHLIVS



passim indicauit. *Confer dissertat. illius de autocratia naturæ.*

3. Hæc simplex veritas quod homo suum habeat Medicum, quod natura sit morborum medicatrix, quod sibi sufficiat, conuenienter agat atque congruas plerumque vias eligat, plus fane valet & in curandis morbis plus spei alit, quam splendidissimus artis nostræ adparatus.
4. Non fluere autem hanc spontaneam morborum curationem ex necessitate corporis organici, superius, vbi de *modo operandi* diximus, iam demonstratum est. Rationi enim repugnat, quod corpus læsum se ipsum redintegrare possit.
5. Dari autem casus, in quibus natura artificis ope indigeat, superius sub *methodo* iam inculcauimus. Restat, vt hoc loco errores naturæ speciatim indicemus.
  - 1) Errat si vel nimis præcipitanter, vel nimis languide agit, & ita peccat contra *ἐναρξίαν* seu iustam temporis mensuram, de quare innumeri casus in praxi medica occurrunt.
  - 2) Errat euacuationis specie, e. g. si materiam peccantem per periculosas vias eliminare suscipit.
  - 3) Errat, si proposito suo pertinacius insistit, cum successus respondere nequit; id quod in adfectibus arthriticis obseruamus.
  - 4) Errat, si per leues excitationes in extremos motus euagatur.
6. Hos & plures alios errores committit natura: vnde ministerii medici partes sunt prudente ratione eos corrigere, ne motus vel in libertate sua euagandi relinquantur, vel cum impetu supprimantur.
7. Artifex quando omnes officii sui partes, quas sub *methodo* recensuimus, expleuit, indubium effectum nequaquam sibi promittat. Experientia enim affatim illum docebit, prosperum effectum neque a medicamentorum physico-mechanica necessitate, neque a Medici dexteritate, sed ab altiori potentia pendere.

8. Tem-



8. Tempus medendi seu *ἐνταγλα* non infimam in ministerio therapeutico meretur considerationem. Omnes enim actus vitales tam ordinarii quam extraordinarii certa temporum periodo absoluntur. Exinde opportunitas cum natura agendi addiscenda est, ita ut vel laboriosos & erroneos motus præueniamus, vel salutares & æquales actus subleuemus.
9. Huc spectant tempora, ab HIPPOCRATE inculcata, nempe *initii, incrementi, status & declinationis*, quæ, licet a multis risu excipiantur, prudentem tamen imitationem & adplicationem exposcunt, præcipue in febribus & inflammationibus.
10. Huc pertinent tempora *critica*, quæ sane studiosissime sunt obseruanda, ne contra illorum cursum, qui plerumque laboriosus est, quidquam aduersi suscipiamus, sed declinationes criticas in motibus euacuatoriis promovendis expectemus.
11. Huc etiam referendæ *horæ* paroxysmorum, quæ sane probe obseruandæ sunt, ut Medicus tum cum natura operetur, & cum illa materiam præparet, excretionem autem, cui in primo actu secretorio locus non est, ad tempus remissionis, quo natura ad lenes excretionem inclinatur, referuet.
12. Præcipue autem huc spectat curatio *per expectationem* in acutis morbis. Hi enim periodis suis specialibus ita includuntur, ut nullis specificis interrumpi nedum aberrari possint. Diese Tage können durch die Kunst nicht verkürzt, wol aber erleichtert werden. Sane si ægrotans hoc consideraret, a Medico non posceret id, quod non est in eius potestate.
13. Ad *ἐνταγλα* therapeutica referendæ etiam sunt morbi *chronici*, qui certis periodis recurrunt, e.g. hæmorrhagiæ, spasmi, febres intermittentes &c. hi enim recursus prudente artis ministerio plerumque tum possunt præoccupari.
14. Culpandus etiam hic venit error ille crassissimus, qui contra *ἐνταγλα* committitur in acutis, quando curationibus



bus suis *heroicis ὕστερον* faciunt *πρώτερον*, & mox sub initium morbi antequam præparatio & secretio facta sit, euacuationem, & quidem satis immodestam moliuntur. Hac enim ratione natura turbatur & eneruatur, ut deinde impar sit excretioni, quæ iusto tempore tentanda esset.

15. Moris quidem est, ut eiusmodi Medicus, qui impetuosius talia tentamina declinat, *otiosus spectator* salutetur, præstat autem hanc contumeliam æquo animo ferre, quam in devia abripi & officio suo deesse.
16. *Cunctatio* (festinationis, oppositum) etiam euitanda est: hæc enim, secundum HIPPOCRATEM, vix alibi maiora damna potest inferre, quam quidem in arte medica. Hinc necesse est, ut timiditas, multo magis autem negligentia excludatur, ne sero medicina paretur, e. g. quando habitus corporis athleticus tractandus occurrat, tum *ἐὐναρσία* postulat, quantitatem sanguinis, siue per venæ sectionem, siue per aliam ventilationem mature imminuere, ne ipsa natura scenam suam motibus auctis aperiat & negotium difficilius reddat.
17. Denique ad *ἐὐναρσίαν* therapeuticam etiam pertinet ipsa adeo *abstinentia*, de qua sequentia notanda veniunt:
  - 1) Corpori sano medicamina prophylactica adplicare, non promiscue suadendum est, ne lassæ fiat natura & confundatur. Vbi autem natura certis medicationibus iam adsueta est, hæ non facile sunt negligendæ, ne dicam abrupte rescindendæ.
  - 2) Idem sentiendum est, cum in ipsis morbis motus vitales *vegete & ordinate* succedunt; certe sponte currenti calcar adiicere non conuenit. Alias placidæ excretionibus turbantur, materia peccans massæ sanguineæ intimius implicatur, exanthemata præcipue facile recedunt, & si luctæ tandem criticæ imminuant, natura deficitur viribus ad plenariam despumationem.
  - 3) Vana est medicatio in casibus *conclamatis, determinatis, radicatis, scirrhosis & ulceratis*. Quando enim



in his multa tentamus, status tranquillior in hecticas commotiones facile exasperatur. Huc etiam pertinent calculus, morbi hæreditarii & periodici, qui remediis acrioribus magis confirmantur quam extirpantur.

- 4) Morbi per alios *corrupti* quando offeruntur, Medicus vel abstineat, vel sincera prognosi se præmuniat.
- 5) Abstinendum etiam est a tentaminibus ambiguis, multo magis *sinistris*.
- 6) Abstinendum porro a *multitudine* & in speciem magnifico adparatu remediorum; quidquid & ægroti & adstantes vrgeant, immo quidquid etiam metus, ne in voculas imperitorum hominum incurramus, suadere & hortari videatur.
- 7) Inuigilet quam maxime in ægri etiam & adstantium abstinentiam, ne clanculum alia remedia interponant vel substituant plane; quod tamen difficillimum in praxi est negotium; cum si vsquam alibi, certe in medica arte *ἀλλοτριεπισκοπία* tam frequenter quam perniciose exercetur.
18. *Consuetudo* vti altera est natura & non raro morbos a causis materialibus liberos sustentat; ita quam maxime considerandum est, illam non a physica, eaque incognita corporis qualitate, neque ab æternis motuum legibus, sed a principio vitali dependere. Consistit enim in peculiari prompta naturæ habilitate, quæ certa æstimatione & rationali intentione subnititur. Præter ea inuoluit simul *memoriam* (liceat ita loqui) *vitalem*, vnde natura, memor eorum, quæ alio tempore facta sunt, ad repetitionem talium motuum non solum inclinat, sed & promptam ad eosdem ostendit agilitatem.
19. Quem ad modum autem non facile sanus quisquam reperietur, qui a consuetudinibus prorsus immunis est, ita præcipue valetudinarii & molliter educati hoc onus perferunt. Vnde necesse est, vt Medicus, si ægrotans ei offeratur, consuetudinum rationem habeat, & noxias prudente ratione extirpandas curet.

20. Quid



20. Quid autem consuetudo possit, quantumque valeat ad motus inuertendos & morbos confirmandos; innumera exempla docent. E.g. quando quis dietam duram & crassam, cui a teneris adsuevit, in tenuem & mollem permutat, tum (quod paradoxon est dieteticum) in debilitatem ventriculi & febres intermittentes facile incurrit, restituitur autem quam primum durioribus cibis denuo vescitur. Item quæ damna neglectio hæmorrhagiarum adfuetarum inferat, per vulgus notum est. Incidunt enim in congestiones, febres, adfectus rheumatico arthriticos, inflammationes &c.

21. Superari autem debent consuetudines noxiæ sequente ordine

- 1) Materialis causa, quæ occasionem dedit, præcipue plethora, remoueatur.
- 2) Deinde motus non vi quadam, neque repente, sed sensim & per vices modesta coërcitione & specificorum remediorum adplicatione patienter oppugnentur.
- 3) Simul autem motus ad alias corporis partes placide avocentur & excretiones debitæ vbique promoueantur.
- 4) Quando autem subiectum robustum & adfectus non adeo fonticus est, tum quacumque repugnantia tollatur. Sic e.g. orexin caninam curauimus, cum eum, qui hoc malo diu laborarat, a comestione panis vehementer adpetiti vi quadam retineremus & aliquoties exinde in deliquium animi incidere pateremur. Quod postquam per vnius diei spatium pertulerat, paulatim sequentibus eo deductus est, ut redeuntem adpetitum inordinatum firmo animi proposito ipsemet sine vllis incommodis refrenare posset.

22. *Temperamenti*, ætatis & sexus rationem habendam esse sub *methodo* diximus; & hoc plus veritatis alit, quam particularum figuræ. e.g. essentiæ alexipharmacæ excitant ægrotos melancholicos, cholericos autem in furorem agunt. Scorbutici cholericos non tolerant acris illa



la antiscorbutica, quæ salutaria sunt melancholico sanguineis. Congestiones sanguinis versus caput, quæ hæmorrhagiam narium respiciunt, aliter tractandæ sunt in adultis quam in iunioribus, in illis enim hæmorrhoides respici debent, in his autem huic respectui non est locus. Et quis ignorat in sexu feminino negotium mensium, gestationis, partus & puerperii multas considerationes sibi vindicare, quibus omnibus in virili sexu supersedere possumus.

23. Præ omnibus autem *sensibilitas* individualis in praxi medica multum iuris & considerationis sibi tribuit, & non solum morbos ex friuolis causis profert, sed & eosdem mirifice sustentat. Dabimus aliquot huius rei specimina, satis luculenta & consideratione dignissima.

1) Matrona quædam illustris fluorem album, qua soror eius amantissima laborabat, tanta nausea auersabatur, ut prædiceret sibi eundem morbum, quam primum sororem visura esset. Quumque post aliquot dies fama audiretur, sororem iam esse in itinere ad se inuisendam, animo insigniter commouebatur, & in fluorem album prius incurrebat, quam soror domum ipsius intraret.

2) Illustrissima quædam persona vomitu corripiebatur quam primum pilulas nominari audiret, multo magis, quum easdem videret. Erat autem pathematibus hysterico-cephalalgicis non mediocriter obnoxia, quumque Medicus spem faceret liberationis ab hoc malo per usum quarundam pilularum; multis tentaminibus, sed multis etiam reiectionibus eo res peruenit, ut tandem pilulas retineret, & singulis dehinc annis libram circiter integram cum insigni usu lætabunda consumeret.

3) Illustrissimæ duæ sorores mortem duorum fratrum ingenti tristitia lugebant, & multis deinde annis vomitu corripiebantur, quotiescumque & in quo loco cantilenas illas audiebant, quæ die sepulturæ cantatæ erant. Hæc scena tanto magis ridicula videbatur,

C

quod



quod vnaquæque ab illa tantum cantilena ad vomitum excitabatur, quæ sub sepultura illius fratris cantata fuerat, quem præ altero dilexerat.

- 4) Alia illustriss. matrona vomebat, quotiescumque fratris sui filiæ, vtut serico indutæ, lecto illius infidebant.
  - 5) Alia quædam mediocris conditionis, 42. annor., mane solebat post potum thee quatuor cochlearia iusculi, posthæc aliquot bolos panis bis cocti & tandem paullulum cereuiciæ adsumere. Atque hanc consuetudinem si exacte custodiret satis bene se habere videbatur. Vbi autem horum quidquam vel deerat vel paullo ferius adferebatur, præceps in lipothymiam ruebat.
  - 6) Nobilis quidam iuuenis, toties vel animo labitur vel conuulsionibus adfligitur, quoties, prius quam consuetam modicam vini portionem (duo vitra) sumserit, cum aliis hominibus colloqui & versari sustinet.
  - 7) Quumque ante aliquot dies litterato cuidam dixissem, adspectum faciei pallidum indicio esse, ipsum mox scholam medicam frequentaturum, ille post paucas horas in museum suum se abscondens, protinusque deliriis furiosis correptus reliquis domesticis gladio suo mortem minabatur. Altero die post in febrem intermittentem delapsus est, quæ in tertianam satis ordinate adhuc durantem transiit.
24. Hæc satis docent, quantum valeat sensibilitas, & quam prouide eiusmodi homines tractandi sint in ipsis morbis. In his enim sensibilitas & attentio naturæ longe maior est, quam in statu sano ob imminens vel præsens periculum. Vnde tanto maiore circumspectione utatur Medicus, ne per remedia incongruentia naturam in nouos labores & angustias coniiciat, sensum molestum inducendo & motus inconuenientes excitando atque ita oleum flammæ adfundendo. Certe enim natura motus illos, quos Medicus externus per remedia sua excitat, probe examinat, atque ad archetypum motuum



tuum connatorum & a Creatore suo concessorum refert.

25. Et quem ad modum per remedia commoda non exiguum leuamen naturæ adfertur, excitando sensum acceptum & iucundum, ita curationes ineptæ maximum damnum inferunt. Ad prauos enim motus sensibilem naturam auertunt, vt contra vim illatam renitatur. Immo ipsæ formulæ paullulum incongruæ non numquam graues molestias pariunt ob sensibilitatem. Quod si enim formula naturæ aduersa obtrudatur, phænomena quædam interdum, ac si venenum oblatum esset, accidunt. Sic e. g. dulcia his, amara illis sunt aduersa. Item ab absorbentibus terreis confestim ingestis ventriculus non nullorum grauatur: ob grauitatem enim subsident & vel non immutantur, vel in muciditatem abeunt, & variis ventriculi morbis alimentum suggerunt.

26. *Regimen* in morbis recte institutum, vti non minimam curationis partem absoluit, ita *nimis calidum*, siue per stragulorum molem, siue per hypocausti calorem, fecunda multorum malorum mater existit.

1) Humores enim nimium commouet, & motum intestinum intendit.

2) Hæc commotio materiam morbiferam auget. Nam materia peccans, e. g. in acutis malignis, nisi per contagium cum humoribus communicata fuerit, nil aliud est, quam excrementum quoddam ordinarium motu humorum acri intestino ad extraordinariam subtilitatem euectum.

3) Sub hac orgastica humorum expansione pori ita contrahuntur, vt æstus quidem ingens, transpiratio autem nulla contingat.

4) Et tum materia peccans, licet multo cum labore ad superficiem trudatur, exitum non inuenit. Vnde natura turbata & indignabunda illam ad interiores partes cum tædio reuocat, id quod vel hæmorrhagiis pe-



riculosis, vel diarrhœis, vel vomitibus, vel aliis malis introducendis par est.

- 5) Quando autem hæmorrhagiæ non sequuntur, tum molimina illa incompleta per materiæ malignitatem & acredinem varias irritationes & inflammationes immo graues & funestas sæpe læsiones producant.
  - 6) Quod si vero ad partes externas hæc materia excernenda protrudatur, adfectus erysipelacei in carnosis, in glandulosis autem partibus tumores molestissimi & contumaces producantur.
  - 7) Sudores per regimen calidum coacti sub morbi initium præmaturam quidem exanthematum eruptionem, sed & facilem illorum retrocessionem efficiunt, in statu autem & declinatione modum ita excedunt, ut ægroti superato licet morbo, vires non facile possint recuperare.
27. Contra *regimen nimis frigidum* etiam valde noxium est, e. g. quando potus frigidus porrigitur, lintheamina incaute mutantur, aër frigidus, dum lectum sternunt, corpori transpiranti admittitur, stragulum abiicitur, hypocaustum frigidum est &c. Hac enim ratione
- 1) excretiones salutare suppressuntur.
  - 2) Has compensare natura cogitur per noxias diarrhœas & vomitus.
  - 3) Hæmorrhagiæ vel exacerbantur vel suppressuntur.
28. *Potus* quando ægrotis denegatur ab iis, qui sitim pro symptomate noxio habent, multum impeditenti naturæ obiicitur. Quem admodum enim humiditas in statu naturali est instrumentum necessarium, quo natura in omnibus fere operationibus suis indiget; ita in statu præternaturali, ob continuam transpirationem & crebriorem urinæ excretionem, plurimum humidi consumitur, cuius proinde defectum natura iusto desiderio compensare adlaborat. Itaque e vanis speculationibus proficiscitur inconsultum illud tentamen, naturam sitientem relinquere & necessario humoris subsidio, quo secretiones & excretiones facilius exsequi potest, defra-



defraudare, quippe cum & multiplicis ac quotidianæ experientiae suffragio potus conueniens temperatus & parvis identidem haustibus assumtus cupientem ægrum valde recreet & medicinæ velut analepticæ vices sustineat.

29. *Cibus* contra multo damno, renitente natura, obtrudi solet. Quum enim hæc in plurimis morbis digestionem vacare recuset, molesto sensu adficitur a cibis intrusis, & de illorum per proximam viam reiectione mox meditatur, id quod anxietates cardialgicæ, pressoriæ, vomibundæ satis confirmant. Quando autem cibi retinentur, cruditates multæ, quæ morbo detrimentum adferunt, generantur.
30. Denique ubi iam conualescere cœpit æger, monendus est, ne nimium securus omnem protinus medicamentorum usum commodique regiminis curam abiiciat, neque aut subeundis grauioribus cœli iniuriis aut voluptatibus, animique peruersis adfectibus indulgendo recidiuam sibi contrahat, vel saltem retardet perfectam pristini roboris integritatem.



## TABVLA II.

DE

## EMESI SEV VOMITV.

## I. DEFINITIO.

Emesis est vehementissima euacuationis species, qua natura materiam quamdam siue vere existentem, siue imaginariam e ventriculo, & non numquam simul e locis vicinis, per motum ventriculi spasticum inuersum, sursum eliminare intendit. Deriuatur ab ἐμέω, vomio.

## II. DIFFERENTIA.

## I. Vomitus est



- 1) vel *spontaneus*, per quem natura sponte sua aliquid ad-  
versus e corpore suo remouere conatur.
- 2) Vel *artificialis*, qui a Medico, naturæ ministro, per re-  
media emetica in eundem salutarem finem prouo-  
catur.
2. Materia, quæ per motum talem anotericum euacuatur,  
prouenit
  - 1) vel e *ventriculo solo*.
  - 2) Vel ex *intestino* simul *duodeno*; quo casu emesis grauior  
esse obseruatur.
  - 3) Vel in quibusdam casibus etiam e *pulmonibus*, dum hæ  
partes per commotionem eius modi constrictoriam  
simul in consensum trahuntur, & pulmones ab infar-  
ctu mucido liberantur.
  - 4) Eadem ratione vomitus adficit *uterum*, quando in mo-  
tibus ad partum deficientibus prouocatur.
3. Vomitus artificialis differt ratione *gradus*, prout vel per  
blandiora remedia, vel per fortiora drastica produci-  
tur.

### III. INDICANTIA.

Vomitus artificialis locum habet

1. in deprauatione *ventriculi recentiori*, e. g. quando cibi  
vel nimii, vel dyspepti, vel sub nausea, iracundia, au-  
ditate aut profunda meditatione adsumti sunt; præci-  
pue si cardialgia & nauseabunda pathemata mox succe-  
dant.
2. Huc etiam spectat, quando per cibos dyspeptos, e. g. pi-  
sces, cucumeres, melones, fungos, non ita pridem ad-  
sumtos, itemque globos illos farinaceos (*Klöße*) aut pla-  
centas pingues calidas subito & largius ingestas, mensi-  
um fluxus suppressus est.
3. Item quando febris acuta manifestæ ventriculi repletioni  
accedit; necesse autem est, vt tum in principio princi-  
pii vomitus, isque temperatissimus, prouocetur. *Conf.  
cautelæ.*
4. In *deprauatione ventriculi chronica*, nempe in saburra mu-  
cida vel biliosa, quæ vel concoctionem impedit, vel car-  
dial-



dialgiam nauseosam generat, vel saporem ac odorem acescentem aut nidorosum per fauces spargit, vel febres intermittentes, præcipue quando parietibus ventriculi tenaciter adhæret, minatur.

5. In *febris* quibusdam *tertianis*, quando spontaneus vomitus deficit.
6. In *cephalalgia*, quæ e vitio ventriculi exorta est.
7. Mox post *adsumptum venenum*, philtrum, cibum virulentum, si spontaneus vomitus deficit.
8. In *cacochymia scorbutica*, in qua *sedum vermiculare* tamquam specificum emeticum laudatur.
9. In *oppletione pectoris* mucida & suffocatiua, quando autocratia naturæ per tussim non sufficit. Item in *apoplexia serosa* aut *pituitosa*.
10. *Defectus dolorum* in tali partus situ, qui pellentia concedit. Præ aliis ANGELVS SALA hoc concutiens remedium ad promotionem partus commendauit.
11. *Adfuetudo* huius euacuationis, cum primis quando neglectio eius modi remedii alia incommoda attulit. Quæ enim subiecta inconsideratæ diætæ ab usu vomitoriorum melius se habent, & hanc euacuationem aliquoties repetunt, in his natura adsuëfacta idem remedium exspectat; vel, si non sequatur, ad segnes cardialgicos motus transit, immo subinde febrilia molimina format, quæ circumstantiæ vomitum tanto magis indicant.
12. In subiectis de reliquo *euemetis*, sufficientibus quoque *viribus* præditis: multum enim roboris requiritur, vt motus ille spasticus non solum in fundo ventriculi, sed & per totum œsophagum exerceatur. Distinguenda autem est syncope cardialgica & suffocatiua, quæ vomitum omnino indicat, a lipothymia & virium vera debilitate.

#### IV. INDICATA seu REMEDIA.

Hæc desumuntur

- I. Vel ex *regno vegetabili*, in quo occurrunt

1) *radices*:

*Asari*, dos, drachm. semis ad drachm. j. Decoctum



Etum illius, cum vino paratum, ad aliquot vncias propinatur.

*Radix Ellebori albi*, cuius extractum ad scrupulum j. exhibetur.

*Ipecacuanhæ*, dos. scrup. j. ad drachm. semis.

*Squillæ*, cuius oxymel infantibus ad vnciam vnam præscribitur.

2) *Folia*: *Gratiolæ* dos. scrup. i - ij.

*Nicotianæ*, mandendo vel leniter coquendo.

*Sedi vermicularis*, dos. drachm. semis. Decocti dosis ad vncias aliquot adscendit.

*Sambuci & ebuli* folia prima, *itali*, *gemmæ* vel *turiones* dicta.

3) *Flores*:

*Iaceæ &*

*Persicorum*, quorum syrupi infantibus ad vnciam vnam præscribi solent.

4) *Pinguia & oleosa*, e. g. oleum *amygdalarum* dulcium, butyrum aquæ tepidæ immixtum, quæ nauseam mouendo emesin inuitant.

2. Vel ex *regno minerali*, quæ parantur

1) modo ex *antimonio*, quod præbet emetica præ aliis visitata, e. g.

a) *regulus antimonii simplex*, ex quo pocula emetica conficiuntur vsus fere perennis. Quippe vinum calidum ex his pariter atque ex vitro antimonii vim vomitoriam extrahit prope in infinitum, paucillulo de substantia eorum sensim decedente.

b) *Regulus antimonii medicinalis*, dos. scrup. I.

c) *Flores antimonii*, dos. gr. iv.

d) *Sulphur antimonii*, dos. gr. iv - vj.

e) *Vitrum antimonii*, dos. grana paucissima.

f) *Crocus metallorum Rulandi*, gr. vj - viij, paratur ex antimonio & vitro.

g) *Aqua benedicta Rulandi*, seu vinum emeticum, ex vitro antimonii & vino paratum, cuius dos. ab vncia semis ad integram vnciam.

h) *Oxy-*



- h) *Oxyfaccharum emeticum Angeli Salæ*, quod ex vitro antimonii & aceto vini paratur, dos. a drachm. ij. ad vnciam semis.
- i) *Oxyfaccharum emeticum Ludouici*, quod ex croco metallorum & aceto vini præparatur. Dosis cum priori conuenit.
- k) *Syrupus rubi idæi emeticus*, qui ex vitro antimonii vel croco metallorum & succo rubi idæi præparatur.
- l) *Sapa vomitoria Syluii*, quæ ex vitro antimonii vel croco metallorum & musto paratur.
- m) *Tartarus emeticus*, qui omnium tutissimus & vsitatissimus est. Dos. gr. ij. - iv. Paratur e croco metallorum & tartaro.
- n) *Mercurius vitæ*, qui e butyro antimonii per præcipitationem cum aqua præparatur, dos. gr. iiij.
- o) *Rosa mineralis Angeli Salæ*, quæ nihil aliud est, quam mercurius vitæ in roseum colorem exaltatus.
- p) *Antimonium* cum duabus nitri partibus detonatum, infantibus conuenit, dos. gr. ij. - iiij.
- 2) Modo ex mercurio, e. g.
  - a) *mercurius præcipitatus ruber*, seu *arcanum corallinum Crollii*, quod ex mercurio viuo & spiritu nitri paratur, dos. gr. iv. - v.
  - b) *Turpethum minerale*, quod ex mercurio viuo & oleo vitrioli, vel ex mercurio sublimato & oleo tartari per deliquium paratur, dos. gr. iiij. - vj.
  - c) *Mercurius præcipitatus albus*.
  - d) *Aurum vitæ Kegleri*, quod itidem ex mercurio paratur & olim magni fuit habitum.
- 3) Modo ex vitriolo.
  - a) *Vitriolum album*, dos. drachma semis.
  - b) *Gilla Paracelsi*, quæ ex vitriolo albo, aqua soluto & inspissato, conficitur, dos. a scrup. ij. ad drachm. j.
  - c) *Sal vitrioli*, dos. scrup. j.
  - d) *Manna vitrioli*.
  - e) *Crystalli lunæ*, alias validissimæ hydragogæ, huc etiam



iam referri aliquatenus possunt, agunt enim ex iisdem cupri principiis, dos. gr. iv.

3. Vel ex *regno animali*, ex quo pauca, eaque prorsus inusitata prostant, e. g.

1) *rasura unguium humanorum.*

2) *Oua piscis barbi.*

3) *Oua formicarum.*

4) *Muscerda.*

## V. MODVS OPERANDI.

1. Simplex physica remediorum efficacia tam congruum effectum præstare non potest, vt anoterica euacuatio proueniat. Alias peristaltis tam facile deorsum, quam sursum fieret, vel spasmi ad retinenda potius quam expellenda aduersa valerent.

2. Docet etiam quotidiana experientia, emesin sæpius subsequi, licet remedium emeticum non adsumtum sit; immo sola phantastica idea vomitui prouocando sufficit, id quod in tabula præcedente aliquot luculentis exemplis confirmauimus.

3. Error itaque est, quando perhibent, remedium emeticum neruos ventriculi confuso actu vellicare, per hos spiritus adfluere & stomachum ad eiiciendum aduersum inuertere. Tacemus fabulam de peculiari *ventriculi inuitore*.

4. Hinc necesse est, vt specialis director talium spasmodum accedat. Nempe natura per rem sibi aduersam, siue vere existentem, siue imaginariam, excitatur, vt per proximam viam promptissime illud eiiciat. Vnde etiam a diuersa subiectorum sensibilitate diuersus emeticorum effectus exoritur.

5. Operantur autem ipsa emetica,

1) *vel nauseam excitando.* Vnde sola aqua tepida vomitum prouocare potest. Item pinguis, quæ in coagulum sebaceum facile abeunt.

2) *Vel stimulando*, dum sal rodens tunicam ventriculi interiorem, quæ ad modum sensibilis est, adgreditur &

natu-



naturam excitat, vt adpulsos humores in cavitatem ventriculi transcolet, inimicam materiam aut pharmacum diluat, & cum reliquis contentis per spasmodicum fibrarum motum exterminet.

- 3) Dependet autem hæc stimulatio a particulis *salino-sulphureis resinosis*, quas emetica & purgantia vegetabilia habent communes. In mineralibus, vt antimonii & mercurii productis, simul arsenicalis impuritatis admixtio vim septicam dictamque stimulationem exercet.
- 4) Quo volatiliores sunt particulae illae salino-sulphureae in vegetabilibus, eo magis per *superiora* euacuatio sequitur; id quod de vomitoriis valet,
- 5) Quando autem *minorem* habent *volatilitatem*, per *inferiora* purgant.
- 6) Quæ denique *mediae* sunt volatilitatis, *άνω* & *κάτω* purgant; sensibilitas autem subiectorum diuersas has materiae conditiones sæpius infringit.

## VI. MODVS PROPINANDI.

Hic inuoluit

1. *corporis præparationem.* Mobile enim esse debet, quod mouere volumus.

- 1) Materia *mucida*, eaque *viscida*, abstergitur & resoluitur per incidentia salina, vno aut altero die præmissa, e. g. per tartarum vitriolatum, arcanum duplicatum &c.
- 2) Materia *biliosa* præparatur per præmissa absorbentia, nitrosa, diluentia, mucilaginosæ.
- 3) In casu *mixto*, id est, quando saburra mucida & biliosa coniuncta est, conuenit salibus digestiuis absorbentia immiscere & præcedente vespera a cibis paullulum abstinere & aluum apertam respicere.

2. *Vomitum ipsius directionem.*

- 1) Remedium emeticum, matutinis horis propinandum, cum cathartico & carminatiuo coniungatur, ne vniuersus motuum superuenientium vigor sursum tendat.



- 2) Neque esculenta neque potulenta mox post adlumtum remedium ingerantur; minime omnium frigida, feculenta, lacticia, quæ operationem impediunt.
- 3) Quam primum autem operatio remedii sentitur, vomitus promoueatur per humidum aliquod tepidum, e. g. cereuisiam cum ouo conquassatam, modico butyri decenter saliti adiecto, itemque per infusum thée, coffée, iusculum quodam modo pingue.
- 4) Abstineatur a refrigeratione, præcipue si subiecta sint sensibilia.
- 5) Non minus fugiatur commotio corporis vehemens, moderata autem ambulatio vomitum tam certo promouet, quam immodesta concussio illum exacerbat.
- 6) Quando post tertium vel quartum vomitum bilis sincera & fluida eiicitur, satis vomuisse ægrum concludatur. Hinc quieta corporis continentia & iusculo pingui sufficiente maior huius euacuationis progressus arceatur. Si autem ante tertium vomitum bilis excernitur, frustra emesis instituta est. Subest enim materia vel pauca, quæ vomitu eliminari non potest, vel simul viscosa & ad motum inepta.
- 7) Post vomitum essentia quædam carminatiua, vel haustus vini generosi ac aromatibus conditi propinetur.
- 8) Cibus post ea sit parcus & mollis, ne adstrictio alui succedat, quæ alias commodo quodam laxante soluenda esset.
- 9) Quando vomitorium, vel sine omni, vel sine sufficiente effectu, propinatum fuit, nouus stimulus emeticus, neque statim, neque proximis diebus subiungendus; sed potius leni laxante succurrendum est.
- 10) In *hyperemesi* propinentur stomachica & tonica, præcipue cascarilla, diapnoica cum securis anodynis coniuncta, e. g. vinum calefactum, ad gratiam saccharatum, cum modico cinnamomi & caryophyllorum, macis, nucis moschatæ, eiusdemque tria cochlearia pro vna vice hauriantur. Porro theriac. gr. xij. extract. absinth. card. benedict. ana gr. j. Item corall.



corall. præp. cascarill. ana gr. vj. extract. theriac. gr. ij. denique conferua flor. anthos.

*Externe* conducunt emplastra stomachalia e tacamahaca, cerato de galbano, adspargendo olea aromatica & carminatiua, e. g. nucist. menth. item gallia moschata, cum zibetho, moscho.

## VII. CAUTELAE ET OBSERVATIONES PRACTICAE.

1. Quoniam abusus vomitoriorum & purgantium tantus est, vt non solum chirurgi & empirici, verum etiam multi Medicorum grauissime hic impingant, & vtrorumque vsum ad omnium fere morborum occupationem & melam extendant; necesse est, cautelas circa hoc euacuationis genus tanto maiore sollicitudine inculcare, ne sine sufficiente indicatione vomitorium propinetur.

2. Vocantur autem circumstantiæ illæ, quæ vomitum artificialem prohibent, generali nomine *contraindiciantia* & hæc sunt sequentia:

1) *insignis plethora*, nisi materia summe vrgeat. Simplex autem plethora directe contra non indicat.

2) *Hæmorrhagiæ omnes & molimina hæmorrhagica*, speciatim

3) *congestionès sanguinis versus caput*, plethoræ imminuendæ destinatæ, e. g. *vertigo sanguinea*, *pertinaces & valde æstuentes cephalalgia, hemicrania, ophthalmia*, *adfectus erysipelacei & anginodei*.

4) *Congestionès sanguinis versus pectus*, hæmoptysin minitantes; tanto magis, si ipsa hæmoptysis prægressa, vel *phthisis* iam inducta sit, aut *asthma siccum & spasticum* adfligat.

5) Vniuersus adparatus motuum congestiorum circa *viscera cum vena portæ connexa*, nempe in adfectibus *hypochondriaco-hystericiis*, e. g.

a) in restrictione sanguinis super *ventriculum*, *cardialgiam* nauseosam mentiente. In his enim vomitoria *cardialgias syncopicas, conuulsivas, singultuosas, flatulentias anotericas, atoniam ventriculi chronicam, adpetitus deiectionem, alui adstri-*



- ctionem, temerarios vomitus, icterum, viscerum inflammationes, febres syncopales &c. inferunt.
- b) In *colica sanguinea*, seu *ileo hæmatite* HIPPOCRATIS.
- c) In *mensium & hæmorrhoidum suppressione*, nisi quidem menses a cibis recenter deuoratis, suppressi sint. *Conf. indicantia.*
- 6) Adfectus *nephritici, calculosi, podagrici, gonagrici, ischiadici.*
- 7) Adfectus *periodici sanguinei*, hereditarii.
- 8) Adfectus pure *lipothymici*, a prostratione virium dependentes. Vbi enim robor naturæ deest, violenta hæc euacuatio locum non habet.
- 9) *Conuulsiones.*
- 10) *Febres acutæ* omnes, præcipue *epidemicæ*. In his enim plerique ad vomitum non inclinant, qui vero vomunt, a magnis anxietatibus nihil aut parum subleuantur. Licet etiam vomitus *spontaneus* fortuito nonnumquam utilis esse soleat, dum cruditates individui remouet, hi tamen motus per artem non sunt imitandi. Hinc circumspecti Præctici conatus illos vomendi, qui in acutis nimis diu continuant, & partibus vitalibus ob nimiam concussionem damnum minantur, per diluentia, temperantia, digestiua & diapnoica placandos esse potius, quam ulteriore stimulo incitandos, præcipiunt. *Conf. caut. 7.*
- 11) *Status graviditatis.* Licet enim gravidæ a spontaneo illo vomitu, quem permultæ experiuntur, non facile in damnum incurrant, immo non nullæ a vomitorio adsumto abortum non patiantur; legibus tamen, non autem rarioribus illis exemplis, viuendum est.
- 12) Denique circumstantiæ quædam *individuales*, e. g.
- a) nimia subiecti sensibilitas & horror naturalis a vomitoriis.
- b) Subiecta *dysmetæ*, qualia præcipue sunt, quæ obæsum nimis corpus, collum breuius ac angustum, stru-



strumam & thoracis malam habent conformationem.

c) Homines, qui *hernia*, procidentia *ani* & *uteri* laborant.

d) *Infantibus* vomitoria efficacia propinare minime conuenit, nisi in casu ancipiti, e. g. catarrho suffocatiuo. Sed neque hic vitium defectus expectandus est.

3. Licet autem nullum adsit *contra-indicans*, ad emesin tamen non est properandum. Quia enim vomitus instituendi nulla alia causa est, quam vt *materia euacuetur*, perpendendum omnino, an non commodiore via ad finem hunc peruenire possimus, vel materia illa *correctionem* admittat, vt in corpore ad certum tempus sine noxa tolerabilis sit. Quod si ita sit, consultius sane putatur, per digestiua, absorbentia &c. corrigere eam, quam per violentam emeticam concussionem exturbare. Quæ autem materia dicto modo corrigi non potest, illam per proximam viam euacuare conuenit.

4. Quo fortiores sunt motus emetici, eo certius sensibilibus damnum inferitur. Vicinæ enim partes, nempe intestinum duodenum, diaphragma, hepar, cystis fellea, per spasmodicam talem constrictionem vehementer adficiuntur, immo vniuersa humorum massa intensius excitatur & sanguis versus caput adigitur; quæ sane symptomata non debent friuole contemni & insuper haberi.

5. Sane quo temperatius emesis procedit, eo felicior effectus expectandus est. Hinc adsertum HIPPOCRATIS: quod *materia e ventriculo tum demum euacuata sit, si bilis sequatur*, eo valere non debet, vt in causis *simplicibus* ad bilis vsque fluidæ excretionem emesin vrgeamus.

6. Vitandus est crassissimus ille error, qui in illis adfectibus emetica præscribit, in quibus materia peccans non est in primis regionibus, sed circa easdem, e. g. in quartana, in motibus hæmorrhoidalibus & hystericeis menstruis,

7. Oc-



7. Occurrunt non numquam casus in ipsis *acutis*, vbi vnus aut alter vomitus ægroto conducere posset, prouocare autem illum per medicamentum, non æque tutum est; præcipue quando Medicus non satis certus existit, materiam in ventriculo turgere seu abundare. Prudentia medica hic opus, quæ in talibus casibus moderationem & succedaneam placationem respiciat, & vomitum potius per digitum, pennam, laryngem irritantem, aut per nauseosam formulam, quam per positium emeticum promoueat.
8. In vomitibus *spontaneis* duo errorum extrema euitentur, ne ex vna parte sponte currenti calcar adiiciamus, & secundum vulgare adsertum *vomitum per vomitum curare* intendamus, ex altera autem parte a præmatura vomitus spontanei suppressione abstineamus. Priore modo placida materiæ euacuatio turbatur & connexæ partes offenduntur; posteriore autem ratione materia peccans excernenda infauste supprimitur.
9. *Asarum* principiis gaudet *acido-sulphureis*. Vnde potenter abstergit, incidit & stimulat.
- 1) *Radix* illius saporem habet aromaticum, & instar zingiberis acrem. Subtilius puluerisata emesin, crassius autem catharsin tantum prouocat.
  - 2) *Decoctum* radice *vinosum* retinet efficaciam emetico-catharticam; *aquosum* autem vim emeticam amittit, & diuresin atque diaphoresin satis notabiliter promouet.
  - 3) *Folia* recentia quatuor vel sex incisa & trita atque cum *vin*o infusa & expressa vomitum, mitiorem tamen quam radix, cient, cum *aqua* autem infusa tantum laxant.
  - 4) *Folia* quia signatura aurem referunt, decoctum illius pro auditu difficili auribus instillandum, vel suffitus forma admittendum commendant.
  - 5) *Electuarium diasari Fernelii* ab vncia semis ad sex drachmas pro vomitu excitando conducit.

6) Ce-



- 6) Ceterum hæc planta non nisi robustis conducit, & in variis chronicis adfectibus, e.g. cachexia, hydrope, ictero & apoplexia serosa, tamquam alterans & euacuans commendari solet.

10. *Elleborus albus.*

- 1) *Albus* vocatur non a floribus, qui nigri sunt, sed a radice *alba*.
- 2) *Iunior* a *Paracelso* adpellatur; id quod exinde deriuant, quia iuniores seu fortiores, quam niger, possidet vires.
- 3) Principia habet acida cum sulphureis mixta, & quia drastica sua efficacia vomitum vehementissime excitat, vsus ipsius internus, qui *Hippocratis* tempore frequentissimus erat, hodie potissimum exoleuit.
- 4) Et licet in maniacis pro ultimo refugio habeatur, non tamen nisi in robustis subiectis locum inuenit. Ac tum quidem non in substantia, sed infuso vinoso ordinare illum expedit.
- 5) *Michaëlis* essentia ellebori albi virginem maniacam curatam esse a B. *Ettmullero* adseueratur.
- 6) *Externe* sternutatoriis misceri solet. *Hartmannus in praxi chymiatrica* refert, quod cingulum ex foliis ellebori albi circa renum regionem adplicatum, vteri hæmorrhagias & nimios menses sistat.
- 7) Ceterum perhibent, coctione per vinum purgandi vim mitiorem reddi. Ac tum quidem pauca illius grana alterandi scopo, præcipue in hydrope, dari possent conuenientius.

II. *Ipecacuanha.*

- 1) Hæc radix, quæ ante paucos annos ex America, & speciatim *Brasilia* ad nos deportata est, magnam quidem famam commendantium laudibus adquisiuit, sed dolendum, encomia illa experientiæ non semper respondere.
- 2) Gaudet principiis salinis, resinosis, cum subtili terra adstringente mixtis. Vnde non tantum emesin prouocat, sed & tonico-adstringentem efficaciam exhibet.

E

3) Hæc



- 3) Hæc est caussa, quod specificum dysentericum a multis nationibus habeatur. Sed cauendum, ne nimis ferro propinetur.
- 4) In ipsa peste *Viennensi* anno 1713. vtiliter adhibitam fuisse hanc radicem nouellæ retulerunt. Si vero vmquam cautelæ, certe in acutis necessariæ sunt, ne experimentum secundum *Hippocratem* sit fallax.
- 5) Cohibendi scopo commendari etiam solet ad diarrhœas, fluorem album, febres intermittentes &c. Sed vti reliquorum adstringentium, ita & huius remedii vsus debet esse cautus.
- 6) Ceterum angustia illa præcordiorum, quam hæc radix propinata sub initium inferre solet, non adeo pertimescenda est, mox enim rursus euanescit.

12. *Scilla* seu *squilla*.

- 1) Hæc radix a non nullis ad ceparum, ab aliis autem ad hyacinthi species refertur. Ex maritimis locis, e.g. *Hispania*, *Sicilia*, *Balearibus insulis* ad nos venit. Non differt nisi accidentibus externis. Eligenda vulgo commendatur alba & quæ alteri adnexa eruitur; quæ autem sola est, virulenta esse creditur.
- 2) Licet ad alterantia magis quam euacuantia pertineat hæc radix, placet tamen ea occasione, qua oxymel illius pro blando emetico infantum commendatur, virtutes illius recensere.
- 3) Omnes ceparum species acrimonia superat, ita vt manibus diu tractata pustulas excitet. Imbuta enim est sale volatili acerrimo. Vnde efficaciter incidit, abstergit & colliquat humores mucido-ferosos, ideoque amplum in praxi vsum nacta est.
- 4) Præcipue laudatur in adfectibus pectoris mucidis, suffocatiuis, in cachexia, œdemate, hydrope, ictero, quartana, glandulis induratis & aliis chronicis adfectibus, in quibus materiam mucosam ad euacuationem efficaciter præparat. Conf. *Stæblii dissert. de adfectibus pectoris & de tumore œdematoso podagrico*. Præter ea in vitiis vrinæ a viscido muco dependentibus,



tibus, conducit & serum per vias vrinarias simul euacuat. Ad vermes etiam laudatur.

- 5) Datur vel in substantia, præcipue succo, vel in alia forma, e.g. radix cum aceto infunditur, & sic ex sale acido aceti & sale volatili squillæ falsum volatile emergit, *acetum squilliticum* vocatum, quod veteres pro panacea habuerunt. Hoc acetum squilliticum, cum melle mixtum, dicitur *oxymel squilliticum simplex* ad differentiam *compositi*, quod plura quidem habet ingredientia, vix autem easdem simplices virtutes.

13. *Gratiola* seu *gratia Dei*, *Wild=Uurin*.

- 1) Discernant, quorum interest, num *centaurii* potius *minoris*, quam *hyssopi* species sit.
- 2) Principia habet salino-sulphurea. Hinc *folia*, quæ saporem habent amarissimum, efficacia gaudent abstergente, resolvente & stimulante. *Αρω* & *κατω* purgat, sed non violenter, vnde correctione non adeo indiget; inter ea tamen ad minus vñitata refertur.
- 3) *Conserua*, quæ exinde paratur, ad integram vnciam, *succus* autem inspissatus ad drachmam semis vel integram exhibetur.

14. *Nicotiana* seu *tabacum*.

- 1) *Nicotiana* nomen habet a *Nicotio*, qui, Regis Galliae in Hispaniam legatus, anno 1560. ex insulis Americanis in Galliam hanc herbam primum transtulit.
- 2) *Tabacum* autem ab insula *Tabago* vocatur.
- 3) Cum *peto* vnam eandemque esse herbam non nulli adfirmant, non nulli autem petum in India tantum crescere contendunt.
- 4) Gaudet principiis *sulphureis*, crudis, narcoticis, vaporosis, & *salinis* volatilibus acerrimis.
- 5) A principiis *sulphureis*, fumosis, quæ totum corpus celeriter perreptant, dependet narcoticus, anodynus, stupefactiuus effectus.
- 6) A principiis *salinis* potissimum arcessenda est vis emetico-



tico cathartica, sternutatoria, apophlegmatizans, incidens, resoluens, abstergens.

7) Pro scopo emetico; extra necessitatis casum, non facile eligenda est hæc herba, quia anxietates cardialgicas fere intolerabiles efficit.

8) *Extractum* vero aquosum per diuturnam fatis coctionem paratum & in forma sicca conseruatum, peculiarem efficaciam abstersiuo-anodynam exferit, & in tussi phthisica sedanda egregiæ est virtutis. Sumitur vel cum iusculo, vel cum stomachico remedio ad 4-5. grana, & quando in sensibilibus conatus vomendi obseruatur, haustu vini calefacti, aromatibus & saccharo imbuti, succurritur. Conf. *Stablii dissert. de affect. pectoris*. Notandum autem generaliora præmittenda esse, nec citius, quam par est, tussis sedetur & asthma augeatur.

9) Præter ea hæc herba vsum habet chirurgicum, nempe mundificantem & consolidantem, & quidem tam efficacem, vt praua subinde & maligna vlcera, quibus alia remedia imparia sunt, illius vsum restituantur. A salinis enim particulis dependet effectus abstersorius & mundificans, ab oleosis autem seu sulphureis dolorum mitigatio & consolidatio.

10) *Vnguentum nicotianæ*, quod ad pediculos enecandos vulgo præscribitur, caute adplicandum est, ne stuporem capiti inducat.

11) De vulgatissimo *fumi* vsum & abusu multi scripserunt, e. g. *Simon Pauli, Neander, Albinus*, præcipue etiam *Iacobus Rex Britanniae tractatu de misocapno*. Summa huc redit: robusti, laboriosi, succulenti, catarrhosi a moderato vsum commodum aliquod persentiscunt, immo a qualicumque etiam abusu conspicuum damnum non patiuntur. Consuetudine enim discit natura ipsam adeo veneni portionem perferre. Contra ficciores, sensibiles, debiles, otiosi a nimio præcipue vsum turbas non solum vitalium, sed & animalium

um



um functionum experiuntur, & stupidi denique redduntur.

12) De usu huius fumi *clismatico* tabula chirurgica de *injectionibus* diximus.

15. *Sedum vermiculare.*

1) Abundat sale volatili acerrimo.

2) *Decoctum* saturatum, & ad iv - vj vncias in adfectibus manifesto scorbuticis propinatum & pluribus diebus repetito exhibitum, in exemplis innumeris specificam efficaciam demonstrasse, celebrat *Bellouius* in A. N. C. Sed cautione opus est, ne commotio talis emetica extra casum crassiorum ventriculi impuritatum suscipiatur. Scorbutus enim ægre tolerat vehementem medicationem.

3) *Decoctum* vel *succus* melle subactus in stomacace externe adhiberi solet.

4) Num *amuleticus* usus (dum sacculo includitur & collo adpenditur) in febribus intermittentibus contumacibus talem efficaciam exferat, qualem *Ettmüllerus* recenset, experientiæ relinquitur.

16. *Sambucus.*

1) Integrum fere rusticorum pharmacopolium replet *sambucus*.

2) Ad *euacuantium* autem censum pertinent *Iuli*, die ersten Sprößlein, qui, quando concisi comeduntur, *άνω* & *κάτω* purgant. Communis est auctorum, præcipue *Agricolæ*, adsertio, quod sursum decerpti vomitum, deorsum vero secessum excitent.

3) Item *baccarum acini* seu *arilli*, quorum *oleum* potentius euacuat. De hisce granis experientia docuit, quod in aquam immissa, quæ fundum petunt, catharsin, quæ supernatant, vomitum, promiscue vero exhibita vomitum & catharsin simul operentur.

4) *Ebulus* cum sambuco viribus conuenit.

17. *Emetica antimonata* licet plura superius nominata sint, pro scopo tamen directe emetico *tartarus emeticus*, rite præparatus, omnibus anteponendus, quia securioris



ris vsus est, quam reliqua, quæ e vitro parantur, vtpote non facile, nisi robustis & quadratis corporibus, offe-  
renda.

18. Immo ipse *syrupus emeticus Angeli Salæ & oxysaccharum emeticum Ludouici* moderatum exposcunt vsum, in qua parca dosi votis secure satis faciunt.

19. Speciatim *mercurius vitæ* impetuose operatur. Hinc ante non debet adhiberi, quam satis fuerit edulcoratus, quo casu vsus illius tartaro emetico æquiparant, non nulli præferunt.

20. *Rosa mineralis Angeli Salæ* ad pompam potius quam vtilitatem comparata videtur. Hinc operæ pretium non iudicamus anxie inquirere, num mercurio vitæ roseus color per hæmatitem an per alia additamenta concilietur.

21. *Sulphur antimonii auratum* sub præcipitatione primum cadens, sensibilibus non est propinandum, quia nimis violenter vomitum excitat. Quod vero *ultima* est præcipitationis, peculiarem & admirandum plane effectum per triennium nobis exhibuit, nempe pro circumstantiarum ratione modo euacuantem, modo anodyno-sedatiuum. De qua relegatur *dissertatio D. Ræmpleri de catarrho suffocatiuo*. Immo post huius dissertationis editionem alios adhuc effectus ostendit, in illa haud allegatos, & quidem in febribus intermittentibus ante paroxysmum propinatum, prima dosi ordinarie euacuantem, altera autem sedantem efficaciam edidit. Conducit etiam in variis congestionibus & stasibus.

22. *Mercurialia* emetica, quia damnum non raro dant, merito reiiciuntur.

23. *Sal vitrioli* in apoplexia ferosa a *Langio* multum extollitur. Propinandum est cum largo vehiculo. Præter euacuantem effectum peculiarem habere vim resoluenti & incidendi prædicatur.

24. Reliqua, quæ supra adduximus, emetica vt cryсталlos lunæ, rasuram vnguium human. & alia e regno animali petita, quia tum nimis validi tum incerti effectus neque etiam vsitata sunt, latius non recensebimus. TAB.



TABVLA III.

DE

CATHARSI SEV PURGATIONE  
STRICTE DICTA.

I. DEFINITIO.

Κάθαρσις est euacuatio catoterica, qua materia quædam, siue quantitate, siue qualitate, siue vtraque peccans, non solum ex primis regionibus, verum etiam ex ipsa sanguinis massa motu intestinorum spastico seu peristaltico aucto per aluum educitur. Deriuatur a καθάρω, purgo.

II. DIFFERENTIA.

I. Κάθαρσις est

- 1) vel *spontanea*, quam natura sponte sua in salutarem finem instituit, quæque differt a passiuis colliquatiuis hecticorum deiectionibus.
- 2) Vel *artificialis*, quæ a Medico per remedia purgantia in eundem salutarem finem prouocatur, & de hac nobis præcipue hic sermo est.

2. *Materiæ*, quæ per motum hunc catotericum deiciuntur, proueniunt

- 1) vel ex *primis viis*, quando scilicet vitiosa digestio faburram mucidam, sæculentam, acidam, biliosam, nidorofam, verminosam parturit.
- 2) Vel ex ipsa *sanguinis massa*, dum cathartica illa, quæ non ita impetuose agunt, in ipsos humores penetrant, mucido serosas portiones resoluunt & fundunt, vt deinde copiosius versus intestina congeri, ibidemque segregari & eliminari possint.

3. Catharsis *tres* habet *gradus*.

- 1) *Primus* dicitur *lenitio*, id est, quando materiæ viscidæ, coagulatae & induratae per diluentia, emollientia, & humectantia fluidæ redduntur, & simul ipsæ viæ lubricantur, vt motui huic excretorio magis sint ad-

com-



commodatæ. Hæc lenitio vti placidissima ita semper est secunda, & in ipsis adeo *acutis* morbis locum habet; item grauidis & puerperis conuenit: solam enim alui solutionem producit.

2) *Secundus* vocatur *laxatio*, quando talia remedia exhibentur, quæ per particulas suas salinas materiam viscidam resoluunt, & vias simul placide stimulant. Hæc euacuatio, quæ sine impetu contingit, amplissimum sui vsum in totam praxin medicam diffundit. Absolvitur autem vel *vna* dosi, vel *pluribus*, per vices & per aliquot dies propinatis, ac per *epicrasin*, ut dicunt, operantibus.

3) *Tertius* vocatur *purgatio*, & hæc per talia remedia producit, quæ, licet emeticis violento impetu cedant, atque per viam magis naturalem, nempe aluum, euacuent, multos tamen motus molestos, validos, torminosos, spasticos sibi comites adsciscunt. Hinc necesse est, ut artifex a commotionibus hisce violentis in omnibus fere illis contra-indicantibus abstineat, quæ tabula præcedente de emesi enarrata sunt.

4. Denique differentiarum loco adlegamus diuersitatem illam, quam sic dicta *electiue purgantia* ratione diuersorum humorum euacuandorum exferunt, quo intuitu alia sunt

- 1) *phlegmagoga*, quæ serum mucilaginosum educunt.
- 2) *Hydragoga* quæ serum fluidum, effectu plerumque drastico, exturbant, e. g. aquas hydropicorum.
- 3) *Cholagoga*, quæ bilem euacuant.
- 4) *Melanagoga*, quæ secundum antiquam hypothesein bilem nigram expurgant.
- 5) *Panchymagoga*, quæ ordinariè composita sunt, & quousvis noxios humores exhauriunt.

### III. INDICANTIA.

1. *Lenitio & laxatio* in plurimis morbis requiritur. Blanda enim euacuatio campum habet in therapiâ longe ampliorem, quam *alteratio* seu *correctio*, licet vulgata praxis hanc potissimum respiciat.

2. *Pur-*



2. *Purgatio* autem, quia valide & satis impetuose euacuat, angustioribus limitibus circum scripta est, vti superius iam diximus. Locum autem habet

- 1) generatim in omnibus illis adfectibus, in quibus blandæ laxationes non sufficiunt.
- 2) Speciatim in cruditatibus primarum viarum copiosis, mucidis, verminosis, biliosis, digestionem impediens.
- 3) In massæ sanguineæ impuritatibus mucido-ferosis, præcipue in mucida pectoris oppletionem cum vel sine tussi coniuncta.
- 4) Specialissime in illis adfectibus, qui a corruptione lymphatico-ferosæ dependent, & resoluentia atque colliquantia efficacia postulant, e. g. in hydropicis adfectibus, lue venerea &c.
- 5) In congestionibus versus superiores corporis partes contumaciter contingentibus. In his enim purgantia reuellendi scopo efficacem præstant vsum.
- 6) Omnes hæ circumstantiæ tanto magis indicant purgationem, quando subiecta sunt robusta & huic euacuationi adsueta.

#### IV. INDICATA seu REMEDIA.

##### A. VEGETABILIA.

##### 1. *Lenientia.*

- 1) Decocta ex emollientibus parata.
- 2) Iuscula pingua.
- 3) Liquiritiæ radix, & alia dulcia.
- 4) Mucilagines hordei, auenæ.
- 5) Oleum lini, amygdalarum, oliuarum, chamomillæ expressum.
- 6) Passulæ maiores coctæ, item pruna & alii fructus dulces cocti.

##### 2. *Laxantia.*

- 1) Cassia fistula ʒij - ʒj. in decocto.
- 2) Centaurium minus.
- 3) Manna. ʒj - ʒij.
- 4) Myrobalani. ʒβ - ʒj.

F

5) Psyl-



- 5) Psyllii semen.
- 6) Rhabarbarum monachorum seu hippolapathum ℥℥.
- 7) Rhabarbarum ℥℥ - 3j. extract. 3℥.
- 8) Rosarum pallidarum syrupus. 3i℥.
- 9) Tamarindi, ℥j - 3ij in decocto.
- 10) Violæ.

Hæc omnia *cholagoga* vulgo audiunt.

- 11) Acaciæ flores.
- 12) Agaricus 3j - 3ij in infuso, extract. 3℥.
- 13) Bryonia 3ij. infus. 3ij. succus ℥j.
- 14) Carthami semen 3ij.

Ad *hydragoga* pertinent.

- 15) Ebuli radix.
- 16) Hermodactylorum radix 3ij. extr. 3j.
- 17) Iris Florentina gr. ij - iv. pro infantibus.
- 18) Mechoacanna ʒj - ʒij infus. 3℥.
- 19) Matalista.
- 20) Persicorum flores. Conserua illorum 3j. pro inf.
- 21) Rhamnus solutius siue syrupus domesticus ℥j - 3i℥
- 22) Squilla, eius oxymel ℥j. pro infant.
- 23) Turpethum vegetabile 3℥. Resina eius gr. x - xv.
- 24) Epithymum.

Hæc ad *phlegmagoga* referuntur.

- 25) Aloë rosata vel violata. gr. ij - iij - ʒj.
- 26) Helleborus niger. gr. iij - iv. fibræ in infuso composito 3ij - 3℥.
- 27) Polypodium.
- 28) Sennain infuso 3℥ - 3j; extract. 3℥.

Hæc iuxta veterum regulas sunt *melanagoga*.

### 3. *Purgantia*.

- 1) Cataputia. gr. vj.
- 2) Colocynthis ʒ℥. extract. gr. iv - vj.
- 3) Cyclaminis radix.
- 4) Elaterium gr. iij - ʒ℥. est succus cucumeris asinini.
- 5) Esula, cuius extract. gr. iij. iv.
- 6) Euphorbium.
- 7) Frangula.

8) Gra-



- 8) Gratiolæ herbain infuso ʒß.
- 9) Gummi guttæ gr. v - ʒß.
- 10) Ialappa ʒj - ʒß. eius refina gr. v - ʒß.
- 11) Iris nostras, radix ʒj. infantibus autem gr. ij - iij.
- 12) Mezereum seu Laureola.
- 13) Ricinus Americanus seu grana tilli.
- 14) Ricini vulgaris semen.
- 15) Soldanella.

Hæc omnia *hydragoga* sunt.

- 16) Scammoneum "*cholagogum*" habetur. dos. scammoniei sulphurati seu diagrydii gr. v - x. resin. scammon. gr. iv - x.

#### B. MINERALIA.

1. Aurum fulminans gr. j - viij.
2. Lapis Armenus.
3. Lapis Lazuli.
4. Magnesia alba ʒj - ʒij - ʒß.
5. Mercurialia nonnulla, cum primis mercurius dulcis ʒß - ʒj.
6. Nitrum crudum & præparata ex illo ʒß - ʒß. Nitrum antimoniatum ʒij. Lapis prunellæ ʒß. Arcanum duplicatum seu nitrum vitriolatum.
7. Sal Ebshamense, seu anglicanum, seu mirabile Glauberi ʒiij - ʒß - ʒvj.
8. Sal Egranum.
9. Tartarus crudus & præparata ex illo, e. g. tartarus vitriolatus, tartarus tartarifatus seu solubilis, arcanum tartari, terra foliata tartari, dos. vbique ʒ - ʒj.

#### V. MODVS PROPINANDI.

Hic inuoluit

##### 1. corporis necessariam præparationem.

- 1) Per placidam alui solutionem. Hæc enim quando clausa est, stimulum purgantem eidem admouere non conuenit.
- 2) Per coenam parcam & lubricantem.
- 3) Per materiæ euacuandæ digestionem & resolutionem,



pro diuersa illius conditione instituendam. *Conferantur*, quæ *tabula præcedente* hac de re dicta sunt.

2. *Ipsius purgantis conditionem*, de qua notamus sequentia:
  - 1) vbi blanda & repetita laxatio, cum epicrasi dicta, locum habet, hæc purgationi vno impetu factæ & repentinæ præferenda.
  - 2) Subiectis siccioribus formulæ humidæ, humidioribus autem siccæ propinandæ sunt.
  - 3) Remedium purgans, præcipue resinofum, cum resoluente & carminatiuo copulandum est, ne tunicis intestinorum adhærendo tormina excitet.
3. *Temporis opportuni rationem.*
  - 1) Tempus *necessitatis* nullis legibus circumscriptum est; vbi autem *electio* locum habet, sequentia notentur.
  - 2) Purgationes vehementes non in ipsis paroxyfmorum exacerbationibus, sed tempore remissionis exhibeantur. Præstat enim præseruandi quam curandi scopo hanc euacuationem instituere.
  - 3) Tempus vernale & autumnale reliquis præferendum est, manu ducente ipsa natura, quæ iisdem temporibus collectos hiemali vel autumnali tempore noxios humores per varia molimina euacuare intendit.
  - 4) Luna decresciente, natura humores superfluos facilius & tranquillius dimittit, quam crescente. Et licet hoc adfertum a multis contemnatur, constantis tamen experientiæ testimonio stabilitur.
  - 5) Purgans remedium commodius matutino tempore, quo primæ viæ ab alimentis liberæ sunt, & natura vegetior est, propinatur.
4. *Regimen post adsumtum purgans observandum.*
  - 1) Cibus solidus ante non sumatur, quam remedium effectum suum fere absoluerit. Caveatur etiam, ne copiosa illorum ingestio optatum purgantis effectum turbet, & partibus laxatis maiorem molestiam faciat.
  - 2) Neque potulenta mox post adsumtum remedium ingerantur,



rantur, ne pharmaco nimium diluto vis purgans hebescat. Quam primum autem operatio medicamenti initium sumere videtur, promoueatur per potum calidum, iuscula carniū cum ouo molli forbili mixta, vel per alia decocta conuenientia, abstergentia, demulcentia & torminosos adfectus impredientia. Laudatur hic præcipue decoctum ex passulis minoribus, tamarindis & leni quodam carminatiuo præparatum.

- 3) Placida corporis motio in loco tepido operationem medicamenti egregie promouet. Moderatus enim calor humores fluidos & ad excretionem aptiores conferuat, refrigeratio autem & potus frigidus notabiles turbas infert; & si medicamen resinofum fuerit, hypercatharsi facile anſam præbet.
- 4) Quando purgans paullo vehementius effectum vel nullum vel leuiorem, quam ad malum expugnandum requiritur, edidit, nouus ſtimulus neque eodem, neque ſequentie die addatur. Hypercatharſis autem eadem expoſcit remedia, quæ præcedente tabula hyperemeſi deſtinauimus. Præſtat autem principiis obſtare, & acriora pharmaca aut largiores doſes, quibus eiſmodi euacuatio impetuoſa ultra modum incitatur, fugere.

## VI. MODVS OPERANDI

1. Effectus formalis catharſeos non abſoluitur a medicamine per ſe & ab illius phyſica relatione ad corpus & materiam euacuandam; ſed natura ipſa eſt principium purgans, quod congruam & adæquatam motuum directionem & quidem pro diuerſa ſui ſenſibilitate, æſtimatione & materiæ euacuandæ conditione, inſtituit, vti præcedente tabula iam inculcatum eſt.
2. Eluceſcit hoc ex ſequentibus præcipue circumſtantiis.
  - 1) Certis anni temporibus diarrhœæ ſpontaneæ proueniunt, quarum quidem originem a cauſis humorum ſalinorum ſtimulantibus vulgo deriuant, ſæpiſſime autem ab experientia refutantur.



- 2) Cibi dyspepti, copiose adsumti, nullo stimulo præditi, solis naturæ motibus spastico-colicis per aluum promte eiiciuntur.
- 3) Quo sensibilius est subiectum, eo citius & efficacius natura offenditur a molesto purgantis sensu, eoque facilius & copiosius catharsin exsequitur. Quod quidem videre est in omnibus teneriori corporis textura donatis, delicatis vrbanis debilibus; quamquam & hic etiam materiæ & viarum conditionem, consuetudinem, tempus anni aliaque, quæ hunc actum circumstant, miram subinde varietatem inferre compariamus.
- 4) Quando natura ad euacuationem cathartica inclinatur, blande laxans tum temporis plus efficit, quam alio tempore directum purgans. Inclinare autem potissimum obseruatur luna decresciente, quidquid alii in contrarium adferant.
- 5) Emetica non numquam per catharsin, & vicissim cathartica per emesin reiiciuntur; id quod singularem naturæ directionem designat.
- 6) Solus visus, auditus, olfactus, immo mera imaginatio & insomnia nonnumquam sufficiunt, vt sensibiles homines catharsin experiantur.
3. Quem ad modum autem natura *motum* illum *peristalticum* *auctam*, ita remedia *sensum* efficiunt, eoque ipso naturam diuerse adficiunt, excitant, stimulant.
4. Non nulla humectando, lubricando & vias flexiles reddendo efficaciam suam edunt, ad quam classem pertinent lenientia superius enarrata.
5. Quædam salina sua efficacia abstergente & leniter vellitante naturæ ansam præbent, vt materiam sibi onerosam hisce subsidiis mobilem factam expellat. Huius census sunt salia media.
6. Alia *humores* resoluendo agunt, & efficaciam suam colliquantem non solum in primis regionibus exferunt, sed & in ipsam sanguinis massam transferunt, vt resoluti tales humores postea ad intestina deferantur, & per aluum



aluui euacuentur. Huc spectant formulæ, quæ per epicrasin laxare dicuntur, item gummatoſa.

7. Non nulla fermentationem excitant, & sub hoc actu reſolutorio humores ad euacuationem præparant, e.g. tamarindi, manna, paſſulæ, pruna.
8. Quem ad modum autem hæc purgantia, in humores agentia, phyſica ſua efficacia differunt, ita etiam pro diuerſitate materiarum diuerſus ſubſequitur effectus. Quapropter veterum differentia, quæ purgantia in cholagoga, hydragoga, phlegmagoga & melanagoga diſtribuit, haud quaquam in vniuerſum erroris arguenda & reprobanda, ſed potius, quia non ſiculneo nititur fundamento, diligentiore perueſtigatione digniſſima cenſetur.
9. Sic alia agunt in *vias*, easque particulis ſuis ſalinoſulphureis ſeu reſinoſis plus vel minus ſtimulant. Quoniam autem talis ſtimulus ventriculum mediocriter tantum adſcit, natura illud remedium tam promte ſurſum reiicere non cogitur, ſed tam diu illud tolerat, donec teneram inteſtinorum texturam moleſtius pungat, & tum humores e maſſa ſanguinea copioſe adfundit, &c. e.g. ialappa, ſcammoneum, folia ſennæ.
10. Non nulla autem cauſtico ſuo ſale primas regiones ita rodunt, vt inflammationes exoriri poſſint, indeque natura excitetur, ad moleſtam illam materiam promptiſſime ἀνὰ & κατὰ excutiendam. Huius cenſus ſunt colocynthis, helleborus albus.
11. Quando autem particulæ reſinoſæ plicis inteſtinorum tenaciter adhærent, natura non ſolum per motus ſpaſtico-colicos, ſed & per copioſam humorum aduſionem illas detergere & abluere adlaborat. Hæc eſt ratio, quod tepidus potus, copioſe adſumptus, dolores tales mitiget.
12. Non nulla peculiarem tantum tractum inteſtinorum adficiunt, id quod dependet vel a differente illorum relatione ad diuerſos in inteſtinis humores, vel promptiore aut tardiore illorum reſolutione, ſecundum quam modo citius, modo tardius operantur, e.g. helleborus niger



- ger & centaurium minus adficiunt præcipue intestinum rectum.
13. Non nulla in *humores* & *vias* simul agunt, illos resolvendo & has stimulo, & talia effectum edunt faciliorem & copiosiore. Huc spectant potissimum composita panchymagoga.
  14. *Martialia*, quando aluum mouere dicuntur, id non nisi tæni augmento contingit.
  15. Quæ purgantia manu chirurgica venis infunduntur, illa humores potissimum alterant, vias autem leniter stimulant, quem ad modum lac nutricis ab adsumto purgante eius modi vim imbibit, vt humores abstergere, & vias moderate stimulare soleat.
  16. Topica purgantia, præcipue quæ regioni vmbilicali applicantur, agunt primario stimulo, hæ enim ligamentofo-tendinosæ partes, quando exquisitius a purgantibus fortibus adficiuntur, naturam ad motum catharticum excitant.

## VII. CAUTELAE ET OBSERVATIONES PRACTICAE

1. *Catharsis* licet ordini naturæ magis respondeat, mitior etiam & tolerabilior sit quam emesis, abusus tamen, qui cum purgantibus fortioribus vulgariter committitur, quouis modo damnatur. Impetuosæ enim, violentæ & torminosæ commotiones aliis motibus irregularibus in corpore excitandis pares sunt.
2. Quando ipsa natura, præcipue circa æquinoctia, per spontaneas diarrhœas corpus suum exonerare intendit, hi motus leniter potius promouendi quam indiscretim sistendi sunt.
3. Catharses quando nimis frequenter & impetuose instituuntur, non tantum varii motus irregulares accenduntur, sed & viles humores cum necessarij roboris decremento exhauriuntur. Hinc cum prudente moderamine semper sunt instituendæ.
4. Subiectorum diuersa indoles semper consideranda est, vti sub modo propinandi iam monuimus. Sensibilia enim a mediocri interdum purgante, immo a sapore nauseoso



fo, vel simplice mentis fictione vomitum & multa incommoda experiuntur, quæ proinde laxantibus potius quam efficacibus purgantibus tractanda sunt. Sic etiam infantes, senes & feminas validis purgantibus aggredi & in varias turbas conicere, nemo temere suaferit.

5. Minime omnium, secundum *Hippocratem* conuenit in acutis purgantia adhibere: typum enim febris turbant & salutari morbi decursui sufflumen aut damnum adferunt. Hinc moderate tantum lenientia hic locum habent.

6. Sic etiam positiuæ & efficaces purgationes contra - indicantur in omnibus fere illis adfectibus, in quibus vomitoriorum vsus abesse debet. *Conf. tab. de emesi.*

7. Præcipue etiam purgantia nocent puerperis. Commendant quidem auctores vina medicata vel alia blanda laxantia, circa finem puerperii instituenda, ne sordes in primis viis collectæ, variis morbis, præcipue purpuræ chronicæ ansam præbeat, notandum autem est, quod præstet prioribus nouem diebus pilulas *Stablianas* propinare, & hac ratione tali catharsi supersedere. Commendant alias puerperis, vt aluum siccam per esum pororum Borstorianorum lubricam reddant.

#### 8. CASSIA FISTULARIS.

1) Est arboris cuiusdam exoticæ filiqua plus vel minus longa, quæ externe corticem habet lignosum, fistulam referentem, interne autem fouet medullam seu pulpam, & semina membranoso septo distincta. Hæ filiquæ maturescentes quando a ventis agitantur, strepitum edere dicuntur, ac si mille anseres clangerent.

2) *Solutiua* seu *laxatiua* dicitur ad differentiam *cassie lignæ*, quæ cum cinnamomo conuenit.

3) Est vel

a) *orientalis*, quæ vel ex *Cananor*, *Cambaia* & aliis Indiæ locis ad nos fertur, & κατ' ἐξοχὴν orientalis audit, vel *Alexandria Aegypti* prouenit, & filiquas habet præ illis teneriores, vsitatissimas. Vel

G

b) oc-



- b) *occidentalis*, & hæc modo *Brasiliensis*, quæ maximis quidem filiquis prædita, virtute autem laxante inertior, vti *Ettmüllerus* contra *Schröderum* exposuit; modo *Insularum Antillarum*, quæ & forma & qualitate ad orientalem propius accedit.
- 4) *Occidentales arbores* olfactu suo penetrante insignem formicarum copiam arcessere dicuntur, quæ, quid, quid in vicinia satum, consumant.
- 5) Eligendæ sunt filiquæ ponderosæ, quarum fistula seu cortex lignosus purpurascentem habet colorem, pulpa autem succulenta est, & situ non infecta.
- 6) Hæc pulpa, quæ *flos cassiæ* seu *cassia extracta* audit, & sola in usu est, prius non extrahi, quam in usum vocari debet: nam mox post extractionem acescit & tormina excitat.
- 7) *Semina* potius adstringunt quam laxant; id quod de *interstitio lignoso* non nulli etiam contendunt, sed *Ettmüllerus* ex *Pechlino* contrarium docet & memorat, hunc corticem simiæ oblatum efficaciter purgasse.
- 8) Præter extractam cassiam habemus præparata: *electuarium de cassia & manna*, item *cum foliis fennæ*, item *syrupum de cassia*. Adhiberi solet in clysteribus ad ℥ij.
9. MANNA.
- 1) Dissensum auctorum de manna dies nostri nondum prorsus deleuerunt. Plurimi illam non amplius pro vapore terræ & melle aëreo, æstatis calore eleuato, noctis frigore condensato & cœlitus delapso cum *Galeno*, vel a muscis quibusdam, vti mel ab apibus elaboratum habent.
- 2) Sed pro lacrima, quæ præcipue ex arboribus orni & fraxini in Calabria, vnde Calabrina dicitur, & etiam alibi prouenit. Adulteratur saccharo penidio, herbarum foliis circumuoluto.
- 3) Constat vel granis *maioribus*, quæ ex trunco arboris vulnerato stillat, & cultris ligneis abraditur; vel mi-
- nora



nora habet grana, quæ purior est & priori præfertur. Per se enim ex ramusculis in folia stillat, hærens in illis siccescit, & ventorum motu in terram delabitur.

- 4) Eligenda est recens, anno non vetustior, alba, solida, non spongiosa.
- 5) Recens manna sine torminibus aluum blande laxat, in specie bilem, non æque vetusta. Quoniam autem amplissima dosi, nempe ad ℥iv ab adultioribus sumi debet, infantibus ordinariè destinatur.
- 6) Principia habet salina, acida & mucilaginosæ, vnde abstergit, colliquat & laxat.
- 7) Mucilaginosæ sua parte flatulentiam concitare potest, hinc sale quodam digestiuo, vel semine carminatiuo miscenda.

#### IO. MYROBALANI.

- 1) Sunt fructus ex numero prunorum exoticorum, antiquis Græcis incogniti, ab Arabibus in scholam medicam introducti. Proueniunt in *Iaua* Indiæ insula, & quidem in arboribus, quæ magnitudine a prunis nostris parum recedunt.
- 2) Numerantur vulgo quinque horum prunorum genera, nempe
  - a) myrobalanus *Bellirica*, quæ & figura & colore nucem moschatam refert.
  - b) *Chebula*, quæ nigra & omnium est maxima.
  - c) *Citrina*, a colore flauo ita dicta.
  - d) *Emblica*, subnigra, multa carne, exiguis ossibus prædita.
  - e) *Inda*, nigra, ossibus fere destituta.
- 3) Denominatio, quæ ab *Auicennæ* & *Serapionis* interpretibus prouenit, minus conueniens est: myrobalanus enim vi etymologiæ designat glandem vnguentariam, ex qua oleum, vnguentis destinatum, expriment, nostri autem myrobalani neque oleum fundunt, neque balani figuram exhibent.
- 4) Habent principia sulphurea & salino-acida, cum terra subadstringente sociata. Hinc non nulli dubitant,



an ad laxantia magis, quam adstringentia myrobalani sint referenda.

- 5) Multo incertiore experientiae fundamento innititur adsertum, quo *bellirica* panchymagogæ, *chebula* hydragogæ, *citrina* cholagogæ, *emblica* phlegmagogæ, *inda* melanagogæ habentur. Et licet biliosos humores quantisper eliminant, hodie tamen, quia præstantiora remedia prostant, raro adhibentur.

## 11. SEMEN PSYLLII.

- 1) Hæc planta glabra in Italia crescit. Semen eius secundum *Ettmüllerum* est vel *maius* vel *minus*, illud euacuans, hoc alterans. Sed si dicendum quod res est, utrumque ob principium insigniter mucilaginosum materiam volubilem reddit, lenit. Destinatur autem magis externis quam internis vñsibus, speciatim doloribus & ardoribus leniendis, abscessibusque maturandis. In angina autem, in qua vulgo extollitur, hoc remedium non commendamus. Mucida enim angustiam tam facile augere quam soluere possunt. Sed ad linimentum pro lingua fissâ æque ac semen cydoniorum valet.

## 12. RHA - BARBARVM MONACHORVM.

- 1) Rhabarbarum genuinum vti species est lapathorum, ita monachi, commentatores *Mesues*, ob illius defectum aliam lapathi speciem substituerunt, nempe *lapathum latifolium*, græce *hippolapathum*, quod cum lapatho angusti folio, seu oxylapatho, quod etiam in vñsu est, non confundendum.
- 2) Viribus rhabarbari veri aliquo modo accedere dicitur, quoniam autem dupla portione adfumendum est, & sapore suo maiorem nauseam mouet, plebeiis & minus delicatis tantum præscribi solet, & quidem vel in decocto, vel infuso.

## 13. RHA - BARBARVM & RHA - PONTICVM.

- 1) Rhabarbarum licet per plura secula in schola medica cognitum fuerit, planta tamen huius radicis minus adhuc explorata habetur.

2) De-



- 2) Denominationem mutuatur a fluuio Rha, hodie Volga, in Tartaria. Quod autem in Tartaria penes fluuium Rha non crescat, sed ex China tantum ad illum fluuium Rha aduehatur, hodie innotuit, vnde vel mari per Hispanos & Belgas ad nos defertur, vel terra per Tartariam & Moscouiam. Alexandrina audit, quia ex hoc emporio solo olim transferebatur.
- 3) Multi auctores rha-barbarum & rha-ponticum verum, quod *Dioscorides* describit, pro vna eademque planta reputant, alii autem differre illas adseuerant. Quocumque modo res se habeat, sunt radices, quæ forma externa & viribus multam habent cognationem, atque solo tantum natali differre videntur, videlicet rheum seu rhabarbaricum ex plaga Scythiæ meridionali, rha-ponticum autem ex septentrionali ad fluuium Rha vehitur.
- 4) Rhabarbarum verum a loco natali diuerso diuidere solent in *Leuanticum* seu *Sinense*, *Turcicum* & *Moscouiticum*, quod valore minimum habetur.
- 5) Eligendum est id, quod aureum habet colorem ruffis venulis largiter interspersum, ponderosum, amarum, & quod madefactum croceo colore manum tingit.
- 6) Principia habet salino-sulphurea, cum terreis limosis & austeris mixta, vnde non solum abstersiuum, inuoluentem & laxantem habet efficaciam; sed & a terra illa austera dependet famosa illa rhabarbari tosti adstrictio. Igne enim eiiciuntur particule eius sulphureæ.
- 7) Vberrimum in praxi habet vsum, tutumque effectum præstat. Panchymagogum quidem est, sed tamen sigillatim inter alia eminet vt princeps cholagogorum. Hinc precipue laudatur in saburra primarum viarum biliosa, speciatim infantum, in dysenteria, vitiis iecoris, ictero, chlorosi. A *Cratone* anima hepatis vocatur. Non tamen vt veteres opinati sunt, vis specifica cholagoga probatur per colorem flauum, quem excrementa sub illius vfu ostendunt.



8) Propinatur vel in substantia, vel in infuso. Extractum atque tinctura tam efficaciter non operantur. Vis laxans residet in substantia mucilaginosâ, quæ aquoso menstruo extrahitur commodissime.

9) Præparata officinalia sunt: *syrupus de cichoreo cum rhabbaro*, qui in infantibus vſitatissimus: pilularum variæ compositiones, e. g. *aggregatiuæ*, *de tribus*, *sine quibus*, *Mesue*.

#### 14. TAMARINDI.

1) Sunt fructus arboris cuiusdam peregrinæ, quæ præcipue in Arabia felici, item in insula Summatra, Ceylon, Peru &c. crescit, & siliquas, cassiæ fistulæ congenères, profert, quarum pulpa, remotis reliquis, in vsum vocatur. Eliguntur siliquæ recentes e nigro rufescentes, vinosi acidiusculi saporis.

2) Principiis gaudet hæc pulpa salino acidis & subtiliter mucilaginosâ, vnde effectum habet absterforium, inuoluentem & temperantem.

3) Euacuat benignissime, biliosos præcipue humores, vnde in hepatis vitiis, ictero, febribus biliosis modeste adhibita prodest; immo virtute sua temperante sistit non numquam deiectiones biliosas impetuosas, & ad sanguinis orgasmum temperandum a non nullis adhibetur.

4) Non nulli hanc arborem ad palmam Indicam referunt, & tamarindos esse fructus palmæ, nempe dactylus barbara lingua tamar vocatur, sed errant.

5) Adhibetur modo in substantia, nempe pulpa tamarindorum cum saccharo condita ad  $\mathfrak{z}\text{i}$  -  $\mathfrak{z}\text{ij}$  exhibetur, vel pulpa cum succo pasfularum inspissatur, modo in decocto, vbi præcipue serum lactis tamarindinatum celebre est.

#### 15. FLORES ACACIÆ.

1) Principiis gaudent salinis, acidulis, cum mucilaginosâ mixtis, vnde humores seroso-mucidos & biliosos resoluunt & colliquant.

2) Præ-



- 2) Præter effectum leniter catharticum diuresin etiam blande promouent.
- 3) Commendari præcipue solent in adfectibus chronicis, cacochymicis & oppletionibus pectoris mucidis: vnde aqua florum horum ad asthmaticas refertur.
- 4) Propinantur in forma vel infusi vel decocti.
- 5) Externe adplicati effectum edunt antispasticum.

## 16. AGARICVM vel AGARICVS.

- 1) Est fungus nobilissimus larici præcipue adnascens; quæ arbor & terebinthinam Venetam seu resinam laricem fundit.
- 2) Nomen habet a patria prima, nempe *Agariæ Sarmatiæ* regione, vnde olim per Alexandriam & Venetias ad nos deferebatur, hodie autem copiose reperitur in montibus Delphinatus, item in tractibus Rhætorum, Vindelicorum ac Noricorum.
- 3) Eligitur, illud quod femina vocatur, hoc enim albissimum, post dulcedinem subamarum, leue & friabile, mas autem quod dicitur est nigricans, lignosum, graue.
- 4) Præscribitur vel trochiscatum (quia in substantia ob leuitatem ventriculo minus acceptum est) vel in nodulis, decoctis & clysteribus. In extracto aliis purgantibus miscetur, e. g. ingreditur extractum *panchymagum Crollii*, Electuarium hieræ picræ cum agarico in clysteribus.
- 5) Principiis gaudet sulphureis, salino-acidis & mucilaginosus, vnde humores mucido-viscidos resoluit, colliquat, abstergit, & intestina stimulando euacuat.
- 6) Multi specifici effectus, qui huic fungo tribuuntur, e. g. in capitis morbis & vteri adfectibus, item alexipharmaca efficacia, experientiæ non respondent.

## 17. BRYONIA.

- 1) Hæc radix subtilibus & exiguis particulis sulphureis & alcalicis prædita est, vnde efficaciter resoluit, colliquat & euacuat humores seroso-mucidos.

2) Con-



- 2) Conuenit in adfectibus chronicis serosis, item in hepatis & lienis infarctu.
- 3) Vermes enecare & expellere a *Freitagio in aurore. med. cap. 37.* duobus egregiis exemplis confirmatur. Vid. etiam in *A. N. C. Ann. 1. obseru. 103. p. 236.* historiam *Michaelis*, qui ope bryoniæ & iridis bufones & ranas ex ancilla quadam expurgauit.
- 4) *Zacutus Lusitanns libr. 1. Med. Princ. histor.* exemplum habet curatæ per bryoniæ vsum melancholiæ.
- 5) *Helmontius tract. hydrops ignotus* contendit, quod si venenum laxatiuum huius radicis ablatum sit, effectum eximium diureticum exserat. Hanc correctionem per adfusionem vini & exsiccationem aliquoties repetendam obtinere quidam sperant.
- 6) Fascinationes autem secundum *Paracelsum* an tollat, dubium est.
- 7) Externe resoluendi scopo adplicatur pedibus œdematosi, scroto tumore adfecto, liuoribus & contusionibus ad sanguinem grumofum discutiendum, gangrænæ secundum *Tackium*; membris etiam arthriticis hanc radicem aliquamdiu adpendunt, deinde illam in hortum sepeliunt, & sic per transplantationem arthritidem curare sperant.
- 8) Fæcula præparata nullius est efficaciam.
- 9) Succus vel per se ad vnciam vnā hydropicis propinatur, vel per saccharum in syrupum redigitur, cuius dosis est vncia semis.
- 10) Succus ingreditur etiam *unguentum Agrippæ*, quo umbilicalis regio inungitur, ad serum per aluum euacuandum.

#### 18. SEMEN CARTHAMI seu CNICI.

- 1) Huius vsus debet esse circumspectus, quia nimis potenter serum euacuat. Hinc non nisi in subiectis robustis vel desperatis morbis adhiberi oportet.
- 2) Principia habet acria salina cum sulphureo-acidis & mucilaginosi mixta.



## 19. EBULI RADIX.

- 1) Hæc, ob vim drastrictam raro etiam adhibetur, & secundum *Pancovium* singulares hominum naturas exposcit.
- 2) Principiis gaudet mucidis, cum salinis acris & sulphureis mixtis.
- 3) Dicitur alias *chameæde*, hoc est sambucus parva. Parum enim a sambuco ebulus differt, nisi quod ad gradum vehementiæ sambuci non accedat.

## 20. HERMODACTYLORVM RADIX.

- 1) Quæ hermodactylorum radix in officinis hodie prostat, est species colchici non venenati, atque ex Syria ad nos deuehitur. Quare vero veteres plantam hermodactylorum nomine designare voluerint, incertum est. Vi vocis enim animam articulorum denotat, negant autem optimi auctores, nostram radicem in adfectibus articulorum laudatum effectum edere. Vnde *Paracelsi* pulvis podagricus purgans cum colchici radice alba, & famosum electuarium marocostinum *Mindereri* inde natum reiiciuntur, item pilulæ de hermodactylo.
- 2) Principiis gaudet sulphureo-salinis, vnde abstergit, colliquat, & mucorem serosum euacuat. Præstat autem ab hoc remedio minus fido & certo abstinere.
- 3) *Ettmüllerus* notam superstitionis illis inurit, qui colchici nostratis radicem in peste superioris seculi amuletice gestauerunt. *Wedelius* autem in peste Hamburgensi efficaciam illius laudat.

## 21. MECCHOACANNA.

- 1) Hæc radix alba in taleolos concisa, ex prouincia Hispaniæ nouæ, *Mechoacanna* dicta, circa medium superioris sæculi ad nos primum adlata est. Speciem bryoniæ illam non nulli existimant, alii, quod nullum fere saporem habeat, contradicunt.
- 2) Principiis gaudet sulphureo-resinosus cum terreo-mucidis, vnde colliquat & euacuat humores mucido-serosos, catarrhales.
- 3) Cum ialappa virtutes quidem continet easdem, sed mitiores.



tiores. Vnde etiam ialappa alba vocatur & maiore dosi præscribitur; rhabarbarum vero album dicitur ob intercedentem cum eo conuenientiam.

- 4) Extractum quando cum spiritu vini paratur, minoris est efficaciae. Vis enim laxans latet in mucilagine gummosa, quam spiritus intactam relinquit. Hinc cum menstruo aquoso vel vino rhenano præparari debet. Extractum mechoacannæ, quod prostat compositum, elegantis est compositionis.

## 22. MATALISTA.

Hæc radix peregrina ab Hollandis ad nos adlata cum ialappa easdem habere virtutes dicitur, in vsum autem adeo non dum recepta est. Inferior autem ialappa, superior mechoacanna creditur.

## 23. FLORES PERSICORVM.

- 1) Gaudent principiis acidis cum subtilibus terreis remixtis.
- 2) Præter virtutem abstergentem & diureticam alium sine molestia laxant, licet nihil in tota arbore sit, quod purget. Hinc in vinum vel serum lactis infundunt, & tempore vernali præseruandi scopo adhibent, *zur Frühlings-Cur*. Variis enim adfectibus quadrant, nempe cachecticis, cacochymicis, vitiis lienis, hepatis.
- 3) Infusum vinosum vermibus expellendis conducit, & saburram biliosam in infantibus eliminat. Non nulli cataplasma faciunt ex foliis persicorum & felle tauri atque umbilico pro lumbricis expellendis adplicant.
- 4) Aqua & conferua ex hisce floribus parata etiam contra vermes præscribuntur.

## 24. RHAMNVS CATHARTICVS seu SOLVTIVVS, SPINA INFECTORIA, SPINA CERVINA.

- 1) *Bauhinus* nouem huius fruticis species recenset, e quibus sexta solutiva seu cathartica nostra est, quæ baccas fert, nucleum cerasorum adæquantem.
- 2) Crescit hic frutex iuxta sepes, in siluis & per culturam in hortis.

3) Bac-



- 3) Baccæ colliguntur initio Octobris, vel in fine Septembris. Ex his præparatur famosus ille *syrupus domesticus* seu *de spina ceruina* dictus  $\zeta j - \zeta i \beta$ .
- 4) Succus e baccis maturis expressus dicitur *Gastgrün*.
- 5) Baccæ gaudent principiis salino-acidis, parcius mucilaginosi & humores biliosos æque ac ferofos efficaciter eliminant, præcipue in infantibus.

## 25. TURPETHVM VEGETABILE.

- 1) Multum dissentiunt auctores, cuius plantæ sit hæc radix. Recentiores statuunt esse radicem plantæ lactiferæ in Cambaia & in aliis Indiæ locis crescentis. Nonnulli pro radice scammoniei illam habent.
- 2) Turpethum *vegetabile* vocatur ad differentiam turpethi *mineralis*, quod ex mercurio præparatur.
- 3) Gaudet principiis magis resinosis, sulphureis, quam salinis, acribus, acidis.
- 4) Non solum humores efficaciter resoluit & colliquat, sed & vias potenter stimulat. Hinc ad classem fortiter purgantium referri potuisset. Superat enim Agaricum, secundum regulam: quidquid agaricus non attingit, turpethum promouet. Sed quocumque loco ponatur, vsum tamen non habet hæc radix, nisi in robustis subiectis & contumacibus morbis, e. g. hydrope, lepra.
- 5) Species diaturbith cum rhabarbaro vermibus destinari solent. Post mercurium enim nihil fortius illos expellit, quam hæc species, quæ a  $\zeta \beta$  ad  $\zeta j$ . in formam morsulorum ope sacchari redactæ, propinantur.
- 6) In pilulis de agarico & adgregatiuis maioribus turpethum vegetabile non adeo impetuose stimulum suum exferre potest. Hinc quodam modo tutioris vsus sunt.

## 26. EPITHYMVVM.

- 1) Est species Cuscutæ. Nam quod apud nos in lupulo, vrtica &c. est cuscuta, id in thymo cui circum nascitur est epithymum, sed odore, qui cum thymo conuenit, differt.



- 2) Hæc planta blandissime laxat. Raro sola adhibetur. *Syrupus de epithymo* ad vnc. iij - vj. propinatur. Veteres ad blanda laxantia & diuretica retulerunt. Est ordinarium ingrediens nodulorum purgantium vino infundendorum, nam multa coctione vis auolat.

27. ALOE.

- 1) Est succus inspissatus, qui ex planta eiusdem nominis colligitur.
- 2) Nascitur in Cambaia, Bengala, Socotera. Quæ vero aloë apud nos nata est, ex illa talis succus non ita elici potest.
- 3) Tres species ad nos feruntur, quæ puritatis ratione differunt.
  - a) *Caballina*, impurissima, & fex quasi aloës, equis curandis destinata.
  - b) *Hepatica*, quæ hepatis colorem refert, & priorem puritate longe superat, sed nigrior, fractu contumacior & odoris minus grati, quam sequens.
  - c) *Socotrina*, optima & ab insula orientali Socotera nomen adepta. Altera denominatio *succotrina* quasi succo citrina hodie reiicitur. Hæc quando ita pura est, ut ad vitri pelluciditatem fere accedat, *lucida* vocatur, & hanc non nulli pro quarta specie habent. Optima autem Aloë prius debet purgari.
- 4) Diuersitas puritatis a modo colligendi plurimum dependet. Succus enim ille, qui in terram stillat, impurior est illo, qui vasis excipitur, & ita sine omni peregrina substantia colligitur. Sic etiam impurior est, quando folia per machinam exprimuntur, quam si sponte sua exstillet.
- 5) Acaciæ succo aloën adulterari putant, sed hic succus in illis insulis haud dubie carior est, quam ipse succus aloës. De adulteratione per gummi arabicum & signis diagnosticis, vid. *Angel. Sala.*
- 6) Duplici gaudet principio,
  - a) *gummatoso*, in quo virtus purgans latet, per menstruum aquosum extrahenda.

b) re-



b) *Resinoso*, tonico, adstringente, quod spiritu vini solubile est.

7) Hallucinari videtur *Zwelferus*, qui in resinoso hoc principio quærit effectum laxantem, & pro hoc scopo aloë spiritu vini extractam commendat. Non nulla enim vegetabilia in parte quidem resinosa vim laxantem habent, e. g. *ialappa*; alia autem in mucilaginoso, e. g. *senna*, alia in gummatosa, uti *aloë*, alia in gummatosa & resinosa simul, e. g. *gummi guttæ*, *scammonium*, *euphorbium*.

8) Hinc resinosa pars ab aloë est segreganda, alias pertinetes alui adstrictiones & orgastica incommoda succedunt. Modus separandi per solutionem in menstruo aquoso uti simplicissimus est, ita præferendus vulgo sic dictæ *insuccationi*, quando aloë depurata in succis vegetabilium soluitur & exsiccat, e. g. violarum, rosarum, borraginis &c. unde *aloë* modo *violata*, modo *rosata* &c. audit. In hisce enim insuccationibus resina non separatur, neque etiam per illas correctio acrimoniæ vel virtutis purgantis augmentum, uti vulgo creditur, obtinetur.

9) Aloë, quæ a resina non est liberata, quando larga dosi præscribitur & nimis diu usus eius continuatur, molimina hæmorrhagica suscitare valet, e. g. abusus *pilularum Franckofurtensum*, *elixiris proprietatis*, quæ remedia aloë partim ingreditur, partim mere constituit, hæmorrhoides excitant. Hinc neque hæmorrhagicis, neque siccioribus temere præscribenda.

10) Aloë hoc habet peculiare, ut aliquot illius grana aluum æque bene laxent, ac integer scrupulus.

11) Veteres resinam acrem aloës corrigere quidem voluerunt per tragacantham, bdellium, mastichem, decoctum passularum, olea &c. sed hæc potius occultatio & inuolutio quam correctio acrimoniæ dici potest, hinc æque ac recentiorum insuccationes reijciuntur.



- 12) Improbatur aloë colore nigra, fractu contumax, difficulter liquefscens. Eligenda pinguis ex rubro-ruffa, translucida, friabilis, arenarum expers, myrrhæ odorem æmulans.
- 13) Præter vsum melanagogum præcipue intestinum rectum purgat, & sanguinem hæmorrhoidalem perinde ac menstruum versus conuenientia loca inuitat, modo adhibeatur in refracta dosi.
- 14) Vermibus enecandis & expellendis conducit. Ventriculo autem non adeo amica, licet amara sit.
- 15) Externe vlceribus mundificandis & abstergendis par est. Hinc essentia aloës cum essentia myrrhæ & succini parcius remixta in talibus læsionibus bene se gerit.
- 16) Præparata prostant *pilule Francofurtenses*, quæ nil aliud sunt, quam aloë violata, cuius lbj. additur ℥j. extracti gemmarum sambuci contusarum, vide *Ettmüllerum*; item *pilule angelicæ*, *pestilenciales Russi*, *Glossianæ*, *species hieræ picræ*, *elixir proprietatis Paracelsi*, &c.

## 28. ELLEBORVS NIGER.

- 1) De elleboro *albo* sub emeticis iam diximus, cui præcipue etymologiam vocis quadrare perhibent, videlicet quod per os sumta radix interficiat, ἀπὸ τῆς ἐλέιν interficere & βογὰ ἐσθὰ, eine tödtende Speise.
- 2) Verum enim vero ipse etiam *niger* elleborus sua pollet vehementia, nisi legitime præparetur & prudenter adplicetur. Eam ob causam grauibus in hunc diem morbis fuit dicatus, nempe deliriis melancholicis, maniacis, hydropi. *Claudius Deodatus* fugam dæmonum vocat, quod mentis turbas diabolo stabulum
- 3) Inter melanagoga primus ipsi conceditur locus. Operatur enim in humores sanguineos crassiores, quos antiqui melancholicos & atrabilarios adpellabant. Speciatim efficaciam suam edit in intestinum rectum, teste experientia. Sæpius enim hæmorrhoides con-



gruo illius vsu prouocauimus. Hinc in vitiis sanguinis circa venam portæ prudens eius vsus commendatur, nempe pauca grana extracti aquosi aliis resoluentibus & laxantibus miscentur.

4) *Paracelsus* præcipue hanc plantam maxime extollit & remedium exinde parat, non solum quatuor morbis cardinalibus, epilepsiæ, apoplexiæ, hydropi & podagræ curandis, verum etiam vitæ longius protrahendæ suffecturum. *Daura* (quasi aurea, vti *Johnson* in lexico chymico interpretatur) & *thesaurus vitæ* ab auctore vocatur, item *senior*, quia virtutes seniles habet respectu albi, & præparat illam e foliis ellebori nigri ℥v. Macis ℥j. essent. croc. meliss. chelidon. margarit. aur. ana ℥v. Hisce addit pondus ad omnia triplum sacchari in spiritu roris maialis, aqua meliss. & chelidon. soluti.

5) *Rolfincius* de eo prædicat: facit acquirere iuuenescentiam & incolumitatem, mores laudabiles & complexionem bonas, animum ad actiones reddit promptum; quæ omnia tamen ὑπερβολὴν sapiunt.

6) Virtutem purgantem a sale volatili dependere, omnes fere consentiunt, fixi enim parum continet. *Bouldac* in anatomia ellebori per ignem reuerberii euocauit primum spiritum pure acidum; hunc deinde secutus est spiritus mixtus ex acido & vrinoso volatili, post ea prouenit spiritus alcalinus volatilis cum particulis spiritus acidi immixtis; denique oleum penetrans & foetidum atque vltimo ex capite mortuo exigua portio salis fixi prodiit.

7) *Fibræ* radice efficaciores sunt, quam crassior radix, cuius medulla lignosa virtutis expers est.

8) *Veratrum* dici putant, quod mentem vertat.

9) Quatuor species ab auctoribus præcipue adlegantur (vid. *Ettmüllerum*) nempe

a) elleborus niger legitimus seu veratrum nigrum flore roseo albo, vel iuxta *Matthiolum* Syriacus flore purpureo. Sed florum diuersitas non debet mouere



uere dubium, primum enim albicantes paucis diebus rubescunt. Ob effectum sternutatorium vocatur germanice: schwarze Niese, Wurzel. Dicitur etiam Christ, Wurzel, quia circa festum natiuitatis florere incipit. Folia septem vel plura ex parte crenata ad caulem habet. Optimus hic est.

b) Elleborus niger hortensis flore viridi.

c) Elleboraster niger nostras domesticus, hortensis, flore ex flauo viridescente.

d) Elleborus ferulaceus *Theophrasti*, quem alii ob florum similitudinem pro bupthalmi specie habent. Alii Elleborum *Hippocratis* illum vocant. Sed verosimile est, quod de albo semper intelligendum sit, quidquid de ellebori vsu apud *Hippocratem* occurrit. NB. In defectu styriaci hic & hortensis flore viridi sublitt. b) substitui possunt.

10) Acrimoniam ellebori nigri olim cogitarunt per stomachica, deinde per acida emendare, sed per hasce præparationes elleborus castratur. Hinc præfertur modus recentiorum, qui aquam tantum simplicem radicibus a medulla liberatis adfundunt, leni calore exsiccant, adfusionem & exsiccationem tam diu repetunt, donec foetorem amiserint.

11) Extractum alii præparant menstruo spirituofo, alii acido & spirituofo simul, alii primum spirituofo deinde aquoso. Sed quocumque specioso titulo hæc extracta commenduntur, id quod aquoso menstruo paratur, omnibus præfertur. Spiritus enim vini parum extracti, & quidem tormina excitantis, & leuiter purgantis producit, quod autem per acida paratur, multum efficaciam amittit, & pauca etiam portione prodit. Menstruum vero aquosum extrahit non tantum partes gummatosas, sed abripit etiam simul paucas particulas resinosas illis interspersas. Nam quando spiritus vini remanentiæ adfunditur, nil resinosi extrahit. In M. N. C. describitur extractum



ctum non purgans, quod *Paracelsus* balsamum perpetuum vocat.

12) *Folia*, radicibus mitiora, rarius vsurpantur, quia commode conseruari non possunt. *Borrichius* aquam ex illis purgantem destillauit, & licet auctores pluri-  
mi negent, purgantes particulas alembicum transcendere posse, *Zwelferus* tamen & *Ettmüllerus* adfirmant.

13) In collectione ellebori legitimi cauendum, ne *radices aconiti*, quæ venenosa qualitate mortiferæ sunt, fumantur. Colliguntur postquam defloruerunt, nempe mense Maio & initio Iunii.

14) Ceterum licet ὑπερβολαὶ odiosæ sint, quæ de vsu huius radicis mirifico feruntur, plus tamen in recessu habere videtur, quam vulgo creditur. Vti enim tum temporis floret, quando macrocosmus cis æquatores telluris languescens & morte quasi interceptus iacet; ita etiam microcosmo languenti & ægrotanti insignem opem adlaturus existimatur.

## 29. RADIX POLYPODII.

1) Nascitur in fago, corylo, quercu (quod optimum habetur) item in antiquis saltibus & rudibus saxosis.

2) Eligendum est recens, antiquum enim adstrictoriam nanciscitur efficaciam.

3) Principia habet salino-acida, mucilaginosæ & subtiliter terrea, vnde abstergit & colliquat.

4) Præter autem effectum purgantem, quem in primis viis exferit, absterforia quoque virtute se commendat in viscerum, abdominis æque ac pectoris pathematibus, e. g. in cachexia, ictero, infarctu glandularum mesaraicarum, malo hypochondriaco, tussi, asthmate, vitiis renum, anomaliis hæmorrhagicis.

5) Præscribitur vel in decocto vel infuso.

6) In officinis prostat *syrupus de polypodio*.

## 30. SENNA.

1) Est planta filiquosa, non tam frutex quam herba, quæ  
I magni-



magnitudine cubitum circiter refert, & cum *colutea vesicaria*, vulgo falsche Gennes-Blätter, quæ species in Gallia, Germania &c. reperitur, multum conuenit.

2) Decem enim sennæ species a *Langio* recensentur, quarum duæ tantum in vsu sunt, videlicet *Alexandrina*, quæ optima, folia habet acuminata & *Italica*, quæ obtusa protrudit folia, Alexandrinis virtute inferiora.

3) *Folia* sunt tantum in vsu, rarissime *folliculi*.

4) Eligenda sunt folia viridia, saporis subacris & amaricantis, bene siccata, integra, a stipitibus & folliculis libera, neque coluteæ foliis adulterata. Hæc enim in dupla dosi id modo præstant, quod sennæ folia in simplice.

5) Ad melanagoga quidem vulgo referunt hæc folia, sunt autem polychresta & catholica: omnibus subiectis & ætatibus conueniunt, blande purgant humores viscidos & serosos. *Wedelius* ait: *senna tota bona est, vniuersali vsu in morbis quibusuis, posita indicatione laxandi, interpretis est quasi generalis omnium purgantium & omnium morborum, adde & indiuiduorum, sicubi purgatio necessaria est.*

6) Taxant quidam plurimi auctores in senna, quod flatulentiam & tormina excitet, & hoc alii directe, alii per accidens fieri statuunt. Posteriori sententiæ fauent sequenti: vis laxatiua secundum *Etmüllerum* residet in substantia mucilaginosa, cui sal acre tamquam nucleus inclusum est. Mucilago subtilior (verbis *Etmülleri* volatilior) blande laxat, crassior autem insignia tormina excitat, quod & stipites, tamquam fibræ corticis faciunt, & hinc reiciuntur cum folliculis itidem inflantibus. Hinc folia non coquenda sunt, alias crassior mucilago simul extrahitur, sed infundenda tantum, neque ea nimis vetusta esse oportet, utpote iam subtili mucilagine, tamquam primaria laxante substantia, priuata.

7) Ad



- 7) Ad tormina (siue directe, siue per accidens a fenna metuenda) corrigenda adhibebant olim zedoariam zingib. anis. foenicul. melius autem fit per salia alcalina. Hæc enim iuuant extractionem, augent vim laxantem, humores spissos incidunt & vias aperiunt.
  - 8) Infusum fit optime menstruo aqueo, cuius odorem & saporem nauseosum hodie feliciter emendant per plantam Brasiliensem, *Yquetaya* dictam, quæ species est scrophulariæ & continet cum scrophularia nostra aquatica maiore (cum qua itidem correctio obtinetur) *vid. Acad. reg. Paris. 1701. memoir. p. 209. seq.* ubi integra de hac planta diss. legitur. Infundunt in aquæ feruentis lb. j. fennæ & scrophulariæ fol. ana ʒij. & liquorem frigidum propinant. Prius autem scrophul. in loco vmbroso per 12. dies asseruant & deinde folia ad perfectam exsiccationem vsque exponunt.
  - 9) *Decoctum* cum prunis vti vulgatissimum est, ita ad tormina vitanda leni coctione fiat & deinde non exprimatur.
  - 10) *Pulueres* fennati ob molem nauseosam & principium torminosum non separatim itidem reiciuntur.
  - 11) *Extractum* minus etiam vsitatum est.
31. CATAPVTIA.
- 1) Cataputia dicitur *minor* seu *labyrinthis minor*, ad differentiam *maioris*, quæ *vicinus* est.
  - 2) Lac fundit hæc planta instar esulæ, hinc ad esulas refertur & minor dicitur.
  - 3) Semina ex capsulis prodeuntia germ. Spring-Rörner dicuntur.
  - 4) Ob summam violentiam, qua & succus lacteus inspissatus & grana serum exturbant, & nulli lacti esulino cedunt, e foro pharmaceutico proscribuntur.
32. COLOCYNTHIS.
- 1) Colocynthis, quæ ab Arabibus *Al-Handal* vocatur, est cucurbita quædam filuestris, quæ ex India orientali & Persia ad nos defertur.



- 2) Sola huius pomi pulpa in vfu est, femina reiiciuntur.
- 3) Principia habet sulphurea, resinosa, acria & quia summe drastica est & humores serofos & viscidos valenter euacuat, robustis tantum subiectis & morbis contumacibus destinatur. Immo nonnulli pro infami & virulentissimo remedio hunc fructum habent, quod solo tactu & odore purget. *Pechlinus* vocat eum fructum sine exemplo amarum, fel terræ & pestem plantarum, quod herbas sibi vicinas instar veneni enecet!
- 4) Alii magni illum faciunt in morbis contumacibus, nempe epilepsia, apoplexia, cephalalgia, hemierania, lue venerea, adfectibus soporosis, hydropicis, catarrho suffocatiuo. *Helmontius* colocynthidem morborum chronicorum curatricem vocat egregiam, corrigendam vero *sale Paracelsi circulato*, additque confidenter, se per colocynthidem melius quam per decoctum lignorum curare velle luem veneream.
- 5) Accuratissima sane correctione opus est, ne ægri sub vfu infestæ huius plantæ idem exclamant, quod filii prophetarum, de *morte in olla* vociferabantur.
- 6) Veteres gummi arabico, bdellio, tragacantha, oleis &c. acrimoniam corrigere & obtundere conati, cum hisce corrigentibus colocynthidem introchiscos redigebant, qui arabico nomine *trochisci Al-Handali* audiunt, sed colocynthis gummoso inuolucro delinita, secundum *Helmontium*, est instar lupi domestici, quia data occasione ad ferociam suam naturalem redit. Hinc recentiores trochiscos ex colocynth. extracti part. i. panis triticei p. ii. & aliquot guttis nucis mosch. express. præparant, certiore hac ratione dosin sibi confecturi.
- 7) *Extractum* licet variis mensuris & artificiosis methodis a pluribus componi doceatur, id tamen, quod secundum *Ludouici* per aquam simplicem cum sale tartari præparatur, idem præstat quod alia eaque operosiora artificia. Etenim per salis tartari portionem  
copio-



copiosiore extractio promouetur, crassiores terrestres particulæ separantur, & extractum sub diuturniore digestionem amaritiam notabiliter amittit.

- 8) Analysin colocynthidis a *Boulduc* modo per destillationem, modo per fermentationem cum musto, modo per digestionem, modo per extractionem institutam refert *bist. acad. reg. memoir. p. 12. sq.* Conclusio est, optimum esse illud extractum, quod & gummosas & resinosas partes contineat, modo per longas digestionem, ad fermentationem tendentes, particulæ mucilaginosæ, irritationem efficientes, separatæ sint.
- 9) Licet autem optime præparatum sit extractum, non tamen per se debet adhiberi, sed aliis stimuli loco ad pauca grana adfociari.
- 10) Externe clysteribus stimulantibus miscetur *electuarium diacolocynthidos*, idem *oleum diacolocynth.* *Quercetani*. Hoc etiam suppositoria inungunt, vel ad vermes pellendos umbilicum illinunt unguento ex hoc oleo & felle taurino parato.
- 11) *Semina* mitius purgant. *Lobelius* semina maiore quam pulpam dosi sine incommodis exhibuit cum sufficiente purgante effectum. Ingrediuntur etiam semina *Freytagii* extractum purgans compositum.

### 34. CYCLAMINIS seu ARTHANITÆ RADIX.

- 1) Huius plantæ *folia* cum asaro conveniunt, radix est tuberosa, foris nigra, intus alba, saporis pungentis.
- 2) Principia habet salino-acria, vehementer colliquantia & stimulantia. Hinc circumscripti auctores ab usu interno huius radice dehortantur.
- 3) Externe duplex illud unguentum *ἐπόμφαλον*, quod in officinis prostat, umbilico solet adplicari, nempe de *arthanita maius* & *minus Mesue*, sed & hisce carere possumus.

### 35. ELATERIUM.

- 1) Est succus cucumeris asinini seu silvestris inspissatus.
- 2) Genuinum elaterium desumitur ex *fructibus*, iisque



mediocriter maturis. Nonnulli etiam ex radice, alii ex tota planta contusa succum exprimunt & inspissant.

- 3) Hæc planta in hortis nostris sæpius colitur, germ. dicitur. Spring-Rûrbis, vel vexier-Rûrbis. Si enim petiolum fortius tangitur, interiora fructus maturi, caro nempe cum lapillis impetuose profiliunt.
- 4) Fructus cucumere vulgari longe minor est, & glandem maiorem vix superat.
- 5) Principia habet salino acria, saporem acrem, amaricantem, non amarissimum, uti *Dioscorides* dicit, & nauseosum.
- 6) Optimum habetur, quod candelæ admotum accenditur, adulteratur amylo, quo etiam desideratam a *Dioscoride* albedinem conciliare illi allaborant. Corrigit autem auctores modeste *Dioscoridem*, quod succus viridescens albidus fieri nequeat, sed tantum *albicans*.
- 7) Succus ita causticus est ut Medici quidem ante triennium in usum illum non vocandum censeant. *Dioscorides* dicit, quod a bimulo ad decennium accomodate purget, sed dissentientes habet 1) *Mesuen*, qui illius virtutem purgantem ad tertium tantum annum extendit. 2) *Theophrastum*, *Plinium* & *Cardanum*, qui quo vetustior est, eo meliorem dicunt, ita ut ad ducentos annos possit seruari.
- 8) Elaterium raro solitarium sed aliis stimulandi scopo iunctum specificum in hydrope habetur.
- 9) Succus recens ad cochleari. propinatus fortiter purgat, externe tumoribus emolliendis scirrhis destinatur, in forma vnguenti vel cataplasmati. *Riuerius* efficaciam eius ad scrophulos vsque extendit.
- 10) Radix in taleolos discissa etiam purgandi scopo adhibetur, sed non cruda, verum in extracti vel essentiæ forma. Sed has minus vsitatas formulas mittimus.

### 35 EUPHORBIVM.

- 1) Veterum euphorbio destituti sumus, id autem quod  
sub



sub nomine euphorbii ex Asia ad nos fertur, est succus ex arbore ferulacea fauciatâ profluens. Nomen habere dicitur ab inuentore *Euphorbo*, fratre *Antonii Musæ*.

- 2) Hoc magma, quod gummatosa magis quam resinosa fouet principia, quidem conuenit cum signis illis, quæ *Dioscorides* de vero euphorbio tradit, effectui autem ipsius non respondet, præcipue quando *Dioscorides* dicit, euphorbium facere, ut pars corrupta a sana intra 24. horas abscedat. (*Vid. tab. chirurg. de carie.*)
- 3) Ob causticam suam acrimoniam, qua etiam solidas partes erodit & humores vehementissime commouet, inter purgantia haud referri meretur. Immo etiam externe caute adhibendum, quando vel paralyticis membris ad motum in iis reuocandum imponitur, vel errhinis miscetur. De exiguo in cariosis vlceribus vsu num 2) iam diximus præc. autem tabula allegata.

### 36. ESULA.

- 1) Generale nomen est omnium *tithymalorum*, qui inter plantas venenatas referri solent, & quorum species fere sunt innumeræ. Quæ autem officinalis est, vocatur *esula vulgaris maior* seu *tithymalus cupressinus*.
- 2) Hinc male quidam distinguunt inter esulam & tithymalum, quia non nisi patriæ & loci diuersitate differunt.
- 3) Continet esula succum lacteum, qui inspissatus scammonium æquat, & pro hoc sæpe venditur atque etiam in eundem stimulandi vsu vocatur.
- 4) *Radix*, & præcipue *cortex* illius radicis in officinis vsitatus ob vehementiam a circumscriptis auctoribus reicitur, licet *Mesué* & *Fernelius* admodum eius vsu extollant.

### 38. FRANGULA. Faulbaum. ALNUS NIGRA BACCIFERA.

- 1) *Cortex* radicis interior lutei coloris, non autem exterior fuscus, eligendus, qui ἄνω & κάτω serum potenter euacuat. Raro adhibetur.

2) *Al-*



- 2) *Alnus* rotundi folia, folio glutinoso, Erle. Si cortex non solum radicis sed & ramorum luteus aqua coquitur, etiam probe serum educit, sed & hic rari vsus est.
  - 3) Frangulæ cortex principia habet salina, acria, modice acida, copiose alcalina.
  - 4) Quoniam per vomitum & aluum potenter euacuat, præstat ab hoc remedio abstinere. Viridis cortex ἄνω & κάτω, siccatus per aluum tantum purgat.
  - 5) Scabiem & alios adfectus cutaneos cito curare dicitur, sed experientiæ non respondet.
39. GRATIOLA. GRATIA DEI. Wild-Murin.
- 1) Multæ & diuersæ sunt plantæ, quæ hoc nomine insigniuntur, nostra autem est *centauroides*, nempe planta parua, foliis exilibus, plus vel minus crenatis, flore purpureo, interdum albo, rarius luteo.
  - 2) Tam planta integra, quam speciatim folia insigniter ἄνω & κάτω serum purgant. Quamuis *Ettmullerus* non tantam eis vehementiam adsignet.
  - 3) *Bauhinus* vult, gratiolam hyssopo magis quam centauro adfinem esse.
  - 4) Præter virtutem purgantem adscribunt etiam gratiolæ viam alterantem & specificam anthelminticam. confer. *Tab. de emesi.*
40. GUMMI GUTTÆ.
- 1) Est lacryma seu succus gummoso-resinosus, ex arbore quadam indica collectus, saporis acris & coloris rutilo-flauescentis.
  - 2) Multis gaudet nominibus, frequentissimum autem est *gummi guttæ* & *gutta Cambodia*.
  - 3) *Gutta* nomen deriuant a barbaro illo *gutta*, quo podagram designant, ob virtutes quas in podagra habere creditur; *Cambodia* autem vocatur a regione Indiæ orientalis *Camboia* Chinæ proxima.
  - 4) Innotuit primum hoc vegetabile circa initium sæculi superioris, a quo tempore auctorum dissensus de hoc succo propemodum fuit infinitus. Alii enim pro



composito ex chelidonio maiore, scamnoneo & croco, alii ex scamnoneo & tithymalo, alii ex rhamno solutiuo &c. illum habuerunt.

- 5) Clarius autem innotuit hoc vegetabile ex descriptione *Bontii* de medicina Indorum. cap. 9. sequentibus verbis: nascitur in filuis gutta Cambodja, tithymali quædam species, in tantam altitudinem, vt cacumina magnarum arborum, quas hederæ instar amplectitur, æquet; crassities eius est facile brachii humani &c.
- 6) Modus præparandi sequens est: succus ex vulnerato hoc vegetabili destillans aqua soluitur, & deinde in massam puram rutili coloris redigitur.
- 7) Notabile est de hoc succo, quod serofas humiditates, quas excernit, non tingat, licet colorem possideat valde tingentem.
- 8) Habet principia salino-sulphurea, satis acria, quapropter hoc gummi ad remedia drastica referendum est. Hinc raro per se adhibetur crudum, ἄνω enim & κάτω purgat: correctum autem mitius agit.
- 9) Corrigitur vel fumo sulphuris, ad modum scamnonei sulphurati, vel spiritibus acidis (Spiritus vitrioli, licet bonum corrigens, ingratum tamen virorem ei conciliat) vel tritura cum guttis aliquot olei cuiusdam destillati, vel cremore tartari, &c. Hac enim ratione partes resinose disiunguntur seu discontinuantur, vt tanta violentia agere non possint. Et sic ad gr.v-x. dari potest. Etsi etiam, vbi aliquot guttis spiritus cuiusdam acidi, e. g. vitrioli vel sulphuris correctum est, absque noxa sumitur.
- 10) Frequentius stimuli tantum loco adhibetur, & cum extracto panchymagog. scammon. jalapp. &c. miscetur. Vfus eius frequens est in hydrope.
- 11) Præparata, quæ prostant in pharmacopoliis, respiciunt maximam partem correctionem, e. g. *gummi gutta vitriolatum Mindereri*, quod *Zwelferus* perstringit, *Schroeckius* autem propugnat, item *magisterium*, quod alii simplici spiritu vini cum modico spiritus



vitrioli additamento, vel cum tinctura fantali rubri tincto, vel oleo tartari &c. præparant.

- 12) *Boulduc* præter varia alia experimenta, quæ de gummi guttæ instituit, sequentem præcipue laudat præparationem: gummi guttæ in petia ligatum pani calido, e clibano modo extracto, includitur, & per 24. horas in loco calido relinquitur. Postea gummi exentum puluerisatur, & in petia denuo ligatum pani calido includitur, idque aliquoties adhuc repetitur. Hoc modo præparatum gummi guttæ absque violentia purgare adserit. *Vid. Hist. Acad. Reg. Memoir. p. 132.*

#### 41. IALAPA, GIALAPA, IALAPIVM.

- 1) Est radix oblonga, crassa, saporis acris, quæ in noua Hispania copiose prouenit, & in taleolos concisa inde ad nos deportatur.
- 2) Eligenda est, quæ exterius nigricans est, interius autem aliquo modo rufescens, & quæ resinosas particulas circularibus striis distinctas, copiose ostendit, non cariosa sed ponderosa, & candelæ admota flammam concipiens.
- 3) Nomen habet a Xalapa, portu nouæ Hispaniæ. Dicitur etiam *Mechoacanna nigra*, ad differentiam *albæ*, quæ superioribus sæculis admodum clara fuit, Ialapa autem inuenta laudes illius obscurauit.
- 4) *Tournefort elem. botan. p. 105.* tres ialapæ species recenset, quarum vltima, quæ *ialapa fructu rugoso* dicitur, officinalis est & a prima specie, quæ *flos mirabilis Peruvianus*, vel a *Baubino solanum Mexicanum flore magno* vocatur, omnino distincta est. Errat igitur *Etzmüllerus*, qui ex radicum & virium aliqua conuenientia vnâ eandemque esse radicem statuit.
- 5) Principia habet copiosa sulphurea seu resinosa, parcius salino-alcalica, acria, ita vt etiam puluis inter terendum naribus exceptus, instar aliorum fortium purgantium, sternutationem moueat.
- 6) Est catholicum & panchymagogum purgans in omnibus



bus casibus, in quibus purgatio electiva seu perfecta indicatur, licet in siccioribus non ita, uti in succulentis, efficaciter operetur. Speciatim colliquat & purgat humores serofos, hinc in hydrope præ aliis laudari solet. In omnibus vel mitius vel tamen mediocriter operatur.

- 7) A mala autem vel præparatione, vel nimis larga dosi, vel neglectione sufficientis resinarum partium dilatationis, tormina & alia incommoda inducere valet.

Quibus quidem præcauendis sequentia inferuient:

- a) sola non propinetur, non quod sit violenta, sed quia est resinosa, adeoque indiget resolutione seu latissima sui expansione & discontinuatione. Nam resina ab humoribus corporis nostri, non resolvitur. Vnde per intestinorum tractum æqualiter distribui nequit, & vel prorsus sine effectu præterlabitur, licet maior dosis adhibita sit, vel vni tantum regioni adhærens irritationem nimiam, indeque tormina, hypercatharsin &c. concitat.

- b) Probe hinc notetur axiomata *resinæ non agunt nisi solutæ seu dilatatæ*. Obtinetur hæc dilatatio vel spiritu vini, qua solutione resinæ exigua dosi plus operantur, quam sine illa in maiore dosi propinatæ; vel cum oleosis aut emulsiuisteritur, e. g. vna vel altera guttula olei destillati, item cum vitello oui, nucem moschata, præcipue etiam cum amygdalis dulcibus, qua emulsiua præparatione tenerioribus aliquot grana cum effectu & commoditate propinantur. Vel denique admixtione salinorum, cui rei eximie velificantur tartarea. Sic v. g. Jalap. puluerifat. gr. xv. tartari vitriolati vel cremoris tartari  $\mathfrak{ss}$  pro dosi propinata tutissimum edunt effectum.

- 8) In officinis præter pulverem prostat *extractum*, quod quocumque etiam modo artificioso præparetur, languidum tamen est, & *magisterium*, quod nil aliud est quam resinosa pars per spiritum vini extracta & aqua



quacumque præcipitata; hinc vulgo *resina* adpellatur. Porro *diacydonium pellucidum ialappæ* dos. ʒij - ʒß  
specificum ialappæ dos ʒj - ʒß.

42. IRIS NOSTRAS ET FLORENTINA ILLYRICA.

- 1) Iris est vel *communis* seu *nostras* vel *Florentina*, *Illyrica*.
- 2) Vtraque gaudet principiis nitroso-alkalinis, parcius sulphureis & terra mucilaginosâ.
- 3) Nostras est gladiolus cæruleus maior in pratis & aruis crescens hydragogis adnumeranda. *Succus* ad ʒj - ʒij cum iusto moderamine propinatus in adfectibus œdematosis & cachecticis pertinacibus vsum præstat. Infantibus pro lactis vitio ad grana duo propinari solet.
- 4) *Oleum irinum*, quod ex iride communi præparant, in clysteribus abstergentibus & stimulantibus vsum habet.
- 5) *Florentina* & *Illyrica* non specie sed natali solo differunt. Præstantiorem ducunt mercatores Florentinam Illyrica seu Sclauonica, quæ Venetias & inde ad nos fertur, quia licet Illyricam haud vincat efficacia, tamen candidior adparet ac fragrantior.
- 6) *Florentina externe* adhibita egregie resoluit & simul roborat. Hinc in tumoribus non solum sic dictis frigidis seu mucidis, sed & inflammatoriis cum effectu propinatur. Errhinis etiam misceri solet, item cariei destinatur a quibusdam. *Interne* satis efficaciter quidem resoluit, atque hinc viscidis pulmonum humoribus incidendis, tussi & asthmâti, phthisi quoque cum multis encomiis destinatur, sed optatum effectum non præstat. Interea tamen vnum vel alterum granum infantibus, pectoris oppletionem mucida adfectis, cum vfu exhibetur.

43. MEZEREVM seu LAVREOLA.

- 1) Est frutex seu arbuscula, crescens in hortis & in principio veris flores proferens, germ. Kellerhalß, Seidelbast. Vocatur etiam *daphnoides*, *thymelca*, *piper montanum*.



*tanum*. Laureola dicitur quia folia laurinis quodam modo gemina protendit.

- 2) Baccæ vocantur *grana* seu *cocci gnidii*, quæ rarissime in usu sunt, rarius cortex & radix. Ob vim enim summe drastringicam hoc remedium ab omnibus fere damnatur.
- 3) In officinis prostant *pilule de mezereo*, quæ itidem reiciuntur. Vis enim drastringica huius remedii per acida, quæ alias adhiberi solent pro scopo corrigendi, non obtunditur.

#### 44. RICINVS.

- 1) Præter multas ricini species duas in foro pharmaceutico usitatas nominamus. *Vulgaris* dicitur etiam *cataputia maior* ad differentiam *minoris*: Vid. *cataputia*: item *planta Christi Wunderbaum*, quod speciose & sine pari fere crescat. Ricinus dicitur, quod grana eius figuram animalis ricini, germ. Hundes-Mücken, repræsentent.
- 2) In hortis colitur & est planta annua, *Cretensis* autem in multos annos durare & in magnam altitudinem adfurgere perhibetur.
- 3) *Americanus* dicitur etiam *Curcas*, *nux catbarta*, *grana tilli* vel *tiglia*. Est arbor, quæ figura & magnitudine ficum quodam modo refert, in quolibet fructu (qui instar iuglandis est) sunt tres nuclei pineis similes, cortice nigro.
- 4) Ob summam vehementiam, qua semen ricini utique *ῥῖνω* & *ῥάτω* purgat, usus eius a Medicis reicitur.

#### 45. SOLDANELLA seu BRASSICA MARINA Meer-Winden, Meer-Kohl.

- 1) Nihil ad similitudinem habet cum brassica; Winden vero vocatur quia in maritimis locis hinc inde serpit & flores dispergit instar voluuli.
- 2) Hæc planta ubertim crescit in locis maritimis Italiæ & Galliæ, unde folia eius ad nos exportantur.
- 3) Quatuor soldanellæ species sunt, e quibus illa tantum



officinalis est, quæ *minor* dicitur. Præscribitur in infuso vel decocto ad 3j - 3ij. rarissimi autem est vsus.

- 4) De Soldanella *Alpina* vid. *Rulandus lun. apolog. contra Oberndorferum* p. 67. vbi ad hydropem & icterum illam magnopere extollit atque soldanellæ marinæ anteferendam putat.

46. SCAMMONEVM.

- 1) Est succus resinofus, ex radice Scammoneæ Syriacæ collectus, continens duas partes resinofæ & vnam tantum gummosæ substantiæ. Deriuatur ἀπὸ τῆς σκαμπτεν, fodere, excavare. Illud enim scammonium, quod ex radice excavata & in locum frigidum reposita exfudat, melius est quam quod ex tota planta exprimitur.
- 2) Plura sunt vegetabilia, quæ scammoniei nomine veniunt, nostra autem species conuoluuli Syriaci reperitur etiam in insula Creta.
- 3) *Dioscorides* scammonium laudat *pellucidum*, sed hoc hodie non reperitur, eam haud dubie ob causam, quod non ad mentem *Dioscorides* amplius colligatur, verum ope torcularis exprimatur, atque eo ipso impuras partes, pelluciditatem auferentes, habeat commixtas.
- 4) Optimum est, vti superius dictum, quod ex incisa radice fudet, imprimis quod ex Antiochia adfertur, spongiosum, friabile, leue, cito liquescens, madefactum lactescens, linguam non exurens. Hæc enim mordacitas, si præsto sit, testatur, tithymali succo adulteratum fuisse.
- 5) *Sebizius* & alii scammonium tamquam pessimum & nocentissimum pharmacum descripserunt. Vnde multis in hunc vsque diem exosum est medicamentum. Sed si experientiam consulamus, planum est, legitime præparatum, parca & stimulante tantum dosi datum habita subiectorum & diuersarum circumstantiarum iusta ratione catharticum esse non contemnendum.

6) Li-



- 6) Licet etiam succo esulæ adulteratum sit scammonium, *magisterium* tamen illius vi sua rodendi vix illam, quæ magisterio ialapæ inest, superabit.
- 7) Præparant non nulli e scammonio *pulverem*, quem *polychrestum* vel ob colorem *rubinum vegetabilem* vocant. E variis præparationibus illa optima est, quæ instituitur cum fantali tinctura per vitrioli & simul vini spiritum parata. Acida enim quando sulphureis menstruis iunguntur optime solvunt succos, qui ex gummosa & resinosa parte constant. Et quoniam in hoc pulvere particulæ gummosæ resinosas disiungunt & dilatant, atque eorum conglobationem sic impediunt, facilius miscetur aliis compositionibus quam *magisterium*.
- 8) *Magisterium* seu *resina* scammoniei (pulvis Syrius uti & ipsum scammonium a non nullis vocatur) largiore quantitate quam ex ialapa obtinetur. Dilatari debet ne tormina excitet, uti de *resina ialapæ* superius diximus. Præscribitur ordinarie paucis granis ut stimulant & quidem in variis formis.
- 9) Tormina quæ a parte gummosa rodente expectanda sunt, optime per salium additionem præcauentur.
- 10) Quoniam scammonio malignitatis nota inusta est, variorum illius correctiones excogitatæ sunt, quas auctores in tres classes distribuere solent.
  - a) *Prima classis* exhibet correctiones, quæ vim causticam scammoniei potius ad tempus occultant quam vere temperant, præter ea impuritates in illo relinquunt. Huc pertinet, quando scammonium malo cotoneo excavato inclusum & pasta circumductum in clibano coquitur, vel quando succis citri, rosarum, cydoniorum imbuitur. Præcipue autem huc spectat sulphuratio notissima, unde *scammonium sulphuratum* audit; vocatur etiam *diagrydium* vel melius *diacrydium* sulphuratum, item quando spiritus vitrioli vel sulphuris ei adspargitur, & post ea guttulæ quædam olei fœniculi vel  

alius



alius carminatiui adduntur. Quoniam autem per acida vis purgans non corrigitur sed castratur, tantum virtutis amittitur, quantum acidi accedit.

b) *Alteraclassis* offert correctiones, quæ magnam resinæ partem disperdunt, & portionem tantum gummosam, quæ tamen ob vim rodentem minus tuto ægris propinatur, conseruant. Huc spectant, quando aqua vel simplice vel destillata, idem succis acidulis, phlegmate vitrioli, succo citri, cydoniorum &c. extractionem scammoniei suscipiunt. Item quando emulsionem exinde parant, vel cum decocto glycyrrhizæ corrigunt.

c) *Tertiaclassis* habet correctiones, quæ labores & sumtus frustra augent e.g. quando extractum ex diacrydio cum spiritu vini parant, atque ei aliud e variis aromatibus paratum iungunt, quod *extractum diacrydii aromatizatum* vocant. Sed uti extractum minore labore ex ipso scammoneo paratur, quam si prius diacrydium & ex hoc magisterium conficiatur, ita aromata admixta neque corrigunt, neque vires extracti exaltant. Hinc salia alcalina & spiritus ardentes, optimi correctores censentur e.g. essent. scammoniei ad ʒj - ʒij. blande laxat.

#### 47. AURVM FVLMINANS.

- 1) Est species calcis solaris per solutionem auri cum aqua regia armoniacali, tum præcipationem cum oleo tartari per deliquium & edulcorationem cum aqua simplici paratæ.
- 2) *Fulminans* dicitur, quod, calorem externum sentiens fulminis instar strepitum edat, & cum impetu quæuis adstantia conquasset.
- 3) Quando autem aqua regis loco spiritus falis armoniaci cum spiritu falis communis paratur, calx hæc non fit fulminans.
- 4) Sic etiam fulminans vis cauetur, quando inter terendum aliquot guttulis spiritus falis vel olei sulphuris hæc



hæc calx humectatur. Sic damnum sub tritura metuendum simul aueritur.

- 5) *Cardilucius* adferit, præcipationem melius succedere, si loco olei tartari per deliquium spiritus falis ammoniaci ex æqualibus partibus falis armoniaci & ciner. clauell. factus, sumatur.
- 6) Quo sollicitius calx edulcoratur, eo magis vim fulminantem amittit; alias leui calore immo tritu accenditur & perditur. Quocirca in exsiccando circumspeditione opus est, ne supra fornacem ponatur & calore leuiter excedente periculum aut detrimentum inferat tam facilis quam vehemens displosio. Tutius igitur sub umbra vel calore hypocaufti, quidquid humidi ei adhæret, abigitur.
- 7) Aetiologia huius phænomeni, quod hæc calx fulminet, & insuper contra naturam ignis ac pulueris pyrii non tam ad superiora quam potius subiacentia vergat, eruditorum ingenia quouis tempore multum vexauit. Prius quidem (quod fulminet) vno ore particulis nitrosis regeneratis & a flamma accensis acceptum ferunt, posterioris autem phænomeni causam in auri grauitate solent quærere, cuius mole salia compressa ad inferiora cogantur; sed puluis pyrius ordinarius maiora quam aurum fulminans pondera sursum proiicit.
- 8) Mittimus hæc ad chemiam curiosam, & hic tantum adiciamus vsum medico-pharmaceuticum. Principium in hac compositione acidum, quando non prorsus per edulcorationem sublatum est, aluum stimulat a gr. vj. ad ʒß. calx vero exactius edulcorata diaphoresin tantum promouet. Vomitus aliquando excitat, & tum a cupro non satis purgatum est, quod pertinaciter auro adhæret.
- 9) Laudari solet in epilepsia infantum a torminibus alui excitata, si leniteredulcoretur a gr. β. ad gr. j & cum tart. vitriolat. gr. iv. mixtum sit. Sic enim lac vitiosum



sum euacuatur & caussa talium conuulsionum præscinditur.

48. LAPIS ARMENVS.

- 1) Est substantia lapideo-metallica ex paruis quasi grumis constans, colore cæruleo-viridi, vnde cum chryso-colla natiua adfinitatem habet. Levis est & friabilis.
- 2) Olim ex Armenia ad nos ferebatur, hodie vero etiam in Germaniæ & Bohemiæ argenti & auri fodinis reperitur. Raro tamen in officinis ostendi potest. Dicitur germ. *Berg-blau*.
- 3) Vitriolicæ est indolis & more cupreorum inferne & superne purgat.
- 4) Olim vsus eius fuit celeberrimus & speciatim atræ bili veterum opponebatur, hodie autem in praxi euiluit, cæterum pictoribus in vsu est & color exinde paratus *azureum* vocatur.

49. LAPIS LAZVLII.

- 1) Multum cum lapide Armeno conuenit. Est enim substantia lapideo-metallica & quidem cupræ seu vitriolicæ indolis, sed vti Armenus lapis coloris magis viridis, sic Lazuli saturate cœrulei est, argenteis & aureis punctis interspersis coruscans, saporis plus est adstringentis quam Armenus. Germ. *Berg-Lasur*, *Lasur-Stein*. Color Armeni perit in igne, Lazuli durat.
- 2) Ex pluribus speciebus optima est, quæ *Vltramarina* dicitur seu quæ ultra mare ex Cipro, Asia, Africa ad nos tranſuehitur. Fodinæ germanicæ etiam hunc lapidem largiter proferunt. Qui ex fodinis auri prouenit e.g. Hungaricis, Transylvanis, a non nullis expetitur ad aurum ex eo separandum.
- 3) Facultates nocentes, lotionem licet frequenti non emendabiles, plurimi illi adscribunt, & hinc foro practico excludunt. *Wedelius* autem vires purgantes leues & innoxias illi tribuit. Immo sunt, qui plus huic lapidi quam elleboro fidendum esse putant in adfectibus melancholicis & elephantiasi. Porro antispasticam,



cam, antiictericam, antinephriticam virtutem ei ad-  
signant & speciatim contra podagram retropullam  
laudant, licet sine fundamento.

4) *Pilule* de lapide Lazuli etiam exoleuerunt.

§0. MAGNESIA ALBA.

1) Est calx alcalina seu puluis albissimus, qui paucos ante  
annos demum inclaruit, & paratur ex lixiuio nitra-  
riorum, aus der so genannten Mutter-Lauge, euapo-  
rando, calcinando, edulcorando &c.

2) Habet effectum abstersiuum & blande laxantem, dos. ʒj-  
ʒij & plus.

MERCVRIALIA. De his subsequantibus dicetur.

Sic etiam de NITRO & TARTARO alibi dicemus.

§1. SAL ANGLICANVM seu *Epsbarnense* vulgo d' *Epsom*.

Conuenit in principiis cum sale *mirabili*, quod ad sali-  
um mediorum classem pertinet, acidoque vitriolico &  
terræ alcalicæ salis communis suam originem debet ac  
mixturem. Effectum habet abstersiuo laxantem, di-  
gerentem.

§2. SAL EGRANVM.

Vti salia neutra & tartarifata aut sal mirabile, si largior dosis  
sit, aluum ducunt; ita hoc sal ex acidulis Egranis euapo-  
rando & crySTALLIFANDO paratum & eadem fere principia  
cum sale Anglicano & easdem virtutes laxantes obtinet,  
ita vt extra locum commode auehi & vsum quoque ali-  
bi adferre possit non pœnitendum.



TABVLA IV.

DE

DIAPHORESIS SEV SVDAZIONE.

I. DEFINITIO.

*Diaphoresis* est euacuatio per peripheriam corporis porosam,  
L 2 qua



qua humores serosi, siue superflui, siue noxii, & quidem vel transpirationis insensibilis, vel aquosi sudoris forma expelluntur. Deriuatur a *διὰ*, per & *φέρω*, fero.

### III. DIFFERENTIA.

#### I. Diaphoresis est.

1) vel *spontanea*, seu *naturalis*, quam natura sine artis auxilio in salutarem finem suscipit, atque hæc a sudoribus hecticis passivis & colliquantibus distingui debet.

2) Vel *artificialis*, quæ aptis remediis in eundem salutarem finem prouocatur, & de hac præcipue hic nobis sermo est.

#### 2. Vtraque

1) est vel *halitua*, quæ fit per transpirationem *insensibilem* & *diapnoë* adpellatur.

2) Vel *aquosa* quando visibilis sudor excernitur, & hæc pro aëris, adsumtorum, motus corporis & cooperaturæ diuersitate multum variat.

3. *Materia*, quæ per hanc euacuationis speciem eliminantur, sunt duplicis generis: naturales aliæ, aliæ præter naturam; in eo autem conueniunt, vt sint vaporosæ tenues plus vel minus volatiles, nempe tam pure aquæ quam bilioso-oleosæ & salino acres in volatilem subtilitatem extenuatæ.

4. Non tantum *qualitates* humorum *noxia*, agiles & subtiles per sudorem eiiciuntur, sed & *quantitas* sanguinis, dum in serum resoluitur, hac ratione imminuitur.

### III. INDICANTIA.

1. Diaphoresis *halitua* seu *diapnoica* vti est subsidium saluberrimum, quo natura corpus suum quotidie a noxiis materiis repurgat, ita & in plurimis morbis salutari effectum per artis auxilium promouetur.

2. *Aquosa* autem sudatio paucissimis morbis opportuna & necessaria est. Immo licet non adeo impetuose, sed moderate tantum instituat, angustioribus tamen limitibus circumscripta est; id quod contra vulgatissimum abu-



abusum probe notari meretur. Locum autem præcipue habet.

- 1) *in ætate congrua*, quæ infantilem perpetuo fere excludit.
- 2) In ipsius naturæ inclinatione, habitudine corporis ad sudorem facili & peruia & consuetudine, quæ multum hic valet. Præcipue autem constitutio sanguineo-phlegmatica huic excretioni quadrat; in hac enim non tantum abundant humores serosi, sed & habitus corporis est porosus, atque ad largiorem exhalationem periphericam admodum idoneus.
- 3) In *plethora moderata*. Vbi autem *in signi* vbertate sanguis luxuriat, ibi non nisi summa prudentia tales commotiones sudoriferæ suscipiendæ sunt.
- 4) In *dyscrasia* humorum salino-sulphurea.
- 5) Speciatim *in sine paroxysmorum febrilium* tam intermittentium, quam acutarum. Nullæ enim febres, secundum veterum & hodiernorum practitorum observationem, sine omni, sed pleræque cum notabili sudore salutariter solvuntur. De febribus autem *exanthematicis* legantur *cautelæ*.
- 6) In *febribus lentis*, in quibus natura viam monstrat per largos sudores: in his enim materia magis præparata est, quam in aliis febribus. Moderate autem omnia sunt prosequenda.
- 7) In *grauantibus & tendentibus artuum molestiis* (vulgo lassitudinibus) quæ chronice adfligunt, & spasmos arthriticos minantur. Notandum autem est, prudentem corporis motum plus hic valere ad sudorem feliciter promouendum, quam vlla alia remedia. *Conf. observatio Hildani*, in proprio corpore facta; item alia illius observatio de arthritide inueterata, tormentis corpori adinotis, vel per torturam sanata, *cent. 1. num. 79.*
- 8) Denique in omnibus morbis qui a *feri impuritatibus* dependent, e. g. in scabie, lue venerea, aqua inter cutem, in primis anasarca.



## IV. INDICATA seu REMEDIA.

## A. VEGETABILIA.

Rad. Angelicæ

Anthoræ

Ari

Bardanæ

Bistortæ

Caryophyllatæ

Carlinæ

Chinæ

Contraieruæ

Dictamni albi

Doronici

Enulæ seu helenii

Galangæ

Gentianæ

Imperatoriaæ seu o-  
strutii

Lapathi acuti

Leuistici

Morfus diaboli seu  
succisæ

Olsnitii

Petasitidis

Pimpinellæ albæ

Sarsaparillæ

Scorzonæ

Tormentillæ

Valerianæ

Vincetoxici

Zedoariæ

Zingiberis

Herb. præcedentium radi-  
cum pleræque,  
item

Beccabungæ

Cardui benedicti

Capilli veneris

Centaurei minoris

Chamædrios

Chærefolii

Cochleariæ

Epithymi

Fumariæ

Millefolii

Nasturtii

Origani

Rutæ

Saluiæ

Scabiosæ

Sedimurarii

Serpilli

Scordii

Trifolii fibrini

Verbenæ

Flor. Acaciæ

Calendulæ

Hyperici

Saluiæ

Sambuci

Scabiosæ

Tiliæ

Ulmariæ

Semina Aquilegiæ

Cardui benedicti

Cardui Mariæ

Napi

Rutæ

Baccæ Juniperi

Lauri

Paradisi

Sambuci

Cor-



Cortices Aurantiorum	Terra Sigillata Strigenfis
Citri	Lemnia
Succus Citri	Melitenfis
Ligna Fraxini	Samia
Iuniperi	Gemmæ e. g.
Sanctum	Carneolus præparata
Sassafras	Granatus præparata
Santalum album	Hyacinthus præparata
citrinum	Rubinus præparata
& rubrum	Smaragdus præparata
Camphora	C. ANIMALIA.
Aqua Card. benedict.	Conchæ præparatæ
Flor. acaciæ	Cornu cerui vftum & philo-
Sambuci	fophice præparatum
C. C. citrata	Spiritus & fal volatile
Galegæ	Formicarum fpiritus
Scordii	Hirci fanguis
Scorzoneræ	Lapis bezoardicus orientalis
Theriacalis	& occidentalis porcinus
Chærefolii	Lumbrici terrestres
Plantaginis	Perlarum mater
Scabiofæ	Lucii pifcis mandibulæ
B. MINERALIA.	Cranii humani fal volatile
Antimonii ceruffa	Sanguinis humani fal volatile
Clyffus fulphuratus	Serpentum & viperarum ca-
Flores	ro, fal volatile & officula
Regulus medica-	Vnicornu verum & foffile
lis	D. COMPOSITA.
Sulphur	Effentia alexi pharmaca Stahlii
Antimonium diaphoreticum	Lignorum
Bezoardicum	Fracastorii diafcordium
minerale fimplex &	Liquor cornu cerui fuccina-
compositum	tus
Corallia præparata.	Miftura fimplex
Mercurius diaphoreticus	Theriaca, Mithridatium
Sulphuris Flores	Tinctura bezoardica Micha-
Spiritus	ëlis.



## V. MODVS OPERANDI.

Diaphoretica promouent sudorem

1. vel diluendo, incidendo, resoluendo, attenuando sanguinem spissum, qui secessioni & fluxui partium serosarum impedimento est. Huius census sunt decocta calida, pleraque vegetabilia superius indicata, quæ principia habent resinoso-salina & ratione graduum in calidiora & temperatiora distinguuntur.
2. Vel commouendo, quæ cum prioribus *positiue* sudorem euocare dicuntur.
3. Vel temperando, præcipitando & inspissando subtiles & orgasticas partes humorum. Hac enim ratione serum agile, quod alias a celeri sanguinis fluxu simul abripitur & propter subtilitatem colatoria secernentia crebro subterfugit, facilius secedere potest. Atque hæc *priuatim* agere dicuntur, & profunt illis, qui sanguinis ebullitione laborant. Huiusmodi sunt terrea absorbentia, acida, nitrosa.
4. Vel demulcendo naturam & nimios motus placando; de qua re insignis est obseruatio *Schellhammeri* in A. N. C. dec. 2. aphorism. 5. Huc pertinent anodyna correctæ, quæ naturam ad placidas exonerationes inuitant, speciatim pilulæ *Wildegansii*, quæ nihil aliud sunt, quam laudanum opiatum correctum.
5. Vel relaxando peripheriam corporis; id quod non tam per remedia mere humectantia, quam per externa humido-calida obtinetur.
6. Cæterum notandum, qualitates materiarum ad sudorem absolute promouendum non sufficere. Vti enim is sine adsumtis remediis sæpissime excitatur, ita in quamplurimis procedere recusat, licet remedia diaphoretica largiter ingesseris, cuius rei paroxysmi febriles primis horis exæstuantibus testimonium exhibent luculentissimum.
7. Et sic ipsa natura est causa efficiens sudoriferæ excretionis. Hæc enim superficiem corporis relaxat, hæc poros aperit & humores ad circumferentiam dirigit. Remedia autem



autem augendo motum intestinum excitant naturam, vt hæc motum progressuum, qui solius naturæ actus est, intendat, atque hac ratione sudorem propellat.

8. Hinc licet remedia externa humida e. g. balnea, peripheriam corporis omnino relaxent, non absoluunt tamen vniuersum negotium sudoris. Etenim terrorem repentinum largissimo sudori statim reprimendo parem esse quis ignorat?

9. Multo minus calor siccus externus per se sudorem promouere potest, sed infert tantum sensum molestum, qui naturam excitat vt humoribus ad peripheriam directis hanc molestiam mitigare & auertere conetur.

11. Sic etiam interne res se habet; siquidem particulae agiles, quas medicamentum continet, & particulae sanguinis motu intestino resolutæ, satis causæ vel occasionis præbent circumspectæ naturæ, vt motum sanguinis progressuum mox augeat, & noxias illas moleculas, diuturniore mora & sui incremento reliquum bonum sanguinem corrupturas, euacuet, siue per halituosam, siue per aquosam sudoris speciem pro remediorum agiliū, particularum peccantium, temperamentorum, vel reliquarum circumstantiarum diuersitate.

## VI. MODVS PROPINANDI.

Hic inuoluit

1. *corporis necessariam præparationem,*

1) per placidam alui solutionem: adstricta enim aluo non conuenit sudorem promouere.

2) Per humorum sudore excernendorum correctionem.

Vnde si humores nimis spissi sunt, necesse est, vt prius resoluantur, vel, si admodum tenues & agiles, inuoluantur; id quod veteres in febribus *coctionem* vocauerunt.

2. *Temporis opportuni electionem,*

1) tempus sudori maxime conueniens est matutinum, ab hora III. ad IX. Tum enim coctio & secretio quorum libet excrementorum in corpore maximam partem peracta est.

M

2) Su-



- 2) Sudatio, qua corpori in futurum prospicere, idque ab imminentibus maioribus malis prae munire volumus, circa æquinoctia optime instituitur, nisi quidem natura alio tempore viam maioremque commoditatem ostendere videatur. Valet enim hic, si vniquam a libi, regula: Medicus naturam imitetur & tempora illius opportuna obseruet.
- 3) Quæ vero diaphoresis ad curationem suscipitur, illius tempus pro morborum indole variat; generatim autem tenendum est, in principio mali nos eo haud festinanter progredi, sed attentione adhibita naturæ ductum ac propensionem sequi oportere.
- 4) In febribus enim sudores spontanei non primis initiis neque sub ἀκμῇ æstus, sed in declinatione paroxysmi prodeunt. Vnde & eodem tempore commodissime sudorem excitandum, & tum vsum analepti-  
corum succis acidis citri &c. modice imbutorum, præcipue in acutis, & peracutis coniungendum esse meminerit Practicus.
- 5) Verbo: In peracutis in principio moderati & per totum morbi decursum continuandi sudores conueniunt, in aliis benignis & intermittentibus deferuescente paroxysmo.
- 6) Item in febribus inflammatoriis sub initium statim prouide adiuta & perpetuata diapnoë eum vsum adfert, vt ad optatam staseos discussionem, vtpote, quæ lente & pedetentim, ne utiquam autem præcipiti impetu succedit, eo facilius perueniamus.
- 7) Sic etiam in morbis a feri & lymphæ impuritatibus productis e.g. Scabie, hydrope, ictero, lue venerea, sudores sub initium promoti non conducunt. Ideoque materia prius præparanda & tum demum exhausti-  
enda est.

### 3. Diaphoreses gradum.

- 1) Vti natura plerumque ab omni impetu abhorret, ita Minister ipsius idem moderamen seruare debet, atque ita per lenis sudoris progressum durabilem reuera



tantum efficiet, quantum alias magna vi paucis horis vel frustra tentabit, vel non sine multis incommodis & exasperatione morbi molietur. Hoc pacto etiam tum vires custodiuntur, tum graue illud periculum, quod exanthemata chronica & acuta sudatorio impetu expulsa facileque retrocedentia creant, antevertitur.

2) Speciatim probe considerandum est, quinam sudoris gradus cuius morbo, individuo, temperamento & ætati conueniat; num diapnoë halitiosa, an diaphoresis placida, an sudatio largior & vehementior.

3) Sice. g. malignæ amant diapnoën, quia materia peccans est subtilissima & agillima, halituosam; reliquæ acutæ diaphoresin placidam & constantem, lues venerea mitioris gradus & phlegmaticorum anasarca largiorem sudationem.

4) Cholericis & melancholicis diapnoë conuenit, regimen autem sudatorium quod phlegmatici & sanguinei melius perferunt, ipsis infensum & certo nociturum est.

#### 4. *Regimen sub sudore.*

1) Quemadmodum transpiratio naturalis corpus nostrum optime defendit & sanum tuetur; ita coactum regimen si non plures turbas aut detrimentum, certe tamen magnam anxietatem plurimis adferre comperitum est.

2) Tranquilla continentia multum promouet sudorem, iactatio corporis vero ventilatione aëris refrigeratoria eundem interrompit.

3) Neque negligenda est debita corporis obtectio sub qua, si euacuatio congruenter succedere detrectet, in subsidium vocandæ sunt frictiones.

4) Calor humidus præferendus est sicco, vti formulæ fluidæ siccis. Hinc in morbis chronicis venereis hydropicis sudor commode promouetur per balnea decocta, lateribus calidis adfusa, spiritum vini accensum &c. vbi simul interne conuenit potus calidus aqueus



us e.g. thée, coffee, ne viæ exarescant & humores condensentur. Potum enim denegare est absurdum.

5) In chronicis, grauatiuis e. g. hypochondriacis, arthriticis, scorbuticis sudor sub motu corporis excussus vtilior est. Is vero cum leniter inchoandus, gradatim augendus & cum sudor erumpit, placida remissione sensim minuendus, sæpiusque iterandus est, coniuncto, si necesse videatur, vsu radicis ari, simplici spiritu vini extractæ.

6) In acutis quies & mediocris obtectio sufficiunt ad diaphoresin prouocandam & longiore tempore conseruandam. Remediis autem diaphoreticis commodemiscantur roborantia & lenia acida, vt nimia humorum resolutio impediatur & vires conseruentur.

5. *Regimen post sudorem.*

1) Indusium excluso frigore cautim est permutandum.

2) Quies cum vel sine somno custodienda est. Quod si vero præcauendi scopo præscribatur diaphoresis, tum non æque necessaria est, neque vt domi se contineant, nisi quidem aër humidus vel frigidus iniurias minetur.

3) Sub & post requiem analeptica potulenta conueniunt, sed tepida, e. g. haustus vini saccharo & cinnamomogrator redditus. Cibus autem per aliquot horas differendus est.

4) Alius aperta conseruanda.

## VII. CAUTELE ET OBSERVATIONES PRACTICAE.

I. Quemadmodum blanda diaphoresis ductui naturæ consentanea est & amplissimam in praxi utilitatem ostendit, dum materias salino-sulphureas, summe agiles, orgasticas, motum fermentatiuo-putridum minitantes, e corpore proscribit, ita non tantum Hippocratis effatum: *ubi sudor ibi morbus*, cum grano salis accipiendum; sed & maxime culpandus est abusus, qui tum quemlibet fere morbum per sudores expurgare intendit, tum gradu, tempore atque ordinatione multos errores errat & a regia naturalis methodi via deflectit.



2. Si enim per calida remedia & regimina coacta humores tam impetuose exagitentur, vt intimius resoluti hac ratione agiliores & perniciosiores reddantur, tum pluribus morbis plus damni quam auxilii adfertur, præcipueque vires nimium pessundantur.

3. Hinc necesse est, vt sudatio copiosa a moderata diapnoë, quæ vbiq̃ue fere conducit, sollicitè discernatur, & ea, quæ sudorem diffuadent, probe obseruentur.

4. *Contra indicantia* hæc audiunt & sunt sequentia:

1) *nimia sanguinis quantitas.* Hac enim præfente aut irritò tentamine humores acrius percellimus, aut, nisi summa circumspèctio adhibeatur, sudorem qualemcumque inutiliter elicimus.

2) *Qualitas materiæ vel ad motum ineptæ vel alteri ineptiori immerfæ.* Huc spectat præcipue *spissitudo* humorum & affectus cachectico-cacochymici, hydro-pici, in principio constituti. Sic & in aliis chronicis cauendum, ne dyscrasiam sanguinis ante exterminare nobis proponamus, quam sufficiens abstersio & resolutio præcefferit.

3) *Via siue spasmi interni, siue refrigeratione aëris externi constrictæ & ad transmissionem feri, licet subtilioris, inhabiles factæ.*

4) *Enormes hæmorrhagiæ, immo procliuitas ad illas vel aliæ copiosæ euacuationes.*

5) *Cruditates primarum viarum, præcipue biliosæ post iracundiam vel vinum affatim ingurgitatum.* Bilis enim magis exagitur & in massam humorum altius diffunditur.

6) *Alui adstrictio & oppletio ventriculi, præcipue post repentinum terrorem.*

7) *Affectus capitis contumaces.*

8) *Pectoris labe.*

9) *Defectus virium & hectica.* Hinc & thermæ atque acidulæ his diffuadentur, quia humores magis colligunt & resoluunt.

10) *Venenum modo haustum.*



11) *Morbi maligni.*

12) *Morbi hæreditarii.*

13) *Habitus corporis strictus.*

14) *Adfectus exanthematici:* exanthemata enim acuta per copiosos sudores nimis exagitantur, cumulateque excussa citius retroeunt, chronica autem parum per eundem promouentur. Plus hic valet liber transpirationis successus.

5. Transpiratio naturalis, vti ante diximus, est optimum valetudinis tuendæ præsidium, quam ob rem qui eius beneficio non fruuntur, vt melancholico cholericis & sicco corporis habitu præditi, pluribus ordinarie incommodis subiiciuntur, & si quando in febrem incidant, grauius aliis laborare, ægriusque eluctari videntur. Licet enim impulsus sanguinis satis vehemens sit, sudor tamen ob stricturam superficiei difficulter erumpit.
6. Culpanda est hoc loco quam maxime stulta illa & adfectata mundities, quam aulici & alii delicatuli homines in exteriori corporis habitu conseruare student, dum diaphoresin modo per quietam continentiam in locis frigidiusculis, modo per sacculos lithargyrio refertos, modo per frequentem denudationem & linteorum permutationem semper impedire conantur.
7. Sudor vniuersi corporis est salutaris, particularis autem, qui turbato tono in superficie erumpit & frigidus est, suspectus merito & sæpe exitiabilis existit.
8. Sudor colliquatiuus, qui tono amisso, passiuè fluit vti rarus est, ita noxius ac plerumque letifer iudicatur.
9. *Plethora* si sudorem impediat, est imminuenda & organis temperantibus nitratis & absorbentibus obtundendus, quæ quidem hoc in casu diaphoreticis positius multo præstantiora sunt.
10. Sudores siue naturales siue artificiales repente suppressi graua pericula minantur.
11. Præcipue *sudores illi spontanei*, qui sanis quibusdam largiter interdum solent euenire, nullo modo sunt restringendi, sed potius per moderatum corporis motum & potum



potum sufficientem promouendi. Quando enim tales personæ circa æquinoctia grauitates tensiuas (vulgo vocant lassitudinem corporis) adpetitus imminutionem, sitim maiorem, adfluentiorem mucum narium, faucium, pectoris sentiunt atque his incommodis deinde spontanei matutini sudores spissi, submucidi, olidi accedunt, tum primum quidem fatigationem quamdam, post ea autem notabilem alleuationem atque euphoriam experiuntur.

12. Neque etiam simpliciter coërcendi, sed potius promouendi & absterfionibus tractandi sunt sudores illi molesti, qui in *pedibus, inguinibus, sub axillis* &c. quibusdam copiosius exoriuntur. Subitam enim aut temerariam repressionem sequuntur facile adfectus rheumatico arthritici. Nam quamuis in particularibus locis præ aliis erumpant, non referendi tamen sunt ad particulares illos noxios sudores, quos num. 6. accusauimus.

13. Cauendum etiam est, ne copiosos febrium *tentorum* sudores suppressamus, immo ne hecticorum quidem olidos sudores, qui nondum extreme colliquatiui sunt, simpliciter cohibere, sed potius conueniente ratione, quantum possumus, mitigare tentemus.

14. Accusant vulgo practici *debilitatem* illius partis, in qua talis specialis sudor emergit; nec male de præsentī statu: adficitur enim pars iam aliquo incommodo, dum relaxata est. Quoniam autem talis diaphoresis ad noxæ alicuius correctionem tendit, nullo modo reprimenda, sed potius iuuanda, naturæque salubre consilium artis subsidis, quoad licet, maturrime exsequendum est.

15. Calor blandus vti multum valet ad sudorem eliciendum, ita *nimius & vehemens* magna damna infligit. Nam sanguinem reddit turgidum & feri secretionem impedit, & dum humores eo impetuose ad exteriora protruduntur & diffunduntur, distensionī & obstructioni partium fomentum subministrat.



16. *Stuphæ* vaporosæ, humidæ, siccæ, balnea, hypocausta sudatoria, vanni linteis obtectæ & quæcumque aliæ machinæ multum quidem non differunt ad sudorem obtinendum, præstat autem pro subiectorum & morborum varietate selectum adhibere. Generatim illa methodus præferenda est, qua caput & respiratio in libertate permanent. Vnde in hydropicis & aliis, in quibus sudatio longa & reperita requiruntur, immissio in *clibanum pistorium* tepescentem, prominente extrorsum capite, suam habet vtilitatem. In lue venerea vapor spiritus vini accensi a Belgis præcipue adhibetur. *Pediluvia*, *fotus* & *suffimigia* præ aliis conducunt mensibus reuocandis, coniunctis internis. In *balneis Laconicis* quibus vapor nudo corpori admittitur, cauendum est, ne capiti incommodetur; neque *vesicæ*, liquore calido repletæ, suo usu destituuntur.
17. *Sympathetice* sudorem prouocare, non satis tutum est.
18. Sudores per *narcotica* excitati non leuamen sed torporem & debilitatem adferunt. Nisi enim genuino *Starckii correctore* & probatissimis alexipharmacis emendentur, omnia sulphure suo vaporoso naturæ sunt inimica. Vnde sudor cum angore animi & reluctante natura quasi extorquetur.
19. *Peripheriam* humidis oleosis relaxare & hac ratione sudorem promouere, nocet: pori enim tali illitu pinguium obstruuntur.
20. In adfectibus *chronicis* seroso-lymphalibus, speciatim in lue venerea, hydrope & œdematosis tumoribus sudor optime cietur in stupha sicca seu balneo Laconico cum vapore aquæ, decocti, spiritus vini, coniuncto decocto lignorum vel essentia alexipharmacæ.
21. In adfectibus *spasmodico-hypochondriaco-hysterics* & *arthriticis* magis conuenit sudatio in balneis: hæc enim tonum nimis intensum suauiter relaxant.
22. Remedia, quæ commendauimus, differunt gradu virium agilitatis & specificis qualitatibus. Hinc pro differentia



rentia temperamentorum & morborum delectum habere expedit, idque eo magis, cum tot proflent formulæ compositæ tincturarum & puluerum, vt abundantia potius quam penuria laboremus.

23. In *malignis* calidiora, quæ nimium feruorem & ebullitionem humoribus important, raro sine noxa dantur, quapropter tutius est, ea prorsus excludere. *Aceta bezoardica* profunt quidem in malignis, quando iulapiis moderate immiscentur, tantum autem non præstant, quantum de illis vulgo speramus.

24. In *repulsione scabiei* & aliorum vlcerosorum adfectuum, non minus in *feminis fluxu virulento* specificè per diaphoresin expellunt *rad. valerian. pimp. alb. succinum & sulphur* moderate adhibitum. *Herba fumarie* prodest quidem in adfectibus vlcerosis infantum, nocet autem in exanthematicis febribus.

#### 25. RADIX ANGELICÆ.

1) Ex variis angelicæ speciebus *satiua* seu *vera* tantum in usu est & hæc in minorem & maiorem, quæ temperatior existit, diuiditur.

2) *Angelicæ* nomen ab angelicis virtutibus, quas ei tribuunt, accepisse dicitur. Germ. die Engel-Wurk. Eandem ob causam a nonnullis radix *spiritus sancti*; ab effectu autem, quem in adfectibus pectoris exserit, Brust-Wurk adpellatur.

3) Abundat principio sulphureo, cum parcioribus resinosis mixto. Vnde efficaciam habet calefacientem, impellentem, attenuantem, resoluentem, discutientem, roborantem, diaphoreticam, diureticam.

4) Prodest in adfectibus serosis, catarrhalibus, cachecticis, scirrhis, item hepaticis & primarum viarum.

5) In acutis autem & aliis æstuosis pathematibus, licet alexipharmaca radix habeatur, parce & circumspecte adhibenda est, præcipue quando subiecta sunt calidiora.

6) In moribus venenosis dubia est efficaciam.

N

7) Ad



- 7) Ad menses promouendos non nisi generatim conducit, nempe sanguinem resoluendo & impellendo.
- 8) Angelicæ radix ad fabæ magnitudinem comesta ebrietas arcere dicitur; sed præstat principiis ob stare, quam remedium dubium adhibere.
- 9) Externe variis chirurgicis vsibus quadrat, ad resolvendos tumores frigidos & roborandas partes relaxatas.
- 10) Radix mansa & dentium cavitati imposita, horum dolores auferre dicitur.
- 11) Datur modo in substantia, modo infuso, modo extracto, modo essentia.

#### 26. RADIX ANTHORAE.

- 1) Coaluit ex principiis sulphureis, acris & tenuibus terreis.
- 2) Eamdem fere cum angelica habet efficaciam calefacientem. Vnde tam humores quam vias adficit, & sudorem copiose promouet.
- 3) Laudatur vulgo contra venena variorum vegetabilium, tamquam alexipharmacum. Quare anthoræ nomen contractum esse volunt ex antithora. Eamdem ob causam *aconitum salutiferum* vocant, putant enim hanc plantam infringere *aconiti lethiferi* seu *thoræ venenosæ* noxium effectum; germ. *Giffth-Heyl*. Sed spem fallere experientiam, auctores contra *Gesnerum* adfirmant.
- 4) Neque virtus specifica anthelmintica, quæ vulgo ei tribuitur, vsu confirmata est.
- 5) In acutis, præcipue malignis, carere hac radice possumus.
- 6) Veteres *ἄνω* & *κάτω* illam subinde purgare perhibent.

#### 27. RADIX ARI.

- 1) Concreuit ex principiis copiose sulphureis & moderate alcalinis, vel potius acris calcareis & subtilibus terreis. Quando enim acetum adfunditur, efferuescit, adeoque ad alcalinam indolem propius reliquis plantis accedit.

2) Effe-



- 2) Effectum exserit resoluentem, incidentem, discutientem, tonicum &, vt putant, alexipharmacum. Ob acrimoniam vocatur teutscher Ingber.
  - 3) Vsum habet fere polychrestum, prodest enim in adfectibus serosis, mucidis, atrophicis, cachexia, chlorosi virginum, colica mucida, febribus intermittentibus, hydrope, dum vrinam promouet & mucescentes substantias eiicit; in ictero, obuiscationibus abdominis, maxime primarum viarum, glandularum mesenterii, hepatis, lienis, atonia ventriculi, tussi humida, viscida, catarrhali.
  - 4) Dubiæ contra est efficaciam in hæmorrhoidibus turgentibus, vbi ad ardorem mitigandum cum oleo liliorum alborum illam remiscent & externe adplicant.
  - 5) Neque prodest in nephritide & podagra externe adhibita.
  - 6) Contra in vlceribus cacoëtheis & fistulosis mundificandis egregie se commendat.
  - 7) Hoc habet peculiare, vt sudorem largissime promoueat, etiam in iis, qui alias difficulter sudant. In hunc finem drachm. j. cum cochleari spiritus frumenti exhibetur, & in chronicis hypochondriaco scorbüticis adfectibus magna cum vtilitate vsurpatur. In forma autem pure puluerulenta quando exhibetur, tum crudior illius substantia irritum reddit effectum.
  - 8) Præter ea optime propinatur in essentia concentrata, item in extracto per vinum, vel spiritum vini parato. Porro in infusis, quæ vero melius cum vino, quam aceto, quod partes acres inuertit, parantur. Externe in sacculis, cataplasmatibus & decoctis adplicatur.
  - 9) Ingreditur aceta bezoardica, *puluerem stomachalem Birckmanni, elixir purgans* &c. *Fæculæ* autem ari tamquam fæces inertes a multis hodie reiciuntur.
28. RADIX BARDANAE seu LAPPÆ MAIORIS.
- 1) Principio gaudet parcius sulphureo & nitroso, quæ vtraque mucilagine quadam involuta sunt.



- 2) Effodienda est radix *primo* anno enata digiti crassitie, altero enim anno caulescit. Vires sunt in caule & floribus. Cortex radice acrimoniam habet maiorem, quam interior eius substantia.
  - 3) Præstat efficaciam resolventem, abstergentem, leniter diaphoreticam & diureticam, item lubricantem & inuoluentem.
  - 4) Hinc prodest in affectibus cachecticis, hydropicis nondum obfirmatis, atrophicis, ulcerosis, scabiosis, item in febribus catarrhalibus benignis. Frequenter etiam in usum vocatur ad decocta mundificantia, atque a nonnullis in sarsaparillæ ipsius locum substituitur.
  - 5) In peste autem tantam facultatem haud possidet, quanta vulgo isctatur. Neque morsus venenatos, contra quos *Apuleius* illam commendat, per sanare comperitur.
  - 6) Affectus arthriticos, podagricos, spastico-conuulsivos curare quidem dicitur, sed experientiæ non respondet. Multo minus apoplexiam præcauere potest.
  - 7) In tussi mucida, grumescencia humorum, sanguinis coagulatione & asthma inueterato, hæmoptysi, pleuritide ac empyemate parum iuuat, licet ab *Ettmüllero* speciatim commendetur.
  - 8) Adhibetur vel in forma essentiae vel decocti. *Pulvis* iners, ne dicam plane inutilis est.
  - 9) Folia leuiter conquassata & externe adplicata tumores oedematosos efficaciter resoluunt. Num vero, si pedibus calcantur, suffocationem vterinam tollant, & contra capiti imposita eandem excitent, experientia nondum confirmatum habemus.
29. RADIX BISTORTAE.
- 1) Principiis gaudet terreis, crassioribus, nec non acido acris, obtusioribus, vnde vis eius præcipua est styptica seu adstringens.
  - 2) De cætero quemadmodum radix figura exteriori cum

tormen-



*tormentilla* inultum conuenit, ita & viribus eiusdem æquiualeat, vnâque alteri commode substitui potest.

3) Radix hæc adstringens in efferis quidem hæmorrhagiis tam interno quam externo vsu vsurpatur, cautelæ autem, quæ adstringentia arctis limitibus circumscribunt, hic quoque obseruandæ sunt.

4) In *stomacace* peculiarem sibi vsum vindicat; in *diarrhœa* autem vel *sanguinis* fluxu restringendo more omnium adstringentium agit, effluxum nempe materiæ cohibet, adfluxum autem neutiquam tollit, ideoque multa cum cautione in vsum vocanda.

5) In *tumoribus macidis* vsurpari potest externe, vbi congestiones non tam discutit, quam repellit.

6) Deinde & in *angina* principatus fere inter restringentia radici bistortæ defertur.

7) Contra morsum venenatorum animalium iam dudum a veteribus commendata fuit hæc radix, videtur vero hoc ex figura potius eius, quæ serpentis capiti æmula quodammodo est, quam ex vlla vera ratione illis in mentem venisse.

8) Ex dictis hisce adparet, radicem hanc, quæ proprie adstringit, incongruenter sudoriferorum & alexipharmacorum ordini esse adscriptam.

### 30. RADIX CARYOPHYLLATÆ.

1) Principio gaudet subtili terreo, sulphureo, interspersa pauca mucilagine. Hinc discutit, resoluit, sudorem adiuuat, & roborat.

2) Vfus eius præcipuus est in viscerum oppilatorum resolutione, id quod a tonica ipsius virtute potissimum dependet.

3) Porro radix hæc semi-aromatica tamquam cephalicum & neruinum insigne ab auctoribus magnopere commendatur. Qua de re & species pro cucuphis frequenter ingreditur.

4) Denique & diuretica & diaphoretica virtute celebratur, quod vtrumque, vtut admodum leniter & moderate, tamen non ineffaciter exsequitur.



## 31. RADIX CARLINÆ.

- 1) Radix partibus scatet sulphureis tenuioribus, attamen largioribus terreis intermixtis.
- 2) Potenter resoluit atque discutit, & calidis alexipharmacis adnumeranda est.
- 3) In viscerum obstructionibus referendis & aliis chronicis pathematibus superandis plus valet, quam in acutis, præcipue malignis.
- 4) Quemadmodum & in catarrhalibus adfectibus peculiarem laudem meretur.
- 5) In peste virtus illius alexipharmaca a prisca antiquitate multis laudibus elata fuit; vti & carlinæ nomen ab ipso *Carolo Magno* accepisse ferunt; qui virtutem eius admirabilem aduersus pestiferam luem, in totum exercitum crudeliter grassantem, expertus esse legitur.
- 6) Notatu digna res est, in superiori Germania rusticos radicem hanc canibus suis propinare, vt vigilantiores & mordaciores reddantur, ac domesticarum rerum custodiam eo diligentius seruent; Vnde & ab ipsis rusticis *Hunds-Born*, vocatur.
- 7) Ceterum magicos vsus & transplantationis modos, quos *Helmontius tract. magnet. vulner. curat.* fusius recenset, & collectionis tempus intra bina Mariæ festa restringit, suo loco relinquimus.

## 32. RADIX CHINÆ.

- 1) Nomen sortita est a regno Chinæ, vnde primum a nos delata fuit.
- 2) Duplex est occidentalis, & orientalis.
- 3) Seligitur orientalis, resinosa, ponderosior, consistentiæ compactioris, coloris mediocriter rutili.
- 4) In comparatione cum sarsaparilla, principiis constat acrioribus atque austeris, sulphureis tenuibus, cum interspersa multa inutili mucilagine.
- 5) Decoctum huius radice diaphoresin & diuresin satis efficaciter promouet, atque ad sanguinem purificam,  
dum



dum non solum generatim extollitur, sed & lui venereæ extirpandæ, vti per vulgus notum est, speciatim destinatur.

- 6) Præprimis vero decoctum hoc ad cephalalgiam ex contagio venereo ortam efficacissimum est.
- 7) In hydropæ & cachexia quoque scopo abstersorio admodum conuenit.
- 8) Dein abstergentem hunc effectum exserit quoque in vlceribus tam internis quam externis.
- 9) Apprime vero notandum quod abstersiua hæc virtus quodam modo ancipitis sit euentus: frequenter enim sinistre adplicata, mundificationis loco obtrahit partium solidarum crispatoria adstrictio, & hanc pressopede sequuntur congestiones, adfluxiones, inflammationes, æstusque auctiores.
- 10) Cum spiritu vini ex radice chinæ conficitur tinctura, virtutum antiuenerearum non contemnendarum; obseruandum autem, illam subiectis magis temperatis quam calidis propinandam esse.

### 33. RADIX CONTRAIERVÆ.

- 1) Hæc radix partium est tenuissimarum, calidiorum sulphurearum, terreis paucioribus remixtarum.
- 2) Ad calefacientia potentiora omni iure refertur: sanguinem enim valde exagitat, vnde alexipharmacas essentias ingredi non debet, licet magno encomio in hunc finem semper celebrata fuerit; id quod & ipsum nomen innuit.
- 3) Conuenit autem in apoplexia serosa, in atonia ventriculi ex causâ frigida nata, in morbis & defluxionibus catarrhalibus, in colica flatulenta & puitosa.

### 34. RADIX DICTAMNI ALBI seu FRAXINELLÆ.

- 1) Radix, vel potius pars exterior, corticalis, alba, in vsum recepta est.
- 2) Quod ad principia attinet, haud multum a *vincetoxico* abludit, nisi quod præter sulphureas & alcalinas partes, mucilaginosâ adhuc, non autem viscida, sed satis liquida gaudeat substantia.

3) Vn-



- 3) Vnde virtus ei potissimum est resoluens, abstergens, per diaphoresin & diuresin leniter euacuans, & partium tonum restaurans.
- 4) Conuenit vero maximopere in omnibus fere capitis adfectibus, ex serosis congestionibus ortum ducentibus. Item in febribus catharrhalibus, modo iusta methodo adhibeatur.
- 5) Magnopere quoque in plerisque vteri adfectibus, præcipue illis, qui ex eius atonia proueniunt, extollitur; id quod vltiori experientia relinquimus.

### 35. RADIX DORONICI.

- 1) Variæ dantur species, seligitur autem plerumque doronicum Romanum, radice scorpioide nodosa.
- 2) Coaluit ex partibus acidis & mucilaginosi.
- 3) Litigatur adhuc dum inter auctores, vtrum venenosa sit planta, an utilis: alii enim eius virtutem neruinam, præsertim contra vertiginem mire deprædicant; alii contra lethiferas inter plantas eandem numerant.

### 36. RADIX ENVLAE vel HELENII.

- 1) Partium est tenuiorum, acrium, sulphurearum. Hinc prodest pulmonibus mucro crassiore obfessis.
- 2) Offertur in decocto, vel essentia, laudem vero quoque meretur *vinum enulatum*, quod alii ex tempore quasi parant, dum syrupum enulæ, melioris notæ, vino intermiscunt.
- 3) Radix hæc, quia principiis gaudet moderate calidis, elegans est sudoriferum & diureticum, immo alexipharmacum, in febrilibus adfectibus haud spernendum.
- 4) Pollet etiam aliqua virtute fluxum menstruum nec non lochia restituendi.
- 5) Ob eandem causam glandularum obstructions referendi habet facultatem, hinc in atrophia adhibita, haud semel fructuosa fuit.
- 6) Prodest in defluxione catarrhali, præcipue coryza.
- 7) Externe decoctum eius, vel puluis, axungia ope in linimenti



nimenti formam redactus, contra scabiem remedium est tutum satis & commendabile.

- 8) Frustulum radice sub lingua detentum, hæmorrhagiam narium sistere perhibent.

37. RADIX GALANGAE.

- 1) Datur vel maior, vel minor, posterior tamen priori præfertur.
- 2) Hæc radix aromatica principio gaudet sulphureo, subtili, largiorique alcalino volatili, acriterre pauciori maritato.
- 3) Potenter satis incidit, resoluit, attenuat & roborat; ideoque sanguinem nimis commouet & vix in aliis, quam sic dictis frigidis adfectibus, adhiberi potest.
- 4) In diarrhœa simplici, si parciore quantitate detur, satis efficax deprehenditur.
- 5) Sic etiam in febribus quibusdam intermittentibus, quando post paroxysmum, diebus intercalaribus propinatur, operæ pretium facit.
- 6) Stomachica est, atque ventriculum singulariter roborat; unde & vertiginem ex cruditate primarum viarum ortam tollere obseruatur.

38. RADIX GENTIANAE RUBRAE.

- 1) Gentianæ diuersæ species reperiuntur, quarum quatuor præcipue in vsum medicum tractæ sunt. Prima est verna, pusilla, non nisi in Alpibus obuia, amarissima, ex qua Heluetii syrupum antifebrilem parare solent. Altera palustribus in locis occurrit & ob amaritiem suam pari modo specialiter adplicatur. Tertia dicitur autumnalis, vel cruciata, quia radix eius transuersim scissa, crucis signum exhibet. Quarta, nostro sensu, præstantissima & cæteris omnibus anteponenda, rubra audit.
- 2) In vfu est radix crassa, maior, extus fusca, intus ex flavo rufescens, amaritiei insignis. Errant, qui ei *gentianam albam*, quæ alias *ceruaria* dicitur, substituant. Hæc enim & caractere & virtute sua, toto, vt aiunt, cœlo a nostra differt.



- 3) Principio gaudet nostra rubra alcalino, sulphureo, cum intermixta mucositate, vnde cum galanga eadem quidem virtute prædita est incidente, resolvente, tonica, stomachica, sed non adeo calida.
- 4) In febribus intermittentibus, vbi crassiores & tenaciores sordes primas obsident vias, inmo in ipsis quar-  
tanis effectum illius magnopere prædicant.
- 5) Efficax est in tollendis diarrhœis contumacioribus, quæ grauibus doloribus colicis stipatæ sunt.
- 6) Prodest contra vermes, præcipue in paullo robustiori-  
bus infantibus & pueris, in teneris vero tormina & conuulsiones excitare dicitur.
- 7) Conducit quoque in cardialgia ex nimia oppletione ventriculi prodeunte.
- 8) *Iulius Palmarius* laudat illam in noxis ex morfu canis rabidi inductis.
- 9) Externe dentes a carie defendit & hoc respectu pulue-  
ribus dentifriciis immiscetur.
- 10) Puluerisata vlceribus inspersa egregium est mundifi-  
cans, callosasque excrescentias aufert; sed prospiciendum, ne nerueas atque tendinosas attingat par-  
tes; vtpote quas irritat & acrius afficit, subsequenti-  
bus facile affluxu maiori & inflammatione.

### 39. RADIX IMPERATORIAE.

- 1) Nomen per excellentiam quamdam, ob præstantes ni-  
mirum virtutes, quas ei tribuunt, accepisse traditur.
- 2) Exotica quidem est, colitur tamen satis abunde in hor-  
tis nostris. Cominode autem ei substituunt radicem  
*Angelicæ*, qua cum multum conuenit.
- 3) Principiis gaudet valde calidis, sulphureis, penetran-  
tissimis.
- 4) Pertinet ad calida alexipharmaca & sudorifera; hinc  
maxime prospiciendum, ne subiectis calidioris in-  
dolis exhibeatur, multo minus in febribus malignio-  
re nota conspicuis propinetur, alias æstus maxime  
intenditur, materiæ febrilis corruptela exacuitur &  
ipsa



ipsa exanthemata euentu plerumque lethali præpropere erumpunt.

5) Foetori oris mansa egregie mederi dicitur.

40. RADIX LAPATHI ACVTI.

1) Hæc radix rhabarbaro haud multum dissimilis & particulis acriusculis, resoluit; acerbis & terrestribus paucioribus, quas coniunctas habet, leniter adstringit.

2) Multæ lapathi reperiuntur species, quarum maxima, quæ foliis prædita est cubitalibus, a *Muntingio* pro veterum herba *Britannica* habetur.

3) Decoctum illius ad sanguinis repurgationem, in scabiosis præcipue impuritatibus non sine effectû propinatur.

4) Quemadmodum & externe in scabie ferina, serpigine, intertrigine & herpete miliari cum aliquo fructu adhiberi multi afferunt.

41. RADIX LEVISTICI.

1) Abundat principio volatili, oleoso, sulphureo, multis particulis mucosis inuoluto.

2) Radix, quæ angelicæ fere comparanda, satis calida est, atque hinc rarius in vsum trahitur, a quibusdam autem vterinis adfectibus peculiariter destinatur.

42. RADIX MORSVS DIABOLI seu SVCCISAE.

1) A scabiosa, cui persimilis est, vix distingui potest, nisi quod folia succisæ sint integra, huius autem plerumque diuisa.

2) Radix, in qua vix aliquid de sulphureo calidiori principio deprehendi potest, celebratur quidem vt alexipharmaca, tot autem laudibus, quot in ipsam vulgo conferunt, non est digna.

3) Manifestior est virtus eius subadstringens, qua de re in chirurgia locum habet & gargarismata ingreditur.

43. RADIX OLSNITII.

1) Hæc planta umbellifera a congeneribus suis succo, quo turget, lacteo facili negotio distingui potest.



- 2) Radix, quæ diaphoreticas obtinet virtutes, rarissime in vsum venit. Ingreditur tamen *tincturam bezoardicam Wedelii*.

44. RADIX PETASITIDIS.

- 1) Concreuit quidem ex multis partibus sulphureis & acris salinis, attamen per interspersas aqueas & viscosas quodammodo temperatior redditur.
- 2) Primus qui huic radici resistantem pestilentiae tribuit virtutem, fuit *Forestus*; Hic enim confitetur, se illam in hac lue magno cum emolumento pauperibus propinasse. Certum tamen est, auctores sæculi nostri huic sententiae non suffragari.
- 3) In aliis autem febrilibus adfectibus, præcipue mucido-catarrhalibus operæ pretium facit.

45. RADIX PIMPINELLAE ALBAE.

- 1) Hæc radícula dici meretur polychresta: licet enim valde temperata sit, ob partes tamen tenues & aciores salinas parcius sulphureas satis efficaciter penetrat, resoluit, discutit, abstergit & mundificat diaphoresin etiam ac diuresin placide promouet.
- 2) Vnde non solum in adfectibus chronicis, e. g. catarrhalibus, tumoribus viscosis, glandulosis, vlcerosis, veneris, sed & in acutis benignis atque malignis egregium vsum præstat.
- 3) Radix mansa præcauendi scopo in contagiosis febribus laudatur.
- 4) Essentia illius principem locum inter alexipharmacas obtinet; speciatim in peste & morfu canis rabidi effectum illius laudant.
- 5) In turbis a mercurio subnatis vsum exhibet salutarem.
- 6) In adfectibus faucium optime se gerit, quando guttæ viij vel plures sine vehiculo deglutiuntur.

46. RADIX SARSAPARILLAE.

- 1) Ex regno Peruano & aliis Americæ prouinciis ad nos transportatur atque a *Parillo* Hispaniensi quodam Medico nomen accepisse dicitur.

2) Opti-



- 2) Optimæ notæ est illa, quæ longissima, sarmentosa, calami scriptorii crassitie, coloris extus fusci, intus autem albicantis, per longitudinem fissâ, substantiam farinaceam, non adeo larga quantitate exhibet & aqua decocta eandem rubro imbuere colore.
- 3) Concreuit ex partibus tenuiter sulphureis & salino-nitrosis, quapropter efficaciter resoluit, colliquat & abstergit humores mucido-ferosos & saliales, non æque autem stricte dictos sanguineos.
- 4) Inde insigni quidem vtilitate adhibetur in adfectibus catarrhalibus, scabiosis, vlcerosiis & præcipue venereis; in illis autem pathematibus, ubi vitium in rubicunda sanguinis portione potissimum latet, operæ pretium non facit.
- 5) Itaque taxandus est communis ille abusus, qui famosum illud decoctum antiuenericum, in quo radix nostra principatum fere tenet, tamquam vniuersale sanguinem mundificans remedium præscribitur. In malo enim hypochondriaco & scorbutico non conuenit, nec in spastico-rheumatico-arthriticis morbis, licet generali vi diaphoresin stabilem adiuuare, adeoque aliquem fructum afferre possit, eas laudes meretur, quas complures ipsi assignant.
- 6) Sunt qui principiis tenuiter terrestribus hanc radicem abundare atque hinc virtutem subadstringentem, acidamque absorbentem ei tribuere contendunt. Vnde *Ettmüllerus* existimauit, *tormētillam* nostratam virtutibus æquipollere, si non antecellere, peregrinæ huic sarsaparillæ.
- 7) Ob viam diaphoreticam, decoctum huius radicis a multis laudatur in febribus acutis, benignis & malignis. Quod si vero exactius consideremus limites angustos, quibus positiua sudoris in febribus promotio circumscripta est, minus magnifice de his encomiis sentire cogimur.



## 47. RADIX SCORZONERAE.

- 1) Varia est, vel sylvestris, vel sativa, optima est posterior & quidem eius species quæ *Hispanica viperaria* germ. Schlangen-scorzonere dicitur.
- 2) In usu est potissimum radix, quæ dilacerata multum lactescentis succi plorat.
- 3) Principiis gaudet pinguibus, oleosis partim, partim quoque acris amaris, ipsa vero radice crassior substantia cruda valde est & terrestris, unde recens rarius usurpatur.
- 4) *Decoctum scorzonerae cum cornu cerui* olim quidem magni fuit habitum in febribus malignis, & aliis venenosis affectibus, hodie autem laudes ipsius multum evanuerunt.

## 48. RADIX TORMENTILLAE.

- 1) Principiis gaudet valde austeris, terrestribus, stypticis cum in lingua saporem relinquentibus; unde & radices cum vitriolo decoctæ, atramentum constituunt.
- 2) Præcipue itaque locum habet in iis affectibus, qui adstrictionem exposcunt. Quo minus autem illam ex numero diaphoreticorum ad classem adstringentium ablegauerimus, vetuit ordinis huius antiquitas, præter humanam necessitatem non turbandi.
- 3) Radicem hanc virtutibus suis sarsaparillæ æquiparasse *Ettmüllerum* superius iam indicauimus.
- 4) Licet autem decoctum vel pulvis huius radice in diarrhoeis, dysenteria, hæmorrhagiis nimis &c. Utiliter adhiberi possit, cautela tamen illæ, quas adstringentium usus requirit, quam maxime sunt observanda.
- 5) Externe celebriora inter traumatica styptica, immo pharyngica, numerari solet.

## 49. RADIX VALERIANAE.

1. Principio prædita est radix largo sulphureo, nec non alcalino acris, abstergenti, cum particulis terreo-mucidis parciorebus.

2) Ra-



- 2) Radix, quæ præ cæteris plantæ partibus in vsum recepta est, insigni vi alexipharmaca pollere creditur, vnde Itali ad venena pleraque illam adhibent.
  - 3) Quoniam autem & ipsa minor valerianæ species, licet temperatior sit maiori, ad calida alexipharmaca referenda est; vsus illius eandem cum illis requirit circumspeditionem.
  - 4) Attamen illam in locum pretiosæ illius radiculæ *serpentariæ virginianæ* commode substitui posse, cum aliis non dubitamus.
  - 5) Radix externe de collo suspensa specificum ophthalmicum habetur; id quod experientiæ relinquitur.
50. RADIX VINCE TOXICI seu HIRVNDINARIÆ.
- 1) Vsurpatur radix albicans, tota fere fibrosa, particulis gaudens sulphureis temperatioribus & salino - alcalicis.
  - 2) Virtute pollet sudorifera excellentiori in gradu & ob peculiarem temperiem terreo - sulphuream in morbis acutis præ aliis locum habet. Num autem tam certò vincere possit toxicum, quam quidem prioribus temporibus existimarunt, merito dubitamus. Nihil enim aliud in malignis, quam quod alia temperata alexipharmaca, efficit.
  - 3) In chronicis maiorem fere quam in acutis vtilitatem ei adsignamus: quoniam enim blande resoluit, abstergit, diaphoresin & diuresin promouet, in adfectibus illis, ubi vitium lymphæ & feri peccat, commode adhibetur.
  - 4) Speciatim in hydrope tam ascitico quam anasarcodeo infusum eius vtiliter exhibitum fuisse, adfirmant auctores fide digni. Immo sunt, qui læsiones internas hoc decocto curari contendunt, tam felices autem nondum fuimus, vt hoc adfertum indubio quodam experimento confirmare possimus.
  - 5) Tyrolensium al'pium incolæ strumas hac radice specificè discuti statuunt, conf. M. N. C.



## § 1. RADIX ZEDOARIAE.

- 1) Principio gaudet sulphureo & alcalino acri, ad zingiberis tamen mordacitatem non accedente.
- 2) Ad antiloimica referunt hanc radicem; dicunt enim illam pestis tempore in ore gestatam omne miasma arcere. Quod autem ad vsum illius internum attinet, ille ob nimium calorem adfectibus magis chronicis mucido-serosis, quam acutis reseruandus est.
- 3) Inter carminatiua etiam & stomachica remedia haud vltimum tenet locum, ac tum quidem praecipue eius essentia cum spiritu vini extracta, praeferrī meretur.

## § 2. RADIX ZINGIBERIS.

- 1) Particulis constat sulphureis, acrioribus, volatilibus, immo igneis quasi, iisque per pluribus, terreis vero & alcalinis parciorebus.
- 2) Quemadmodum igitur hinc abstergentem, colliquantem, diureticam & roborantem qualitatem induit, sic ad expugnandas varias diuturnas ægitudines aliis remediis, vt salubre condimentum, prospero euentu adiungitur.
- 3) In primis vero hydropicis tumoribus, cachexiæ, chlorosi, obstructioni hepatis & glandularum mesenterii, flatulentia pituitosa, catarrhis frigidis &c. itemque aliquantum febribus intermittentibus succurrere obseruatur.
- 4) Certe in aqua intercute aliis incidentibus palmam dubiam reddit, modo hic & vbique prouideamus, vt teneris, calidis & alioquin macilentis ea parcius indulgeatur.
- 5) Scopo autem diaphoretico rarius vsurpatur, cum sic in largiore dosi, adeoque non, nisi valde phlegmaticis, exhiberi debet.
- 6) Laudatur etiam ad visus obscuritatem, dentium dolores, pestilentiam & calculum, sed his nihil certi subest.
- 7) Verius externe guttam rosaceam interdum discutit, vino adusto infusa & adplicata.

8) Opti-



8) Optime denique zingibere vtimur vel condito, vel cibis admixto.

§3. HERBA BECCABVNGAE.

1) Principio gaudet nitroso salino multo, acriori parco; indeque blande abstergit, resoluit & quodammodo temperat.

2) Est autem notissimum antiscorbuticum, neque, nisi valde remote, propter effectum quemdam resoluentem, ad diaphoretica potest referri.

3) Sicut vero mitius operatur, ita pulcre ad alias calidiores herbas, quæ scorbuto opponuntur, temperandas inseruit.

4) Talis illius vsus frequentissimus est. Raro & ambigue commendata prostat ad calculum & menses pellen- dos, ad lumbricos necandos, ad curandam colicam & dysenteriam, sedandosque hæmorrhoidum cœ- carum dolores &c. quæ pleraque inanis quædam persuasio credidit potius, quam experientia confir- mat.

5) Optime vsurpatur in succo.

§4. HERBA CARDVI BENEDICTI.

1) In vsu est herba & semen; prior intense amara, cum in- termixtis particulis salino-nitrosis.

2) Virtutem habet insignem resoluendi, roborandi, sudo- rem leniter promouendi & putredinem refrænand- di.

3) Merito igitur polychresta habetur in imbecillitate ven- triculi, ictero, morbis frigidis, serosis, atrophia, asth- mate humido, tussi stomachali & hypochondriaca, vitiis renum &c.

4) Febribus quoque intermittentibus, quæ languidis len- tescentibus motibus contumaciores sunt, vt omnia amara, subuenit & præsertim, vbi iam cessarunt, ad restaurandum tonum utilis est.

5) In acutis autem & contagiosis febribus petechizantibus & pestilentia non tantas vires ostendit; quantæ præ-



dicantur, neque etiam phthisin, epilepsiam &c. per-  
fanat.

- 6) Extus vlceribus prauis & cariei repurgandæ inseruit,  
ad caneri vero malignitatem exstinguendam suffice-  
re nondum animaduertitur.
- 7) Vsurpatur in essentia, extracto, infuso, succo.
- 8) Semen quoque est haud inelegans resoluens, præcipue  
in pleuritide, neque tamen hic cardui Mariæ semen  
adæquat, multo minus omnem virulentam materiam  
subigere valet.

55. HERBA CAPILLI VENERIS.

- 1) Dicitur adianthum magnum seu nigrum & e Gallia Nar-  
bonensi adportatur.
- 2) Principio gaudet duplici, altero nitroso, altero terreo-  
styptico, subadstringenti blandiore, indeque virtu-  
tem temperantem, resoluentem & tonicam foeneratur.
- 3) Commendandum propter ea videtur hypochondriacis,  
hystericis, melancholicis, ictericis, obstructione vi-  
scerum, vitiis renum, præcipue asthmate & tussi labo-  
rantibus.
- 4) Neutiquam autem calculum frangit, vel menses & fe-  
cunditas tam certo, quam non nulli credunt, promo-  
uet, vel gonorrhœæ & fluori albo medetur.
- 5) Externe capillorum radices firmare eorumque defluui-  
um prohibere, iam a vetustate laudatur, vnde & no-  
men suum consecuta est.
- 6) In officinis prostat eius syrupus. Datur alias & in infuso  
& in succo.

56. HERBA CENTAVRII MINORIS.

- 1) Intense amara partes salinas, acidas, cum resinosis & ter-  
reis coniunctas, facultatem autem digerendi, resol-  
uendi & emundandi, neque solum vrinam, sed & alibi  
diaphoresin, alibi quoque aluum paullulum ciendi  
continet.
- 2) Sigillatim conuenit præcipue cum absinthio & carduo  
benedicto, etsi adhuc penetrantius agere & febribus  
intermittentibus efficacius opitulari censeatur.

3) Quam



- 3) Quam ob rem etiam vermibus magis infesta est hæc herba & ad fluxum mensium aliquantum promouendum & ad hæmorrhoides (irritando intestinum rectum) eliciendas confert.
- 4) Num vero propugnaculum luis pestilentis & venenorum victrix dici mereatur, iudicent experientiores.
- 5) Cæterum vlcera egregie repurgat & in clysteribus adhibita, aluum sat valide mouet atque ascaridum colluuiem exstinguit.

## 57. HERBA CHAMÆDRYOS.

- 1) Principium sulphureum & salinum parcius, terreum autem largius, huic herbæ insinuatam esse creditur, etsi nihilo minus aperientem, resoluentem, diureticam & sudoriferam qualitatem habere plurimi statuunt.
- 2) Vnde & eam valere scribunt ad obstructions viscerum, asthma, tussim humidam, scabiem, scorbutum, hydropem, suppressionem menstruorum &c. quæ cuncta tamen adhuc oppido obscura sunt, cum hodie rarius adhibeatur. Porro nec antarthriticam esse herbam bene notat *Ettmüllerus*.
- 3) Cæterum etiam *Paracelsus*, chamædryos vsu phethoram imminuere pollicebatur, sed nec hunc effectum innotuisse palam est.

## 58. HERBA CHÆREFOLII.

- 1) Intelligimus chærefolium vulgare, non autem Italicum illud, quod alias myrrhis adpellatur & a non nullis male substituitur.
- 2) E temperatis sulphureo-salinis & mucilaginosi partibus deducunt huius facultatem placide resoluentem & abstergentem.
- 3) Quæ de causa licet haud ingentes vires obtinuerit, tamen diætetico maxime vsu conuenit, præcipue tenerioribus & litteratis in eiusmodi malis, quæ lenem resolutionem paulatim perficiendam efflagitant.
- 4) Præscribitur itaque hoc scopis in spissitudine & stagnatione humorum, ictero, obstructionibus viscerum,



vitiis renum, puncturis laterum, tussi, neque in phthi-  
si recens contemnenda est.

- 5) At de reliquo in promotione mensium & secundina-  
rum, in hydrope, febribus intermittentibus, ictibus  
virulentis &c. non implet commendantium laudes.
- 6) Quid autem in vertigine possit, vltius experiundum  
est.
- 7) Extus ad coagulatos humores discutiendos adplicatur.  
Interne optime datur in succo & substantia.

19. HERBA COCHLEARIAE.

- 1) Vtimur tota planta, quæ ob particulas salinas, acriores  
volatiles, subtiles atque penetrantes efficaciter inci-  
dit, resoluit, attenuat.
- 2) Scorbuto autem peculiariter dicata est, vnde quoque  
singulari DEI beneficio fieri cum aliis compluribus  
sentimus, vt cochlearia in locis maritimis, vbi scorbu-  
tus maxime tyrannidem suam exercet, sua sponte in-  
lætissimam & abundantissimam messem progerminet.
- 3) Neque tamen in aliis morbis, prorsus inutilis reputan-  
da est, cum & intercipiendis viscerum oppilationi-  
bus & chloroticis atque asthmaticis inferuire possit.
- 4) Exsiccata ad medelam adferendam non tantum valet,  
quantum recens. Vnde rectius vel folia eius recentia  
vel succus inde expressus & purificatus, in vsum tra-  
huntur. Hæc eadem mandendo, aut in ore detinen-  
do stomachacem feliciter corrigunt.
- 5) Spiritus, qui ex recenti cochlearia, vel per infusionem,  
vel per con fermentationem paratur, nimium acris &  
penetrans, ideoque paucissimis scorbuticis conueni-  
ens est.
- 6) Quinetiam succus quamuis haud adeo validus sit, ta-  
men vbi habitus magis cholericus & dolores acer-  
biores existunt, præstat eundem aliis mitioribus ex  
beccabunga, acetosella &c. temperare.
- 7) Semen cochleariæ easdem cum herba vires habere no-  
tatur, sed tamen est multo inferius, minusque vsita-  
tum; cæterum non tam ad variolas, ad quas expellen-  
das



das laudatur, quam ad morbos diuturnos, frigidos fortasse idoneum.

60. HERBA EPITHYMI.

*Vid. tab. de catharsi.*

61. HERBA FVMARIAE.

1) In texturam suam partes salinas, acidas, terram magis calcariam & subtilem resinam interpositam recepit, viribus ex inde resoluentibus, aperientibus & diureticis pariter ac sudoriferis conspicua.

2) Vnde iam a priscis temporibus ad cacochyiniam & humorem melancholicum, vti loquebantur, corrigendum destinata; hodie quoque salubris reperitur in primarum regionum vitiis, malo hypochondriaco, morbis chronicis, seroso-lymphalibus, ictero, scorbuto, scabie, statu vlceroso & aliquantum in venereis inquinamentis.

3) Cum autem sanguinem acrius commouet & impellit, tum in febribus acutis continuis incongruens est, quapropter nulli auctores sumus, vt aquam fumariae destillatam, quam vulgo ad expellendas variolas & morbillos extollunt, hoc scopo infantibus aut cuiquam alii porrigat.

4) Postremo sunt, qui diuturno huius herbae vsu, tum melancholiam, tum oculorum mala sublata esse narrant, id quod experientiae commendamus.

5) Datur in infuso, extracto, essentia.

62. HERBA MILLEFOLII.

1) Principio sulphureo parcissimo & acido-terreo, styptico blandiore donata, facultatem habet subadstringentem, aliquantum diureticam, vnde ad diaphoretica proprie non pertinet.

2) Verius autem vulnerariis & vlcera repurgantibus adnumeratur, omnesque haemorrhagias, diarrhoeam, dysenteriam, fluorem album, gonorrhoeam sistere dicitur; sed hic vbique iusta cautio adhibenda est.

3) Praecipue vero, docente *Stablio*, tamquam certissimum & specificum spasmodicorum motuum hypochondriacorum & hysteri-  
corum sedatiuum laudari



meretur, dum modo opportuni temporis momenta captare studeamus.

4) Dein & in doloribus hæmorrhoidum coecarum magno vsui est.

5) Ast in calculo renum, nec non in ipsa nephritide, millefolium dolentem sensum infert, adeoque minus tuto exhibetur.

6) Externe comæ millefolii, naribus intrusæ, sanguinem eliciunt. Cæterum, ut dictum est, in vlceribus, item in stomacace vsurpantur.

#### 63. HERBA NASTVRTII.

1) Triplex datur 1) hortense (Garten Kress 2) aquaticum, alias *sissymbrium* vocatum, Brunnen Kress. 3) pratense, non nullis *iberis* vel *cardamine* dictum.

2) Ex his particularum volatilitate atque acrimonia primum tenet *aquaticum*, quod principiis & viribus antiscorbuticis cochleariæ simile, nisi quod paullo mitior sit, & nonnumquam vtiliter ad scopum diureticum exhiberi queat; præcipue in morbis frigidis, cacochymicis, serosis, diuturnis, hepatis & meseræi vitiis, cautius in calculo.

3) Deinde quoque in tussi humida & lumbricis necandis conuenit.

4) Sed in omni febrium genere, pestilentia, quartana, in phthisi, item in philtris singularem edere effectum, experimenta non persuadent.

5) Neque semen nasturtii tantum efficit, quantum vulgo in suppressione mensium, paralyfi linguæ, herniis hæmoptysi, aut dysenteria laudatur. Externe ad *sinapisinos* confert.

#### 64. HERBA ORIGANI.

1) Duplex est vel vulgare vel Creticum; posterius autem rarius in vsum venit.

2) Principio gaudet sulphureo-resinoso temperatiori, terreo parciore, nitroso omnium parcissimo, vnde aliquantum resoluentem, aperientem & neruinum edit effectum.

3) Cre-



- 3) Creditur autem singulare cephalicum, pariterque multis pectoris & vteri adfectibus leniendis apta habetur.
- 4) At si hodiernam praxin intueamur, raro intus datur; frequentius vt neruinum pediluuiis, balneis, fomentis, adiicitur.

## 65. HERBA RUTÆ.

- 1) Principium habet sulphureum purissimum, volatile, terreum vero subtilius, parcius; ac celebris valde, immo si veteres audis, rex est inter herbas antiloimicas, sudoriferas, & resoluentes.
- 2) Hodie tamen scopo diaphoretico non adeo, nisi apud plebem & rusticos, in vsu est.
- 3) Interim magnis encomiis cohonestatur in morbis pestilentibus, venenis, morsibus virulentorum animalium (quorum naturalis hostis est) porro in debilitate stomachi, vitiis serosis, catarrhis pectoralibus, promotione mensium &c.
- 4) Et quemadmodum non solum discutit interne & externe, sed & roborat; ita quoque visum acuere, capitis dolores leuare, odontalgiam rheumaticam & gingivarum mala depellere celebratur.
- 5) Præterea alii rutæ vsu vermes necari, stimulum veneris obtundi, quartanam, melancholiam, quin & epilepsiam curari asserunt.
- 6) Sed profecto hic quoque multa occurrere videntur incerta, & sub debito examine in nihilum abitura.

## 66. HERBA SALVIÆ.

- 1) Præter particulas salino-sulphureas, terreis quoque aliquantum austeris referta, qualitatem resoluendi & roborandi accepit.
- 2) Speciatiim laudatur in atonia partium, frigidis capitis & pectoris adfectibus catarrhalibus, vertigine, asthmate, tremore, paralyti, stomachi imbecillitate &c.
- 3) Vterinos autem morbos non adeo subleuat, neque mensium suppressionem, sterilitatem, phthisin, calculum, arthritidem, podagram egregie lenire potest, nedum tollere.

4) Exter-



- 4) Externe ad tumores discutiendos in embrocationibus vel fomentis frequenter in vsum vocatur.
- 5) Præcipue vero vsum est in anginodis faucium adfectibus, nec non in stomacace vel dentium casu, dum nempe sub gargarismatis specie adhibita partes læsas emundat & roborat.

67. HERBA SCABIOSÆ.

- 1) Herba in officinam recepta e partibus consistit gummosis, leniter sulphureis amaris, terreis plurimis intermixtis & efficaciam habere dicitur leniter resolventem, mundantem & diapnoicam.
- 2) Refertur inter prima fere pectoralia, & tussientibus, asthmaticis, pleuriticis, phthisicis opem ferre, præterea carbunculum pestilentem, morsus venenatos, ficus ani, scabiem &c. curare traditur, quibus si experientia hodie adstipularetur, pulcrum utique præsidium medicæ praxi accederet. Interim in pectoris malis teneros non nihil subleuat.
- 3) Extus etiam vlcera purgare dicitur, sed pariter ambiguo effectu.

68. HERBA SEDI MVRARIÆ.

*Vid. tab. de emesi.*

69. HERBA SERPILLI.

*Vid. tab. de motuum excitatione.*

70. HERBA SCORDII.

- 1) E particulis sulphureo-salinis allii odorem spirantibus & paucioribus aliis, egregiam crasin accepit, vi resolvente, attenuante, balsamica & sudorifera foecundam.
- 2) Vnde iam pridem inter certiora alexipharmaca locum sibi vindicavit & multorum practitorum elogia promeruit in febribus malignis, contagiosis, pestilentibus; vti & externe corruptionem arcet, atque in vlceribus inueteratis & gangræna in peiorem gradum nondum prouecta, vtiliter adhibetur.
- 3) Præterea laudatur in catarrhis pectoris, tussi chronica, vlcerationibus internis, diarrhœa & dysenteria, vermibus fugandis, calculo, hydrope, promotione mensium,



menfium, morfibus virulentis; quæ quidem exactius ad incudem experientiae reuocanda videntur.

- 4) Multo autem incertior vel plane irritus eius vfus eft in epilepfia, & externe in doloribus podagricis & ifchia-  
dicis leniendis.
- 5) Cæterum diafcordium Fracaftorii, ob ingredientium multitudinem, opiique additamentum theriacæ fpe-  
ciem repræfentans, a nobis non adeo commendatur;  
& quamvis *Sylvius* formulam eius concinnius con-  
traxerit, tamen effentia fcordii bene faturata, nec non  
decocto huius herbæ & fucco tam interni quam ex-  
terni morbi, quibus congruunt, fimplicius & fere  
profperiore fucceffu oppugnantur.

#### 71. HERBA TRIFOLII FIBRINI.

- 1) Hanc potiffimum falino-fulphureæ, acres, amaricantes  
particulæ cum terrea mucilagine permiftæ donare  
creduntur qualitate incidendi & refoluendi.
- 2) Ex qua fit, vt in tenaci humorum craffitie, catarrhis fri-  
gidis, afthmate, malo hypochondriaco, cachexia,  
quin & omnibus vifcerum obftructionibus & quarta-  
na commendetur; vbi licet fæpius fperem deftituat, ta-  
men impenfior cura certus illius effectus poteft in-  
ueftigari.
- 3) Primus autem, qui hanc plantam ob antifeorbuticas  
vires celebrauit maxime, fuit Simon Paulli, idque  
haud immerito, fi pro gradu morbi & temperamento-  
rum diuerfitate rite propinetur.
- 4) Sunt tamen & alii, qui ipfam in arthritide & phthifi (re-  
ctius fortaffe atrophia) mirifice extollunt; fed horum  
imitationem nemini poffumus fuadere.
- 5) Effentia & fpiritus huius herbæ nimis acres plerisque  
exiftunt. Optimum eft eius infufum aut fuccus, aut  
integra herba comefta. In decocto fubinde commo-  
tiones & tormina hypochondriaca fufcitatur.

#### 72. HERBA VERBENÆ.

- 1) Ex partibus temperatis sulphureis, nitrofis & terreis  
com-

Q



composita, & qualitate discutiendi, resoluendi & paullulum adstringendi prædita autumatur.

- 2) Sicut autem vsus eius apud veteres paganos frequens & superstitiosus fuit; ita nec dum hodie idem plane desit, cum ad soluendas incantationes adhibetur.
  - 3) Plurimas vero speciales vires verbenæ adscribunt in doloribus capitis, epilepsia, melancholia, oculorum caligine, tussi, dysenteria, vermibus, ictero, febribus intermittentibus & acutis, obstructionibus viscerum, calculo & extus in stomacace, odontalgia, podagra &c. At vero si recte attendamus, magna heic se prodit inconstantia vel vanitas, adeo ut cum tot effectus laudentur, nullum hodie satis exploratum habeamus.
  - 4) Neque hoc valde mirandum est, cum hodie raro a medicis præscribatur, nisi forte in cephalalgia, ubi recens de collo suspenditur, commendantibus Foresto aliisque, quamquam alii huic amuleto non fidant.
  - 5) Cæterum etiam aqua destillata dari solet parturientibus & in oculorum vitiis.
73. FLORES ACACIAE.
- 1) De floribus acaciæ Tab. præced. locuti sumus; nunc pauca hæc addimus.
  - 2) Pulvis eorum mulierculis superioris Germaniæ ad modum in vsu est, quæ nempe eiusmodi puluillo ad  $\mathfrak{D}\beta$  in pulte, quo infantes vesci solent, oblato iisdem alium blande subducere solent.
  - 3) Aqua florum destillata vi resolvente notissima est: nec non a multis pharmacopœis ob odoris quandam similitudinem aquæ cerasorum admiscetur & pro eo venundatur. Plura vide tab. de cathars.
  - 4) Fructus acaciæ tum styptici sunt, tum etiam diuretici censentur, atque ex illis vinum paratur in calculo, diarrhœa & hæmorrhagiis sistendis vulgo laudatum.

74. FLORES CALENDVLAE.

- 1) Principio gaudent sulphureo & non nihil graueolenti,  
mul-



multo mucos & parciori terra inuoluto; atque hinc vires suas potissimum desumunt resoluentes, moderate diaphoreticas & roborantes.

- 2) Reponuntur autem vulgo ab autoribus inter remedia alexipharmaca, diapnoica, exanthemata expellentia; & mirum quantum in arcendo pestilenti contagio extolluntur; sed neque hic, neque alibi promissis satisfaciunt.
- 3) Folia herbæ (sed pariter incerte) aduersus odontalgiam, fluorem album, bubones & carbunculos pestilentes &c. laudantur.
- 4) Optime autem flores propinantur in infuso vinoso, sic aliquantum ad leuiorem infarctum hepatis & suppressionem mensium tollendam vtilis futuri.

75. FLORES GALEGAE.

- 1) Herba, (quam & rutam caprariam vocant) in Italia & Hispania sponte crescit, apud nos vero in hortis colitur.
- 2) Effertur vt singulare antiloimicum, atque in febribus malignis vermibus, epilepsia &c. commendata prostat; sed rarior vsus certi quippiam ponere vetat. *Ettmüllerus* sane magnam eius inertiam arguit & fidem narrationum, quibus viperæ morsus curare traditur, sublestem esse commonet.
- 3) In officinis paratur eius aqua destillata & conserua.

76. FLORES HYPERICI.

*vid. tab. de diuresi.*

77. FLORES SALVIAE.

*vid. herb. saluiae.*

78. FLORES SAMBVCI.

*vid. tab. de emesi.*

79. FLORES SCABIOSAE.

*vid. herb. scabiosae.*

80. FLORES TILIAE.

- 1) Particulas habent acido-salinas, parcas sulphureas, multis terreis obuolutas, præcipue autem mucos abundantes; atque his efficaciam suam debent blande



temperantem magis, quam resolventem aut roborantem.

- 2) Commendari autem maxime solent in diversis spasticis & convulsivis infantum adfectibus; quibus aliquantum leniendis potissimum inseruit aqua destillata, quæ præcipue in usum recepta est & inter leniter diapnoica locum meretur.
- 3) Neutiquam vero hæc aqua promiscue palpitationem cordis, vertiginem, epilepsiam, partum difficilem &c. tollit, quibus nec ipse spiritus florum tiliæ par est, licet hic languidos motus non nihil excitare & vires reficere valeat.

### 81. VLMARIAE FLORES.

- 1) Hanc plantam quoque barbam caprinam (a barba hirci seu tragopone distinguendam) appellare solent Botanici.
- 2) Continet partes acidas, austeras, terreas; indeque ob adstringentem qualitatem ad profluvia sanguinis, ulcera, vulnera, fracturas laudatur. Ex quo nemo facile hariolari aut sibi persuadere poterit, inesse ei pariter vim alexipharmacam, quam & experientia derogat.
- 3) Flores quidem (a quibus vinum gratiam saporis maluatici imbibere dicitur) in aquam destillati sudorem non nihil promouent & in febribus vsurpantur; cæterum an etiam vel podagræ vel oculorum doloribus &c. prosint, accuratius adhuc explorandum est.

### 82. SEMEN AQVILEGIAE.

- 1) Huic adsignant particulas sulphureas, acres, mucilagines & terra temperatas, ac proinde resolventem & diaphoreticam qualitatem.
- 2) Speciatim vero alexipharmaca virtute insigni creditur in febribus malignis, vti & variolarum difficili eruptione; vbi licet non tantum valeat, tamen in emulsione cum aliis commode potest præscribi.
- 3) Rarior eius vsus & dubia magis efficacia est in ictero, vertigine, epilepsia, malo hysterico, arthritide &c.



## 83. SEMEN CARDVI BENEDICTI.

*vid. herb. cardui benedicti.*

## 84. SEMEN CARDVI MARIAE.

- 1) Particulis pinguibus, interspersis sulphureis tenuioribus, & alcalino-acribus, viribusque abstergentibus lenientibus & temperantibus instructum habetur.
- 2) Ad peculiarem exinde usum illud transtulerunt in febribus acutis, ictero, hydrope, ischuria, nephritide, calculo.
- 3) Specifica autem virtute, a multis iam annis nec sine iure, celebratur, aduersus pleuritidem; quippe integrum (nam in emulsione interdum non ita euidenter iuuat) contusum datumque, aliis irritis, punctiones sæpe mirabiliter sustulit. Cæterum etiam aliis febribus inflammatoriis, morbisque cholericis & renalibus cum fructu adhibetur.
- 4) Herba in dictis malis pariter efficax (sed experimentis non adeo probatis) inprimis vero (vt singulare remedium) fluorem album emendatura perhibetur.

## 85. SEMEN NAPI.

- 1) Huius quoque virtutem resoluentem & diaphoreticam, quin alexipharmacam prædicant e nexu partium pinguium-cum acribus vaporosis sulphureis & mucilagine quadam generaliter existentem.
- 2) Cum autem venenum domare putetur, tum in febribus malignis & variolis ac morbillis expellendis sæpe præscribitur; sed propter ambiguam vim fatius est id omittere.
- 3) Non meliorem opem spondet in vermibus, calculo aut lochiorum promotione, vnde vbique, quantum constat, fere superuacaneum est.

## 86. SEMEN RUTAE.

*vid. herb. rutæ.*

## 87. BACCAE IUNIPERI.

*vid. tab. de diuresi.*

## 88. BACCAE LAVRI.

*vid. tab. de diuresi.*



89. BACCAE vel GRANA PARADISI seu CARDAMOMVM  
MAJ.

- 1) Quotidianum hoc Indorum condimentum ex Insula Iaua vel Ceylonia ad nos transuehitur atque præcipue duplex est 1) Cardamomum maius, cui nomen granorum paradisi solennius est 2) Cardamomum minus præcedenti longe vsitatus & culinis notissimum.
- 2) Vtrumque præsertim vero vltimum (vt vtilissimum) resoluit, calefacit, attenuat ac roborat, quippe e sulphureis acribus parciole oleo & terra commistis partibus concretum.
- 3) Est igitur salubre in omnibus morbis frigidis seroso-lymphalibus, in tono primarum regionum debilitato, indeque ortis flatibus, colica, doloribus post partum, vertigine cum cruditate coniuncta.
- 4) Cæterum tantæ virtutes, vt febres malignas, epilepsiam, vertiginem idiopathicam, memoriæ debilitatem, suppressionem mensium &c. curet, vix ab eo possunt expectari.

90. BACCAE SAMBVCI.  
*vid. tab. de emesi.*

91. CORTICES AVRANTIORVM.

- 1) Ex particulis suis semi aromaticis, sulphureis, oleosis & salinis valent ad resoluendum, discutiendum & roborandum.
- 2) Et profecto flauedo eorum suaue & egregium suppeditat carminatiuum, quo in ventriculi imbecillitate, flatulentia, colica, doloribus post partum cum fructu vtuntur Præctici.
- 3) Eadem adhiberi potest in diarrhœa, stranguria, vitiis renum, ictero, cachexia; ac tum in tincturæ vel infusi vel olei vel syrupi forma conuenienter præscribi.
- 4) Succus pomorum cum diuersus sit, is potissimum eligendus est, qui nec acidum nimis, nec vere dulcem, sed vinosum saporem refert. Hic videlicet temperante, analeptica & moderate diuretica virtute insignis,



gnis, vtiliter datur in orgasmo sanguinis quocunque, ardore interno, siti symptomatica; atque vt reficit vires & naturam excitat, sic lipothymia aliique motuum defectui quodam modo subuenit & scorbuticis opitulari a non nullis magnopere celebratur.

- 5) Dantur & alius speciei poma aurantia, quæ Chinenſia (Pommefine) appellant; quibus vt figura magis rotunda, cortex fuluior & tenuior eſt; ſic maior gratia & ſuauiſſas, cæterum eadem vtilitas adſcribitur.
- 6) Flores aurantium ſuauiſſimum ſpargunt odorem, adeoque recreant, vt aqua eorum deſtillata (quam etiam aquam namp hæ vocare ſolemus) nulli alii analepticæ ſecunda habeatur. Itaque, vbicumque animus abiectus aut vires fractæ ſunt, inprimis vero in febribus malignis & peſtilentibus, creberrimi vſus exiſtit. Proſtat quoque horum conſerua.
- 7) Tandem de ſemine nihil eſt quod addamus, ſiquidem vis eius anthelmintica & alexipharmaca valde adhuc dubia permanet.

## 92. CORTICES CITRI.

- 1) Hi licet cum prioribus maximam partem conueniant, tamen maiorem lenitatem & ſuauiſſimam analepticam adepti ſunt, omnibus, niſi ſingularis idioſyncraſia obſtet, gratiſſimam: deinde & diaphoreticam virtutem (eſſi hæc nondum ſatis cognita ſit) habere cenſentur.
- 2) Quapropter eos plerique medici non modo dictis primarum viarum vitiis corrigendis deſtinant, ſed & peſtilentiæ & acutis febribus; vtpote quarum contagium auertere, præſentem vero malignitatem præclare expellere poſſe concelebrantur. Eſſi alii rectius moneant, totum citri pomum hic plus, quam ſolos cortices valere.
- 3) Quomodocunque hæc ſe habeant, nos ob analepticam præcipue vim, qua naturam erigunt & exhilarant, cortices citri non parui æſtimare debemus.
- 4) Oleum autem fragrans, quo turgent cortices, magnopere



pere expetitur, idque e recentibus expressum cum saccharo abigit in gratissimum elæo saccharum, ex quo deinde cum essentia corticum per spiritum citri abstractitium parata tinctura carminatiua & analeptica conficitur; etsi aliis alia via placeat. Cæterum suavissimum oleum per M. B. acquiritur, vel si vulgari modo id destillare lubeat, non putrida poma, vt vulgo fit, sed recentes cortices sumendi sunt.

5) *Succus citri* sat valide acidus (cui parem sane regnum vegetabile non gignit) coagulando, refrigerando, incrassando, subadstringendo & diuresin promouendo se commendat; id circo saluber in intensiore æstu febrili, dyscrasia biliosa, cruditate ex humoris fermentantis defectu prognata, pollutionibus nocturnis.

6) Præterea laudatur in scorbuto, pica grauidarum, ebrietate, obesitate nimia, vermibus, calculo; quanquam hic non satisfacere soleat, multoque minus ad febres directe curandas idoneus sit; quin etiam turbas excitare potest, si per se largius offeratur; mitior vero & abstergentis melioris qualitatis confors fit absorbentium ostracodermatum admixtione. *vid. ocul. cancri.*

7) Pulpa albicans concoctioni resistit & inutilis est. Floribus conditis analeptica virtus, semini citri vero laus antidoti contra omnia venena tribuitur, sed id quidem adhuc incertum est.

8) Prostant ad usum in officinis: succus citri, syrupus acetositatis citri; syrupus de corticibus citri; cortices citri conditi; essentia, spiritus & oleum cort. citri &c.

93. SVCCVS CITRI.  
*vid. cortices citri.*

94. LIGNVM FRAXINI.  
*vid. tab. de diuresi.*

95. LIGNVM IUNIPERI.

1) Hoc aliquatenus fragrans lignum, præsertim si mense Martio



Martio cædatur, & subtilibus terreis sulphureis cum aliqua mucilagine temperatis partibus condensatum, abstergere paullulum & resolvere comperitur.

- 2) Multi autem hanc vim in maius prouehunt, idque in morbis venereis, scabiosis, frigidis catarrhalibus, ligno sancto aut sassafras comparant, aut prorsus anteponunt. Verum tamen fida satis & crebra documenta, quibus hæc efficacia euinci debuisset, nondum allata sunt, unde hoc in medio relinquimus. Interim inferuire potest pauperibus, quos etiam fumitæes iuniperi non minus quam turiones sanabuci purgare dicuntur.

- 3) De baccis iuniperi supra & de gummi iuniper. *tab. seqq.*

96. LIGNVM SANCTVM, seu GVAIACI.

- 1) Hoc lignum nigricans, durum, densum & ponderosum, odore fragranti, sapore acri amariusculo, ex Americanis insulis ad nos transportatur; atque uti resoluentem, mundificantem, diaphoreticam & diureticam vim obtinet; sic sigillatim velut specificum venereorum malorum remedium eximiis maectatur encomiis.

- 2) Neque tamen hic solum, sed etiam in catarrhis viscidis, vlcerosis & scabiosis sordibus, itemque diuturna valida coryza & tussi humida; atque opportuno tempore in cachexia & anasarca salubriter præscribitur, dum modo frigidiora magisque phlegmatica subiecta, quippe quæ calidior & penetrans huius ligni vis non adeo adficit, obueniant, nam aliis parce exhibendum est.

- 3) Interim verum est, hodie Gallicum aliosque prænotatos morbos sine huius ligni subsidio felicissime curari.

- 4) Sed vltcrius progressi autores quidam laudant idem in podagra, malo splenetico, scorbuto, colica, mensium fluxu retardato, epilepsia, phthisi & febribus ma-

R

lignis.



lignis. Quæ si satis fida & perpetua forent, hodie quoque prosperiore successu gauderemus.

- 5) Nos potius ab huius modi ligni vfu abstinemus, neque oleum eius destillatum nisi in vlceribus venereis suadere possumus, etsi alii id in arthritide, epilepsia, pellendo foetu viuo & mortuo &c. collaudent.
- 6) Denique notandum est, corticem ligno ab aliis præferri, ab aliis posthaberi. Illud constat, illum esse acriorem ligno, & si effectum singularem spectes, minus adhuc exploratum.
- 7) Datur hoc lignum commodius in decocto quam essentia.

#### 97. LIGNVM SASSAFRAS.

- 1) Est coloris ex albo rufescentis, odoris penetrantis, grati, aromatici, foeniculati, consistentiæ porosioris, atque ex America pariter ad nos defertur.
- 2) Principiis constat sulphureis oleosis acribus, volatilibus, terreis pari modo subtilioribus intermixtis, atque hinc vires exerit resoluentes, attenuantes, purificantes, diaphoresin atque diuresin promouentes.
- 3) Cortex eius omnia principia constitutiva, præprimis sulphurea in excellentiori gradu obtinet.
- 4) Vtrumque aggreditur maxime, corrigit & euacuat ferum & lympham mucidam corruptam, ideoque conuenit in iisdem malis, quibus curandis guaiacum destinatur. Est tamen eo temperatius & pluribus subiectis conuenientius.
- 5) Salutatur alias catarrhorum alexipharmacum proprium, atque in renum vitiis (extra paroxysmum tamen melius) & in arthritide ac podagra (sed rarius optato cum successu) frequenter in vsum traducitur.
- 6) Merito vero cum aliis dubitamus, illud vnquam in febribus, obstructionibus viscerum, paralyfi, epilepsia, sterilitate (nisi prorsus generali quadam vi) promissa expleturum esse.
- 7) Idem valet de efficacia eius in dentium doloribus, quos,  
si ca-



si catarrhales sint, pariter ac lignum sanctum subinde leuat.

- 8) Nam extus quoque roborat & discutit & emundat, id-  
eoque ad partium laxitatem, tumores frigidos & vl-  
cera conuenit; atque vsurpatur hic in decocto, sac-  
culis, cataplasmatibus, oleo, intus pariter in deco-  
cto vel essentia.

98. LIGNVM SANTALVM ALBUM, RVBRVM ET CITRI-  
NVM.

- 1) Santali rubri principium est minus sulphureum, sed  
magis austerum acidum terrestre; albi & citrini vero  
partes sunt magis oleoso - sulphureæ volatiles, terre-  
is interpositæ.

- 2) Hinc quoque prioris vires magis adstrictoriæ, postero-  
rum autem resoluentes magis, mundificantes & paul-  
lulum roborantes deprehenduntur.

- 3) An ergo rubrum santalum, vt multi laudant, in catar-  
rhis acribus, hepatis obstructione, febribus, phthisi,  
atrophia, arthritide tutum probumque medicamen-  
sit, iure ambigimus. Potius, notantibus aliis, sudo-  
ris eruptionem prohibet, & hæmorrhagias compe-  
scit, de reliquo tingendis essentiis inferuire potest.

- 4) Et quamuis album ac citrinum meliora & in morbis fri-  
gidis serosis, catarrhalibus, vlceribus, venereis ma-  
lis & tumoribus adhuc recentibus intrus & extus paul-  
lulum vtiliora sint; tamen neque species diatrion-  
santalon, neque emplastrum santalinum promissos  
effectus repræsentant.

99. CAMPHORA.

- 1) Succus hic resinofus, qui e singulari arbore Indica su-  
dat, atque etiam e radice canelæ Zeylanicæ per artem  
destillatur, principiis abundat sulphureis adeo sub-  
tilibus, vt in aëre sensim absumatur & quasi conta-  
bescat, atque hinc potestatem acquirit valde calefa-  
cientem, discutientem & nonnihil tonicam.

- 2) Plurimi vero limites virtutum eius ampliant, & cam-  
phoram, vt insigne cardiacum & alexiterium præsi-  
dium,



dium, interne ad quamvis putredinem (nam cadauera ab ea diu tuetur) & virus vincendum, ideoque ad febres malignas & pestilentes curandas, porro ad conciliandam tumultuantibus spiritibus blandam requiem, atque adeo ad melancholiam, maniam, phrenitidem, epilepsiam, palpitationem cordis, malum hystericum, quin & reiectionem sanguinis &c. valere pronunciant.

3) Sed tamen alii Practici abnuunt, aut talem eius usum variis definiunt cautionibus. Et profecto, nisi vis eius ignea nitrosis aliisque refrigerantibus temperetur, & in exilissima dosi præbeatur, plus noxæ adferre solet quam emolumenti.

4) Equidem constat, in mixtura simplici camphoræ diaphoreticum & salutarem sæpe effectum edere; sed ibi nimium eius feruorem infringit acidum vitrioli, quod nisi largius accedat, mixturæ simplicis usum haud adeo fructuosum comperimus.

5) Cæterum vnum aut alterum granum camphoræ pulueribus temperantibus immixtum offerri potest angina vel cholera simpliciore vel inflammatione ventriculi vel paraphrenitide (nam heic partes affectas propius certiusque attingit adeoque stases facilius discutit) laborantibus.

6) Peramplus autem & egregius camphoræ usus externus est, optimum quippe in inflammationibus (si paucissimas exceperis) & variis doloribus nimioque humorum ad partes læsas adfluxu subsidium. Quomodo vero commodius ubique adplicari debeat, in *tabb. medicis & chirurgicis* passim est præceptum.

7) Conuenit igitur in cephalalgia, clauo hysterico, otalgia, ophthalmia (vbi & oculis caute imponi & de collo suspendi potest) deliriis phreneticis, dentium dolore catarrhali, inflammatione colli, ventriculi, pleuræ, hepatis, lienis; rheumatismo, erysipelate, phlegmone, gangræna &c. itemque circa ambitum vulnorum



rum & vlcerum, vbi magnopere cauendum est, ne quid eius ipsis læsionibus continui inspergatur.

8) Præterea in scabie ferina ardorem mitigat, & collo appensa infantum æstum acutum per diapnoën lenit, & retropulsum forte sudorem reuocat.

9) Omittenda vero est tum in nephritide, quia stimulo diuretico eam sæpe exasperat; tum in eius modi stasibus humorum, quorum suppurationem potius, quam discussionem adiuuare res ipsa suadet.

10) Et quoniam camphora tantum subtiliores sanguineas particulas discutere solet, non æque ferofas crassiores; id circo necesse est, vt in tumoribus & stasibus sanguineis quidem, sed tamen simul mucidis, ei admiculum ex croco vel farina fabarum & radd. resoluentibus &c. adiungatur. Quod si negligamus, interdum duriores & pertinaces tumores fiunt, tantum abest, vt dissipentur.

11) Adplicatur vel per se in sicca forma aliis admista, vel in emplastris, vel in fluido, spiritu; vbi notamus, spiritum vini rectificatissimum esse oportere.

#### 100. ANTIMONII CERUSSA & CAETERA.

*vid. paullo infra.*

#### 101. ANTIMONIVM DIAPHORETICVM.

1) Vsitatissima hæc calx ex detonatione antimonii, cum iij. part. nitri facta, resurgit, & diaphoreticorum remediorum princeps vocatur ex omnibus, quæ vulgaris Chymia suppeditat.

2) Non solum enim sudorem efficaciter impellit atque promouet, sed dosi quoque imminuta ad lenem diapnoën iuuandam & tuendam commode inferuit; unde hoc scopo illud aliis congruentibus permistum in omnibus febribus opportuno tempore propinare expedit; ne infantibus quidem exceptis; hoc vnum prouidendo, vt in purpura simpliciore chronica duntaxat ab eo abstineamus.

3) Præcipue autem in stasibus inflammatoriis imminuen-



dis & discutiendis, præ aliis remediis huic prærogatiua quædam tribui solet.

- 4) Etsi vero *Sylvius* id in vlcerationibus internis & hectica quoque præcellentem efficaciam habere prædicet; tamen hic vllam peculiarem laudem mereri nondum in confesso est.
- 5) Cæterum plane consonat cum *bezoardico minerali*, quo propterea, vt pretiosiori, minime indigemus, multoque minus ob splendorem nominis in pestilentia & febribus malignis præ alio confidere possumus.
- 6) Neque hilum ab his recedunt, vel *cerussa antimonii*, vel *sulphur antimonii* cum *nitro fixatum*, vel *mercurius vitæ* cum nitro fixatus, vel pauxillulum dissimilis materia perlata *Crugeri*, seu nix antimonii. Vnde facile est intelligere præparationum talium vanitatem, meris opinionibus innixam, nec superfluam modo, sed & sumtuosam.
- 7) Eiusdem furfuris sunt *bezoardica composita, solare, lunare* &c. vtpote quæ nullam singularem virtutem ex superficialia perfectorum metallorum additione haurire posse, ideoque non tam ægrorum corpora quam crumenam leuare, intelligentiorum Chymicorum iudicio existimantur. Gratis etiam bezoardicum Iouiale suspicitur tanquam præclarum in malignis febribus &c. diaphoreticum, cum potius ex stanno qualitatem nauseosam stypticam nactum sit & gradu solum ab antihectico Poterii distet, de cuius noxa alibi loquemur. Parem fere censuram subeunt alia antimonii iactata arcana, vt flores correcti diaphoretici; varia magisteria; tincturæ ex vitro; panacæ variis modis extortæ; quarum stupendas vires fidelis experientia nondum comprobauit.
- 8) Notamus adhuc *de regulo antimonii medicinali*, quod, cum sub primo ortu compluribus admirationem sui iniecerit, prædicantibus, nihil fere eo excellentius esse in purificandis humoribus, in febribus acutis & inter-



intermittentibus, in scorbuto, gonorrhœa virulenta, obstructionibus viscerum &c. hodie ob infidos effectus euilescat, & merito non nisi gradu a croco antimonii Rulandino differre censeatur. *Conf. D. Caroli dissert. de hoc regulo.*

- 9) Neque *clyssi antimonii*, siue simplices ex nitro & antimonio; siue compositi ex nitro, antimonio & sulphure; vel ex nitro, antimonio & tartaro; digni sunt, ut tanto apparatu & sumtibus conficiantur. Nam nec aquæ stimmi nomen, nec insignem quandam laudem in nephritide, scorbuto &c. mereri, multoque præstantiora simplici via acquiri, satis apparet. Alias admisceri solent iulepis ad gratum acorem conciliandum. Et, si clyssio ultimo tartarifato, loco aquæ, spiritus vini in excipulo præponatur; exsurgit spiritus de tribus, quem carminatium Michaëlis vocant, nempe crama ex acidis illis per spiritum vini aliquantum, ut aiunt, dulcificatis.

102. BEZOARDICVM MINERALE SIMPLEX & COMPOSITVM.

*vid. iam dicta.*

103. CORALLIA PRAEPARATA.

*vid. tab. de correctione cacochymiae.*

104. MERCVRIVS DIAPHORETICVS.

*vid. tab. de saluatione.*

105. SVLPHVR & EIVS PRAEPARATA.

- 1) Est vel natium, vel artificiale. Prius rarius occurrit, posterius ex pyrita plerumque Schwefel-Kieß, qui simul vitrioli matrix est, educitur a metallurgis; atque hoc factitium iterum duplicis est generis, vel purius, citrinum; vel impurum, caballinum dictum.
- 2) Constat autem ex copiosis particulis inflammabilibus & fortissimis acidis, indeque medicam qualitatem nanciscitur partim incrassantem; partim etiam commouentem humores & expellentem.
- 3) Mirum enim est, sed iam satis compertum, sulphur crudum seu eius flores, interne datos, scabiosa vlcerosa simpli-



simplicia & venerea inquinamenta aliquantum expellere; (vnde si hæc retroacta sint, confert) extus autem adplicatos, dictas fordes in superficie hærentes facile repercutere; quapropter talis sulphuris vsus tum hic tum alibi in manatione aurium & impetigine infantum tutius omittitur, vel saltem parce & circumspectissime adhibetur.

4) Ex eadem causa ancipitis alexæ est illorum conatus, qui variolosa vlcuscula, cicatricum & fouearum metu, sulphureorum ope restringunt, aut his contra hæmorrhoides cæcas vtuntur.

5) Contra, sulphur in catarrhalibus pectoris adfectibus, asthmate humido, itemque exigua dosi in hydrope & inflammationibus internis (sed statim sub initio aut declinatione) non spernendam virtutem habet. Fumus quoque illius fluentis (at flammam non adepti) pariter ac antimonii fusi, tussim siccam suspectam præsentem subinde compescit.

6) Nequicquam autem balsamum pulmonum salutatur. Etenim nec simplex sulphur, nec præparata illius validiora phthisicis, empyematicis, pleuriticis aut febre maligna pestilente decumbentibus conueniunt, sed potius vi sua acriter humores commouente, grauius periculum minantur.

7) De externo vsu iam aliqua innuimus. Certe vbique cautus esse debet, nec in variis efflorescentibus pustulis aut sordibus cutis, nisi alia congruentia præmiserimus, nec in tumoribus, nisi hi valde mobiles, molles, benigni & ab internarum causarum fomento liberi sint, facile tentandus.

8) Nunc paucissimis præparata sulphuris attingemus; vbi primum balsamum sulphuris, qui cum oleis destillatis fit, in summum abusum trahi animaduertimus, dum in phthisi, nephritide, calculo, dysenteria, febribus non sine periculo excandescentiæ humorum, grauioris vlcerationis, hæmoptyses, mictus cruenti &c. ingeritur. Neque externis vulneribus & vlceribus singula-



singularem opem spondet, quin potius ob ardoris exasperationem omittendus & melioribus, quæ prostant, postponendus videtur. Mitior est balsamus sulphuris Rulandi, atque ille, quem Rothius in chymia sua cum oleo lini parare docet.

- 9) Nobilior multis putatur rubinus sulphuris, sed speciosum nomen, cui omen non respondet, fallere debet neminem. Neque enim a priori modus parandi magna promittit, nec a posteriori certa virtutum eius singularem constant documenta.
- 10) Idem valet de multis aliis sulphuris productis & speratis arcanis; ubi quidem in ære piscantur, qui verum oleum aut pinguedinem quandam, expectatissimum scilicet pulmonis balsamum, e sulphure tentant separare. Etenim nihil olei ei inest, sed tantum magnæ fliccarum flagrabiliū particularum abundantia. Cæterum spiritus sulphuris acidus cum spiritu vitrioli puro conuenit, in parua dosi refrigerans, in maiori valde coagulans, & tandem arrodens.

106. TERRA SIGILLATA STRIGENSIS, LEMNIA, MELITENSIS, SAMIA.

- 1) Omnes huius modi terræ medicæ a vulgaribus bolis non differunt nisi subtilitate, qua linguæ protinus adhærescunt; ac pleræque non nihil acidi adstringentis, omnes aliquid martiale continent; vnde calcinata rubicundiorē induunt colorem.
- 2) Differentia igitur potissimum a loco natali desumitur, & sic alia Silesiaca, alia Laubacensis, alia Lemnia, vel Turcica dicitur. At in usu medico nullam insignem varietatem deprehendimus, ut propterea haud necesse sit, loco nostratium pretiosas Turcarum terras sibi aduehendas curare.
- 3) Atque hoc eo magis superuacuum est, cum in totum hæ terræ non multum valeant, & prorsus destitutæ sint virtute singulari alexipharmaca, ob quam vulgo in venenis subigendis, febribus acutis & coniuncta iis diarrhoea, aut dysenteria maligna extolluntur.



- 4) Profecto multi prudentes Practici hodie cognoscunt ex huius modi vsu non leue periculum aut damnum imminere. Cum enim paullulum adstringunt & intestinis, luti instar, tenacius adhærent, tum naturæ labores aggrauant, & salutarium excretionum progressum interdum funesto cum euentu interuertunt; quapropter abstinemus, præsertim cum in diarrhœis acutarum iam felicior methodus innotuerit.
- 5) Neque in aliis morbis peculiaris harum terrarum utilitas comperta est; vnde pro superfluis fere habentur. Saltem frustra ex iis solutiones & magisteria parantur, quorum ieiunitatem iam alii demonstrarunt. Prorsus etiam ridicule stigma illud acidum, quod per ignem ex his terris propulsum capitur, febribus malignis aiunt conuenire.

## 104. GEMMAE.

- 1) Durissima & compactissima hæc naturæ corpora ad medendum efficacia esse alii aiunt, alii negant. Etsi autem modus agendi obscurior sit; tamen plerasque gemmas præcipue hyacinthum orientalem, & sinaragdum &c. teneras corporis ægri membranas non nihil stringere, adeoque vim subtilem tonicam exferre, omnino attenta perdocet experientia.
- 2) Placant exinde aliquantum grauiiores commotiones & trepidantem naturam paullum confirmare videntur, adeoque conferunt in palpitatione cordis, terrore, pauoribus infantum, moliminibus abortiuis &c. Nec frustra eas pulueri suo contra calculum admiscuit *Volkamerus*, quippe vtiles ad spasticum dolorem calculosis infestum leniendum. Quo tenerius autem & sensibilius subiectum est, eo præsentior apparet effectus.
- 3) Generosas vero planeque admirandas vires alias, tum antiqui, tum pauci recentiores illis adscribunt. Nam *Plinius* iam memorat, adanantem, & venena irrita facere, & lymphationes abigere, metusque vanos expellere. Sic aliæ geminæ commendantur contra viru-



virulentos ictus, malignitatem pestilentem febrilem (vnde pulvis Bezoard. compositus Sennerti & ruber Pannonicus rubinos, smaragdos, hyacinthos recipit) inquietudinem, timorem, somnolentiam, lasciuiam, imo prauas cogitationes; nonnullæ aduersus hæmorrhagias, dysenteriam, choleram, epilepsiam, fascinationes; aliæ ad visum acuendum, ad insomnia terribilia abigenda, quin & sapientiam consequendam &c. valere putantur: sed quis non videt talium elogiorum matrem superstitionem, qua abiecta facilius erit veritatem perscrutari.

4) Ingentis quoque existimationis sunt gemmarum tincturæ a Chymicis promissæ; sed pleræque miserabiliter extortæ statim fidem amiserunt; ac fere desperant de iis hodie, deficiente aceto radicis, quo scilicet *Paracelsus* illas parare consuevit.

5) Cæterum necesse est, vt hi lapides, siquidem meliorem effectum desideres, in tenuissimum & ad fidem dentium plane non stridulum pollinem comminuantur; cui an diuturniore tritu & affusione aquæ intimas virtutes magis elicere possimus, vt credit *Borrichius*, tempus certo definiet.

6) Prostant e gemmatis compositionibus species de hyacintho, quibus, etsi multa alia consueto more immixta sint, tamen commode parciore dosi vtimur in omnibus efferis sanguinis profluviiis, hæmoptysi, sunt fluxu lochiorum nimio &c. Minus hodie vsitatæ species de gemmis frigidaæ aut calidaæ.

#### 108. CONCHAE PRAEPARATAE & OSTREARVM TESTAE.

1) Succedanæ hæ sunt matri perlarum vel conchæ margaritiferaæ, & absorbenti qualitate insignes, ideoque ad generalem vsum magis quam specialem idoneæ vid. plura sub ocul. cancr. & testis ouorum, quibus cum hæ conueniunt.

2) Si fortiori igne tractentur inuertuntur aliquantum & denique calcis viua instar causticum produnt sa-



porem; vti & Batauis in vfu est ex eiusmodi conchyliis veram calcem parare.

3) Saturata vero acidis vegetabilibus purioribus, e. g. succo citri, hoc modo vires adsciscunt efficacius abstergentes & diureticas. Prostant hinc solutiones concharum, & specificum antifebrile Strobelbergeri adeo decantatum, quod ex conchis tantum aceto saturatis constare asseritur. Cæterum mineralia acida hic non æque congruunt; vtpote a quibus alia partim ignota, partim minus proficua vis talibus abforbentibus accedit.

109. CORNV CERVV VSTVM, PHILOSOPHICE PRÆPARATVM, SPIRITVS & SAL VOLATILE.

1) Quemadmodum ceruus totus alexipharmacus esse vulgo creditur; sic præcipue cornu illius coctum (præparatione scilicet philosophica in olla vel alembico) ad malignitatem febrium vincendam & sudorem pellendum conferre multi adstruunt. Sed omnino perquam ambigua & occulta qualitas hæc est; manifestius ex indole sua glutinosa & terrea generaliter ad abforbendum, temperandum, inuoluendum inseruit, vt C. C. raspati & gelatinæ vsus testatur.

2) Frustra certe, vbi vera malignitas adest, in hoc philosophorum arcano spem ponimus, neque C. C. vstum in diarrhœis acutarum, cholera, hæmorrhagiis &c. adeo frugiferum comperimus. Est enim terra animalis calcarea non solum abforbens, sed & styptica, præsertim si acido coniungatur. Vnde nec proderit illud verminantibus pueris (nam meliora anthelmintica habemus) sæpius ingerere.

3) Superflua quoque eorum sollicitudo videtur, qui C. C. deciduum tantopere venantur. Tantum enim abest, vt perfectius sit, vt potius maiorem virium medicarum inertiam prodac. Alterum quidem ex deciduis raro inuenitur, adeoque maximi vulgo pretii habetur, cum putant ceruum velut consulto tantum thesau-



thesaurum abscondere; sed probabilius est hoc animal, vbi vno cornu se iam orbatum & exarmatum sentit, intra densiores sylvas se abdere atque ibi illud tandem deponere, qua propter non mirum est rarius id se venantibus offerre; *confer Stahl's programm. de C. C. decido.*

4) Spiritus & sal cornu cerui volatile purum, producta potius quam educta sunt ab artifice, ideoque frustra alexipharmacam cornu cerui virtutem retinere & præclara acutarum febrium remedia esse traduntur. Multo certius & tonum solidarum partium intendunt & humores commouent ac per diuresin euacuant, cæterum in febribus damnosa, vt alibi ostensum est.

5) E tenellis cornubus, quæ typhas ceruinas vocant, aqua spiritiosa destillatur, ad epilepsiam, palpitationes cordis & febres acutas pariter destinari solita, quibus leuandis an sufficiat, itidem dubitamus.

6) Vanissimum autem est, os de corde cerui (quod putant esse tendines musculorum cordis circa arteriæ magnæ exortum, qui ætate indurati in cartilaginem ac tandem os degenerant, sicut etiam in bobus aliisque animantibus interdum tale os reperitur) cordis imbecillitati (vnde confectionem alcherimes ingreditur) & abortus motibus, itemque lacrymas cerui (quæ pro glandulosis partibus circa oculorum angulos sitis habentur) malignis febribus mederi.

7) Vtilior ducitur priapus cerui, quem *Ettmüllerus*, aliique in dysenteria & pleuritide, non nulli etiam in colica & hysterico malo commendant.

#### XIO. FORMICAE & EARVM SPIRITVS.

1) Præ omnibus insectis singulare quid fouent, nempe copiosum acidum volatile, quo fit, vt violarum vel cyan; flores cœrulei in aceruum formicarum iniecti illico rubicundo colore tingantur. Optimæ vero & efficaciori acido præditæ censentur, quæ plenas resiniferis arboribus & betulis sylvas incolunt, luna crescente collectæ.



- 2) Pellunt autem diuresin & peculiarem vim ad omnes sensus recreandos, magnanimitatem & robur addendum, adeoque ad morbos senum, vertiginem, apoplexiam, catarrhum suffocativum, paralyfin, impotentiam virilem, sterilitatem, item memoriæ debilitatem subleuandam consecutæ existimantur.
- 3) Atque hoc quidem tam interno, quam externo vsu; quamquam multi adhuc maximam harum laudum partem non agnoscant ideoque iis, quoad e certioribus experimentis veritas eluceat, diffidendum putent.
- 4) Extus vtiliores sunt ad roborandum tonum, & propterea in paralytodea relaxatione, tremore, morbis spasmodicis arthriticis (at in horum remissione & exitu duntaxat, alias sæpe dolorem augent) item auditu difficili & tinnitu laudantur.
- 5) In hunc vsum balnea ex myrmecio, seu formicarum aceruo fiunt, vel qui præstat spiritus formicarum cum spiritu vini rectificato paratus (vt insigne antiparalyticum,) vel aliæ compositiones, quarum basin formicæ constituunt, v. g. aqua magnanimitatis Laurenbergii ab *Ettmüllero* commendata adhibentur.
- 6) Sed tamen & alia producta laudantur, vti: liquor e formicis & earum ouis in clibano per digestionem paratus; in suffusione aliisque oculorum & aurium morbis; item spiritus vrinofus tam e putrefactis formicis, quam e recentibus cum calce viua confectus in cerebri morbis, arthritide, scorbuto, hydrope (vt volunt) nobilis, quæ vt experientia confirmet, vehementer omnes practici optabunt.

### III. SANGVIS HIRCI.

- 1) Hunc in primis *Helmontius* magnis laudibus extulit; atque vulgo, vt efficacior acquiratur, curiose caprum nigrum ruta muraria aliisque balsamicis herbis ante nutriendum, tum illo de cornubus suspenso, sanguinem ex incisis genitalibus excipiendum & leni calore exsicccandum præcipiunt.

2) Sed



- 2) Sed alii hodie pleraque hæc non necessaria credunt & illius vires in sanguine coagulato dissoluendo, in pleuritide, paralyfi &c. laudum cumulo minime respondere experiuntur.
- 3) Certe si solus hic sanguis sine regimine sudorifero datur, parum efficere solet, vnde & in calculo (quem tamen ex adseueratione *Scaligeri* certissime frangit) non multum valiturus videtur. Frustra quoque oleum ex sanguine hoc destillatum podagræ & contracturæ prodesse tradunt.

III2. LAPIS BEZOARDICVS ORIENTALIS, & OCCIDENTALIS.

- 1) Horum vsus ob caritatem & frequentem adulterationem merito rarus est; namque ex millenis vix vnus genuinus Persicus in Europa reperitur, & creberrimas fraudes subesse ex eo liquet, quod apud nos plures & viliori pretio prostant quam in ipsis Indiis. *Confer D. Kæmpfer amœnit. exot.*
- 2) Præstantissimus habetur Persicus in ventriculo capriceræ natus, cuius bonitatem color viridans, cœruleus vel in alterutrum nigricans, substantia inter lapidem & resinam ambigua, in acido nitri vel salis spiritu solubilis & menstruum rubro colore tingens, aliaque plurimæ notæ indicant. At hi rarissime; sæpius vero alii ex aliis Indicis animantibus desumpti, vel arte fabricati vero Bezoardico similes ad nos perueniunt.
- 3) Non est itaque quod multa de eius principiis & virtutibus proferamus, præsertim cum magnopere inter se diffideant autores, aliique summam & potissimum contra omne virus efficaciam, alii fere nullam, alii denique mediocrem humores nostros commouentem & diaphoreticam qualitatem his lapidibus adiudicent. Adeo nihil certi constat, veriorum experimentorum penuria.
- 4) Bezoardicus occidentalis in capra syluestri Pernana reperiri traditur, e laminis albidis gryseis discoloribus coagmen-



coagmentatus, minus splendens, in superficie scaber & maior plerumque orientali. Vti autem hoc vilior est, sic in dupla dosi præscribitur. Sed de hoc eadem, quæ de priore diximus, valent.

- 5) Multo autem plures lapides bezoardicorum nomine in Indiis circumferuntur, quos e variis cornigeris syluestribus, item e porcis, capris domesticis, e simia (qui quidem omnium pretiosissimus est) depro-  
munt; quo etiam sequens pertinet.

### 113. LAPIS PORCINVS seu PEDRA DE PORCO.

- 1) Est coagulum biliosum, rotundum, leue, aliquantum compactum & vnguinofum, colore rufum, sapore amarum, magnitudine nucis myristicæ vel iuglandis; ac reperitur in cystide fellea hystricum terræ Malai-  
cæ.

- 2) Præsentissimam vero dicitur habere facultatem cardia-  
cam & resoluentem, qua medetur febribus malignis, ictero, viscerum obstructionibus; sed tanti quoque æstimatur, vt in ditiorum solum & Principum mani-  
bus sit. Vnde rarissimus est & in Bataua tantum a quibusdam medicis adhiberi solitus. *Confer Tulpii obseruat.*

- 3) Vfus eius est, vt per aliquot horas in haustu aquæ sim-  
plicis suspensus interdum agitetur. Sic, grani pon-  
dere vix imminutus, imbuat & amarore & virtute sua  
aquam ægro pro vna dosi propinandam.

### 114. LUMBRICI TERRESTRES.

- 1) Salinis suis nitrosis & terreis partibus, resoluunt ali-  
quantum & diuresin promouent, in primis autem an-  
tispassmodica virtute potiti sunt.

- 2) Quamuis enim *B. Ludouici* laudatum eorum vsum cen-  
soria virgula acriter castiget & fere condemnet; ta-  
men singulari & specifico plane effectum motus conuul-  
siuos, ipsamque epilepsiam sedare, itemque vt *Wie-  
rus* alique testantur, arthritidem vagam sæpe lenire  
compertum est.

- 3) Com-



- 3) Commendantur alias etiam ad icterum, hydropem, lactis defectum & (verum prorsus dubie) ad mensium suppressionem, dysenteriam, vermes puerorum, quibus vltimis potius multiplicandis quam exstinguendis forte subseruiunt.
- 4) Quo minus autem eorum mixtio per artificiosas preparationes immutatur, eo certiore & euidentiore effectum præstolari possumus. Vnde optime præscribitur 1) simplex pulvis præparatus 2) succus per additionem vini expressus, quem *Wierus* crebro adhibuit 3) liquamen, in quod vel sine igne vel in vitro conditi & massa panaria obuoluti clibani calore abeunt. Spiritus autem, qui nudo igne paratur est maxime inuersus, vti & non parum ille, quem putrefactio generat, etsi hic a nonnullis valde laudetur ad hydropem & paralytodem membrorum debilitatem.
- 5) Extus eadem hæc adplicari possunt; & quidem tum artubus arthritico dolore vexatis, tum inprimis panaritio imponuntur viui lumbrici, donec illi immorian-  
tur, quo facto eos in locum, vbi cito putrefieri que-  
unt, recondere non abs re erit. *Confer Stahl. diff. de lumbric. terrestr.*

#### II 5. MATER PERLARVM.

- 1) Sicut omnia ostracodermata contexta sunt ex materia terrea mucida maximeque tenaci sensim in lapideam eiusmodi duritiem abeunte; sic quoque mater perlarum ad horum familiam pertinet, atque hoc nomine insignitur, quoniam in sinu suo perlas seu margaritas recondit.
- 2) Etsi vero perlarum mater absorbendi & temperandi virtutem obtineat, tamen alia huius generis singulari effectu haud antistare deprehenditur, vnde omis-  
sa repetitione lectorem ad ea, quæ alibi de testis ostre-  
arum &c. exstant, ablegamus.
- 3) Extus harum subtilissimus puluillus in ophthalmia se-  
rosa in oculos solet sufflari.

T

4) Mar-



5) *Margaritæ* ipsæ, quæ defæcationes tantum huius conchæ partes reputantur, præter dictas matris vires etiam roborantem & leniter tonicam edere a quibusdam creduntur, neque id prorsus friuole; siquidem teneris & delicatis subiectis debilibus, opportune datæ, aliquantum subueniunt.

**II6. MANDIBULAE LVCII PISCIS.**

1) His tum absorbens, tum etiam detergens qualitas inesse iudicatur, vnde non nihil conferunt in puncturis laterum, tussi acriore & vlcerosis renum vitiis.

2) Num autem verum specificum antipleuriticum præbeant, itemque phthisi, gonorrhœæ & fluori albo medeantur, multi ambigunt.

**II7. SANGVINIS & CRANII HUMANI SAL VOLATILE.**

1) E sanguine humano varia secreta quærentur magis quam confiunt; atque vti permultæ virtutes ipsi tribuuntur, sic spiritus & sal volatile eius aut cranii humani non sudoriferum modo audit, sed etiam speciale remedium apoplexiæ & epilepsiæ.

2) Quod quidem vt auspicato vbique euentu vota nostra expleret, valde optandum esset præsertim in apoplexia, sed certe nihil singulare de eo experimur. Nec a priori præ aliis salibus volatilibus apparet prærogatiua. Omnia enim vrinosa volatilia per ignem vel putrefactionem producuntur vniformi pene mixtione, & efficacia, a corporibus, vnde sui materiam hauserunt, longissime recedente. *vid. tab. de diuresi.*

**II8. VIPERARVM CARO, SAL VOLATILE & OSSICVLA.**

1) Viperas, omnium serpentum maxime venenatas, admirabilem nihilominus vim alexipharmacam, restaurantem & balsamicam tenere plurimorum opinio est.

2) Exinde fit, vt grauissimis morbis, febribus malignis, scabiei contumaci, lepræ, lvi venereæ, sterilitati mulierum, hecticæ, strumis & scrophulis conuenientissimæ prædicentur; quæ vires si modo ex parte constantes & perpetuæ sint, dolendum sane est, illas non frequentius adhiberi, adeoque impedimentum ob-

iici,



iici, quo minus ad plenam harum virtutum cognitionem perueniamus.

- 3) Illud euidentius experientia ostendit, quod caro & hep-  
par viperarum aduersus morsum ab iis inflictum sat  
nobile suppeditent antidotum.
- 4) Incertiora autem & specifica vi nudata sunt sal volatile  
& spiritus viperarum, vti optime iam monet *Ettmül-*  
*lerus*. Melior ergo est simplex puluis aliis congru-  
entibus, quia facile in putredinem ruit, condiendus.
- 5) Cæterum officula nec ad fascinationes, nec ad contra-  
cturas salutaria reperiuntur.

#### 119. VNICORNV VERVM & FOSSILE.

- 1) Genuinum terrestre pro veterum commento & non  
ente habetur. Quod vero hodie eius loco prostat,  
desumptum est e pisce quodam cetaceo, circa Groen-  
landiam vagante.
- 2) Conuenit ex sententia multorum cum ebore & cornu  
cerui, vnde facile iudicium ferri potest de iis laudi-  
bus, quas alii in hoc marinum cornu congerunt; cum  
spasmos, conuulsiones, epilepsiam, febres malignas,  
omniaque venena superare dicitur.
- 3) *Vnicornu fossile* (quod & ebur fossile vocatur) copiose  
passim in Germania eruitur indolis ambiguæ variis-  
que doctorum contentionebus frustra tentatæ, donec  
D. Carolus animalem eius mixtionem in lapide suo  
Lydio e chymia solide demonstrarit.
- 4) Cum igitur exaresceta quædam & partim vetustate cor-  
rupta ossa sint, quæ terra margacea plerumque cir-  
cumcludit; certe neque ex illorum crasi, neque ex in-  
tegumento margæ apparere potest singulare virtutis  
ratio.
- 5) Vnde absorbent quidem & subadstringunt, sed cordiali  
& alexiteria vi, quam multi in cœlum efferunt, prorsus  
vacua videntur.

#### COMPOSITA.

#### 120. ESSENTIA ALEXIPHARMACA STAHLII.

- 1) Ex apta selectorum simplicium commistione suauem &  
poly-



polychrestam adepta temperiem, facultate pollet resoluendi, discutiendi, nociuas agilesque humorum impuritates per sudorem & vrinam moderate expellendi, adeoque, dum languentem naturam grata vi excitat & subleuat, vires roborandi.

2) Descriptionem eius dedimus in *tabb. medicis*, vbi, si quis forte ex largiore accessu spiritus vini rectificatissimi, qui ad extractionem requiritur, nimiam sanguinis commotionem (præsertim in teneris post crebriorem usum) metuat; ab extracta Tinctura quarta aut tertia circiter pars volatilioris ardentissimi spiritus destillatione segregari poterit; sic concentratam & simplicium viribus magis imbutam acquirimus essentiam. Cæterum si calidior ex pluribus ingredientibus conflata in certis casibus non adeo conueniens videatur, temperatiorem ex scordio & pimpinella alba priori surrogare expediet.

3) Specialem huius remedii usum vt paucis attingamus, conuenit præcipue in omnibus pene febribus (iusto tempore data) & sub finem earum continuata non tantum vires restaurat; sed etiam, ne motus residui febriles in lentam vel hecticam transeant, sæpe felicissime prohibet. Vbi quoque turgida inflatio sub variolarum ebullitione abest, aut ipsæ variolæ aliaque exanthemata retrogressa mortem minantur, sæpe ea moderata expulsionem salutem reduxit. Porro insigniter confert vitiis lymphæ & catarrhalibus malis, coryzæ, grauedini, broncho, rheumatismis; tutoque resoluit & expectorat in tussi, vomica pulmonum, empyemate, quin & phthisi tempore eustadias. Nec respuenda est in quauis humorum spissitudine, quam diuturno parco usu, inprimis motu corporis coniuncto, attenuat, & ad faciliorem circulum ac sinceri sanguinis salubrem exitum (in suppressione mensium & lochiorum) præparat &c.

4) Cæterum parcis & repetitis dosibus, non autem in magno feruo-



feruore & orgasmo sanguinis, neque in febre ephemera syncho, causo &c. facile eam porrigere conuenit.

**121. ESSENTIA LIGNORVM.**

- 1) Adhibetur in morbis frigidis, seroso-lymphalibus, catarrhalibus, diuturnis, cachexia, anasarca, scabie in primis venerea &c. quamquam decocta lignorum ferre crebrius & vtilius præscribi soleant. *vid. supra sub lign. Guaiac. & sassafr.*

**122. FRACASTORII DIASCORDIVM.**

*vid. sub scordio.*

**123. LIQVOR CORNV CERVI SVCCINATVS.**

- 1) Fit ex sale volatile succini, quod acidæ indolis est, cum sale seu spiritu volatili vrinoso cornu cerui maritato. Atque vti alias in motibus epilepticis &c. laudatur, sic nos ipsum præcipue in hemiplexia & paralyfi ad roborandum denique tonum efficacem reperimus. *vid. sub succin.*

**124. MIXTVRA SIMPLEX.**

- 1) Hæc modo rite confecta & non largius camphorata in æstuosis commotionibus & febribus continuis, vbi leuem sudorem euocare confert, præcipue in sexu masculino vtiliter vsurpatur; sed tamen effectuplerumque meliore, si antea essentia alexipharmacæ portionem quandam admiscueris.
- 2) Minus concinna verò & salubris correctio videtur quam aliqui, omisso acido vitrioli, per spiritum nitri aut sal volatile vrinosum tentant.

**125. THERIACA & METHRIDATIVM.**

- 1) Vtramque hanc inconditam compositionem multi recentiores emendatione & contractione indigere non dissimulant; (vti non nulli iam ipsam interpolare studuerunt) sed tamen quia per tot annorum seriem perpetuato vsu magnam virium opinionem habuit, neque eam hodie prorsus amisit, tolerandam & non plane reiiciendam arbitrantur.



- 2) Est autem utique (in primis theriaca Andromachi) confusa multorum futilium & superfluum farrago; quam aliqui rudi indigestæque moli comparant, in qua calida cum frigidis, amara & acida cum dulcibus, purgantia cum narcoticis, sudorifera denique cum adstringentibus pugnare videas.
- 3) Notandum autem est, in vna drachma theriacæ, si recte calculus initus sit, duo grana opii contineri; atque hæc eo magis, si recentior massa sit, vim suam stupefacientem edere, quæ vero, ubi diutius fermentata & vetustior est, fracta aliquantum imminuitur.
- 4) Quod denique ad efficaciam eius attinet; si veterum præconia audias, tantum non panacæ titulus ipsi competit; si hodiernam experientiam consulas, minime tuetur pristinam gloriam; sed multis aliis & quidem simplicibus cedit medicamentis. Nam & in febribus malignis, ad quarum virus edomandum insigniter valere celebratur, fert posteriores. Quid? quod dubitant nonnulli usum eius hic innocentem esse, præsertim cum sæpe turbas det ac in nouissima Polonorum pestilentia ferales effectus ediderit, adeo ut ea grassante theriacam publico magistratus edicto proscriptam aliquando legamus.
- 5) Certe in vero periculo tenerioribus minus conuenit theriaca, sed relinquitur potius plebi & rusticis, qui ut ei superstitiose fidunt, sic incongruentem hanc mixturam robore suo facilius concoquere possunt, eademque leuiores morbos felicius depellunt.
- 6) Extus ea adhibetur in cephalalgia (sed caute) vomitu nimio, colica, morfu & ictu venenato. Neque tamen hic quoque iis laudibus digna est, quibus vulgo condecoratur.
- 7) Theriacam cœlestem quantum sublime nomen effert, tantum quoque deprimit inconcinna multiplicium farrago. Ad minimum operoso labori & sumptibus parcere, opiumque correctum cum paucis simplicium

um



um alexipharmacorum extractis mistum eodem effectu dare possemus. Reuera enim hæc massa nequaquam diuinis virtutibus excellit, sed potius circumspectum sui vsum postulat in febribus, doloribus spasticis &c. nec temere præscribenda est, nisi anodynæ alicuius vtilitatem præsentis morbi status edoceat.

126. TINCTURA BEZOARD. MICHAELIS.

1) Huius compositio varie describitur; ea quidem, quam Schræderianæ pharmacæ editio nouissima tradit, magnam ingredientium multitudinem ostentat, e quibus si plurima refecarentur, idem fortasse aut melior adpareret effectus.

2) Videtur autem calidioribus vegetabilibus adhuc nimis referta, quamquam opio (vt pleræque aliæ solent) non adeo imbuta vel corrupta. Quapropter non contemnenda penitus, cæterum temperatioribus mitiganda est. Nec ineptum est, illam cum mixtura simplici mixtam parcius exhibere.

127. Vltimo non plane reticenda videtur *apricatio*; qua veteres philosophos Græciæ se vel delectasse vel ab imminetibus morbis præmunire voluisse legimus. Sed notandum est, eosdem simplici victu contentos plerumque parcius & durius, quam Germanorum mos est, vixisse, adeoque a nimia humorum abundantia liberos facilius æstum solis ad vsum quendam sudoriferum pertulisse. In nostro autem climate idem imitari vix consultum fuerit, nisi vel easdem frugalitatis regulas amplecti, vel quotidianas corporis exercitationes adiungere placeat, quibus futurum est, vt sub solis ardore magis magisque indurescamus, & non secus, ac agricolæ aliique laboriosi operarii, qui rustica hac apricatione gaudent, diu vegeti & a morbis chronicis tuti viuamus.



## TABVLA V.

DE

## DIVRESI.

## I. DEFINITIO.

Diuresis est euacuatio feri salino - oleoso - mucilaginosi, quod in renibus fecernitur & per meatus vrinarios eliminatur. Deriuatur a *διά*, per & *ούρέω*, mingo.

## II. DIFFERENTIA.

## 1. Diuresis est

- 1) vel *spontanea* seu *naturalis*, qua natura serum noxium quotidie ex corpore proscribit.
- 2) Vel *artificialis*, quæ per congrua remedia in eundem salutarem finem instituitur.

2. *Materia*, quæ per vrinofum laticem excernuntur, sunt

- 1) vel *ordinariæ*, nempe aquosæ, mucidæ, salinæ, oleosæ & terreæ.
- 2) Vel *extraordinariæ*, quæ in statu præternaturali observantur, videlicet sanguinæ, saniosæ, vlcerosæ, purulentæ, fabulosæ, calculosæ.

3. Quem ad modum diuresis *naturalis* ordinarie quidem placide & sine molestia succedit, non numquam autem ingentibus doloribus spasticis absoluitur: ita & *artificialis* diureseos promotio his phænomenis circumscribitur. Namque

- 1) modo placida *humorum* alteratione & aliorum impedimentorum remotione diuresin ita adiuvamus, ut effectus diureticus sine incommodis obtineatur.
- 2) Modo vehementioribus remediis *vias* stimulamur, atque hac ratione diuresin quibuscumque spasticis motuum exacerbationibus *directe* & *positive* vrgemus, uti sub *modo operandi* fusius indicabimus.

## III. IN-



## III. INDICANTIA.

1. Diuresis placida & moderata ubique ferme suum usum ostendit. Quemadmodum enim naturalis huius excretionis successus ad principes, necessarias & quotidianas corporis expurgationes omni iure referenda est; ita non facile datur morbus, siue sit chronicus, siue acutus, in quo artificialis huius euacuationis promotio, quando leniter instituitur, incommoda aut damnosa esse possit.
2. Speciatim conducit in febribus, præcipue declinante paroxysmo, & quando solutio morbi per diuresin speranda est.
3. Paullulum efficacior diuresis requiritur in chronicis affectibus e. g. in scabie, ictero, hydrope, stranguria, dysuria, ischuria, sabulo renum & vesicæ. Item in mensium obstipatione.
4. Diuresis autem *positiua & directa*, quæ per remedia stimulantia instituitur, angustissimis terminis definita est, uti sub cautelis dicetur.

## IV. INDICATA seu REMEDIA.

Hæc ab auctoribus ob diuersam indolem in tres gradus distribuantur, de quibus sub *cautelis* dicemus speciatim.

## A. VEGETABILIA.

## I. Radices. Allii

Apii

Ari

Aristolochiæ

Asparagi

Bardanæ

Carlinæ

Caryophyllatæ

Ceparum

Dauci seu pastinacæ sylvestr.

Dictamnii albi

Eryngii

Fragariæ

Gentianæ rubræ

Graminis

Helenii

Herniariæ

Imperatoriæ

Leuistici.

Nasturtii

Ononidis

Pareiræ brauæ

Petasitidis

Petroselini

Pimpi-



	Pimpinellæ albæ		Baccæ iuniperi
	Raparum		Lauri
	Raphani		Fructus cynosbati
	Saxifragæ		Nuclei persicorum,
	Squillæ		Ceraforum.
	Valerianæ		6. <i>Gummi</i> - resinæ pleræque
	Vrticæ minoris.		Ammoniacy
2. <i>Herbæ.</i>	Capilli veneris		Bdellii
	Chærefolii		Galbani
	Hederæ terrestres		Iuniperi
	Linariæ		Olibani
	Nasturtii		Sagapeni.
	Petroselini		Terebinthina
	Veronicæ		Balsamus de Copaiua
	Virgæ aureæ.		Peruuianus.
3. <i>Flores.</i>	Arnica		7. <i>Ligna</i>
	Bellidis		Fraxini
	Genistæ		Guaiaey seu sanctum
	Hyperici		Iuniperi
	Linariæ		Nephriticum
	Violarum.		Sassafras.
4. <i>Semina &amp; fructus</i>			8. <i>Salia vegetabilium</i> alcalia
	Bardanæ		fixa
	Carui		Cardui benedicti
	Corticum aurantio-		Fullonum
	rum		Genistæ
	citri		Imperatoria
	Cumini		Ononidis
	Dauci		Stipitum fabarum
	Hyperici		Tartarus & eius præparata,
	Milii solis		e. g.
	Sileris montani		Vitriolatus
	Violarum		Tartarificatus
	Vrticæ		Cryftalli
	Amygdalæ amaræ		Terra foliata & eius
	Baccæ alkekengi		liquor
			Sal



Sal  
Spiritus  
Tinctura.

**B. MINERALIA.**

Antimonium crudū  
eius

clyffus tartari  
fatus  
tinctura

Borax

Calcis viux spiritus

Cryſtallus præparata

Lapis Iudaicus

Lyncis

Nephriticus

Lunæ cryſtalli

Nitrum depuratum

antimoniatū

regeneratum

eius liquor fi-  
xus

ſpiritus acidus

& dulcis

Salia media, digestiua,

e. g.

tartarus vitriolat.

arcanum dupli-

catum

nitrum antimo-

niatum

polychrest.

Salia volatilia vrinosa  
commune rege-  
nerat. & eius  
ſpiritus

Succinum & eius es-  
ſentia

**C. ANIMALIA.**

Aſelli

Bufones

Calculus humanus

Cantharides

Conchæ præparatæ  
ſimplices, & aci-  
do ſaturatæ.

Cornu cerui ſpiritus

Eboris ſpiritus

Lapides percarum &  
carpionum præ-  
parati

Lumbricorum terre-  
ſtrium pulvis, &  
ſpiritus

Oculi cancri

Ranæ

Sanguis hirci

Scarabæi maiales,  
melle ſubacti

Scorpiones

Tali leporis

Testæ ouorum

ſtruthio cameli.

**V. MODVS OPERANDI.**

**I.** *Materiales qualitates*, quocumque modo illæ agant, non  
abſoluunt actum diureticæ euacuationis. Quicquid e-  
nim de organorum habilitate, de humorum ſeroſorum  
abundantia, de paſſiuis lapſibus, de ſtimulis ſalinis, vel



de specifico renibus infidente fermento vulgo proferrunt, illud ad formalem huius excretionis rationem explanandam non sufficit.

2. Licet enim per remedia materialia & humores corrigantur & ad horum transmissionem viæ colatoriæ aptentur & patulæ reddantur; docet tamen experientia, quod his omnibus saluis vrinæ secretio & excretio non raro cessare soleat. Immo sensibilitas subiectorum discrepans efficit, vt alii homines a leuibus materialibus caussis adficiantur, quibus alii vix attinguntur, e. g. cereuisia impura sensibilibus importat stranguriam, id est motus strictorios, eliminationem rei molestæ respicientes, quem adfectum minus sensibiles non experiuntur.

3. Hinc necesse est, vt organis saluis & humoribus præparatis accedat *director*, qui *motibus* congruis & ordinatis vniuersum actum complete, finaliter & salutariter dirigat & consummet.

4. Inuitatur autem & excitatur hic director ad actum hunc diureticum per caussas *materiales*, nempe per remedia illa, quæ diuretica audiunt, & in sequentes classes distribuuntur.

1) *Primam classem* constituunt diluentia, emollientia & lubricantia, quæ humores ad faciliorem secretionem & excretionem præparant, & organa colatoria magis peruia reddunt. Huc referri possunt speciales illæ circumstantiæ, quando materia mucida, sabulosa, vel plane calculus in viis vrinariis hæret, & dicta remedia exposcit.

2) *Ad secundam classem* pertinent resoluentia & abstergentia, quæ *serum spissum* efficacius, quam prioris classis remedia attenuant. Quo spectant præcipue radices & herbæ superius indicatæ, & alia acris, pingua, resinosa, e. g. gummi, resinæ, succinum, terebinthina, extracta resinosa, ligna antiuenerica, plantæ antiscorbuticæ. His adnumeramus recentiorum *ornicam* & *parciram brauam*.

3) Ad



- 3) Ad *tertiam classem* referenda sunt *absorbentia nitrosa* & *antispastica*, quæ humores *nimum tenues* corrigunt, orgasmum illorum temperant & stricturas versus renes spasmodicas demulcent.
- 4) Ad *quartam classem* pertinent *salina*, quæ non solum efficacius incidunt & colliquant, sed etiam *salsedinem feri* augent, & hac ratione naturam excitant, ut contra domesticam æque ac peregrinam acrimoniam motibus euacuatoriis alacrius infurgat. Eius modi remedia sunt *salia acida*, & *alcalina*, eaque tam *fixa* quam *volatilia*, item *salia media*. Ex acidis principem locum obtinet *spiritus nitri purus*, *dulcificatus*, deinde *spiritus salis communis*, non item *spiritus vitrioli*. Ex alcalinis volatilibus, iisque mitioribus sunt *spiritus cornu cerui*, *lumbricorum terrestrium*, *eboris*, quibus adiungimus *spiritum tartari*. *Fixa alcalia* partim indifferenter *urinam* pellunt, partim *specifici* quid habere creduntur e. g. in *hydrope* *peculiarem sibi usum vindicarunt sal stipitum fabarum*, *genistæ*, *ononidis*, *imperatorix*. Confer *Paracels. in macr.*
- 5) *Quintam classem* formant illa, quæ principiis suis acribus humores non tantum potenter colliquant, sed & naturam ad motum renum relaxatorium directe, immediate & specificè stimulant. Huius tenoris sunt ex insectis *millepedes*, *scorpiones*, *bufones*, *cantharides* &c.: item *salia volatilia*, quæ, præter effectum præcedente classe indicatum, præcipue etiam in vias agunt.

## VI. MODVS ADPLICANDI.

Hic respicimus potissimum diuresin per remedia positiua stimulantia. Cum aliis enim blandioribus non facile aberratur.

I. *Debita corporis præparatio* præmittatur,

1) per aluinarum sordium blandam eliminationem.

2) Per sanguinis abundantis, si vrgeat, imminutionem.



2. *Ipsa diureseos promotio instituat per gradus.*

1) Ante omnia impedimenta remoueantur.

a) Quando *calculus* meatum vrinarium occludit hic prius remoueatur, siue per catheteris adplicationem, siue per lubricantia & emollientia, quo nomine decoctum *Foresti* nephriticum commendabile est.b) Præsente *caruncula venerea*, hæc per congrui septicæ adplicationem absumatur. *Vid. Hildanus.*2) Deinde *humorum* correctio & *viarum reseratio* respiciatur. Vnde

a) si humores nimium spissi sint, attenuentur per diluentia &amp; blanda resoluentia.

b) Quando autem nimium agiles &amp; tenues sunt, inuoluantur per absorbentia &amp; nitrosa.

c) Viæ renales quando spasticis stricturis coëscunt, antispastica cum nitrosis &amp; absorbentibus exhibeantur. Clysteres etiam egregium hic præstant vsum.

3) His non sufficientibus efficaciora resoluentia, vel salina propinentur, quo nomine præcipue laudamus essentiam vincetoxici &amp; salia media.

4) Denique, si necessarium fuerit, diuresis per stimulantia specifica directe promoueatur. Et hic quidem, quæ mitiora sunt, præmittantur, e. g. succus raphani ab vnciis iv. ad vj. spiritus lumbricorum terrestrium.

5) Ceterum opportunum tempus exhibendi, quod est in declinatione paroxysmorum, vbique obseruetur.

6) Nonnumquam etiam conuenit diuretica *externe* adplicare, e. g. cepæ sub cineribus assatæ & externe adplicatæ in stranguria mitius, item oleum scorpionum, lumbricorum terrestrium; fortius autem cantharides operantur.

## VII. CAUTELAE ET OBSERVATIONES PRACTICAE.

1. Quem ad modum *blanda* diureseos promotio amplissimam in praxi habet vtilitatem & in omnibus fere morbis



bis conuenit; ita positiuam & directam huius excretionis stimulationem, si promiscue instituas, infestam & sæpe periculofam esse, monent practici.

2. Hinc necesse est, vt *contra indicantia* sollicitè mente teneantur. Sunt autem sequentia:

1) plethoram insignem quam maximo esse impedimento *Riuerius* passim testatur; præcipue quando congestio plethorica versus renes facta est & vel stasin nephriticam, vel mictum cruentum minatur, quo casu venæ sectio debet præmitti, subiunctis temperantibus nitrosis.

2) Res præternaturales in viis vrinariis e. g. calculus, caruncula venerea, grumus sanguinis, tenax mucus.

3) Spasmodica renum constrictio arctior.

4) Reliqui morbi spastico-arthritici: materia enim tartarea, quam vulgo hic fingunt, & per diuresin eliminare student, minimæ est considerationis.

3. In calculo pellendo a fortioribus diureticis maxime cauendum est; nitrosa autem & relaxantia, cum præclarum vsum leni modo adferant, plurimis in dies magis approbantur.

4. In morbis ex cacochymia falsa productis, e. g. in scabie diuretica directâ directum non habent locum; deturbant enim materiam illam noxiam ad viscera. Hinc vel cum obtundentibus vel discutientibus sunt coniungenda.

5. Quicumque ægri in statu sano largam vrinæ excretionem habere consueuerunt, illis, ne hæc in aduersa valetudine supprimatur, tanto diligentius prouidendum est.

6. Dantur subiecta, quæ per periodos, e. g. singulis mensibus, vel circa æquinoctia largam lotii emissionem sponte naturæ magno cum leuamine experiuntur. Hinc necesse est, vt si in his qualiscumque defectus oriatur, congrua arte succurramus.

#### ★. RADIX ALLII.

1) Allii ad modum variæ occurrunt species: nos intelligimus vulgarem illam domesticam, culinis familiarem.

2) Hu-



- 2) Huius enim radix vel bulbus, principiis scatens valde acribus mucilagine tenui temperatis, inter ceteras, quibus pollet, virtutes, insigni vi abstergendi, resol- uendi & vrinam mouendi eminet.
- 3) Qua propter eius vsus laudatur præcipue in adfectibus mucidis pectoralibus, cachecticis, hydropicis, coli- cis flatulentis, verminosis, scorbuticis, hysterico- hypochondriacis. Sed notandum est, multos eius odorem grauem & saporem refugere, teneriores quoque validam illius operationem minus bene fer- re.
- 4) Vnde potius robustis plebeiis & rusticis conuenit, quo- rum etiam cum plurima mala ipsamque pestilentiam abegisse dicitur, rusticorum theriacæ nomen conse- cura est.
- 5) Allium quoque ipsi nautarum vulgo comestum eupo- riston est, quo se aduersus scorbutum præmuniunt.
- 6) Quem ad modum etiam quibusdam peregrinantibus in vsu est, ad appetitum conseruandum, allii capita cum vino deglutire.
- 7) In ipsa nephritide & calculo allii vsum noxam attulisse, exempla nos docuerunt.
- 8) Res est memoratu dignissima, quod Hungari ideo hæ- morrhoidali fluxui magis expositi sint, quia allii cre- briore vsu delectantur.
- 9) Odontalgia mederi ope allii flexuræ cubiti eiusdem lateris, quo dentis persentiscitur dolor, adplicati, experimentum est in vulgus notum.
- 10) Exhibetur vero vel interne, cum apto vehiculo e. g. aqua iuniperi, vel adplicatur contusa prius externe, videlicet regioni pubis.

#### 8. RADIX APII.

- 1) Est hæc e partibus alcalinis parcius nitrosis & sulphu- reis atque aliqua mucilagine conflata; simulque ad- numeratur radicibus quinque aperientibus maio- ribus.

2) Hinc



- 2) Hinc utilis esse perhibetur in malis cachecticis, atrophiciis, ictero, obstructionibus viscerum, calculo, vlceribus &c.
- 3) Non adeo autem amplius vñitata est, neque, si experientiam fidam consulamus, viscerum oppilationibus, quæ plerumque admodum contumaces sunt, medetur, neque nephriticis temere offerenda est. Frustra quoque ad epilepsiam aut colicam tollendam commendatur.
- 4) Meretur interim diætetica inter atque culinaria, vrinam cientia, suum locum.
- 5) Ad lactis abundantiam coercendam externe cum semine coriandri & aceto adplicatam commendat *Emmüllerus*.

## 9. RADIX ARI.

*vid. tab. de diaphoresi.*

## 10. RADIX ARISTOLOCHIAE ROTVNDÆ.

- 1) Dicitur quoque alias aristolochia caua, germanice *Hohl-Wurk*. Item fumaria bulbosa.
- 2) Radix principia fouet in primis sulphurea acris & amarissima; hinc sanguinem vehementer commouet & excalefacit.
- 3) Destinatur proinde potissimum adfectibus mucidis chronicis, tumoribus, cachexiæ, chlorotidi, fluori albo aliisque menstrui fluxus vitiis, atque inter emmenagoga validiora numeratur; vnde colligimus vsum eius parciolem & cum primis in lochiis atque secundinis propellendis cautissimum esse oportere.
- 4) Ob insignem amaritiem radix hæc quoque anthelminthicis accensenda videtur.
- 5) Quas vero laudes ipsi vulgo admetiuntur in podagra, phthisi, hæmoptysi & morbis acutis; illas experientia non confirmat.
- 6) Externe utilior est & confert in carie ossium, ytero prociduo, vlceribus sordidis, itemque ad dolores spasticos ac flatulentos, qui partum excipiunt, tum etiam ad tumores ab inflammatione liberos discutiendos.



Roborat enim laxas partes, & repellit interdum vehementius, quapropter in scabie cautim adplicanda est.

7) Vfurpari potest pulueris, infusi aut essentiae forma.

## II. RADIX ASPARAGI.

1) Constat e partibus mucilaginosi, aliquantum nitrosi & alcalini, ut loquuntur, terreis. Hinc segniores segerit in abstersione & diuresi adiuuanda, quamvis turiones eius comestos urinam valde foetidam & graueolentem reddere notissimum sit.

2) Veteres radicem hanc quinque aperientium classi assignarunt, sed quantum experientia hodierna docet, immerito; siquidem in obstructionibus & scirrhis viscerum, cachexia, hydrope &c. nusquam tam efficaciter operatur.

3) Frustra quoque aiunt eam valere ad calculum, scorbutum, spasmos, epilepsiam, sterilitatem, quam ultimam potius (si aliis credas) inferet, aut certius intantum relinquet, quam profligabit.

4) Quamvis igitur in his aliisque expectationem fallat, tamen haud vane specificam vim in mictu cruento possidere creditur, utpote in quo moderando virtutem huius radice in forma thee adsumtae pluries experti sumus.

## 12. RADIX BARDANAE MAIORIS

*vid. tab. de diaphoresi.*

## 13. RADIX CARLINAE.

*vid. tab. de diaphoresi.*

## 14. RADIX CARYOPHYLLATAE.

*vid. tab. de diaphoresi.*

## 15. CEPAE.

1) Foecundae sunt principiis subtilibus salinis acris, tenui mucilagine interspersis, ideoque satis valenter abstergunt, attenuant & diuresin mouent.

2) Conueniunt propterea in morbis a fero & lymphas spursum corrupta pendentibus, tumoribus, cachexia, hydrope, catarrhis diuturnis mucidis, in sordibus re-

num



num vlcerosis adeoque prophylactice in calculo, denique in scorbuto, vbi a nautis crebro vsurpatur.

- 3) Adiuuant quoque concoctionem, motusque hæmorrhoidales subinde cient, & grassantibus epidemicis febribus ab earum insultu præmunire dicuntur.
- 4) Deposcunt autem robustiorem vtentium constitutionem, & sicubi simplex nephritis adest, non temere suadendæ sunt. Halitus quoque ceparum & allii externus oculis nocere potest, interne vero data neutiquam ea damna visui inferunt, quæ permulti inde superstitiose verentur.
- 5) Cæterum vsus ceparum internus magis diæteticus est quam pharmaceuticus.
- 6) Externe cepæ assatæ applicantur ad vrinam suppressam eliciendam, ad tumores duros emolliendos, ad maturandas hæmorrhoides tumentes omniaque apostemata tam maligna quam benigna. Et sane vsus earum hic commendabilis est, non fecus ac in ambustis partibus, quæ a cepis leuiter mollitis aut illarum succo optatum leuamen recipiunt.

#### 16. RADIX DAUCI seu PASTINACAE SYLVESTRIS.

- 1) Hæc minus vsitata est, nec temere adhibenda, si verum est, quod *Willisus* scribit, ipsam comestam delirium inducere; etsi de eo merito ambigatur.
- 2) Prostat in officinis semen dauci duplex nempe 1) Creticum, quod suauissimum aromatis odorem spirat, sed rarum est & 2) nostras Cretico viribus haud absimile, ideoque in eius locum merito surrogandum.
- 3) Pertinet ad sic dicta semina calida minora, & cum semine apii cumini &c. eundem fere effectum edere obseruatur.
- 4) Laudatur alias ad dolores partus, suppressionem mensium & vterinam suffocationem tollendam, præcipue vero eius virtus calculum tam præcauendi, quam si præsto sit, frangendi ab *Helmontio*, *Boyleo*, *Etmüllero* aliisque extollitur, in quem vsum Angli etiam hoc semen cum cereuisia fermentandum curant. Sed



cum alii tam salubrem illius viri nondum experti sint, antequam iis encomiis credamus, pluribus & certioribus opus est documentis.

17. RADIX DICTAMNI ALBI.

*vid. tab. de diaphoresi.*

18. RADIX ERYNGII.

- 1) Coaluit e principiis mucilaginosi, parcius sulphureis & nitrosi, unde paullulum abstergendi & urinam ciedi vires quasdam mutuatur.
- 2) Equidem constat, hanc radicem vulgo quinque aperi-entibus adfociari, sed rarius eam præscribunt practici, procul dubio, vsu edocti, ad referandum hepar aut lienem obstructum parum valere.
- 3) Decantantur etiam illius laudes in resuscitandis mensibus, in gonorrhœa, nephritide, epilepsia, item in stimulanda venere & augendo lacte; verum an fides experimentis superstructæ sint, cum aliis dubitamus.
- 4) Hac igitur radice, vti compluribus aliis sine detrimento carere posse videmur.

19. RADIX FRAGARIAE.

- 1) Concreuit e partibus acidiusculis temperatis terreis, indeque tum parum adstringit, tum leuiter diuretica est.
- 2) Dicitur hinc herba pariter ac radix aperire viscera, inflammationes eorum solari, tollere dysenteriam, icterum, fluorem album, resistere venenis, sedare immodicos menses &c. Prædicatur porro, vt expultrix calculi omniumque vulnerum internorum & externorum consolidatrix. Quæ omnia si constanti veritate niterentur, magna vtique felicitate praxis abundaret.
- 3) Sed dolendum est ab experientia laudes hæc refelli, satisque compertum est suppetere nobis efficaciora, quæ in fragariæ locum sufficere possimus.
- 4) *Simon Pauli* radicem hanc in vino rubro decoctam commendat aduersus fluorem album. Verum &  
hoc



hoc cum cautione, ne quid præmatûre tentemus, imitandum est.

- 5) Aqua eius destillata vehiculi loco inferuit in tractandis supradictis adfectibus; Fructus autem seu fraga apta sunt ad æstum & sitim paullulum leuandam, nec tam facile, quam multi metuunt, corruptelas inferunt humoribus.

20. RADIX GENTIANAE RVBRAE.

*vid. tab. de diaphoresi.*

21. RADIX GRAMINIS.

- 1) Graminum varietas atque familia est amplissima, & numerantur a *Scheuchzero* ultra quadringenta; illa autem præcise species, cuius radix diureticorum catalogo inseri meretur, dicitur gramen caninum spica triticea, vulgo *Quecken* dicta.

- 2) Principia habet parcius nitrosa salina acidiuscula cum aliqua mucilagine, a quibus leuem abstergendî virtutem foeneratur.

- 3) Est e censu quinque aperientium minorum, & pari modo, ac præcedens, magnis vulgo laudibus effertur in obstructionibus viscerum, ictero, calculo &c. præterea in hæctica, hæmoptysi, mictu cruento, dysenteria.

- 4) Sed omnino per se debilius operatur, tales effectus, nisi meliorum consortio stipata sit, vix vnquam editura.

- 5) Cæterum hodie quoque euiluit, & rarius, nisi forte in decocto ad lumbricos infantum enecandos, propinatur.

22. RADIX HELENII.

*vid. tab. de diaphoresi.*

23. RADIX HERNIARIAE.

- 1) Dicitur & mille grana maior, ac herba eius tantum in vsum recipitur.

- 2) Hæc vero d magnam dignitatem prouecta est, postquam *Hollerius* primum ac deinde alii excellentem eius virtutem herniis curandis parem compererunt.



3) Adhibetur itaque interne & externe in omnibus fere ramicibus, quamquam hodie non ambigatur, aptam deligationem cum debito regimine plus efficere posse.

4) Alias tanquam nobile vulnerarium prostat, itemque ad icterum, renum vitia, calculum pellendum præcipue laudatur. In nephritide vero abstinere conuenientius fuerit.

24. RADIX IMPERATORIAE.

*vid. tab. de diaphoresi.*

25. RADIX LEVISTICI.

*vid. tab. de diaphoresi.*

26. RADIX NASTVRTII.

*vid. tab. de diaphoresi.*

27. RADIX ONONIDIS.

1) Abundat hæc radix particulis salinis nitrosis, quæ pauca sulphurea interfusa sunt; ideoque tum diureticam, tum resoluentem & abstergentem vim obtinet.

2) Adnumerant proinde eam quinque aperientibus minoribus paullo maiori iure, quam alias ante hac recensitas, quippe in leuiore hepatis obstructione & ictero, nec non in cachecticis & hydropicis malis non contemnenda est.

3) Diuturnum pulueris huius radiceis vsum singulari & specifica virtute paulatim consumere sarcocelen testantur *Matthiolus, Scultetus, Bartholinus, Ettmüllerus.*

4) Cæterum in calculo sub iustis cautionibus; in odontalgia autem, hæmorrhoidibus cæcis &c. fere frustra adhibetur.

28. RADIX PARREIRAE BRAVAE.

1) Hæc non ita diu ex America ad nos delata radix cum particulis scateat sulphureis oleosis & salinis acidis, qualitatem etiam ostendit abstergentem & diureticam.

2) Vnde quidem vsum eius ad vitia renum in primis traduxerunt & in spasticis renum doloribus nephritide & cal.



& calculo leniendo specificas eius dotes reperisse se practici non nulli testantur.

3) In adfectibus serosis quoque & hydrope haud inutilis deprehensa, hodie a quibusdam ad rebellem podagram perdomandam adhibetur.

4) Cum autem huc vsque nondum satis perquisita fuerit & præterea carius venierit, factum inde est, vt adhuc veriorum experimentorum penuria laboremus.

5) Datur alias ordinarie in decocto, rarius in puluere aut essentia.

29. RADIX PETASITIDIS.

*vid. tab. de diaphoresi.*

30. RADIX PETROSELINI.

1) In hac radice aliis præponderant particulæ salinæ nitroso - alcalinæ, vnde pariter generalis illa virtus abstergendi, resoluendi & vrinam propellendi exoritur.

2) Quapropter ad quinque aperientium maiorum numerum refertur & in omnibus morbis ab obstructione viscerum & glandularum natis, porro in omnibus mucidis & serosis, præcipueque in calculo magnis vulgo encomiis ornatur.

3) His nos subscribere non possumus; etsi petroselinum diætetico maxime vsu hic præscribi possit & vtique in mitiori talium morborum gradu conducat. Quamquam autem alias largius præberi queat sine periculo conuulsionum aut vlla capitis offensa, quam inde non nulli metuunt; cautius tamen in nephritide dandum est.

4) Extus sat bene resoluit & tumoribus mammarum nodosis pluries cum fructu adplicatur.

5) In officina aqua eius destillata prostat satis diuretica.

31. RAPARVM RADIX.

1) Hæc radix itidem culinis notissima, quem ad modum succo temperato nitroso exuberat; ita & vrinam leuiter



uiter mouendi & simul acrimoniam humorum demulcendi qualitates habere existimatur.

- 2) In primis autem singularis laus decocto raparum præfertim exsiccatarum tribuitur, in raucedine, tussi sicca, asthmate, stranguria, dysuria, item in quartana & melancholia, quarum vltimarum tamen firmas radices non facile euulsurum videtur.
- 3) Certius vero externe conferunt in pernionibus (vbi quidem flaccidæ aut gelu ante congelatæ rapæ aliis præstare dicuntur) & ambustione. Præter hæc nec visum adeo roborare, nec dentium aut podagræ dolores extinguere deprehenduntur.
- 4) Semen raparum quoque passim in vsu est & magnam sui expectationem apud aliquos concitauit in superandis venenis & febribus malignis, variolis & morbillis; sed ambiguus est, quantum huc vsque innotuit, illius effectus.

### 32. RAPHANVS.

- 1) Plena est hæc radix particulis salinis acrioribus, mucilagine quadam & terra intertextis, a quibus maxime sortitur vim suam incidendi, abstergendi & diuresin adiuuandi.
- 2) Vsum proinde adfert in morbis abdominis longinqui-  
oribus a sero mucido deprauato ortis, vt in cachexia, hydrope, obstructionibus glandularum mesaricarum itemque in ictero, scorbuto, catarrhis lentis chronicis, & (modo opportune) in renum vitiis, denique in vermibus necandis.
- 3) Quamuis autem, in primis eius semen, ad febres malignas morsusque virulentos valere dicatur, tamen hoc magis optabile est, quam veracibus experimentis satis adhuc dum adsertum.
- 4) Cæterum intus datam hanc radicem capiti & oculis debilioribus nocere aut podagricis adeo infestam existere, fabulosum est.
- 5) Externe in deliriis acutarum apponitur plantis pedum,  
viti



vti alia sic dicta rubefacientia; an vero etiam e pestilentibus carbunculis, vt *Paræus* vult venenum potenter attrahat, vel vt *Forestus* scribit, verrucas pedumque clavos absumat, dubitatur.

- 6) Semen raphani parem cum radice facultatem prope modum obtinet.
- 7) Peruulgatæ satisque vsitatæ sunt adhuc duæ aliæ *raphani* species, nempe tum *raphanus sativus minor* & *longus* præcedente longe mitior & suavior; tum *rusticanus* seu sylvestris, qui multis *armoracia* vocatur.
- 8) Hæc vltima sicut vulgarem raphanum volatili acrimonia longe antecedit, ita & subtilius & valentius corpus adficit ac penetrat, nec propterea tamen humores insigniter accendere videtur.
- 9) Vtilis ergo est, in omnibus, vbi raphanus valet, morbis nec pigendum effectum edit in desiccandis vlceribus externis. Certe succus eius cum saccharo datus calculosos & hydropicos non plane deploratos, mirabiliter subinde alleuauit.

### 33. RADIX SAXIFRAGÆ.

- 1) Hanc similiter diureticam radicem veteres ad detergendum renum mucum & calculum frequentius adhibuisse leguntur.
- 2) Hodie autem rarissime vsurpatur, quapropter plura de ea loqui supersedemus, præsertim cum indoles eius peculiaris parum perspecta sit & laudatas vires frangendi calculi vanas esse iam *Ettmüllerus* notauerit.

### 34. SQVILLA.

*vid. tab. de emesi.*

### 35. RADIX VALERIANÆ.

*vid. tab. de diaphoresi.*

### 36. RADIX VRTICÆ.

- 1) Hæc radix particulis sulphureis parcius, paulo largius autem salinis alcalinis imbuta, cæterum lignosa est, vnde quoque imbecillius abstergit & vrinam ciet.
- 2) Etsi enim præstantia illius in aperiendis visceribus, plurimisque malis depellendis vulgo mirum in modum



celebretur; tamen quascunque veras laudes vrtica meretur, eas potius herbæ, quam radici competere peritiores animaduertunt.

3) *Herba* igitur cum & maior & minor occurrit, hæc vltima ob insigniorem teneritudinem & efficaciam feligenda est.

4) Quemadmodum autem partibus salinis, acidis & subtilioribus terreis compositionem sui debet, ita hinc & resoluendi & simul adstringendi virtutem adepta est, ideoque utilis in omnibus sanguinis profluuiis, in primis in hæmoptysi, (vbi pro specifico habetur) in hæmorrhagia narium, vteri, hæmorrhoidibus nimis, fluore albo.

5) Commendatur præterea in viscerum obstructione, ictero, asthmate, tussi quacunque, calculo, vlceribus externis repurgandis; quæ omnia licet haud satis explorata sint, tamen solertiore inuestigatione digna videntur.

6) Incertior adhuc illius efficacia est in arthritide vaga, malo hysterico, & dentium doloribus.

7) Vsurpatur tam interne quam externe in decocto, vel quod fere præstat, in succo.

8) Semen eadem, qua herba, virtute pollet, incassum vero ad sterilitatem tollendam exhibetur.

37. HERBA CAPILLI VENERIS.

*vid. tab. de diaphoresi.*

38. HERBA CHÆREFOLII.

*vid. tab. de diaphoresi.*

39. HERBA HEDERÆ TERRESTRIS.

1) Sicut hanc herbam eadem fere principia constituunt, quæ præcedentem vrticam, nisi quod subtile sulphureum huic magis accesserit; ita & generatim parem ei facultatem inesse intelligimus.

2) Dilaudatur proinde in omnibus fere malis, quibus vrtica destinatur, sigillatim vero in renum vitis, mictu cruento, nephritide, calculo; porro in atrophia, vomica pulmonum; confer. *Ettmüllerus*; excellens enim

vul;



vulnerarium censetur, & a *Paracelso* specificorum vlcera ab intra purgantium classi attribuitur.

3) Cæterum pro herba pectorali habetur. Laudes autem illius in conciliando febrientibus somno, in dentium & capitis doloribus, in surditate, gangræna, cancro, strumis, nodisque podagricis discutiendis admodum dubiæ adhuc sunt, & ex parte nauseosam sapiunt hyperbolem.

4) Vsurpatur vt vrtica, vel exsiccata in decocto, vel recens in succo.

#### 40. HERBA LINARIÆ.

1) Hæc minus in usu est, nisi quod cum floribus in vnguentum notissimum, cui nomen suum impertit, redacta hæmorrhoidibus cœcis adplicari soleat, ac subinde aliquantum leuaminis adferre videatur. Notandum autem est, in tumentibus nihil efficere hoc vnguentum, nisi vel iam paullulum exulceratis vel ad vlcerationem proximam inclinantibus.

2) Alioquin huic herbæ amaræ calefacienti & abstergenti ac diureticæ assignantur vberiores non minimæ virtutes, quas tamen, vt aliarum plurimas, ob necessariorum experimentorum inopiam nondum satis explicatas habemus.

#### 41. HERBA NASTVRTII.

*vid. tab. de diaphoresi.*

#### 42. HERBA VERONICÆ.

1) Principia habet cum hedera terrestri fere communia, nisi quod sal eius propius ad salis culinaris indolem accedat; indeque tonico-adstringentem, paululum resoluentem & diureticam arcessit qualitatem.

2) Gloriosas igitur & nomine suo dignas vires consecuta dicitur in omnibus pectoris præcipue adfectibus, tussi, asthmate, punctiõibus laterum, vomica pulmonum &c. itemque in vlceratione renum & calculo, namque & præstantissimum vulnerarium iudicatur. *Confer. D. Franci Veronica Theezans.*

3) Commendamus hæc vltiori experientiæ, & monemus



tantum, si, vt vulgo fit, in forma thée vsurpetur, imbecillem esse veronicæ facultatem; quapropter vt hæc melius euehatur, necesse est, præmonstrante *Illustri Stablio* (in disp. de pectoris adfectibus) herbam vino infusam & per 10. vel 12. dies maceratam eo vsque destillare, donec liquor transiens spiritum vini referat perquam dilutum. Hic liquor longe efficacius, quam quicquam aliud e veronica pectori confulit & in recentiori tussi hectica abdominis & phthifica, sæpius, aliquando etiam in broncho & asthma senili, optato cum euentu se nobis approbavit.

- 4) Veronica alias quoque extollitur in scirrho lienis, colica, hydrope, febribus, pestilentia, sterilitate, moribus virulentis &c. quibus tamen honoribus immerito onerari videtur.
- 5) *Ettmullerus* notat, Tyrolenses bronchocele adfectos non se tantum, sed & porcos suos eodem morbo laborantes decocto & pulmento huius herbæ sanare.
- 6) Extus salubriter, docente *S. Paulli*, clysteribus incoquitur, qui quidem singularem inde vim combibunt ad deliniendos spasmos colico-hystericos & nephriticos.

#### 43. HERBA VIRGÆ AVREÆ.

- 1) Dicitur quoque consolida Saracenica, vel mas vel femina. Prioris flores ad alas foliorum enati, & in spicam laxiorem dispositi, posterioris vero flores in umbellulas digesti conspiciuntur.
- 2) Contexta est e moleculis salinis & terreis sulphurea amaricante quadam portione intermixtis, atque huic compositioni acceptam refert vim suam moderate adstrictoriam, abstergentem & parce diureticam.
- 3) Collaudatur inde vnanimi auctorum consensu tamquam egregium prorsus traumaticum, quo nihil fere in prauis vulneribus ac vlceribus præstabilius & conuenientius dari possit. *Paracelsus* quoque iam plantis illam adnumerat vlcereum fordes ab intra, vt loquitur, detergentibus.

4) Et



4) Et sane tum hic, tum in vomica pulmonum & vlcerosorum statu calculum plerumque comitante, vtilis reperta fuit.

5) Cæterum hanc herbam calculum frangere, hepar & splenem oppilatum referare, percurare hydropem, dysenteriam &c. facilius dicitur, quam indubiis documentis probatur.

#### 44. FLORES ARNICÆ.

1) Hæc planta quia minus huc vsque cognita & vñitata, in officinis etiam raro genuina prostat; natiuos eius characteres subiicere operæ pretium erit. Crescit autem affluentius in regione Variscorum prope Græcium & Plauiam, itemque in Bohemia, & in cubitalem caulis longitudinem assurgens, foliis binis in superficie paullulum hirsutis ex aduerso nascentibus, tot ramos dispergit, quot flores prolaturus est. Flos apparet radiatus, semiflosculis, qui coronam constituent, circa basin in tubulum rotundum abeuntibus atque ibi crinium instar se ostendentibus. Cæterum aureo colore, dum recens, speciosior, deinde fit papposus; idque longe citius, si ad exsiccandum reponatur. *conf. D. de la Marche disp. de arnica.*

2) Cum vero doronici species sit, ideoque a *Tournefortio* doronicum plantaginis folio alterum *C. Bauhini* adpelletur, communi opprobrio virulentam esse hanc herbam quidam pronunciarunt, sed prorsus inmerito; vt iam videbimus.

3) Constat e principiis salinis, tenuioribus terreis & sulphureo-resinosis, indeque generalem resoluendi & diuresin ciendi qualitatem haurire colligitur.

4) Speciatim vero in contusionibus & resoluendo sanguine coagulato a lapsu, nimii oneris gestatione &c. aliis remediis, quantum constat, præualet, admirabilemque & specificam sui virtutem in plurimis exemplis nobis approbavit, quemadmodum etiam a *Ioh. Mich. Febrio* lapforum panacea nuncupatur.

5) In paralyfi quoque & contractura tollenda sæpe plus  
Y 3
huius



huius simplicis herbæ ope, quam maiore aliorum adparatu efficere potuimus, neque minus eandem in nephritide, arthritide, laterum doloribus chronicis aliquantum profuisse obseruauimus.

6) Cæterum mirum id quidem est, sed tamen aliquot experimentis probatum, lapsis solos flores ad salutem sufficere; in contractura autem aliisque malis (siquidem meliorem effectum desideres) plantam integram cum radice præscribi oportere.

7) Denique, cum *Langius* arnicam ad emetica referens scrupulum tentaturis iniicere posset, notandum est, quamuis hæc herba in quibusdam vomitum cieat, complures tamen a decocto nec nauseare nec vomere. Plerumque autem vsus eius dolor partis adfectæ salutaris indicio subsequitur.

8) Datur in decocto vel infuso & ad p. j. vel ij. vna aquæ simplicis vel cereuisiæ mensura recipitur. Decoctum efficacius est, citiusque curationem absoluit, sed quia simul maiorem nauseam creat, satius erit tene-rioribus infusum, vtpote iucundius minusque validum, per vices diutius propinare.

#### 45. FLORES BELLIDIS.

1) Referti sunt particulis salinis acidis, subtilioribus terreis & parcius sulphureo-resinosi. De omnibus participant tam hortenses, quam pratenses, ita tamen, vt illi lenissimi, hi paullo minus mites, herba autem aliquantum acerbior videatur. Existit hinc eorum vis roborans, moderate adstrictoria & abstergens.

2) Valet itaque, præcipue pratensis, ad nimiam partium internarum laxitatem, ad vulnera, ad hæmorrhagias, denique ad stagnantes alicubi humores paullulum resoluendos.

3) Laudem alias habet in aperiendis visceribus, in spirandi difficultate, scorbuto, hydrope, item in arthritide, ramicibus, strumis &c. sed hæc tantisper, dum clarior experientiæ lux affulserit, ad incertum reuocantur.

4) Paul;



4) Paulo plus efficit in incipiente tussi phthifica, & sanguine coagulato discutiendo, eosque releuat, quibus a potu frigidus calenti corpori repente ingesto graviora obtigerunt incommoda. In huiusmodi enim casu a *Minderero* aliisque practico ut eximium specificum celebratur.

5) Tinctura florum bellidis officinalis frequenter usurpatur ad temperandum æstum in congestionibus vehementioribus & febribus, itemque ad minuendas immodicas hæmorrhagias; sed moderate adhibenda est.

6) Cæterum ad usum parantur e bellide decocta & acetaria.

#### 46. FLORES GENISTÆ.

1) His innexa sunt principia salina acida cum mucilagine & terra calcaria permixta, indeque qualitas valde abstergens & diureseos concitatrix deducitur.

2) Adhibentur ergo non sine fructu in cachexia, hydropo, ictero, & menstribus imminutis aut decoloratis. In renum vitiis autem & calculo magna cautione & vix nisi ad prophylaxin quandam præscribi oportet.

3) Nondum satis probati sunt in scorbuto, quartana, scirrhus lienis; frustra que eorum virtus ad podagram & scrophulas eradicandas exaggeratur.

4) Ordinantur flores in pulvere vel decocto vel conferua. Cineres & sal genistæ infusis diureticis adduntur.

#### 47. FLORES HYPERICI.

*vid. infra sub semine hyperici.*

#### 48. FLORES LINARIÆ.

*vid. sub herba linaria.*

#### 49. FLORES VIOLARVM.

*vid. sub semine violarum.*

#### 50. SEMEN BARDANÆ MAIORIS.

*vid. tab. de diaphoresi.*

#### 51. SEMEN CARVI.

1) Huic semini principia temperata sulphurea oleosa, atque



que aromatica qualitatem impertiunt resoluentem, discutientem & roborantem.

2) Itaque sicut in culinis principale iam *Plinii* tempore fuit, ita hodie varia cum vtilitate a medicis in subsidium vocatur ad corrigendam primarum viarum pituitam, atoniam, flatulentiam & colicam inde oriundam; porro ad diarrhœam & dysenteriam, itemque mucidos catarrhos, renum vitia, cachexiam, morbosque feminarum ex imminuto aut decolori mensium statu subnatos, dolores post partum &c.

3) Etsi vero in his vsum suum vtique præstet; tamen immodicis laudibus non est onerandum. Multo incertius autem ad restituendum visus acumen & vertiginem (nisi quidem e ventriculo symptomata acciderit) & memoriæ debilitatem tollendam commendatur.

4) Extus idoneum est ad varias congestiones humorum, stases & tumores discutiendos.

5) Vtimur eo vel in tragæa vel in decocto. Prostat etiam aqua & oleum destillatum: quod tamen, vti alia olea ætherea, parcius interne porrigendum est.

## 52. CORTICES AVRANTIORVM,

*vid. tabul. de diaphoresi*

## 53. CORTICES CITRI,

*vid. ibid.*

## 54. SEMEN CUMINI.

1) Deuehitur ad nos ex Italia, eiusque non tantum principia, sed & effectus conueniunt cum caruo, quod alias cuminum nostras & pratenſe adpellatur.

2) Præscribitur quoque tympaniticis, singultu & anhelitu foetido laborantibus, similiter, vt *Solenander* laudat, flatulentia vteri & fluore albo adflictis; cæterum quatuor seminum calidorum maiorum numero inferitur.

3) *Plinio* tradente omnem pallorem bibentibus gignit; verum hoc perinde ac compescendarum hæmorrhagiarum



rum efficacia huic femini adscripta ad fabellas pertinere videtur.

- 4) Extus lactis concretionem arcet, tumoresque frigidos pulcre identidem dispellit. *Plura confer n. 51.*

55. SEMEN DAUCI.

*vid. sub radice dauci, seu pastinacæ sylvestris.*

56. SEMEN HYPERICI.

- 1) Concretum e partibus salinis acidis & terrestribus, putatur accepisse vires abstergentes pariter, ac traumaticas.
- 2) Laudatur exinde ad profluvia sanguinis, ulcera renum & calculum. Insuper & vermes interimit; sed cum alia probatiora dentur, flores quoque & herba semine vilitiora sint, ad praxin medicam vix necessarium videtur.
- 3) Herbae & floribus exquisita nonnulli encomia admetiuntur non modo in dictis malis, sed etiam in ramibus, vertigine, apoplexia, epilepsia, tumoribus artuum, malo ischiadico, fluxu albo, ictero, quartana, pestilentia, melancholia, veneficiis immo dæmonum obsessione, vnde fuga dæmonum cognominatur. Sed nescio qui fiat, ut hodie tam raro medentum votis hic respondeat, & plerique modo adlegati morbi validioribus armis, ne dicam hyperico, non facile superentur.
- 4) Adparet equidem esse herbam vulnerariam in læsionibus continui & ulceribus consolidandis, in roborandis partibus luxatis, contusis aut fractis salubrem, neque in extinctione vermium, qui in ventriculo & duodeno hærent, contemnendam; verumtamen, quia satis fortiter adstringit, interne eam cautius propinare, neque indetanti successus spem nobis facere debemus.
- 5) Certe prædicatam eius vim ad incantationes & dæmonum artes fugandas, ut multi publice fatentur, peperit aluitque diu mera credulorum hominum superstitio.



## §7. SEMEN MILII SOLIS.

- 1) Compactum est e particulis salinis alcalinis, terreis & parciore mucilagine, quorum nexus illi ingenerat qualitatem absorbentem, abstergentem & diureticam.
- 2) Proinde ei passim ab auctoribus non levis efficacia tribuitur in calculo, ischuria, stranguria, mensium defectu, partu & secundinis propellendis, gonorrhoea sedanda &c.
- 3) Sed quoniam nihil horum satis adhuc expertum habemus, aliaque probatiora suppetunt; vsum huius seminis commendari non attinet.

## §8. SEMEN SILERIS MONTANI.

- 1) Dicitur etiam feseli & a locis, vnde deferri solet, Creticum Italicum & Massiliense cognominatur.
- 2) Ad partes constituentes & petitas inde vires quod attinet, maxime refert indolem seminum calidiorum minorum.
- 3) Ex quo facile potest intelligi, vsum eius non spernendum esse in cruditate & atonia primarum viarum, flatibus, catarrhis mucidis, vitiis renum, morbis serosis &c.
- 4) Idem autem menstrua adeo promouere, parturientibus subuenire, epilepsiam tollere, omneque virus, imprimis cicutaë infringere, dubito an satis comprobatum sit.

## §9. SEMEN VIOLARVM.

- 1) Hoc in mixtionem suam pauciores particulas sulphureas, plures salinas alcalinas recepit, qualitatem exinde abstergentem & diureticam pariter indeptum.
- 2) Dicatur propterea emendandis renum vitiis, praesertim calculo leniter pellendo, in quo ipsum *Crato* alique mire extollunt.
- 3) Ad calculum autem vere frangendum tam parum, quam alia, valet, neque etiam, vt quorundam opinio est, partum faciliorem praë aliis reddere obseruatur. Cæterum commode datur in emulsione.

4) Vti



- 4) Vtiliores sunt *flores violarum*, qui cum principia teneant leuiter acida salina, mucilagine quadam temperata, virtutem inde capeffiuerunt abstergentem, lenientem & expectorantem.
- 5) Quocirca conferunt in asperitate faucium, tussi & catarrho acriori, nec non in renum vitiis & in orgasmo, quem nimia biliosi sanguinis tenuitas sæpe concitat, temperando.
- 6) Quamquam autem cordialium florum titulo decorentur, tamen parum roboris & analepseos ex eorum vfu decumbentibus afferri audias subinde conquerentes Practicos.
- 7) Multo minus vero aut visum acuere, aut cephalalgiam tantopere delinire comperiuntur.
- 8) Prostant ex his confecta aqua destillata, conferua, acetum, syrupus. Reliquis autem præstat syrupus.

## 60. SEMEN VRTICÆ.

*vid. sub radice vrticæ.*

## 61. AMYGDALÆ AMARÆ.

- 1) Particulæ oleosæ, salino - alcalinæ acres, mucilago & paucior terra confociata, huius generis amygdalis insita sunt; iisdemque vim abstergentem resoluentem, meatusque vrinarios stimulantem insinuant.
- 2) Haud inepte itaque morbis diuturnis serosis & catarrhis viscidis destinantur. Tutiores etiam & fere aliis diureticis conuenientiores sunt, vbi calculum pellere circumstantiarum ratio & necessitas exigit.
- 3) Num vero hepar & splenem obturatum aperiant, quartanæ etiam & scabiei medeantur, liceat ambigere.
- 4) Illud autem memorabile est, amygdalas hasce plerisque animantibus volatilibus & quadrupedibus, quæ nempe secundum nonnullorum opinionem coeca nascuntur, comesta mortem inferre, quapropter etiam lumbricos infantum peremturæ atque in hydrophobis ideam rabiosam exstincturæ creduntur.
- 5) Cæterum quamuis iam vetustas earum vsum ad arcendam



dam ebrietatem memoriæ prodiderit; tamen hodie spem gurgitum & helluonum sæpissime frustrantur.

62. BACCÆ ALKEKENGII.

- 1) Hæ quemadmodum ex acidis salinis cum terra lutosa calcaria mixtis moleculis cohæſionem; sic inde facultatem habent pariter abſtergentem, liquantem humores & diureticam.
- 2) Hinc generaliter colligimus, eas quoque conducere in cachexia, œdematibus, hydrope, & lenioribus atque a grauiore febrili æſtu liberis hepaticis vitiis.
- 3) Inprimis vero nobiles deprædicantur in iſchuria, renum exulceratione & calculo. Sed in hoc quidem cautiffime, neque vnquam niſi abſente paroxyſmo, dandas eſſe monent nonnulli prudentiores Præctici.
- 4) Narrantur etiam experimenta, vbi has baccas in miſctu cruento, hæmoptyſi, epilepſia, podagra auxilio fuiſſe aiunt: verum hæc partim dubia, partim non temere imitanda eſſe putamus.
- 5) Extus in ſuffitu hæ baccæ aliquando e dente carioſo grauiusque dolente, plurimos vermiculos cum leuamine elicuerunt.
- 6) Proſtant trochiſci alkekengi ſeu de halicacabo; poteſt etiam aqua deſtillata vel infuſum porrigi.

63. BACCÆ IUNIPERI.

- 1) Exuberantes partibus oleoſis, acribus, reſinoſis fragrantibus & terreis acidulis poteſtatem habent, vti diureticam, ſic validius reſoluentem, excalfactoriam & roborantem.
- 2) Propterea non de nihilo eſt, ipſas mucidæ catarrhali frigidæ & cachecticæ intemperiei, vbicunque hæreat, corrigendæ deſtinare, atque etiam œdematibus hydropticis, obſtructionibus glandularum & menſium vitiis opponere.
- 3) Concoctionem quoque iuuant, & quatenus moderate aliis interponantur, ſcorbuticis vtilis ſunt; in nephritide



phritide vero, vti alia calida diuretica, illas merito excludimus.

- 4) Celebrantur præterea, vt antidotum pestilentiae, vt specificum antiscorbuticum, vt arcanum in lepra, podagra &c. sed licet alias salubres vires acceperint, tamen tantum in eis præsidium latere multi non credunt.
- 5) Extus ad laxas partes roborandas & catarrhos ac tumores frigidos discutiendos inferuiunt, ipsosque dentium dolores, si magis catarrhalis frigida indolis sint, alleuare possunt. Præscribuntur autem in suffitu, aut cataplasmate, aut spiritu, vel oleo.
- 6) Interne vero dantur in substantia, decocto, vino medicato. Succus quoque ex baccis eductus & inspissatus seu rob iuniperi, Germanorum theriaca dictum, ad laudatos effectus non inconueniens est.

#### 64. BACCÆ LAVRI.

- 1) Iuniperi tam principiis quam virtutibus non multum dissimiles, in plerisque iis morbis, quos ibi modo memorauimus, frequenter vsurpantur.
- 2) Per multi tamen baccas lauri iuniperinis adhuc præferunt in flatulentia & colica, nec minus eas longe efficaciores esse sentiunt in vermibus necandis, mensibus, foetu & secundinis pellendis, ac doloribus post partum deliniendis. Et cauere sane nos decet, ne, cum hæ baccæ feruidiores sint, eas largius aut intempestiue præfertim calidis, tenerioribus ac delicatulis offeramus.
- 3) Expedit tum potius illas externe adplicare, vbi vi sua resolvente & roborante aliquid emolumenti afferunt in atonia partium paralytode. Paulo magis emplastrum de his baccis aut cataplasma tumores frigidos discutit, oleumque destillatum conuenit in flatulentia, colica & doloribus post partum, item (sed incerte) in mensium suppressione & sterilitate. Neque ad eodem vsus inepta sunt lauri folia, e quibus paratum oleum



clysteribus carminatiuis sæpe inditur, & alioquin ad scabiem, achores, maculas faciei (Finnen) laudatum prostat, sed in his quidem (inprimis cum sulphure, vt præcipiunt, maritatum) repellente effectû nociturum potius quam salutare videtur.

65. FRUCTVS CYNOSBATI.

- 1) Particulas salinas cum mucilagine quadam continent, indeque potestatem resoluendi, abstergendi & (maxime propter *arillos* terra alcalina foetos) urinam propellendi mutuuntur.
- 2) Quamobrem in omnibus morbis chronicis, vbi generales hos effectus & diuresin respicere nos decet, conueniunt, ibidemque iuxta ac in vitiis primarum viarum & scorbutica labe (opportune tamen) vt euphoriston culinare præscribi queunt.
- 3) Excludantur autem in simplici nephritide, neque in calculo, nisi exacerbatio remiserit, facile indulgeantur.
- 4) Præclaræ etiam, sed incertæ, virtutes illi adsignantur in variis sanguinis profluuiis, gonorrhœa, dysenteria, vomitu nimio, singultu.
- 5) Flores non nullis in locis adeo occurrunt fragrantés, vt ipsis rosarum floribus palmam dubiam reddant.
- 6) Cynosbato porro adnascuntur fungi, passim in retentione urinæ, calculo, hæmoptysi, vlceribus &c. laudati. Sed hæc quoque non minus ac radicis vsus ad morsum canis rabidi, firmamentum ab vberiori experientia desiderant.
- 7) Ultimo notamus, quibusdam hodie in vsu esse ad præsignificatos effectus obtinendos, arillos cynosbati fabarum coffee instar tostos in decocto propinare.

66. NUCLEI PERSICORVM.

*vid. tab. de catharsi.*

67. NUCLEI CERASORVM.

Quod si horum principium & qualitatem spectes, cum persicorum nucleis propemodum vbique congruunt.



unt. Quorum effectus cum superius explicauimus, superuacaneum videtur hisce enucleandis longius immorari.

68. GUMMI AMMONIACVM.

- 1) Exstillat ex planta ferulacea quadam in Lybia progerminante, indeque ad nos aduehitur.
- 2) Optimum est candicans, molliusculum, substantia crassiori picea destitutum.
- 3) Principiis constat sulphureis, acrioribus, cum mucaginosis in aqua dissolubilibus; vnde potenter & interne & externe adhibitum discutit, resoluit, emollit, aperit, aluum leniter subducit, viasque vrinarias stimulat.
- 4) Optime resoluentem exserit effectum, si in asthma in emulsionis forma exhibeatur.
- 5) In atrophia adultiorum quoque, ob peculiarem suam temperiem maximopere conducit.
- 6) Porro in infarctu hepatis ammoniacum laudes suas, quas ei *B. Ettmüllerus* cecinit, omnino aliquantum meretur. Magis tamen adridet nobis, si in pilulari forma, quam si in fluida emulsua offeratur, quia posteriori modo facile nauseam creat.
- 7) Externe tam ad discutiendum, quam ad maturandum amplissimi est usus, quod præcipue de emplastro de ammoniaco *Foresti* valet, vtpote cuius usum felici successu comitatum nos in phlegmone aliisque tumoribus sæpius comperimus.
- 8) Cæterum dolendum est, in scirrhis viscerum rarissime ea miracula, quæ edidisse legitur, patrare, neque, ut nonnulli ammoniacum eo nomine efferunt, ad visum acuendum, vlcera & clauos pedum sanandos, arthriticos & ischiaticos leuandos, adeo vtile animaduerti.

69. GUMMI BDELLII.

- 1) Effluit e resinosa quadam arbore Arabiæ, & cum repletum sit particulis sulphureis ac temperate salinis, similiter



liter inde resoluendi, liquandi, aluumque paululum, & vrinam mouendi potestatem sibi adsciscit.

- 2) Præstantissimum censetur flaescens, sapore amaricanti, fragrans, oleosum ad flammam concipiendam promptum, quodque facile liquefit, & dum frangitur, pellucet, a fordibus nigris liberum.
- 3) Iam ab antiquitate magni habitum laudatur in morbis chronicis seroso-lymphalibus & (dubie tamen) in nimio mensium ac hæmorrhoidum fluxu.
- 4) Hodie vero rarius intus fumitur, tantumque ad tumores glandularum aliarumque partium dissipandos non sine fructu adplicatur.

#### 7c. GUMMI GALBANI.

- 1) Exsudat ex simili quadam cum præcedente ammoniaci plantæ specie, & Constantinopoli ad nos adfertur.
- 2) Succus est resinoso-pinguis, sed non tam oleo, quam aquoso humore resolubilis, inter gummi & resinam consistentiæ quasi mediæ, coloris flaescens, substantiæ molliusculæ, saporis amari acris, odoris grauioris.
- 3) Principia cum ammoniaco fere communia fouet, nisi quod calidior sit & insigniorem acrimoniæ gradum attigerit. Vnde præter emollientem & resoluentem vim, emmenagogam quoque subinde exercet.
- 4) Qua propter, licet haud leuem sui efficaciam prodat in morbis sic dictis frigidis serosis catarrhalibus, primarum viarum deprauatione, viscerumque & glandularum infarctu; tamen, vbicunque vel tenerius subiectum est, vel dicta mala simul maiore æstu comitantur, parcius omnino concedendum est.
- 5) Eadem cum cautione illud hysteriis porrigere conuenit, quanquam his non multum prodesse, neque suppressos menses reuocare, neque foetum mortuum excutere facile soleat.
- 6) Venenis quoque frustra opponitur. Extus autem utilius partes a spasmodicis doloribus vexatas roborat, luxatas



luxatas paullulum firmat, frigidisque tumoribus discutiendis vel maturandis par est. Vnde princeps illius emplastri, quod Germanice Zug-Plaster dicitur, existit; cæterum prænotatis vsibus ceratum de galbano camphoratum subseruire potest.

71. GUMMI IVNIPERI.

- 1) Vocatur alias sandaraca Arabum a Græcorum sandaraca, quod virulentum minerale est, probe discernendum.
- 2) Huic principia sulphurea resinosa, tenuioribus terreis intexta polychrestam vtique temperiem indiderunt, ex qua pulcre tum roborat, tum resoluit, abstergit & diuresin promouet.
- 3) Sicut igitur haud plane disparem succino qualitatem obtinuit; ita interne & externe ad emundandas vlcera fordes confert, in phthisi, hectica, renum exulceratione, nulli facile balsamico postferendum.
- 4) Præterea in morbis seroso-lymphalibus, scabie, gonorrhœa, cachexia, hydrope, glandularum obstructione cum aliquo fructu adhibetur.
- 5) Quin & visum fuit nonnullis hæmoptysin restringere, dentium dolores sedare, nimiamque corpulentiam & obesitatem absumere; verum hæc firmioribus tentamenti nondum stabilita in medio relinquimus.
- 6) Externe suffimentis præcipue inseruit.

72. GUMMI OLIBANI.

- 1) Transportatur huc ex Arabia felici & quadruplicis generis puritate tantum differentis esse traditur. Primum enim est lacrima thuris seu olibanum & thus masculum officinale in granis album & accensu facilitimum. Alterum thus commune dicitur & flauescit. Tertium est olibanum corticosum seu thuris cortex. Vltimum fragmenta seu farinam thuris refert, adeoque olibanum granulofum seu mica thuris adpellatur.
- 2) Primum, vt sincerius, ad internos vsus, reliqua magis ad suffitus, emplastra &c. externe solent adhiberi.

A a

3) Cum



- 3) Cum autem ex sulphureis temperatis & subtilibus terreis particulis conglutinatum sit, vim non modo resoluentem, sed & parumper adstrictoriam inde adquisiuit.
- 4) Rarius vero interne datur & quanquam ex dictis suis qualitatibus aliquem vsum afferre possit, tamen in acrioribus capitis & pectoris catarrhis, tussi, spuito sanguinis, pleuritide, dysenteria, gonorrhœa, diarrhœa &c. non tantas vires ostendit, quantæ alias de eo prædicantur.
- 5) Extrinsecus raro odontalgiam leuat, etsi inseruire possit ad susurrum aurium & neruorum partium dolores leniendos, itemque pestilentibus effluuiis repletum aerem paululum corrigendum.

73. GUMMI SAGAPENI.

- 1) Vocatur etiam gummi serapinum & est ferulæ cuiusdam in Persia & orientalibus Indiis crescentis lacrima.
- 2) Optimum censetur, quod albicans pellucet, & facile liquescit mordaci amaritudine, grauique alliaceo fere odore præditum.
- 3) Coagmentatum vero est e partibus sulphureis, acris salinis & mucilaginosi, iisdemque debet suam resoluenti, roborandi & aliquantum, vti loquuntur, attrahendi facultatem.
- 4) Intus proinde ad eosdem affectus, quibus galbanum opponere expedit, commendatur.
- 5) De reliquo maior experimentorum vbertas requiritur, vt ipsum quoque ad pariendi difficultatem, epilepsiam, arthritidem, mensium suppressionem, venenatos morsus & puncturas valere credamus.
- 6) Externe certius confert ad laxatas partes moderate stringendas, eosque tumores, qui mucido humore repleti regionem magis ex sanguinem obsederunt, discutendos. Cæterum id spasticos dolores leuare dubium est, cataractam vero demere frustra speraueris.

7) Est



- 7) Est ingrediens emplastri diachyl. cum gumm. emplastr. magnet. Salæ aliorumque attrahentium Sug-Plaster.

75. TEREBINTHINA.

- 1) Est resina inflammabilis, quæ ex diuersis arboribus vulneratis destillat. Vulgaris nostra ex larice prouenit, estque flauescens, minus pura; vera autem & purior terebinthina destillat ex arbore terebintho in insula Chio & Cypro potissimum crescente, hinc Cypria dicitur, sed viribus, vulgarem nostram non multum superat. Dicitur etiam Veneta, quia ex Cypro & aliis locis ad Venetos nauibus transuehitur. Alii Venetam pro abietis resina habent, & hinc a Cypria distinctam.
- 2) Imbibit tum salinas partes, tum largiores sulphureas acres per liquidam mucilaginem dispersas, e quibus coniunctis resoluentem, abstergentem, diureticam simulque moderatæ roborationi parem virtutem sibi lucratur.
- 3) Speciatim autem resinarum omnium genera antecellere, & sanctissima vulgo medicina prædicatur, qua nihil salubrius sit ad corpus ab omni corruptione vindicandum, acrimoniam humorum obtundendam, hepatis renum aliarumque glandularum obstructions referandas, vlcerationes internas renum præcipue, calculum & phthisin curanda. Præterea tanquam singulare præsidium in arthritide, podagra, paralyfi, hydrope, sterilitate, item suppressione vrinæ, mictu cruento, sanguinis & puris sputo, gonorrhœa inueterata, fluore albo, tandem & in pestilentia a multis sparsim extollitur.
- 4) At vero si tantus laudum cumulus ad viuum hodie resericaretur, vix dubitari posset, maximam earum partem esse perituram.
- 5) Equidem haud eleuari debet internus terebinthinæ vsus, vtpote in pectoris & renum morbis, cachexia & glandularum obstructionibus &c. profuturus; sed tamen nec ultra modum laudandus est, nec sine debi-



ta cautione feruidiora eius producta, vti spiritus, oleum & balsamus sulphuris omnibus promiscue offerenda sunt. Namque subinde magna hinc damna & pericula in renum præcipue & pectoris morbis existunt.

- 6) Tutius itaque in substantia datur, vel quod præstat terebinthina cocta in plurimis, quibus alias conuenit, malis satis virium habitura, propinatur.
- 7) Externe vberriam vtilitatem affert in emundandis vicerum & abscessuum sordibus (vnde in vnguentis digestiuis &c. primum fere est) porro & resolutioni tumorum frigidorum & debilitatarum partium roborationi egregie inseruit. Quamquam autem oleum & spiritus terebinthinæ etiam ad hos scopos applicari queant, tamen moderamen seruandum est, & ab iis in congestionibus sanguineis, inflammationibus, spasmis, morbis renum potius abstinendum.
- 8) Quod si autem, vt perhibent non nulli, etiam fistulas, lupum, parotides, contracturas, polypum, surditatem &c. adeo feliciter tolleretur, esset omnino sæpius, de quo sibi magnopere gratularentur Chirurghi.
- 9) Illud satis constat oleum hoc æthereum, si parcissime adplicetur nervis prodesse, omnesque partes teneriores magisque ex sanguine roborare, quapropter paucae eius guttulæ balsamis vulnerariis optimo cum effectu immiscentur. Postremo etiam sanguinis profluvia sistit (licet ad hunc vsum spiritus vini rectificatissimus eo longe præstantior sit) & in odontalgia apophlegmatismum interdum cum leuamine suscitatur.

#### 75. BALSAMVS DE COPAIVA.

- 1) Vocatur etiam Indicus albus & ex arbore quadam filiquosa Brasiliæ exstillat.
- 2) Est resina fluida, quæ Cypriam terebinthinam maxime æmulatur, colore paulum flauescente, sapore acris, odore fragrante.
- 3) Cum autem non tam salinis, quam oleosis acris principis



cupiis abundat, tum qualitatem obtinet feruidius resoluentem, abstergentem & roborantem.

4) Idcirco magni vulgo æstimatur in omnibus vlceribus in- & externis, præcipue venereis, phthifica & hec- tica labe, calculo, gonorrhœa, fluore albo, cunctis denique vulneribus.

5) Sed permulti hodie animaduertunt, effectum eius am- biguum, sæpeque magis infestum quam salutarem re- periri. Vti enim satis magna vi excalefaciendi pol- let, ita omnia mala facile exasperare potest, quæ aut per se feruentiora sunt, aut subiecta calida, tenera & plethorica adfligunt.

6) Quapropter in phthisi, hec- tica, renum vitiis acriori- bus, prorsus ab eo cauendum est; in cæteris nec non tinnitu & susurro aurium, extus parcissime lenioribus materiis permixtum, adplicari potest; quamquam, nisi peregrinis nimium delectaremur, facile hoc bal- samo carere & indigenis, quæ fere temperatiora & meliora sunt, contenti esse possemus.

#### 77. BALSAMVS PERVVIANVS.

1) Est vel limpidus, vel crassior niger (qui vilior existit) at- que vt copaiux balsamo principiis & qualitate gene- rali respondet, sicutidem acri & adhuc maiore feruo- re partes & humores valenter afficere notatur.

2) Non possumus itaque internum eius vsum, vti vulgo fit, in phthisi, hæmoptysi, asthmate, vlceratione re- num, corruptelis scabiosis & venereis, hepatis & lie- nis obstructione, mensium suppressione &c. adpro- bare. Certe omnia mala, quibus orgasmus aliquis aut internus calor adiunctus est, facile exacerbat, & absente eo parcissime dandus, cæterum minime ne- cessarius est.

3) Laudatur quoque alioquin ad catarrhos, colicam, vo- mitum, flatulentiam, immo sterilitatem, quam sicut haud vnquam propria sua vi tollit, ita nec externe illius febres intermittentes, nephritidem aut malum ischiadicum amolitur.



- 4) Proficit tamen extus, pariter accopaiuæ balsamus, ad consolidandas exsanguium partium læsiones & cicatricem inducendam, ad repurganda vlcera sordida & venerea, ad roborandos aliquantum partes atonia quin & paralyfi correptas. Vbicumque vero aut calor acrior aut partes tenerrimæ admodum sensibiles sunt, tutius, eo relicto, ad alia remedia confugimus.
- 5) Cæterum in quotidiano vsu est & longe frequentiori, quam carior balsamus copaiuæ. Adplicatur solutus & temperatus vitello ouorum &c.

78. LIGNVM FRAXINI.

- 1) Huic ligno principia salina nitrosa & terrea quandam abstergendi & aperiendi vim largiri creduntur.
- 2) Speciatim vero in splene & hepate obstructo recludendo, in ictero, hydrope, calculo & febribus curandis multum pollere, neque in Gallica lue propulsanda ipsi ligno sancto, dum modo duplicata dosi exhibeatur, cedere non nulli affirmant.
- 3) Ad eadem mala, nec non pleuritidem & phthisin semen fraxini, ob similitudinem externam lingua avis vulgo dictum, passim laudatur.
- 4) Verum hæc omnia partim vana sunt, partim tot experimentis nondum stabilita, vt plenam in iis fiduciam collocare possimus.
- 5) Cortex omnino adstringit, ideoque febres intermittentes cohibere potest. Num autem antiloimicus sit, omnique veneno resistat, porro an fraxini frondes serpentibus adeo inimicæ sint, vt ab illis circumdati in ignem citius, quam in has frondes insiliant; (vti *Paræus*, *Mindererus* aliique complures testantur) sæpius adhuc experiundum est.
- 6) Certior & probatior est effectus huius ligni sympatheticus in vulneratione & hæmorrhagiarum repressio-  
ne & aliquantulum in odontalgia, vbi quidem pars læsa eo fricatur vel lignum manibus tenetur, vt incal-  
lescat. Dicitur hinc vulgo lignum vulnerarium vel  
sympatheticum (*Wund-Holz*, *Heyl-Holz*) & in eo  
colli-



colligendo atque ad hunc vsum aptando certa temporum momenta captari solent; sed cauendum est, ne dum nimium scrupulosi simus, in superstitionem præcipitemur.

78. LIGNVM GVAIACI seu SANCTVM.

*vid. tab. de diaphoresi.*

79. LIGNVM IUNIPERI.

*vid. tab. de diaphoresi.*

80. LIGNVM NEPHRITICVM.

1) E Mexicano regno ad nos transuehitur & quia citrini fantali genium aliquatenus refert, fantalum cœruleum etiam adpellatur.

2) Vti autem acriusculo amaro & aromatico sapore gaudet; ita tum partibus maxime resinosis subtilibus & paucioribus, salinis terreisque constare, tum qualitatem resoluendi & attenuandi possidere censetur.

3) Qua de re conducere id perhibent nephriticis, calculosis, catarrhis frigidis, obstructione viscerum & aqua intercute laborantibus.

4) Quod si autem diligentius examinetur, huiusmodi effectus magis allegari, aut ex aliis transcribi videas, quam propriis, vt par est, & sat multis experimentis corroborari. Vnde non est, quod plura de huius ligni vsum medico adponamus.

81. LIGNVM SASSAFRAS.

*vid. tab. de diaphoresi.*

82. SALIA VEGETABILIVM ALCALIA FIXA.

1) E vegetabilibus in cinerem redactis per aquam extrahuntur & dispulso humore lixiuii in formam salinam coagulantur.

2) Videntur autem ex acido vegetabili largis terræ purioris & paucis sulphureis partibus sub crematione colliquescentibus & subtiliter mixtis per motum igneum producta; atque hinc valide resoluendi, detergendi, acidum absorbendi & vrinam propellendi potestatem acquisiuerunt.

3) Lau-



- 3) Laudantur ergo in cruditatibus præcipue acidis, in morbis ferosis, pituitosis, cachexia, hydrope, calculo, febribus intermittentibus; præeunte *Paracelfo*, utpote qui primus hæc salia in vsum medicum latius traducere cœpit.
  - 4) A quibusdam etiam hodie adhuc delectus habetur & pro diversa specifica plantarum, e quibus salia lixiua seu alcalia fiunt, indole & virtute, horum quoque mixtio & efficacia discrepare autumatur. Vnde sal absinthii in primarum viarum vitiis, tertiana & quartana; sal gentianæ, ononidis, fraxini in hydrope; sal iuniperi, genistæ &c. in calculo; quin & sal bryoniæ ad pustulas Gallicas; sal ligni Guaiaci in lue venerea singularem & præcipuam laudem habere creduntur.
  - 5) Sed Chymia hanc opinionem conuellit, ac perdocet, non tantum plerasque vires herbarum singulares deflagratione pessum ire; verum etiam specificam earum indolem, dum modo satis exurantur saliaque extracta probe purificentur, penitus inuerti ac destrui, adeo ut omnia alcalia sic parata eundem effectum edant, & non nisi ob maiorem subtilitatem alia aliis validius operentur.
  - 6) Vulgo in officinis hæc salia ope sulphuris in crystallos redigere vel a deliquio præfulcire satagunt. At notandum est, tum non alcalina permanere, sed in mediam naturam conuerti. Quanquam non est, quod inde damnum metuamus, cum salia media seu genixa ad supra dictos morbos puris alcalinis conuenientiora, hodieque magis vsitata sint.
  - 7) Externe in vsum vocantur alcalia ad lenem sepsim, ad deterfionem vlcerosarum sordium, porro ad delendas cicatrices, cutemque nitidam reddendam.
83. TARTARVS IPSIVSQUE PRÆPARATA.
- 1) Ad doliorum latera sensim concrefcit ex acidis vinosis, oleosis & terreis calcareis partibus compositus. Varia autem ex eo producta exstant principiis & qualitate diuersa, vti iam indicabimus.

2) Cry:



- 2) Cryſtallis & cremori tartari (qui ſolum tartarum puriorem repræſentant) virtus aliquantum reſoluens, temperans & diuretica non poteſt abiudicari; vnde in cruditate, præcipue bilioſa, ictero, obſtructione viſcerum, malo hypochondriaco, nephritide, calculo laudantur, & tamquam grata ſubſidia catharticis infuſis & pulueribus adiunguntur.
- 3) Efficaciora autem ſunt tartarus ſolubilis ſeu tartariſatus, & terra foliata tartari, quorum ille ex cryſtallis & ſale tartari, hæc ex ſale tartari & aceto deſtillato addito tandem ſpiritu vini, conficitur.
- 4) Qua propter hæc, præſertim terra foliata & eius liquor, vbicunque lenis alui & vrinæ promotio neceſſaria videtur, non parum vtilia ducuntur, ac hodie in dictis abdominis morbis, itemque in atrophia & febribus intermittentibus uſurpantur.
- 5) Tinctura tartari ad alcalinas pertinet, acri reſolvente vi in iisdem fere malis, vti & cachexia, hydrope, catarhis frigidis profutura. Confer paullo poſt, quæ de *antimonii tinctura* dicemus.
- 6) Spiritus tartari volatilis vrinam & ſudorem pellit, atque in aſthmate, ſcorbuto, malo hyſterico, paralyſi, epilepſia &c. commendatur, ſed dubium eſt, tantas eum laudes promerere.
- 7) Oleum tartari foetidum hyſtericis ad odorandum offerri ſolet, & paralyſeos ſolamen creditur. Sed iuſto acrius eſt, ideoque leniter ſeptica vi vlcera praua exedentia repurgat.
- 8) Sal tartari eiusque oleum per deliquium ad alcalia, tartarus vitriolatus ad ſalia media pertinent, de quibus paullo inferius.
- 9) Poſtremo non prætereundum eſt ſal tartari volatile a cunctis Chymicis honoratum. Huius præparandi cum variæ methodi ſint, aliæque aliis meliores; tamen præcipue *Starkeiana* arridet, vtpote quæ ab *Helmontio* & *Paracelſo* id tanquam circulatum minus ſummopere extollentibus, profeſta exiſtimatur.



- 10) Vbi autem rite paratum est, non modo ad extrahendas simplicium optimas vires; verum etiam ad inueterata mala, obstructions viscerum, hydropem &c. percuranda dicitur idoneum; cui vt breui tempore liquidiora documenta accedant, merito optamus.

84. ANTIMONIVM.

- 1) Crudum hoc minerale decompositum, vti constat ex sulphure vulgari & regulo metallico arsenicalibus quibusdam particulis inquinato; sic visum fuit infensissimum virus continere, eoque nomine olim valde diffamatum legitur.
- 2) Postquam autem *Kunkelius*, pluribus tentaminibus in se aliisque factis, non modo innoxium, sed & fructuosum illius vsum esse in doloribus rheumaticis, arthriticis, contractura & febribus intermittentibus corruptis aut suppressis, ostendit; liberatum ab infamia est, multisque imitantibus & antimonii virtutes amplificantibus, non mediocrem laudem obtinuit.
- 3) Prostant inde parati & in dispensatorio Brandenburgico descripti morsuli, restaurantium titulo insignes.
- 4) Equidem nos rarius notabiles effectus horum morsulorum vidimus; sed tamen cum alii meliorem successum experti sint, dignissimum putamus antimonii crudi vsum, vt vberioribus experimentis subiiciatur.
- 5) Celebratur alias quoque in contumacibus feri & lymphæ deprauatæ vitiis, scabie, lepra, vlceribus, præcipue venereis.
- 6) Illud addimus, etsi tutum sit, tenerioribus tamen parcius dari, & sollicite caueri, ne qua mutatio per ignem antimonio crudo ante vsum inferatur, oportere. *Confer. Kunkel. laborat. experiment.*
- 7) De reliquo præparata antimonii, quæ & plurima sunt & vtilissima, sparsim in aliis tabulis recensuimus; heic tantum de tincturis antimonii monemus, quod quamquam multifariam a Chymicis elaborari soleant, nulla tamen adhuc dum notior & ad ampliores vsus translata sit, quam quæ vulgari modo per alcali vel quod



quod præstat, ex scoriis succineis regulo antimonii martiali per nitrum purificato superstantibus, metho-  
do *Stabliana* conficitur.

- 8) Hæc enim (licet non tam antimonialis quam acrior al-  
calina) probe resolventem, lymphæ depravatæ corre-  
ctricem & diureticam vim edere atque in chronicis  
frigidis aultorum malis, cachexia, œdematibus, atro-  
phia, catarrhis mucidis, tussi humida, scorbuto, malis  
arthriticis &c. utilis, itemque si cum sale quodam vo-  
latili iuncta post tales aliosque congestorios & spas-  
modicos morbos offeratur, reliquias abstergere ac  
tonum roborare (vtut hoc vltimum potius salis vo-  
latilis accessui adscribendum sit) obseruatur, ideo-  
que ob egregias vires mixturæ tonico - neruinæ po-  
lychrestæ nomen merito sibi vindicat.
- 9) Cæterum sicut permulti ex vitro antimonii, vario artifi-  
cio, Basilianam aut ei similem tincturam extorquere  
fatagunt, in omni scilicet malignitate, obstructioni-  
bus & lepra incomparabilem; sic alii nihil tanto di-  
gnum hiatu huc vsque præstiterunt, alii omnem o-  
peram oleumque se perdidisse conquesti sunt, vnde  
nihil est quod de ea subnectamus. Cui lubet consu-  
lat de hac tinctura commentarium *Kerkringii* in cur-  
rum triumphalem antimonii *Bas. Valentini*.
- 10) De clyffis antimonii sub sulphure quædam exposui-  
mus.

#### 85. BORAX.

- 1) Est sal colore & duritie alumini haud absimile, sapore  
salis gemmæ, sed adhuc mitiore & parumper vrinoso,  
ea specifica donatum indole, vt crucibulo candefacto  
iniectum & fustum partim in fustum abeat, partim in  
vitrum transmutetur.
- 2) De huius natalibus & principiis, præcipue autem de  
compositione factitiæ boracis, dissentiunt adhuc au-  
ctores. *Confer. Valent. mus. musæor. p. 1.*
- 3) Neque etiam medicam eius facultarem perspicue expli-  
catam habemus; quandoquidem tum adstringere,



tum resolvere & aperire perhibetur. Probabile autem est, id potissimum ex confusione eius cum alumine rupeo existisse; nam borax, quæ hodie sic vocatur, aperit & pellit potius quam adstringit. *Vid. opusc. chym. Stahl.*

- 4) Hinc a paucis (sed maxime dubie) ad fluxum hepaticum, spasmos, malum hystericum; a pluribus vero ad mensium suppressionem tollendam, partum & secundinas promouendas laudatur, vbi etsi interdum aliquid efficere videatur, tamen successus non semper votis respondet.

### 36. SPIRITVS CALCIS VIVÆ.

- 1) In theatro chymico *Digbæi* ex calce viua per spiritum vini alkoholisatum sal tartari & caput mortuum tartari fieri docetur & pro more ingentibus laudum præconiis adficitur.
- 2) Sed dubii effectus est, neque vnquam manifesto aut calculum franget, aut podagram extirpabit. Quapropter aliis probatoribus vti, atque operoso huius parandi labore supersedere possumus.
- 3) Vtilior est calcis viuæ aqua, quæ extus variis tumoribus solet adplicari. Cauendum autem est, ne, cum aliquantum repellit, tumoribus calidis ab interno suppressorum mensium aut hæmorrhoidum fonte oriundis, vel ex apostasi febrili remanentibus, neque etiam hydropicis cum hæctica coniunctis largius imponatur; quamuis rubores ardentes, qui vltimis hisce interdum superueniunt, tutius mitiget.
- 4) Confert magis simplicibus tumoribus cedematosis & bubonoideis nec calidis nec valde duris, & sub cautiore usu cum sulphure identidem misceri potest.
- 5) Minus conuenit in paralyti, doloribus spasticis, vuneribus; in vlceribus autem repurgandis commendat ipsam *Etmüllerus*, & nos aliquoties efficacem animaduertimus.



## 87. CRYSTALLVS PRÆPARATA.

- 1) Huic & subtiliter absorbentem & simul aliquantum adstrictoriam facultatem inesse comperimus.
- 2) Vnde non vane, in acri & torminosa bilis dyscrasia corrigenda quandam ei prærogatiuam *Crato* tribuit. Hoc enim scopo feliciter, præcipue infantibus, porrigitur, eorumque tormina, biliosos alui fluxus, paiores & æstum præsentaneo sæpe effectû solatur; in febre autem cholERICA ob vim simul stypticam non æque conuenit.
- 3) Eadem de causa dysenteria laborantes subleuat & lactis acrioris biliosæ falsæ vitia emendare valet.
- 4) Cæterum ipsam directe tum in lactis prouentu augendo, tum in expediendis lochiis, multum pollere incertum est, paucissimisque obseruare contigit.

## 88. LAPIS IYDAICVS.

- 1) Particulas salinas subtili terræ interiectas habet, ideoque vias vrinarias stimulare deprehenditur.
- 2) Itaque & hunc renum vitiis destinant, ac vulgo lithontripticis accensent, sed prorsus dubio, minimeque calculum atterente effectû.
- 3) Non nulli Chymici magna hinc, vti & e crySTALLIS, arcana extorquere student, sed vana plerumque & amatoribus suis reliquenda. Simplicia enim nobis & meliora diuretica suppetunt.

## 89. LAPIS LYNCEIS.

- 1) Figura gaudet conica teretiore substantia quasi crystallina, striis ad centrum, stellæ instar concurrentibus, prædita.
- 2) Cæterum nec origine, nec principiis, nec effectibus a Iudaico multum differre creditur, quapropter idem de eo iudicium ferendum, neque huic longius immorandum esse putamus.

## 90. LAPIS NEPHRITICVS.

- 1) Cum duobus præcedentibus eadem fere principia & qualitatem accepisse traditur, ex quo non difficile e-



rit intelligentibus, verum ipsius pretium & dignitatem æstimare.

- 2) Rarius autem in vsu est, eiusque virtutem magis adlegatam legimus quam certioribus tentamentis exploratam. Plura itaque de eo subnectere superuacaneum videtur.

#### 91. LVNÆ CRYSTALLI.

- 1) Conficiuntur ex argento cupellato & in aqua forti soluto, cuius phlegma superfluum si deinde euaporēs, tales candidæ crytalli concresecunt.
- 2) Hauserunt itaque ex acido nitri concentrato facultatem summe drastrictam & rodentem, vnde eas (pro scopo diuretico) auersantur prudentiores, illisque relinquunt, quibus aut tincturas lunæ, aut lapidem infernalem causticum inde parare volupe est.

#### 92. NITRVM.

- 1) Coaluit ex peculiari sale acido, cui subtile *Φλογιστόν* intermixtum est, & terra alcalina calcaria, a quarum nexu tam beneficam temperiem accepit, vt, postquam recentiores & in primis Illustris *Stahl* amplissimum eius vsum patefecerunt, inter summa artis medicæ præsidia principem fere locum merito suo teneat.
- 2) Generatim sanguinem & lympham coagulat, atque inde refrigerandi, temperandi, paullulum relaxandi & resoluendi; denique acres biliosas fordes inuoluendi fecumque per diuresin leniter amandandi facultatem ostendit. Minime autem, per se aluum mouet, nisi aut largius iusto sumatur, aut immoderate superbibatur.
- 3) Sicut autem hinc orgasmum humorum reprimit, omniumque excretionum nimietatem, & impetum moderatur; ita in omnibus sanguinis profluuiis, præcipue hæmoptysi eoque tendentibus conatibus, congestionibus, rheumatismis, inflammationibus salutarem edit effectum; vnde & dolores capitis, aurium, oculorum & dentium ab eo leuantur.



- 4) Speciatim cholera & causo laborantibus subuenit, & nephriticos adeo solatur, vt nusquam aliunde præsentius auxilium experiri soleant.
- 5) Quotquot etiam mala spasticis doloribus comitantur, tutius lenimentum a nitro, quam ab opiatīs aut volatilibus vulgo hic commendatis accipiunt, quapropter etiam in arthritide, podagra in primis retrograda, cardialgia calida, indeque ortis vomendi moliminibus, colica hæmorrhoidali, spasticis hypochondriacis & hystericeis malis non sine fructu adhibetur.
- 6) Porro in tussi & asthmate sicco, materiam, quæ forte in pulmonibus hæret, tuto expectorat, scorbuticam cholericeorum acrimoniam corrigit, suppressionem vrinæ expedit, huiusque ardores tam simplices quam e venereis inquinamenti natos mitigat, & feminis inordinatos motus adeoque pollutionem nocturnam efficaciter imminuit.
- 7) Quamuis autem nonnulli vsum eius in grauidis & puerperis reformident; tamen has quoque febrili æstu vel spasmis afflictas a nitro non mediocriter subleuari, neque vllum inde periculum subire comperimus.
- 8) Tandem nulla pene febris occurrit, in qua non simplex hoc remedium ad materiam acrem obtundendam, leniendum æstum, pacandam inquietudinem nimiasque vigilias salubriter adhibere possimus. In primis vero in erysipelate particulari & vniuersali, nec non in diarrhœis acutarum febrium tum cæterarum, tum eius quæ variolis iungitur, vbi sæpe res in anticipi est, profuisse obseruatur.
- 9) Id modo de illius vſu tenendum est, scitam vbique proportionem seruari, magisque repetitis quam largis dosibus, & commodius pro morborum ratione vel cum sale medio vel cum absorbente quodam & diaphoretico fixo permixtum, exhiberi oportere.
- 10) Cæterum quid in melancholia & deliriis chronicis valeat



leat, dignum est, ut pluribus experimentis indagemus.

- 11) In ulcerationibus vero, adeoque etiam phthisi, hectica &c. (quoniam aliquantum irritat) caute & rarius, nec nisi cum ardore & phlogoses coniunctæ sunt, porrigendum est; in vomica pulmonum tamen etiam eo tempore, ubi tussim excitare expedit, concedi potest.
- 12) Extus nitrum inditur clysteribus, itemque in gargarismatis ad anginam, tonsillarum &c. inflammationes cum fructu vsurpatur. Quidam etiam ipsum parcesali communi addunt, eoque conditam carne grato rubore imbuunt, eiusdemque putredinem diutius refrenant.
- 13) Hactenus de simplici nitro crystallisato; quo licet reliqua fere præparata viribus longe inferiora sint, tamen de his quoque paucis agere conueniet.
- 14) Prostat in officinis nitrum sic dictum depuratum, tabulatum (seu lapis prunellæ) cum exigua portione sulphuris paratum, unde paullo densius fit; sed præstat huic simplex nitrum, ideoque consultius est qualicumque ea opera & sumtibus supersedere.
- 15) Pulcrius, licet non adeo vsitatum, est nitrum regeneratum, quippe quod vulgari (ob additionem sincerioris alcali) acrius & penetrantius reperitur, proptereaque in cholericis malis & feruidiore orgasmo celeriores opem promittit.
- 16) Nitrum fixum, quod per carbones vulgo parant, est satis purum alcali, de cuius virtutibus paullo ante diximus.
- 17) *Mynsichtus* decoctionem nitri cum succis herbarum & factam de hinc eius crystallisationem cominendat. Verum ex his vel ex aliis tingentibus, queis colorem gratum nitro conciliare laborant, parum aut nihil efficacitæ huic sali accrescit; unde vano prorsus titulo nitrum rubrum essentificatum, quod succo berberum tinctum est, extollitur.

18) Ne-



- 18) Neque etiam nitrum nitratum (ex nitro puro & spiritu nitri) itemque flores nitri, quos ex nitro soluto per vas quoddam fictile penetrare sinunt, & ridicula quinta essentia nitri (ex nitro & sale communi) sumtus compensant, aut simplicis nitri crystallini virtutes adæquant.
- 19) Nitrum sulphuratum, antimoniatum, vitriolatum magis ad salium mediorum (de quibus statim) familiam referenda sunt.
- 20) Spiritus nitri simplex in maiore copia rodentem vim exercet, in exigua dosi temperat humorum ebullitionem, & diuresin pellit. Nequaquam autem lithontripticus est, vel de cætero ad insignem usum profuturus.
- 21) Maiorem famam adeptus est spiritus nitri dulcis in colica, flatulentia, doloribus spasticis, dysuria & suppressione urinae, nephritide, calculo &c. celebratus. Habet autem omnino temperantem quandam & simul satis diureticam vim, sed magnas eius laudes complures practici etiam non agnoscunt, utinam clarior experientia stabiliret!
- 22) De reliquo innotescit hodie paullo alia huius spiritus compositio, videlicet e spiritu fumante, seu oleo nitri (per oleum vitrioli e nitro propulso) & spiritu vini conficienda, quam anodyna qualitate imbutam esse ferunt & nonnulli rubore tinctam pro tinctura nitri balsamica venditare consuecunt. Sed hæc, ut alia cassæ Chymicorum arcana, perstringentem vide *D. Rockium in dissert. de chymia tria superstitiosa.*
93. SALIA MEDIA, DIGESTIVA.
- 1) Etsi omnia salia ex acido & alcali conflata mediorum titulum mereantur; tamen ex vulgari usu loquendi hec illa media designamus, quæ alias etiam enixa dicuntur, quæque ex acido vitriolico sulphureo & alcali fixo Chymici componunt.
- 2) Pertinent huc tartarus vitriolatus, tam vulgaris *Crollii*, quam *Tachenianus*, arcanum duplicatum, nitrum sulphura-



phuratum, nitrum vitriolatum *Ludouici*, sal polychrestum *Glaferi*, quorum nomina quidem diuersa, principia vero & efficacia, modo rite parata sint, eadem deprehenduntur, quocirca immerito plane tam magnifico titulo arcanum duplicatum superbit. *Confer. Stahl. opusc. chymic.*

3) Neque ab his discrepat nitrum antimoniatum, nisi quod huic aliquid nitri admistum, & non nihil regulinae substantiae plerumque simul intextum sit.

4) Generatim vero hæc salia facultatem possident incidendi, resoluendi, abstergendi & vrinam, ac si in paulo maiore dosi exhibeantur, aluum mouendi.

5) Salubrem igitur eorum usum Practici experiuntur in cruditate ventriculi, febribus intermittentibus, colica pituitosa & flatulenta, obstructione glandularum mesaraicarum, infarctu hepatis & lienis, itemque in nephritide, calculo, cunctisque morbis frigidis catarrhalibus & serosis.

6) Quin & hypochondriacis atque hysteriis alleuamentum adferre & in ipsa arthritide prodesse comperiuntur.

7) Egregium fane adminiculum, aut si vis remedium corrigens nitri, utpote cuius vim humores coagulandi paullulum distinent, in hisce salibus offendimus; unde, illis cum nitro fociatis, polychrestum & amplissimi usus remedium in promptu habetur. *Confer. num. 81.*

8) Cæterum in febribus malignis hæc meliore euentu excluduntur, tum quod crassa nimium, subtilem putridam materiam inuoluere nequeunt, tum quia aliquando, præcipue si diarrhoea coniuncta sit, in comoda important. Etsi alias certum sit, sal medium in sanguinem etiam transgredi eumque attenuare, neque vel primis viis vel alibi, ut quidam metuunt, ullam rosionem, grauesque inde dolores infligere.

#### 94. SALIA VOLATILIA VRINOSA.

1) Nascuntur ex oleosa substantia cum subtilissimis partibus salinis per putrefactionem, vel ignitionem copulata;



lata; omniaque vrinosa vnus eiusdemque indolis sunt, ac, si qua diuersitas notetur, tenuitatis graduduntaxat differunt.

- 2) Efficaciam in corpore nostro edunt magis tonicam, minus resoluentem, diureticam & excalescentem, nisi impuriore & oleosa empyreumatica materia largius imbuta existant.
- 3) Cum autem per multi potius vim acidum hostile suaui-ter absorbendi, porro aperiendi & resoluendi salibus hisce insitam esse putent; ea de causa exquisitis vulgo encomiis tanquam in omnibus morbis, in quibus acidum peccare statuitur, in obstructionibus viscerum, spasmis, doloribus, in cunctis denique febribus acutis saluberrima deprædicantur; de quibus tamen omnibus circumspectior praxis paullo aliter quemuis edoctura est.
- 4) Sæpe enim accidit, vt in febribus vsurpata tristem visceris cuiusdam, vt hepatis, lienis, &c. post se relinquunt infarctum, vulgo Sieber-Ruchen dictum, de quoque œdematosos pedum tumores.
- 5) Periculosa ergo illorum cœpta videntur, qui aquam intercutem per vias vrinarias ope horum salium expellere gestiunt; augefcit enim hoc modo viscerum induratio.
- 6) Dein & experientia vberiore firmatur, quod nimium, vel intempestiue adplicata sudorem impediunt potius, quam promoueant, materiam acrem catarrhalem vehementius exagitent, in febre lenta plerumque noceant, lochiorum suppressionem, cordis palpitationem augeant, immo hæmorrhoidum & mensium obstructionem sæpe obfirment potius, quam referent.
- 7) Sic quoque in cephalalgia salium volatilium cautior vsus exigitur. Quod si enim in exacerbatione dentur malum deterius reddunt. Præstat itaque eorum vsus in morbi huius declinatione, dosi exigua, scopo tonico.



- 8) In arthriticis denique, rheumaticis, podagricis doloribus extus & intus sæpe præscripta plus damni, quam utilitatis attulisse, inmedicabilem videlicet stuporem & dolorem osteocopon parti læsæ inducendo, plurima certe exempla commonstrarunt.
- 9) Locum vero salia hæc volatilia, præmissis antea præmittendis, inuenire possunt in hæctica, in cachexia, in coryza & grauedine, in congestionibus, sed vbique temporis opportuni ratio maximopere habenda est.
- 10) Tutius tamen & maiore cum emolumento in vsum vocantur, si ea cum tinctura quadam acriore alcalina probe permista exhibeas.
- 11) Externe salia volatilia vim errhinam habent, & cum castorei medulla maritata effectu neruino tonico statum surdastrum leuant, ac si per instrumentum *Glauberi* eo modo, quem hic autor descripsit, adplicentur, ad pertinacem mensium suppressionem tollendam aliquantum conferunt.

95. SAL COMMUNE & EIVS PRÆPARATA.

- 1) Triplex hoc obuenit vel marinum, vel fontanum, vel fossile, quod etiam sal gemmæ dicitur.
- 2) Omnia ex singulari acido mercurialis indolis & terra alcalina calcaria natura generat, in eo tantum non-nihil discrepantia, quod sal marinum de nitro quoque participet & sal fossile rupeam terram, vnde durior est, simul absorbserit.
- 3) Virtus eorum existit, resoluens, abstergens, colliquans & moderate diuretica, vnde amplissimum sui vsum in diæta præcipue comprobant. Quod si autem largius, præsertim sub parco potu ingerantur, nimium stimulant, ferique acrimoniam augent, ac prauam denique incrassantem vim exercent.
- 4) Præcipue autem pleraque pectoris mala (& fere grauius quam alius generis salia) exasperant, vnde parce & cautim hic concedenda sunt.
- 5) Conducunt alias in adfectibus faucium ad mucum attenuant.



nuandum & frequenter clysteribus ad spissioresordes eliquandas & naturam stimulo excitandam induuntur.

- 6) Speciatim sal gemmæ ad strumas laudatur *Paracelso*.
- 7) Spiritum vero salis quidam commendant interne ad nimiam sitim, calculum, ramices. Sed periculum est, ne, ubi pectus male habet, immanem tussim cieat & continuato vsu hepatis obstructionem aliaque grauiora mala importet. Extus eum dealbandis dentibus & cariei ossium, sed frustra destinant.
- 8) Idem propemodum valet de spiritu salis dulci, a quo proinde pariter abstinemus, donec eius vsus melioribus experimentis innotescat.
- 9) Tandem de sale digestiuo *Sylvii*; quod proprie sal commune regeneratum est, notamus, quod salis medii viribus ubique inferius, adeoque iure posthabendum fit.

#### 96. SUCCINVM & EIVS PRÆPARATA.

- 1) De origine succini diu agitatam litem circumstantiæ collectionis aliaque fere decidunt; idque pro regni mineralis potius quam vegetabilis sobole habendum esse declarant.
- 2) Copiosius autem in Borussia colligitur & est vel albicans, vel flauescens, vel nigrum. Priora satis conveniunt, posterius vero non nisi pro petroleo artificiali, seu oleo petræ nigræ. off. destillando, vsurpatur.
- 3) Succini flavi principia sunt tenuia, terrestria, sulphurea, oleosa & acida; unde per destillationem sal prodit volatile quidem, sed cum alcalinis puris acidi instar efferuescens, quod in præparatione liquoris C. C. succinati conspiciamus.
- 4) Ex his partibus constituentibus facultatem eius derivare solent resolventem, abstergentem, roborantem balsamicam, & placide diureticam.
- 5) Sigillatim vero inferuit multiplici vsui non minus interno, quam externo, in omnibus lymphæ vitiis, in catarrhali opplerione pectoris, congestionibus,



rheumaticis, cephala, cephalalgia, fufurro aurium, brancho, coryza, hæmorrhoidibus cœcis, gonorrhœa, fluore albo, vbi effentia concentrata maxime confert.

- 6) Et cum in quocunque vlcere siue simplici, siue cancroso exoptatam sæpe virtutem ostendit, tum etiam phthificis tanquam roborans & balsamicum eustadias tempore commendandum est.
  - 7) Præterea & grauidarum & puerperarum morbos mitigat, dummodo vbique febriles motus, vtpote quos effentia succini acrius incendere potest, abesse animaduertamus.
  - 8) Externe præcellenti pollet efficacia in vlceribus, vt iam innuimus, nempe læsionibus partium magis exsanguium, cutanearum, vel tendinibus & membranis magis instructarum, vbi non solum adfluentium & effluentium humorum prauitatem corrigit, sed & vi sua tonica partes solutas conglutinat. Porro in suffitu adhibitum congestiones præcipue serosas resoluit, partesque teneriores roborat; sed tamen protinus eo confugere debilioribus, qui exquisito sensu præditi sunt, non suadet.
  - 9) Datur in puluere & effentia, quæ in primis polychrestanotatur. Oleum vero succini licet valde decantatum, nimium acre est, vehementemque humoribus æstum infert; vnde solum extus parcissime aliisque temperatum vtiliter adplicatur.
  - 10) Tandem liquor C. C. succinatus in epilepticis & catarhalibus, frigidis, hemiplecticis malis iusta dosi & tempore haud incongruens ducitur.
97. ASELLI seu MILLEPEDES.
- 1) E partibus salinis & subtiliter terreis, quibus texturam suam debent, qualitatem arcessunt resoluendi & diuresin prouocandi.
  - 2) Vtiles ergo censentur in cachexia, hydrope, mucidis pectoris adfectibus, glandularum obstructionibus, calculo, quin & arthritide.

3) Sa-



3) Satis autem adparet locupletia huiusmodi virtutum testimonio, quibus certe confidere possumus, nos adhuc dum deficere. Quapropter circumspeditionem, & quia hæc animalcula vias vrinarias acriore stimulo adficiunt, in eorum usu debitum moderamen suademus.

4) Cæterum nouimus illa a celebri & felici Practico ad visus obscuritatem & cataractæ rudimenta abolenda parco & continuato usu frequenter adhiberi.

#### 98. BUFONES.

1) Horrida hæc & inuisa animalia, ob acrem salve vehementer diuresin propellunt, ideoque a non nullis hydropi opponuntur.

2) Sed præstat abstinere, bufonesque siccatos tantum ad externos usus reservare, ubi sub axillis gestati aut manibus detenti narium, vteri, præcipue pectoris hæmorrhagias antipathetica vi sæpe refrenant, & in capite positi interdum etiam acutas, validas congestiones phreneticas & anginodes repellunt.

3) Præterea cum ad varios tumores & excrecentem leuiter carnem & cum aliis stypticis mixti ad hæmorrhagias sistendas, itemque ad bubones pestilentes, cancerum exulceratum, viperæ morsum &c. laudentur, fortasse operæ pretium erit, talem eorum usum pluribus experimentis subiicere.

4) Idem censendum est de bufonum ossiculis, quæ passim ut specificum antodontalgicum (sed dubium hucusque) celebrantur.

5) Neque lapis bufonites, qui falso pro foetu bufonis habetur, eas vires ostendit, ut, sicut nonnulli autumant, ad virulentos morsos & tumores malignos curandos vere quicquam conferre valeat.

#### 99. CALCULVS HUMANVS.

1) Conglutinatus est e partibus mucidis terrestribus paucioribus oleosis & salinis; speciatim renalis ex lymphâ, quam vlcus renale exsudat, & falsugine mucida urinæ.

2) Hunc



- 2) Hunc *Paracelsus* ludum humanum, *Helmontius* suum dulech vocitavit; eorum vero affectu genuinam præparationem alii summo studio rimati sunt, alii etiam docere instituerunt, ut scilicet specificum obtineretur idoneum ad omnes tartareas, ut loquuntur, obstructions referandas & præcipue calculum paulatim in mucilaginem dissoluendum & absumendum.
- 3) Secretam illius calcinationem & reductionem in oleum tradit *Hartmannus*, quod in iris laudibus extollit.
- 4) Præterea vi alexipharmaca plenus creditur atque alicubi ipsi bezoardico lapidi æquiparatur.
- 5) Ast hodie altum de huius ludi virtute est silentium, quibusdam notantibus, quicquid de eo iactatur, ludicram potius speculationem redolere quam veritatem.

## 100. CANTHARIDES.

- 1) Acerrimo sale repleti vehementer stimulant & addunt, ad vesicatoria ideo, ut notum est, pertinentes.
- 2) Quantam autem stimulant diureseos vim teneant, vel ex eo liquet, quod extus cuti impositi tamen urinariis meatibus interdum molestiam pariant.
- 3) Proinde licet illorum internum usum & facultatem in lepra, calculo, hydrope, præcipue vero in gonorrhœa virulenta & fluore albo valde prædicatam legamus; tamen, cum sic facile ardores, inflammationes, aut infestum cruentum inferant, tutior erit abstinentia.
- 4) Quod si autem alicui minus anceps tentamen suscipere lubeat, is leniorem cantharidum essentiam, cuius formulam *Bartholinus* præscripsit, adhibere potest.
- 5) Externe quomodo commode adplicentur, in *tab. chirurg.* est declaratum.

## 101. CONCHÆ PRÆPARATÆ SIMPLICES &amp; ACIDO SATURATÆ.

*vid. tab. de diaphoresi.*

## 102. CORNV CERVİ &amp; SPIRITVS EIVS.

*vid. tab. de diaphoresi.*

## 103. EBVR



## 103. EBUR &amp; SPIRITVS EIVS.

- 1) Huic diaphoretica & antispastica virtus tribuitur, quod quo iure fiat, aliis iudicandum relinquimus.
- 2) In primis autem ad inimicum, quod supponunt, acidum humorum demulcendum, dysenteriam, itemque icterum curandum proponitur.
- 3) Esi vero aliquantulum forte conferre queat, tamen certioribus & melioribus ad hæc remediis abundare videmur.
- 4) Videas etiam ebur vstum, seu spodium, quod adstrictorium magis est, ad fluorem album commendari; sed & de eo non aliter sentire possumus.
- 5) Neque de spiritu eboris, quicquam singulare nobis spondere licet.

## 104. LAPIDES PERCARVM PRÆPARATI.

- 1) E tenuibus terreis & salinis particulis facultatem petunt abstergentem & leniter diureticam.
- 2) Vnde magni fiunt in sanguine coagulato & in stasin excasu ab alto &c. delapso, itemque in laterum puncti-  
onibus, id quod vltioribus experimentis inclarescet.
- 3) Illud certius est, hos lapides infantibus urinæ suppressione, aut imminutione laborantibus sæpe fuisse auxiliatos.

## 105. LAPIDES CARPIONVM PRÆPARATI.

- 1) Ab his quoque specialem efficaciam in febribus & hæmorrhagiis expectant non nulli, sed euentu pariter ambiguo.
- 2) Cum autem de cætero & absorbent & tantillum resoluunt, tum frequenter ad infantum conuulsiones sedandas destinantur, quas tamen alia aptiora feliciter abigunt.

## 106. LVMBRICI TERRESTRES.

*vid. tab. de diaphoresi.*

## 107. OCULI CANCRI.

- 1) Inter ea, quæ facultate absorbendi præcipue & temperandi prædita quotidiano vsui inseruiunt, fere primam sibi vindicant dignitatem; quamvis si effectum



scrupulosius examinemus, conchis præparatis vel aliis ostracodermatis vix meliores reperiantur.

- 2) Speciatim eos in ardore ventriculi seu foda, acrimonia bilis torminosa, malis cholericis, deinde & in orgasmo sanguinis, plurimis febribus, (vbi priuatiue diaphoresin inuitant aut sustentant) in dyscrasia humorum acri serosa, scabie & in spasmis etiam cum fructu propinamus.
- 3) Vbicunque præterea incrassandi scopus nobis obuersatur, adhiberi possunt; contra in obstructionibus partium, spissitudine humorum &c. parcius vel plane non indulgentur.
- 4) Præstantiorem autem teneriusque abstergentem & suauiter resoluentem qualitatem simul induunt, quando citri acido puriore semisaturantur. Sic enim in infantilibus plerisque morbis, in pectoris adfectibus, in vitiis renum, scabie, scorbuto &c. mite & concinnum præbent remedium.
- 5) Idem in omnibus febribus acutis & malignis conuenit, hecticisque & phthificos efficacius fere, quam alia huius generis cognita pharmaca, subleuat.

#### 109. RANÆ.

- 1) Rarissime in vsum vocantur, etsi quidam loco bufonum exsiccatorum ranas viuas in febribus malignis & pestilentibus capitis integumento subdere, vt vehementes deliræ congestiones refringantur, itemque ad anginam periculose ingruentem arcendam linguæ imponere soleant. Cum autem hinc cito emoriantur, ante capienda est satis magna ranarum multitudo. *Confer. Goblî tract. de peste.*
- 2) Iam pridem autem hepar ranarum ad epilepticos motus compescendos valere dictum est. Neque hodie plane abnuît experientia, modo non vetustum nimis aut corruptum, sed recentius post generaliorum remedium vsum propinetur.
- 3) Ranæ, seu vt alii volunt ranunculi virides (die Laub-Frösche)



Grösche) arefacti & manu detenti in sensibilibus interdum hæmorrhagiam narium inhibent & pulverisati in vulneribus styptica efficacia, quin & in vlceribus malignis & cancro prodesse dicuntur.

4) Notior vero est spermatis ranarum vsus, quod cum refrigeret & repellat, in inflammationibus caute adplicandum est; quanquam *Ettmüllerus* illud in omni erysipellate, ambustione, inflammatione hepatis & paullulum camphoratum in doloribus arthriticis, podagricis, cephalalgia, gutta rosacea &c. efficacissimum pronunciet.

5) *Sydenhamius* id cum aliis permixtum pro collutione oris in angina laudat & non nulli specificam ei virtutem adsignant in vlceribus serpigiosis.

6) Emplastrum de spermate ranarum, si cum debitis resolventibus & subadstringentibus paretur, nimium ad læsiones adfluxum optime cohibet satisque probatum euadit defensuum. Idem largius camphoratum scirrhis inflammatis inseruit.

7) Prostat & emplastrum de ranis cum mercurio, sed maioris famæ quam pretii; quippe inconcinna formula est & propemodum inutilis, nisi mercurii portio augeatur. Hoc si fiat, utique in venereis vlceribus efficacissimum est, in aliis autem incertius, ac ubi tenax & cruda materia præsto est, fugiendum. Cæterum quoque ad scirrhos glandulosos, præsertim si sub initio statim adplicetur & diu continetur, discutientes confert.

#### 109. SANGVIS HIRCI.

*vid. tab. de diaphoresi.*

#### 110. SCARABÆI MAIALES.

1) Dicuntur & vinctuosi, utque fusci sunt, sic a scarabæis equinis cornutis &c. facile distinguendi.

2) Drastica vi diuretica æmulari cantharides, sed tamen mitius operari deprehenduntur.

3) Vnde quoque tutior eorum melle vel oleo suffocatorum vsus est in hydrope & œdematibus pedum, præ-



cipue vero testantibus fide dignis practicis, efficax in morfu rabidi canis, modo tempestive adhibeantur.

- 4) Virtutem vero, quam laudant, antipodagricam, antinephriticam & calculum domitricem plurimi in dubium vocant, neque nos tentamen illud, quod *Ettmüllerus* præscribit, temere suscipiendum putamus.
- 5) Externe oleum scarabæorum, olei scorpionum vices interdum supplere potest.

### III. SCORPIONES.

- 1) Non tam interne, quam extus solum oleo oliuarum infusi & macerati vsurpantur.
- 2) Et conducit huiusmodi oleum non tantum ut mirabile specificum ad venenatum scorpionum ictum, verum etiam regioni pubis aut vesicæ illitum calculum pellit & suppressionem urinæ interdum tollit; quamquam illud non facile solum, sed cum aliis mixtum & temperatum ordinare consuetudo sit. Porro *Ettmüllerus* singularem illius vim anodynam in dolore aurium prædicat.
- 3) Cæterum haud ignota sunt olea scorpionum composita, quibus præstantem qualitatem alexipharmacam multi adscribunt, ac propterea, grassantibus febribus malignis & pestilentia, tam ad prophylaxin, quam ad curationem regionem cordis, pulsus, tempora iis ungi præcipiunt; sed si rem recte æstimemus, maiore fiducia quam effectu.

### III. TALIS LEPORIS.

- 1) His etiam peculiare quasdam vires inesse facilius dicitur quam indubitatis speciminibus comprobatur.
- 2) Donec igitur hæc innotescant licet interea ambigere, talos leporis in convulsionibus, inflatione stomachi & colica valde prodesse.

### III. TESTÆ OVORVM.

- 1) Neque has testas singulari facultate certa quædam mala superandi præditas esse novimus; etsi illæ, e quibus pulli prodierunt, ab incubatu quiddam benefici accepisse & calculum præcauere dicantur.

2) Alias



- 2) Alias virtute sua absorbente & aliquatenus temperante ac resolvente se cuius practico adprobare possunt, & in omnibus morbis, quibus cancerorum lapides conveniunt, vtiliter dantur, atque in eorundem lapillorum locum sine metu minoris effectus substituuntur.
- 3) Ad huiusmodi usus repurgatae a pellicula aliisque sordibus & exsiccatae teruntur solum; si vero eas igni diutius imponas & calcines; facessunt tandem in calcariam plane substantiam, attractu aquae vehementer ebullientem. Idem fit cum conchis, unde conchae usae efficaciam resolventem & digestivam, laudante iam *Crollio*, in febribus intermittentibus ostendunt; si vero iusto longius vrantur, acriores sunt & cautius exhibendae.

#### 114. TESTÆ STRUTHIO - CAMELI.

- 1) Insignis harum est durities, quam tam brevi tempore ex humoribus existere & compingi posse mirandum est.
- 2) Virtus autem absorbens & egregie simul diuretica iis tribuitur, unde *Volkamerus* illas in pulverem suum contra calculum selegit.
- 3) Sed merito dubitat *Ettmüllerus*, prae aliis ouorum testis ullam huiusce prerogativam deberi.



### TABVLA VI.

DE

## APOPHLEGMATISMO PER NARES.

### I. DEFINITIO.

Apophlegmatismus per nares est peculiaris euacuationis species, qua natura praedicti organi ope serum illud

D d 3

muci.



mucidum, quod caput præcipue offendere conspicitur, siue sponte sua, siue remediis externis excitata, eliminare contendit. Deriuatur ab ἀπό, ex, & φλέγμα, aqua.

## II. DIFFERENTIA.

1. Euacuatio saliuialis quatuor modis fieri solet.

1) Alia enim contingit per *nares*, & *apophlegmatismus narium* adpellatur.

2) Alia per *sputationem breuem*, quæ *apophlegmatismus oris* audit.

3) Alia per *sputationem longinquam & copiosam*, atque hæc strictiore sensu *saluatio* vocatur.

4) Alia per *pulmones & arteriam asperam*, quæ *expectoratio* dicitur.

2. Priores duæ particulares & quasi superficiariæ, posteriores autem vniuersales sunt: profundius enim ex humorum massa, id, quod euacuant, exantlare solent.

3. Quemadmodum autem in hac tabula de *phlegmatismo tantum narium* dicemus; ita instituitur ille

1) vel per remedia *errhina*, quæ particulis suis acrioribus humores spissos, partibus inhærentes, non tantum attenuant, sed & glandularum motum excretorium simul proritant. Deriuatur hoc nomen a ῥίς, *nasus*, ἑρῥίον, *nasale*, scilicet *remedium*.

2) Vel per *ptarmica*, quæ ad motum illum concutientem & discussorium, qui *sternutatio* audit, naturam simul fortius stimulant. Deducitur vocabulum a πταίρω, *sternuto*.

3) Vel per *errhino-ptarmica*, quæ utroque modo agunt, videlicet tam fundendis humoribus, quam partibus irritandis apta.

## III. INDICANTIA.

1. Licet tam *errhinorum*, quam *ptarmicorum* vsus in vita communi hodie sit frequentissimus, in praxi tamen medica rarius indicatur.

2. Institui autem potest

1) In adfectibus chronicis mucidis, caput & vicinas partes grauantibus.

2) Spe-



- 2) Speciatim in congestionibus oculorum serosis, minime autem inflammatoriis, quas potius exacerbant.
- 3) In pathematibus, quæ a consuetæ coryzæ emanatione pullularunt.
- 4) In fusu auri catarrho.
- 5) In partu difficili & secundinarum retentione.
- 6) Qua circumspectione in apoplexia, lipothymia & lethargicis adfectibus vsurpanda sint hæc remedia, *sub cautelis* monebimus.

3. Vbique autem temperamenti rationem habere conuenit. Phlegmaticis enim, vel robustis a sternutatorio motu non facile læsio metuenda est; in cholericis autem, vel teneris vsus horum vellicantium remediorum debet esse circumspectior. *Conf. cautela.*

#### IV. INDICATA seu REMEDIA.

Virtute errhino-ptarmica pollent

1. *mineralia*, e. g.

Vitriolum album cum aqua rosarum solutum.

Sal armoniacum lixiuio iniectum.

2. *Animalia*, v. g.

Salia volatilia vrinosa.

Castorei essentia.

3. *Vegetabilia*, e. g.

Rad. Ceparum

Ellebori albi

Ialappæ

Ireos Florentinæ

Mechoacannæ

albæ

Pimpinellæ albæ

Pyrethri

Squillæ.

Fol. Anagallidis pur-

pureæ

Betonicæ

Maioranæ

Origani

Ptarmicæ

Rorismarini

Serpilli

Tabaci

Thymi.

Flor. Anthos

Calendulæ

Carthami

Cyani

Lauendulæ

Liliorum conuallium.

Rosarum

Flor.



Flor. Spicæ  
 Violarum.  
 Gummi Euphorbii.  
 Sem. Erucae  
 Nasturtii  
 Nigellæ  
 Rutæ  
 Sinapios.

Fruet. Caryophyllorum aro-  
 maticorum  
 Cubebæ  
 Piperis  
 Saccharum  
 Balsamica pleraque oleosa  
 Species diambæ, diamo-  
 fchi &c.

### V. MODVS OPERANDI.

1. Notissimum est, naturam humanam sine vllis remediis narium apophlegmatismum producere, atque & hac ratione corpus suum a superfluis humoribus repurgare.
2. Vbi autem naturalis hæc euacuatio iusto segnior obseruatur, tum artificialis excitatio requiritur, & hæc per remedia *errhina* & *ptarmica* obtinetur, vti sub *differentia* iam indicauimus.
3. Dum vero vel *errhina* particulis suis salinis acrioribus humores spissos in glandulis narium resoluunt, vel *ptarmica* interiorem narium membranam, quæ valde sensibilis est, potentius adficiunt, vel *errhino-ptarmica* vtraque ratione agunt; natura per molestum hunc sensum excitatur, vt humores copiosius ad nares congerat, particularum acriorum stimulum diluendo infringat, & per motum illum sternutatorium, quasi conuulsium displodat, atque e naribus proiciat. *Conf. tab. med. de coryza*, in qua sub *caussis* de modo agendi plura diximus.
4. Dantur etiam *ptarmica*, quæ non per acrimoniam quamdam salinam, sed per solam leuitatem corpusculorum, naribus adhærentium, naturam ad conuenientem illum motum diffiatorium inuitant.

### VI. MODVS PROPINANDI.

Hic respicit

1. ipsius medicamenti *formam*, vbi licet etiam per solos acres vapores aut turundas, vel ceram, mordacibus rebus imbutam, effectus obtineri queat; tamen pro more vulgatissimo

1) *errhi-*



1) *errhina liquida* esse solent, e.g.  
spiritus volatilis vrinosi,  
euphorbium aqua solutum.

2) *Ptarmica* autem in forma *pulveris* adhibentur.

2. Aliorum pharmacorum congruam *adfociationem*. Raro enim solis hisce remediis morbus quidam superatur. Vnde pro re nata, blanda laxantia, diaphoretica, diuretica, discutientia, resolventia, debent coniungi.

## VII. CAUTELAE ET OBSERVATIONES PRACTICAE.

1. Si dicendum, quod res est, & *errhina* & *ptarmica* magis abufui hodie exposita sunt, quam in decentem usum vocantur. Cum enim, ut moris est, citra necessitatem, immo contra corporis dispositionem tam frequenter illi semulti delectant; tum humorum versus caput congestionibus porta aperitur, & molestissima confectionaria introducuntur. Tantum quippe abest, ut emunctæ naris homines inde euadant, ut potius stagnationibus mucidis & stupiditati cuidam sæpe exponantur. Tacemus, olfactus organum sensim hinc eneruari & interdum plane destrui.

2. Vnde operæ pretium erit, *contra-indicantia* hic subiungere.

1) Insignis plethora, uti alias vehementes commotiones non tolerat; ita & ptarmicorum usum, præcipue in sanguineo-choleris, excludit.

2) In vertigine sanguinea ab his remediis abstinendum est, ne morbo attonito sensim viam aperiant. Quamvis enim præsentī apoplexiæ usui esse possint; imminentem tamen in actum deducere auctores observant.

3) Memoriae debilitati frustra opponuntur *errhina* & *ptarmica*. Quoniam enim humores copiosius versus caput inuitant, memoriam potius læsura, quam roboratura non immerito censentur.

4) In cephalalgia & ophthalmia sanguinea manifesto nocent.



- 5) Qui ad hæmorrhagiam narium nimiam, hæmoptysin & phthisin habent procliuatatem, ab his remediis excitantibus & exasperantibus debent abstinere.
  - 6) Adfectus acuti febriles, spastici & conuulsiui ægerrime tolerant has commotiones. Vnde vsum horum remedium antepilepticum, quem non nulli commendant, non possumus probare.
  - 7) Neque in acutarum singultu concedenda sunt sternutatoria; quanquam alias, *Platone* iam laudante, ad leuiorem singultum profligandum sufficiant; nam & materia, si quæ adsit, inde dissipatur & motu fere contrario, quem diaphragmati ptarma infert, singultuosus deletur.
  - 8) Immo ne in lethargicis & lipothymicis quidem adfectibus hæc remedia satistuta sunt. Licet enim in illis motuum defectus sit manifestus, minime tamen ille per eius modi fortes commotiones refarciendus est.
  - 9) Denique ptarmica nocent in externis corporis læsionibus, e. g. in herniis, prolapsu vteri & intestini re-  
cti.
  - 10) His omnibus subiungimus statum grauiditatis.
3. Quando errhinorum vsum, loco moderatioris effluxus, vehementior humorum adfluxus excipit, & tumor inflammatorius nares occupat, tum eorum adplicationem sinistre institutam esse liquet.
  4. Dantur errhina maxime vehementia, quæ tamen effectum sternutantem non exserunt. Contra ptarmica quædam valida sunt, quæ copiosam e naribus humiditatem, non æque educunt. Interim omnia ptarmica sunt simul plus vel minus errhina.
  5. *Salia volatilia urinosa*, quia materiam non tantum mobilem reddunt, sed & vias atque ipsas membranofo-nerueas partes ita simul adficiunt, vt restrictio mediocritatem naturalem non excedens, adeoque humiditatis contentæ distributio sequatur, præ aliis errhinis vtilia sunt, præci-



præcipue personis sanguinei habitus. Hæ enim vehementiora non æque, vti phlegmatici, tolerant.

6. Præcipuum inter errhina, sed & satis violentum est *euphorbium*. Vnde in substantia, vtut exigua valde portione, vix sine noxa offertur, præsertim si multa narium frictio accedat. Paullulum autem mitius agit, quando pauca illius quantitas cum aqua simplici, vel rosarum, aut maioranæ trita & transcolata naribus attrahitur.

7. Consultum itaque est, ne qua noceatur, inter hæc remedia discrimen & gradus vehementiæ quodammodo perspectos habere. Sic validissima sunt, dictum gummi, radix hellebori albi, piper, &c. leniora, sed tamen adhuc satis fortia folia tabaci, flor. liliorum conuallium, vitriolum, album, &c. mitissima betonica, origanum &c.

8. Cæterum plura quidem, quam allegauimus, ad huius generis pharmacorum classem a quibusdam auctoribus referuntur, sed cum proposita iam fere nimia sint, saltem eum numerum conficiant, ex quo delectum habere cuius procliue est, maior moles in hoc leuiore medicationis genere valde odiosa videri potuisset. Itaque iam ad ea, quæ alibi non pertractauimus, paucis recensenda progredimur.

9. VITRIOLVM ALBVM.

1) Veram huius indolem & differentiam ab aliis vitrioli generibus nemo chymicorum penitus adhuc discutit & aperuit. Est autem materia, vt videtur, salino-acida & terreo-metallica, sapore salino, acri, adstringente & nauseam creante prædita. Vnde interne datum vomitum languide ciet; extus siccat, reprimat, & adstringit.

2) Vt errhinum catarrhos mucidos, coryzam grauedinem, phlegmatorrhagiam &c. subleuat, si aqua maioranæ solutum iusto tempore adhibeatur.

3) Alias est opthalmicum egregium atque eorum, quæ reprimendi & adstringendi scopo collyriis admiscere



fructuosum est, coryphæus. In eundem usum per albumen oui deliquio soluitur & aqua rosarum temperatur. Expedi autem in adplicatione id potissimum observare, ut æstum inflammatorium prius mitigemus atque usui illius statim *saccharum saturni*, aqua quadam ophthalmica solutum, subiungamus.

- 4) De *Gilla Theophrasti*, quam purificatione & crystallisatione huius vitrioli, vel per se, vel addito nitro obtinere intendunt, diximus in *tabul. de emesi*.

#### 10. SAL AMMONIACVM.

- 1) Est hoc vel *natiuum*, quod olim circa Iouis Hammonis templum in Africa effossum esse, hodie vero prope radices Vesuvii eruclari dicitur, vel *artificiale* ex sale communi, vrina & fuligine parari solitum.
- 2) His partibus constituentibus debet vim suam resolventem, diureticam & (propter sal volatile) tonicam, repellentem.
- 3) Integrum, vel in substantia raro intus vsurpatur, quamvis id nonnulli corrigendæ primarum regionum cruditati & febribus præcipue intermittentibus conferrent, sed plerumque lento, vel exiguo, vel nullo successu. Utilius additur gargarismatibus ad crassiorum mucum in angina notha liquandum & diluendum.
- 4) Celebratissimus autem est hinc destillatione per alcali prodiens *spiritus salis ammoniaci*, qui (præsertim per calcem viuam expulsi), perquam volatili odore nares ferit, ibidemque mucum resoluit & partes roborat. Cæterum interno vsu conuenit cum aliis vrinosis volatilibus, de quibus supra locuti sumus.
- 5) Idem sal volatile (ad scopum errhinum) exurgit, cum sal ammoniacum in alcali fixi lixiuium, sub leni præcipue calore, iniicitur.

#### 11. SALIA VOLATILIA VRINOSA.

*Horum usum modo adposuimus.*

#### 12. CASTOREÆ ESSENTIA.

- 1) Castoreum proprie sunt corpora glandulosa, sub testibus



culis animalis amphibii (quod *caster* seu *fiber* vocatur) nata & oleoso spisso liquore turgida, quocum sensum exsiccantur & ex Moscouia frequenter ad nos deuehuntur. Color fuscus, flauescens, sapor acer, amaricans, nauseosus, odor grauis, penetrans obseruatur.

- 2) Adsignatur ei magno plurimorum adplausu facultas discutiens, neruina & anodyna; sed quam parum valeat, vbi talium effectuum spe crebrius exhibetur, quotidiana condocere possunt exempla.
- 3) Sicut enim hystericis nihil tam frequentius offerri solet, quam castoreum; ita sæpe fit, vt, cum radicem morbi plane non attingit, fœtido suo vaporoso oleo grauiore commotiones moliatur, vel deinceps, vbi per aliquot horas spasmos sopiit, vehementius eos resuscitet, capitisque dolores, temulentiam & præcordiorum angustias augeat; præsertim si nauseosa & vomibunda pathemata coniuncta sint.
- 4) Neque aliis etiam spasmodicis malis colicæ, arthritidi, epilepsiæ, neque paralyfi, ariduræ, multo minus vertigini, vel lethargo, quibus a non nullis destinatur, solide mitigandis sufficere castoreum animaduertitur. Et certe cum alia tutiora & efficaciora superpetant, *essentia castorei* postponenda videtur.
- 5) Salubrius autem *extus* adhibetur castoreum ad spasmos abdominis, colicos cruciatus, susurrum aurium & difficilem auditum; atque vt errhinum in *essentia* vel puluere cum aliis sociatum, Prostat & *medulla castorei*.

13. RADIX CEPARVM.  
*vid. tab. de diuresi.*

14. RADIX ELLEBORI ALBI, TALAPP. &c.  
*vid. tab. de catharsi.*

15. RADIX IREOS FLORENT.  
*vid. ibid.*



## 16. RADIX MECHOACANNÆ ALBÆ.

*vid. tab. de catharsi.*

## 17. RADIX PIMPINELLÆ ALBÆ.

*vid. tab. de diaphoresi.*

## 18. RADIX PYRETHRI.

1) Radicis huius (quæ in Italia sponte nascens apud nos in hortis colitur) particulas salinas causticas acerrimas & sapor prodit & effectus valde stimulans, ac rubefaciens.

2) Vnde conuenientius est ab interno eius vsu prorsus abstinere, in externa autem adplicatione tale moderamen seruare, vt mordacitas eius satis infracta insignem humorum adfluxum, aut inflammationem suscitare nequeat.

3) Laudatur in paralyfi (in primis linguæ) apoplexia, lethargo, catarrho suffocatio, odontalgia catarrhali, item (sed incertius) in epilepsia.

4) In ore detenta saliuam cum feruore elicit (vnde Germ. *Speichel-Wurk* audit) ideoque inter potentissima masticatoria refertur. A quibusdam etiam (sed caute & parcissime) aliis sternutatoriis ad vexandas nares immiscetur.

5) Ad usum inditur conuenienti portione clysteribus, cataplasmatibus, decoctis &c.

## 19) SQVILLA.

*vid. tab. de emesi.*

## 20. ANAGALLIDIS PURPUREÆ folia.

1) Huius herbulæ succus etiam caput purgare dicitur naribus attractus; sed talis vsus hodie antiquatus est, sæpius vero (vt est herba vulneraria) ad hæmorrhagias & vlcera itemque ad oculorum morbos eam commendatam legimus.

2) Inter omnes autem illius laudes effulget virtus specifica infantiæ expultrix; namque fatuorum salus, Geesens-Heyl, audit, & complures practici multos maniacos & melancholicos per huius herbæ decoctum ad sanam



nam mentem rediisse testantur. Non indigna igitur est, quam frequentius iusta methodo miserandis huiusmodi subiectis adhibeamus, nec ab usu eius ulteriore, ubi non protinus ex sententia succedit, nos deterreri patiamur.

## 21. BETONICA.

- 1) Herba & præcipue flores suaueolent atque e principio oleoso sulphureo facultatem quamdam resoluendi & neruinam mutantur.
- 2) Conueniunt exinde in adfectibus capitis frigidis aliisque catarrhalibus & quadantenus vterinis ac motuum languore; neutiquam vero ea patrant miracula, quæ vulgo expectantur.
- 3) Etenim rarissime votis satisfaciunt peruulgata eius encomia in melancholia, epilepsia, apoplexia, oculorum caligine, hæmoptysi, tabe & vlceribus pulmonum, obstructis visceribus, quartana, hydrope, calculo, mensibus suppressis, fluore albo, arthritide, podagra, pestilentia, moribus venenatis, incantamentis.
- 4) Nemo autem mirabitur tam longum virium catalogum, quando quidem hæc herba tantum gloriæ habet, ut verbis *Plinii*, domus, in qua fata sit, tuta existimetur a piaculis omnibus.
- 5) Præterea aliis eadem ad arcendam, aliis ad adferendam temulentiam apta creditur; extus autem certius ad vulnera & laxitatem toni corrigendam, dentes firmandos, catarrhos capitis, dubie ad vlcera cancrorsa, surditatem &c. laudatur.
- 6) Radix & semen inertiora sunt & minus vsitata.
- 7) Prostant eius *aqua destillata*, *conserua*, *sirupus*, item *emplastrum* seu *ceratum de betonica* in vulneribus capitis celebre & proficuum.

## 22. MAIORANA.

- 1) Fragrat ex volatiliorum principiorum suauis copula, atque ut neruinam, tonicam, discutientem & carminati-



natiuam virtutem obtinet, sic præcipue & fere maiori iure, quam antecedens, cephalicis accensetur.

- 2) Adhibetur ergo in atonia partium, paralyfi, tremore, stasibus & tumoribus frigidis, catarrhis capitis, & præcipue coryzæ, narium obstructioni (vt egregium *errhino-ptarmicum*) ac odoratus læsionibus dicatur.
- 3) Porro vsum sui comprobat in ventriculi debilitate, flatulentia, & aliquantum in fluore albo, mensibus imminutis & decoloratis, secundinarum retentione. Cæterum eam singulari efficacia subuenire epilepticis, sterilibus, aut oleum eius destillatum quartanæ mederi, ambiguum est.
- 4) Illud adhuc monemus, obstructionem mucosam narium infantibus sæpe molestant & suctioni remoras iniicientem a butyro maioranæ intus, ab aqua destillata, vel oleo extus illito referari.

23. ORIGANVM.

*vid. tab. de diaphoresi.*

24. PTARMICA.

- 1) Vocatur etiam pyrethrum syluestre & cum fatis acribus scateat particulis, tum e glandulis salialibus copiosum humorem elicere, tum sternutamentis prouocandis nominis sui omen implere reperitur.
- 2) Potest itaque huic scopo, aliis pulueribus lenioribus admixta, vt stimulus, velificari; sed raro in vfu & fere superflua est, cum certiora habeamus.

25. ROSMARINVS.

- 1) Herbæ & floribus, ob sulphureo-oleosarum partium copiam fragrantem maxime, implantata est vis aromatica, roborans, discutiens, neruina & analeptica. Vnde ea ad multum vsum apta & a plerisque in magno dignitatis gradu collocata sunt.
- 2) In primis cephalicorum fere princeps atque hic (excepto, quod olfactui forte non adeo succurrat) & in morbis vterinis aliisque, præstantior rosmarinus ducitur maiorana, de qua paullo ante diximus.

3) Opta-



- 3) Optamus ergo, vt in reclusionē obturatorum viscerum, reuocatione mensium, sterilitate, fluore albo (quem speciatim eius essentia nonnumquam corrigit & abolet) apoplexia, epilepsia, memoriæ debilitate & visu acuendo illas virtutes in dies magis experiamur, quas multi auctores promittunt.
- 4) Et merito adhuc in maiori pretio habendus esset, si, vt aliqui putant, a pestilenti contagio certius præmuniret, aut phthisi (ex lacte sumtus) vel narium polypo, vel fistulis & cancro mederetur.
- 5) Prostant in officinis, *aqua destillata, spiritus* (qui ex floribus roris marini seu anthos paratus celebris illa *aqua reginæ Hungaricæ* dicitur) *essentia, oleum, balsamus, conserua.* Præscribitur quoque in *vino medicato, sacculis, decoctis, balneis, suffitu &c.*

## 26. SERPILLVM.

- 1) Datur syluestre, vel paullo hirsutius, vel læue citrino odore gratissimum; atque e nostratibus est insigne aromaticum, neruinum & discutiens, aliis cephalicis vix inferius habendum.
- 2) Quapropter iisdem fere malis, quibus maiorana ac rosmarinus destinantur, conuenit & præcipue spiritum serpilli (citrini odoris) in doloribus capitis, paralyfi, tremore artuum, decoctum & balneum in spasmodico - arthriticis morbis, aquam destillatam in partu instante paullo difficiliore sæpe cum fructu vsurpata fuisse meminimus.
- 3) Cæterum oppilationes viscerum tollere & morsus virulentos, aut peculiari proprietate inflammationem vteri sanare nondum satis compertum est.

## 27. TABACVS.

*vid. tab. de emesi.*

## 28. THYMVS.

- 1) Est serpillum Italicum, nostrate rigidius, sed acrius & fragrantius, notissimum culinis condimentum.
- 2) Itaque gradu tantum a præcedenti diffidet, cæterum parem facultatem neruinam, discutientem, carmin-



natiuam nactus & præterea ad necandos vermes, pel-  
lentos menfes, secundinas, calculum &c. laudari  
solitus.

29. FLORES ANTHOS.

*vid. sub herba rorismarini.*

30. FLORES CALENDVLAE.

*vid. tab. de diaphoresi.*

31. FLORES CARTHAMI.

*vid. tab. de catharsi.*

32. FLORES CYANI.

1) Hos ex temperatis acidis & subtilibus sulphureis parti-  
culis connexos, ideoque leuiter discutiente & toni-  
ca efficacia dotatos esse perhibent.

2) Verum hanc vim duntaxat in partes teneriores, mem-  
branaceas, neruofas emittere & proinde aquam eo-  
rum destillatam oculos maiore humorum conge-  
stione & inflammatione oppressos paullulum solari  
comperimus. Qua propter alibi natas stases sangui-  
nis, suggillationes, tumores faciei &c. non æque dis-  
cutiunt.

3) Cæterum a quibusdam commendantur, vt diuretici,  
in ictero, hydrope, suppressione vrinx, item sca-  
bie, vlceribus, mensium retentione; ab aliis radix  
manu detenta hæmorrhagiam narium sistere & suc-  
cus, qui e contusis viuis cancris aqua flor. cyani ad-  
fusa exprimitur, dentium eruptionem in infantibus  
adiuuare prædicatur. Sed hæc omnia nondum satis  
probata temporis patefacienda relinquimus.

33. LAVENDVLÆ FLORES.

1) In cephalicorum classe sunt, vtique roborantem, ner-  
uinam & resoluentem virtutem consecuti.

2) Cum autem paullo supra (*vid. maiorana, rosmarinus,  
serpillum*) iam eos morbos, quibus leniendis simplicia  
huius generis sufficiunt, allegauimus; in dictis repe-  
tendis non erimus verbosi. Illud hoc loco non præ-  
tereundum est, lauendulam, vti satis oleosa & feruida  
est, sic in vterinis aliisque calidioribus malis parce &

cau-



caute interne dari oportere, cœterum nec palpitationem cordis, nec spasmos, arthritidem &c. singulari quadam vi depellere.

- 3) Extus in tumoribus frigidis, catarrhis, paralyfi, torminibus, specificè (vt quidam volunt) in conuulsione neruorum a vulnere & punctura itemque in pediculorum colluie fuganda adplicatur, & quidem in decocto cum vino, vel aqua, vel oleo destillato &c.

#### 34. LILIORVM CONVALLIVM FLORES.

- 1) His quidem sulphureæ partes maxime fragrantiam, & salinæ alcalinæ stimulum errhino-ptarmicum largiuntur, sed tamen peculiaris vtrarumq; positus & textura integra ad suauem illum odorem requiritur, nam recentes concisi aut conquassati non ita bene olent.
- 2) Quemadmodum autem illis resoluens, colliquans, neruina & analeptica quædam facultas tribuitur; sic horum liliorum vsum in catarrhis capitis attenuandis, vertigine, tremore, paralyfi, loquela amissa, deliquiis animi & languidis alibi motibus excitandis frequentem nec prorsus inefficacem esse nouimus.
- 3) Siccati flores (vti & radix, iudice *Camerario*) errhino-ptarmico effectû satis violenter caput adficiunt & repurgant.
- 4) Cæterum optandum esset, vt & in epilepsia & apoplexia curanda, viriumque restauratione in febribus malignis, medicantium impleret desideria.
- 5) In vfu sunt *aqua destillata*, *conserua* & præcipue *spiritus* per crebram spiritus vini cohobationem a floribus recentibus confectus, quanquam & aliis modis pareretur, de quibus vide *Estmüllerum*.

#### 35. ROSARVM FLORES.

- 1) Sunt magis vel minus odoriferi. Priorès merito seliguntur, atque vt vel rubro-puniceo vel incarnato vel albo colore existunt; sic omnes volatili sulphurea sua portione suaueolenti vires aliquantum reficere & rubicundi simul ex acidis terrestribus suis moleculis adstrictoriam qualitatem petere deprehenduntur.



- 2) His posterioribus maior vsus & inter quatuor *flores* sic dictos *cordiales* locus vulgo conceditur. Quo scopo *spiritum* eorum perfermentationem paratum, & *aquam destillatam* (tonicam pariter & parum resoluentem indeque etiam ophthalmicam) denique *acetum rosarum* laudant. Nec inutilis est *conserua* harum rosarum, quæ cum recens magis styptica sit, vetustate mitescit, ac tum hæmoptycis, tabidis, hæcticis, calculosis, dysentericis insigniter conducere celebratur. Febricitantibus datur ad temperandum æstum *tinctura* rosarum, ad recreandum vero tum *aqua destillata*, tum *saccharum rosatum tabulatum* aliis analepticis adiunguntur. Siccati & puluerisati flores non plane respuendum præbent ptarmicum.
- 3) Ex incarnatis pallidioribus seu Damascenis parantur *aqua*, *spiritus*, *oleum*, *conserua*, inprimis vero celebris ille *syrupus rosarum solutiuss*, commodum infantibus leniente & laxante effectu subsidium; & *mel rosarum* chirurgis ad varias vlcerationes & faucium ac gingiuæ mala expetitur.
- 4) *Vnguentum* & *oleum* coctum rosarum multo sunt abusui expõsita, quando quidem temerario eorum, vti & aliorum pinguium illitui in erysipelate aliisque inflammationibus funestam subinde catastrophem successisse meminimus.
- 5) Cæterum rosas in erysipelate & doloribus capitis singularem virtutem obtinere, aut quartanæ mederi dubitatur.
36. SPICÆ FLORES.  
Spica nostras siue pseudonardus (a spica Indica & Celtica distinguenda) vocatur etiam *lauendula mās* seu *latifolia*, & viribus cephalicis, tonicis, aromaticis, vt & odore magis valido cum lauendula angustifolia seu foemina, de qua paullo supra, conuenit, vnde hic nihil addimus.
37. VIOLARVM FLORES.  
*vid. tab. de diuresi.*



## 38. GUMMI EUPHORBII.

*vid. tab. de catharsi.*

## 39. SEMEN ERVÆ.

1) Qualitatem fouet incidentem & resoluentem stimulo diuretico comitatam, atque hanc ex principiis eius salinis, acribus cum paucis sulphureis & terreis iunctis deriuant.

2) Non vanus ergo eius vsus est, in cruditate primarum viarum, corruptelis feri & lymphæ mucidis, cachecticis, hydropicis, catarrhis frigidis crassis, & glandularum meseraicarum obstructione.

3) Nec inutilis est in scorbuto & vermibus enecandis, dummodo vbique caueatur, ne id vel tenerioribus macilentis, vel in coniuncto grauiore æstu temere præbeamus. Nam his & acutis morbis potius nocumentum acriore sua vi adferet.

4) Externe tonum non nihil restituit, & adfluxum humorum aduocat rubefaciente effectû; quapropter errhino scopo parcissime aliis admiscendum erit. Cæterum directe apoplexiæ, paralyfi, item mensium suppressioni, aut venenatis ictibus auxiliari, improbabile est.

## 40. NASTURTII SEMEN.

*vid. tab. de diaphoresi.*

## 41. NIGELLÆ SEMEN.

1) Mitis ac suauioris carminatiui titulum meretur, nam ex sulphureo-oleosis partibus leni mucilagine temperatis constat, & virtutem hinc arcessit resoluentem, leniter discutientem & roborantem.

2) Quapropter emendandis mucidis impuritatibus, vbi-  
cumque siue in stomacho, siue in pectore, aut renibus hæreant, & flatulentix conuenit; in primisque ad catarrhos capitis indeque oriundam cephalalgiam, vertiginem, obstructionem nasi &c. vel odorata tantum, vel in suffitu, vel in puluere naribus attracto, vel in sacculis imposita laudatur.



- 3) Vtilissimum quoque est ad lac promouendum atque (iufculis incoctum) ad dolores post partum flatulentos dissipandos.
- 4) Illud adhuc satis obscurum videtur, semen hoc virus e rabidi canis morfu delere, & vt amuletum auertere pestilens contagium, vel radicem nigellæ mansam & naribus intrusam hæmorrhagiam narium, aut sub lingua, vel manu detentam mensium profluvium sistere.
- 5) Postremo notamus, hodie quoque *nigellæstri* seu *lolii* feminis vim errhino-ptarmicam innotescere atque ob pulcrum, quem edidisse prædicatur, effectum commendari.

42. RUTÆ SEMEN.

*vid. supra herb. rutæ.*

43. SINAPIS SEMEN.

- 1) Principiis & qualitate parum diffidet a semine erucæ, quamuis vtriusque plantæ facies notabilem ostendat differentiam.
- 2) Cum ergo similiter attenuat humores spissos & viscidos, nec minorem stimulum vrinariis & spermaticis viis admouet; tum cruditate, vel longinqua febre intermittente laborantibus, porro hypochondriacis, lienosis, ictericis, hydropicis, cachecticis, chloroticis, asthmaticis humidis, catarrhosis frigidis vsum sæpe adfert non poenitendum.
- 3) Cæterum eas cautiones, quas sub semine erucæ interspersimus, hic etiam in memoriam sibi reuocare expedit. Externe in paralyfi linguæ &c. hoc semen adhibetur.

44. CARYOPHYLLI AROMATICI.

- 1) Hos fructus arbor quædam lauro similis in Moluccorum insulis proferre dicitur, vnde sub duplici facie ad nos exportatos habemus. Quidam sunt, *maturi* & *maiores antophylli* seu *mares* (german. Mutter-Nelcken) adpellati; alii *immaturiores*, *minores*, quos *veros* alioquin & *vulgares caryophyllos* nuncupant.

2) Sicut



- 2) Sicut autem hi merito ad suauissima aromatum genera referuntur, virtutibus attenuandi, resoluendi, roborandi &c. insignes; ita ob abundantiam sulphurei oleosi acris principii, oppido feruidi sunt & motum humorum vehementius incendunt.
- 3) Ex quo intelligitur, quamuis absente æstu & febris in primarum viarum debilitate, flatulentia indeque oritur colica, atque in morbis frigidis cachecticis, catarrhalibus & motuum remissione ac defectu auxilium promittant; tamen vbiuis caute & parciore dosi, præfertim teneris delicatis & calidioribus subiectis esse porrigendos.
- 4) Neque est quod credamus, illos in capitis imbecillitate, vertigine, memoria debili, visus obscuritate, vel (præcipue antophyllos) in morbis vterinis, fluore albo &c. vtramque paginam facere; vtpote cum ad manus sint indigenæ herbæ temperatiores ac longiore tuto vsu in eiusmodi malis æque efficaces, si non magis profuturæ.
- 5) Externe in oculorum adfectibus conducunt, & quem ad modum solus halitus ex caryophyllis ore mansis oculos in variolis defendere valet, ita in ophthalmia hi fructus aquis ophthalmicis cum fructu adduntur. In doloribus dentium vltimum sæpe refugium sunt caryophylli; sed licet plerumque multum saliuæ & mucii extrahant, tamen cariem non extinguunt, nec catarrhalem adfluxum semper amoliuntur. Maiorem auxilii spem faciunt in supra dictis adfectibus & in paralyfi, contractura, sphacelo: adhibentur autem *oleum destillatum, essentia, balsamus, species caryophyllata, puluis* & ex eo suffitus.
- 6) Cæterum, vt monuimus, nocent in commotionibus humorum, nec tuto in sanguine coagulato, hæmoptysi, horrore quartanæ, aut aliis febribus præberi videntur.

## 45. CVBEBÆ.

- 1) Sunt fructus seu grana colore cinereo, magnitudine piperis,



peris, quæ planta quædam, arboribus, vt hedera, se circumuoluens, in insula Iaua producit. Et quoniam aromaticis sulphureo oleolis particulis itidem adfluunt, (parcius tamen quam caryophylli) concretam inde habent qualitatem discutiendi & roborandi.

- 2) Proinde illa, vt alia huius generis, ad morbos chronicos, frigidos, serofos, stomachicos, mucidos & catarrales valere, inprimis vero vertiginem, memoriæ & sensuum imbecillitatem corrigere prædicant; quanquam in his vltimis singularem earum virtutem constans experientia nondum extra controuersiam posuerit.
- 3) Præterea sopitos excitare, naturalem vigorem intendere & ingenium acuire celebrantur, vbi tamen audiendus esse videtur *Ettmüllerus*, qui ex frequenti cubearum vsu stupiditatem potius metuit, quam acumen pollicetur.
- 4) An denique in fluore albo, aliisque foemininis afflictionibus, item in hydrope & calculo secundam valetudinem restituere valeant, vt non nulli credunt, tempus edocebit.

#### 46. PIPER.

- 1) Ex oriente triplex aduehitur *nigrum, album & longum*. Priora duo fructus vnus eiusdemque plantæ in insula Iaua &c. crescentis sunt, quæ propter imbecillitatem humi procumbit, nisi aut pedamentis fulciatur, aut arboribus vicinis adhærescere possit. Neque differunt, nisi quod album, cortice nigro, rugoso, detracto, læuius sit, ac vulgo maioris pretii. Piper longum coloris cinerei, iulorum coryli instar, e numerosis quasi granis conglutinatum videtur, sapore summe feruido & quodammodo amaricante.
- 2) Est vero piper aroma ex acribus sulphureis terreis & parce oleosis principiis conflatum, & propterea resoluendi, incidendi, roborandi atque, vt quibusdam placet, diaphoresin pellendi viribus refertum. Præterea



terea excalefacit quidem, sed tamen haud adeo vehementer, ac alia huius generis aromata, humores accendere notatur.

- 3) Speciatim ergo concoctioni succurrit ac mucum flatibus & colicæ fomenta præbentem attenuat, atque in omnibus morbis pituitosis, serosis, frigidis, de quibus sæpe mentionem fecimus, conuenit, præsertim cum etiam euacuationem crassarum impuritatum per renes & vesicam adiuuet.
- 4) Largius datum iracundis calidis nocet, quin & conceptum vel prohibere vel abortu vitare dicitur.
- 5) Notissima sunt plebis experimenta, quæ aliquot piperis granis, cum spiritu vini adsumtis, tertianam & quartanam inueteratam oppugnat; successu vario: nam interdum sanitas recuperatur, sæpe vero grauiora mala infert temeritas discriminis subiectorum & opportuni temporis incuriosa.
- 6) Datur potissimum vel integrum vel dissectum, nam tenuiter comminutum effectum suum calefacientem magis in ipsam humorum massam edere, atque hinc non adeo prodesse iudicatur. Prostant & *species diatrion pipereon* in dictis morbis utiles. *Oleum destillatum* vero circumspectissime præscribendum est.
- 7) Extus laudatur in sternutatoriis & apophlegmatismo ad mucidos catarrhos, itemque in laxitate columellæ, dentium doloribus frigidis serosis, denique ut rubefaciens.
- 8) Vitimo meminimus piperis illius *Americani* (etiam *Indici* seu *siliquastris* vocati,) quod constituunt siliquæ ex atro rubentes seu flauæ, multo semine plenæ, vulgari pipere mordaciores. Hæ, tradente *Ettmüllero*, ab Hispanis chocolatæ adduntur, cæterum ad acuum stomachum & febres intermittentes depellendas valent. Sed præsto sunt meliora.

#### 47. SACCHARVM.

- 1) Est succus dulcissimus oleoso-salinus e peculiaribus cannis seu arundinibus Indicis, *Mambu* dictis, insi-



gnis interdum altitudinis & crassitie, molendinarum ope expressus, & per coctionem & lixiuii calcarii additamentum in consistentiam siccam friabilem redactus.

z) Diuersa huius genera venalia sunt, quæ potissimum locus natalis, vel bonitas, vel elaborandi modus distinguit. Prostat enim saccharum

a) *Maderense*, ab insula *Madera* dictum, egregium & omnium purissimum, ideoque ad medicos vsus & confectiones maxime expeti solitum.

b) *Canariense*, ab insulis *Canariis* sic vocatum, priori sinceritate succedit.

c) *Finale* seu *finum* item *refinatum* & *Valentinum* (ab vrbe Hispaniæ, vbi purificatur) gradu puritatis diuersum. Finissimum dicitur *super fein* oder *Candis-Brod*.

d) *Melissum* seu *Meliteum* a *Meli* Indiæ occidentalis insula, non autem *melita* seu *Maltha* Europæ, sic cognominatum, monente *Langio*. Hoc vocant etiam *saccharum cibale*, *Meliss-Zucker*, *Speise-Zucker*, *gemeiner Hut-Zucker*.

e) *Thomæum* (ab insula *S. Thomæ* dictum) est rubrum & vilissimum, Germ. *Braun Farin*.

f) *Miscellaneum* seu *farinaceum*, item *Castonade*, *Musco-nade*, constat e puluere & fragmentis pyramidalis sacchari, des *Hut-Zuckers*, Germ. audit *Farin-Zucker*, loser *Koch-Zucker*.

g) *Candum* seu *crystallinum lucidum*, atque hoc vel candidum limpidumque adpareret ex *Maderensi* & *Canariensi* confici solitum, ex quo purissimum dicitur *Stehr-Zucker*, vel rubrum *fuscum* e *Thomæo* in tales *crystallos* tandem redactum.

h) *Penidium* seu *tractum*, *Penid-Zucker*, *gewundener Zucker* est albissimum leuissimumque, cuius parandi modum docet *Schræderus* &c.

i) *Molle*, *liquidum* seu *mel saccharinum* est liquor foeculentus



lentus a purificatione sacchari residuus & coctione denuo aliquantulum mundatus, vel albus Germ. *Weisser Candis Syrup* vel nigricans sordidior *Schwartzbrauner oder gemeiner Syrup*.

3) Cum autem saccharum salinis acidis & oleosis partibus cum mucilagine quadam & terra calcaria copulatis compositionem sui debeat, tum inde qualitates eius abstergentes, resoluentes & lenientes deducuntur.

4) Equibus (a priori quoque) non absimile vero est, moderatum eius usum prodesse ad iuuandam ciborum digestionem, mucum in intestinis, pectore &c. detergendum, adeoque etiam tussim & asthma humidum, raucedinem &c. subleuandam, præterea in ulcerationibus tam externis quam internis hecticis & calculo renum.

5) Confirmat etiam hanc utilitatem experientia, eosque refellit, qui nimium scrupulose vim sacchari fermentescentem, acescentem, vel mucum augentem ubique veriti, usu eius ægrotantibus seuerè interdicunt.

6) Certe pauca sacchari frustula nemini exitium minantur; quamquam alias non friuole præcipiatur, ut, qui biliosis motibus aut hypochondriacis atque his adfinibus malis, præsentibus simul variis intestinorum sordibus, adfliguntur, eo parcissime utantur, aut plane abstineant; unde hysterics & febricitantibus omnibus (sed nimio plerumque metu) solet prohiberi.

7) Ab intemperato autem usu acrior humorum fermentatio, saburræ mucosæ acescentis & concoctionem impedientis copia, se. & excretionum vitia alibi metuntur, alibi inducuntur, licet in multis de cætero fanis noxæ tardius demum adpareant.

8) Evidentius talis abusus propter acida salina sacchari principia dentes adrodit & carioso nigrore inficit; num vero etiam vermium generationem sustentet, litigatur adhuc dum, quibusdam saccharum potius anthelmintici titulo ornantibus.



- 9) Cæterum suaue condimentum est, iucundumque multorum medicaminum vehiculum, quo sine multi saluberrimum infusum thée aliaque paullo ingratiore adsumere recusarent.
- 10) Iniuste quoque seueris censoribus vapulant omnia per saccharum parata medicamenta, vt *condita*, *panis martius*, *rotulae*, *morsuli*, *confectiones*, inprimisque *syrupi*, qui sane dummodo ex simplicibus efficacioribus fiant, satis probati vsus, neque ob largiorem huius succi accessum reformidandi sunt.
- 11) Præ aliis *Beccherus* sal Indicum hoc ad magnum honoris fastigium euehit, vt balsamum, cuius ope non tantum vegetabilia, sed & animalia perdurant incorrupta; porro vt densatum mustum, e quo fermentato vinum generosissimum vulgari suauius & salubrius prodit. Inprimis vero *substantiam mediam*, quam ex hoc vino parat, subacidam & gratissimam ad multos vsus in febribus valere prædicat.
- 12) *Spiritus sacchari* est satis acidus aliis, qui e vegetabilibus propellitur, haud dispar, nec ad singulares effectus aut variorum arcanorum productionem, vt videtur, idoneus.
- 13) *Oleum sacchari*, quod per spiritum vini solutione & deflagratione spiritus fit, laudatur ad tussim, catarrhos, raucas fauces, &c. Alia vulgo ex saccharo sperata & passim in aprium producta, quia indoles eorum & vires magis ignorantur, consulto præterimus.
- 14) Externe saccharum scopo errhino inseruit præsertim cum oleis destillatis maioranæ, caryophyll. &c. mixtum, naribusque exceptum. Deinde adhibetur in vulneribus, variis efflorescentibus cutis fordibus, serpigine, & vlceribus, quibus ipsum frequenter optato cum effectū inspergunt Turcæ. Nec minus conuenit in ophthalmia serosa & leuioribus oculorum maculis; postremo & clysteribus ad leniorem abstersionem inditur.



48. *Balsamica pleraque oleosa.*

Pertinent huc varia sic dicta balsama vitæ, balsami apoplectici, epileptici &c. quos figillatim examinare a proposito nostro seiunctum est.



## TABVLA VII.

DE

# APOPHLEGMATISMO PER OS.

### I. DEFINITIO.

Apophlegmatismus per os est salivatio *particularis*, qua per remedia adpropriata non tantum saliva e ductibus & glandulis salivalibus, sed & alii humores mucido-ferosi e partibus, oris regioni vicinis, excernuntur.

### II. DIFFERENTIA.

1. Salivatio hæc particularis ab aliis dicitur *masticatio*, vti remedia, quæ in ore hinc atque illinc voluuntur, *masticatoria* seu *phlegmatizantia* vocantur.
2. Hæc autem remedia sunt vel *secca*, vel *humida*, item vel *acria*, vel *non acria*.
3. A salivatione *uniuersali*, seu *mercuriali* eo præcipue se distinguit, quod tantum occupata est illos humores euacuare, quæ circa oris regionem reperiuntur.
4. Ratione materiæ excernendæ multum quidem conuenit cum apophlegmatismo illo, qui per *nares* contingit, ratione autem loci ab eodem differt.

### III. INDICANTIA.

1. Apophlegmatismus per os iisdem fere angustis limitibus inclusus est, quibus alter per nares, de quo præcedente tabula diximus.



2. Vsum autem præcipue habet

- 1) in adfectibus *catarrhalibus* circa caput.
- 2) Speciatim in odontalgia serosa.
- 3) In oculorum & aurium fluxione catarrhali.
- 4) In glandularum colli & faucium infarctu.
- 5) Immo in quibusdam *sanguineis* versus caput congestio-  
nibus.

#### IV. INDICATA seu REMEDIA.

1. *Ex regno vegetabili.*

Rad, Acori seu calami aromatici nostratis

Allii	Nasturtii
Angelicæ	Nicotianæ
Carlinæ	Piperitidis
Calami aromatici	Pulegii
peregrini	Sem. Erucæ
Ceparum	Nigellæ
Ellebori nigri	Sinapis
Enulæ	Staphidos agriæ
Galangæ	Gummata, e. g.
Imperatorix	Camphora
Ireos	Mastiche
Pimpinellæ albæ	Aromata, e. g.
Pyrethri	Piper
Zedoariæ	Cardamomum
Zingiberis	Cubebæ
Herb. Betonicæ	Cocculi de Levante.
Maioranæ	

2. *Ex regno minerali.*

Nitrum.

3. *Ex regno animali.*

Sal ammoniacum.

#### V. MODVS OPERANDI.

Hic pro remediorum variatione varius est,

1. Masticatoria, quæ acria non sunt, sola mole sua, dum man-  
duntur



duntur atque linguæ ope voluuntur & reuoluuntur, naturam ad copiosiores salivæ adpulsionem placide inuitant, & virtute minus drastica effectum hunc producere solent, e. g. gummi mastiches.

2. Apophlegmatizantia autem acria partium suarum tenuitate & acredine nunc humores crassiores incidunt atque ad faciliorem eiectionem eos præparant, nunc ipsas vias irritant. Vnde natura officii sui admonetur, vt salivam in oris cavitatem copiosius infundat, & id, quod molestum est, diluat & abstergat.

## VI. MODVS ADPLICANDI.

1. Præparatio corporis omnino præmittenda est, alias eadem incommoda, quorum mentio præcedente tabula facta fuit, metuenda sunt. Vnde alius soluenda, cacoehymia, si adsit, corrigenda, plethora per venæ sectionem, aut scarificationem imminuenda. *Conf. caut. num. 1.*
2. Absolute quidem necessarium non est, vt apophlegmatizantia ieiuno prorsus ventriculo adplicentur, interea tamen expedit, ne stomachus tum temporis nimis sit repletus.
3. Saliva, quæ profluit, sedulo exspuenda, minime vero, vt nonnulli volunt, deglutienda est, maxime quando ab acrioribus remediis, e. g. staphide agria, foliis nicotianæ, proritata fuit. Deglutitio enim vel leuissimæ portionis in non adfuetis, præcipue foeminis, grauissimas cardialgias syncopticas, sudores frigidos & anxietates efficit; quo vero casu haustulo vini calidi mediocriter aromatizati & edulcorati succurrendum est.

## VII. CAUTELAE ET OBSERVATIONES PRACTICAE.

1. Quando apophlegmatizantia acria ante vsum generaliorum remediorum adplicantur, tum loco nudi effluxus, potius confluxus ad has partes subsequitur, & tumores atque inflammationes producuntur.
2. In odontalgia serosa præsentis sæpe efficaciam est sequens remedium: Recip. coccul. de Levante drachm. semis, salis armoniaci scrup. semis. M. f. nodulus, dentibus dolorificis imponendus.

3. Aco-



## 3. ACORI RADIX.

- 1) Dicitur & *calamus aromaticus* officinarum, a *calamo aromatico* seu *acoro vero peregrino*, quem in Syria reperiri aiunt, distinguendus, cui, ut rariori, vulgaris hic nostras solet substitui.
- 2) Inest autem huic copiosior mucilago sulphureis & salinis alcalinis acribus particulis interiecta, quæ quidem cum eo communicant evidentius facultatem roborandi, resoluendi, abstergendi & diaphoresin pariter ac diuresin non nihil adiuuandi.
- 3) Non mediocriter ergo prodesse censetur in vitiis primæ coctionis, flatulentia, catarrhis capitis & pectoris frigidis, vertigine, cachexia, chlorosi, quartana, lotii suppressione, calculo renum &c. porro ab aliis ut antidotum, & a *Simone Paulli* ut egregium corrigens infalubrium aquarum laudatur.
- 4) Alii vero de inconstanti eius effectu queruntur, ac monent, radicem hanc, quam non omnes æque bene ferunt, parce dandam esse calidioribus ac teneris subiectis; frustra que ab ea singularem virtutem in oppilatione viscerum, mensium vitiis, spasms, paralyssi, oculorum caligine &c. expectari.
- 5) Prostant *aqua destillata*, *acorus conditus*, *extractum*, *essentia* &c.

## 4. CALAMVS AROMATICVS PEREGRINVS.

- 1) Indica hæc radix raro ad nos genuina peruenit & ab aliis cum acoro vero concordare, ab aliis contra recentioribus diuersa esse traditur.
- 2) Effecit autem raritas, ut de peculiari eius facultate Practici parum notitiæ hauserint. Generatim nostrate calamo aromatico, de quo modo diximus, viribus superior & præstantior in morbis stomachicis atque vterinis habetur.

## 5. PIPERITIS.

- 1) Refertur hæc herba ad thlaspiorum genus, atque excerrimis salinis suis principiis potenter incidit, abstergit & resoluit.

2) In-



2) Inprimis ergo viscidis humoribus attenuandis inferuit, atque ad cruditatem absumendam, adpetentiam cibi restaurandam, præcipueque scorbuticam labem corrigendam, laudatur.

3) Modicum tamen & circumspectum vsum suadet ipsius mordacitas; atque integra aliis temperatis admixta & comesta tutior erit & vtilior, quam *spiritus* eius causticus, aliaque præparata.

#### 6. PVLEGIVM.

1) In vtu est latifolium, fragrantibus sulphureis acriusculis & parumper oleosis particulis plenum; ideoque maioranam aliquo modo æmulatur & cephalicorum atque vterinorum censui attribuitur.

2) Exinde magnam eius efficaciam prædicant in catarrhalibus malis, tussi ferina, vertigine, mensibus, partu & secundinis promouendis, fluore albo, item in lippitudine.

3) Alibi ad venena, vlcera, calculum, hydropem &c. commendatur. Sed hæc longe magis ambigua sunt. Cæterum plane fabulosum, viride pulegium plantis pedum suppositum, manibusque detentum, lassitudinem & fatigationem ambulantium insigniter arcere.

4) *Aqua destillata* parturientibus & puerperis sæpe præscribitur, rarius *essentia*, aut *oleum destillatum*, quod externe salubrius est.

#### 7. STAPHIDIS AGRIÆ SEMEN.

1) Herba in Istria &c. sponte provenit & semen hoc profert tantæ acrimoniæ, vt facile fauces adurat & periculosos cieat vomitus; quapropter numquam interne dandum est, extus autem apophlegmatismi scopo caute & modice, si alia deficient, concedendum.

2) Tutius (non tamen large nimis) in vnguento aduersus phthiriasin, in cataplasmate etiam ad vesicatoria & phænigmos adhibetur.

#### 8. MASTICHE.

1) Hæc resina sudat ex arbore lentisco in insula Chio præcipue, atque optima conspicitur in granis candida,

H h

pel-



pellucida, fragilis, mox tamen sub dentibus in molliorem massulam coiens, saporis leuiter adstringentis, odoris non ingrati. In prunas coniecta non flammatur, sed tantummodo fumum dispergit.

2) Participat autem de principio sulphureo, copioso terrestri & parciore acidulo, eam temperiem conciliantibus, vt virtutibus discutiendi, abstergendi & roborandi instructa sit.

3) Interne propterea consecratur intestinorum debilitati, nausæ, diarrhææ, dysentericæ, hæmoptysi, gonorrhææ benignæ & fluori albo, incontinentiæ vrinæ; vbi subinde operæ pretium fecisse legitur. Contra magnis laudibus indigna & inertior est in neruorum adfectibus, vertigine, epilepsia, febribus &c. nam quamuis vt temperatum apophlegmatizans leuiores catarrhos aliquantum lenire, dentiumque vacillationem, & fœtorem oris interdum emendare valeat; tamen non æque altiores dictorum morborum radices attingit.

4) Præterea mastiche, vt eximia correctrix purgantium pharmacorum extollitur, multis ideo compositionibus addita. Sed tamen non vbique necessaria est, nec aliis congruentibus adeo anteferri meretur.

5) Externe efficacior se præstat in atonia partium, luxatione, tumoribus frigidis, item vulneribus & ulceribus, atque hic vsurpatur in suffitu, emplastro, linimento. Cæterum ex mastiche fiunt spiritus *acidulus*, *oleum destillatum*, quod *Ettmüllerus* per vesicam parare suadet, *essentia*, *syrupus* &c.

#### 9. COCCVLI DI LEVANTE.

1) Deferuntur ad nos, ex Aegypto, sed originem iuxta ac veram qualitatem nemo adhuc dum excussit & in lucem protraxit, vnde medica earum virtus perquam obscura est minimeque, in nodosis podagræ tumoribus dissolucendis, quibus a *Riucrio* destinantur, comprobata.

2) Ad.



- 2) Adhibentur alias (sed caute) ad pediculos interimen-  
dos, frequentius autem ad capiendos pisces, vtpote  
qui tali esca in summum stuporem coniecti captanti-  
um manus non amplius fugiunt.



## TABVLA VIII.

DE

# SALIVATIONE GENERALI.

### I. DEFINITIO.

Salivatio generalis est heroicum remedii genus, quo totum corpus ab inquinamentis, iisque specialibus & fermentescente indole præditis, sub laticis salivialis forma per os repurgatur. Vocatur etiam *ptyalismus* a πτύω, spuo.

### II. DIFFERENTIA.

1. Salivatio generalis a speciali, seu particulari in eo differt, quod hæc illum tantum laticem euacuet, qui circa oris regionem reperitur, illa vero humores e toto massæ sanguinæ latifundio exhauriat.
2. Excitatur autem per remedia vel *externa*, vel *interna*, vti sub *modo adplicandi* fusius dicemus.

### III. INDICANTIA.

1. Ptyalismus primario destinatur morbis venereis, iisque ita confirmatis, vt lymphæ, quæ specifico fermento coagulata & partibus solidis infixæ est, per alia consueta remedia non amplius alia medicandi via resolui & abstergi possit.
2. Speciatim eundem exposcunt
  - 1) symptomata luis venereæ fixiora, osteocopa, somnum turbantia.
  - 2) Gummata Gallica, seu tumores & nodi illi duri, qui circa tendinosas & glandulosas partes oboriuntur.

H h 2

3) Ulce.



3) Vlcera venerea, quæ inueterata sunt & ossium adrosionem minantur.

3. Cæterum & in aliis chronicis, inueteratis ac contumacibus adfectibus saluationem non nulli Practici commendant, e. g. in amaurosi, scabie ferina, lepra, elephantiasis, tumoribus glandulosis & vlceribus antiquis; de quare sub *cautelis* plura dicemus.

#### IV. INDICATA seu REMEDIA.

1. Saluationem ipsam excitant *mercurialia* & quidem

1) *externe*

Mercurius viuus in vnguentum redactus, vel per fumum admissus.

Cinnabaris in suffitu.

Emplastra mercurialia.

Cingulum mercuriale, seu sapientiæ secundum *Rulandum*.

Pediluua ex mercurio dulci, vel aliis mercurialibus parata.

Soleæ ex amalgamate mercurii confectæ & plantis pedum suppositæ. *Conf. cautel.*

2) *Interne.*

Mercurius viuus in forma pilularum propinatus.

Mercurius dulcis a gran. iiii ad xx. & plura sumtus.

Panacea mercurialis.

Arcanum corallinum.

Æthiops mineralis.

Turpethum minerale. *Conf. caut.*

2. Saluationem faciliorem reddunt essentia & decocta ex sequentibus præcipue parata.

Rad. Chinæ

Pimpinellæ albæ

Sarsaparillæ.

Herb. Saponariæ.

Lign. Fraxini

Guaiaci

Iuniperi

Sassafras.

Succinum.

V. MO.



## V. MODVS OPERANDI.

1. Salivationem esse actum ipsius principii vitalis, & remedia oblata agere tantum præparando materiam & excitando naturam, multa phænomena confirmant.
2. Ex his non leui momento pendendæ sunt insignes salivæ alterationes, quæ animi pathemata consequuntur. Adparet enim, vel solam nauseam, vel auidum contra appetitum salivæ ad fauces adfluxum & effluxum satis copiosum efficere posse. Et quid notius, quam in iracundis & furiosis largiorem spumam ante os obseruari?
3. Vnde *tenuitas* salivæ & ductuum salivarium *conditio* non sufficit, vt ptyalismi actum pure mechanice interpretari & pro passiva fluxione habere possimus. Quem ad modum enim alias in statu paululum præternaturali natura impuritates, præcipue salinas, cum saliva miscet & exspuit, licet nulla remedia adsumta fuerint; vel in aliis adfectibus e.g. variolis, vermibus, dentitione infantum, per copiosum salivæ adpulsum prospicere sibi intendit; ita in arduo salivationis mercurialis negotio directionem principii vitalis tanto magis agnoscere cogimur.
4. Ergo mercurius hoc tantum efficit, vt inquinamenta venerea, vel quæcumque alia, per virtutem suam colliquantem ac dissolventem a commercio lymphæ sincerioris abstergat & partes glandulosas penetrando aperiat.
5. Directio autem noxiorum horum humorum ad partes salivales, & excretio non tantum miasmatis venerei, sed & ipsius mercurii per salivam a principio quodam agente & sapiente non potest non deriuari. Quumque hoc euacuationis genus res vtique ardua & œconomiae animali satis onerosa sit, non mirandum est, grauia symptomata salivationem comitari, videlicet totius corporis debilitationem, inquietudinem, tremores, respirationem difficilem, dolores circa articulos lancinantes &c.



6. Cum Physicis, autem & Chemicis libenter fatemur, phyzicas mercurii qualitates plurimam partem esse occultas & admiratione dignissimas. Vnde nec operæ pretium ducimus perquirere, num hydrargyrum particulis globulosis & ponderosis (quas a mobilitate ipsius & gravitate colligunt) an vero quibuscumque aliis effectum suum fundentem & aperientem exferat.
7. Multo minus immiscebimur quæstioni illi, cur mercurius in coagulum tantum lymphaticum & non æque in sanguineum stricte dictum efficaciam suam edat. Simples enim effectus, quos experientia a posteriori suppeditat, scopo nostro therapeutico sufficere possunt.
8. Caterum ingens ille resolutorius effectus, qui valde exiguum adsumti mercurii portionem sequitur, vti merito multorum oculos in se conuertit; ita pure phyzice eundem interpretari per notabilia quædam specimina practica non possumus. Dum enim plura subiecta in nosocomio quodam salivationi, sed diuerso tempore exponuntur, tum illa, in quibus ptyalismus prorsus fere cessauit, de nouo copiose saliuam reiciunt, quando aliis mercurius inungitur. Et de femina quadam, cuius maritus heroico hoc remedio vti cogeatur, notum est, illam per solum horrorem, quem conceperat, copiosorem ptyalismum, quam ipse maritus, expertam fuisse.

## VI. MODVS ADPLICANDI.

Hic inuoluit

1. *corporis debitam præparationem*; quam, licet a quibusdam auctoribus superflua censeatur, nullo modo prætermittendam iudicamus. Conuenit itaque
  - 1) sordes primarum viarum per blandum aliquod purgans eliminare.
  - 2) Deinde plethoram valde vrgentem per venæ sectionem, vel in adfuetis, per scarificationem liminuere.
  - 3) Denique impuritates humorum *communes* remouere & poros reddere patulos; id quod decocta lignorum,
 

fatis



fatis nota, præstant, si per quatuor, vel plures dies ad-  
fumantur, & sub initium quidem sine regimine, tan-  
dem autem cum placida diaphoresi eos promotione.

2. *Ipsius salivationis productionem & administrationem.*

1) Salivatio optime instituitur per vnguentum mercuriale,  
quod commodissime paratur ex mercurio depurato  
& axungia porcina. *Conf. cautela.*

2) Huius vnguenti portio (quæ in ipsis adeo robustis mer-  
curii duas drachmas non facile debet superare) bis  
per diem in loco calido adplicatur partibus pedum &  
manuum ex sanguibus, ita quidem, vt primo die, e. g.  
tarso, altero hi & carpi, tertio tarso, carpi & flexuræ  
genuum, & sic reliquæ iuncturæ inungantur, donec  
glandularum oris, gingivæ, ac linguæ intumescencia  
& dentium vacillatio, tamquam imminentis saliva-  
tionis prodromi, adpareant.

3) Postea vinctio minore vnguenti quantitate, per vnum  
alterumve diem semel quotidie in tarso, vel carpo  
continuetur, donec salivatio expedite & sufficienter  
profluat, ac tum prorsus omittatur. Subiectorum  
ratio hic habenda est: quem ad modum enim in non  
nullis, præcipue succulentis, primam, vel secundam  
frictionem libere sequitur salivatio, ita in quibusdam  
contumacibus multo tardius succedit. Quum au-  
tem in his saliva post sextam inunctionem non pro-  
fluit, tum, nisi quidem in robustis emeticum quod-  
dam mercuriale locum habeat, præstat a frictionibus  
abstinere, quam ægrum periculosis symptomatibus  
exponere. Inunctionem per spinam dorsi, vt peri-  
culosam, evitandam arbitramur.

4) Cum libere fluit salivatio, tum hic fluxus per duas, tres,  
vel pro rei necessitate, quatuor hebdomades modera-  
te conservandus est, donec saliva mucida, spissa &  
foetida observatur. Obtinetur autem iustum hoc  
moderamen,

a) liberam transpirationem decocto lignorum, vel es-  
sentia



sentia alexipharmaca temperata, præcipue essentia pimpinellæ albæ, promouendo.

b) Defectum salivationis, vel per repetitam frictionem, vel per dosin mercurii dulcis refarciendo. Quando enim salivatio non est sufficiens, tum repetitio illius maius periculum inuoluit. Desistendum autem, præcipue ab usu interno, si tormina, spasmi, diarrhææ, vomitus & stupores superueniant.

c) Excessum autem per purgans, stimulo quodam præditum, infringendo; quæ cathartica reuulsio, tum etiam locum habet, cum salivatio ultra debitum terminum extenditur.

5) *Interne* si salivationem excitare placet, tum facta corporis præparatione mercurius dulcis omnium optime conducit. Huius primum pauca grana propinantur, quæ deinde adscendendo ad scrupulum semis, adaugentur, vsque dum pari modo, ac in vnctione, prodromi adpareant & ptyalifinus libere succedat. Propinatur autem mercurius dulcis commode versus so-  
mnum, & inane diaphoretica lignosa subiunguntur. Cæterum neque consultum, neque necessarium est, dosin huius remedii, vt communiter fieri solet, ad drachmam semis augere.

3. *Conuenientem dietam*, toto salivationis tempore sollicitè obseruandam.

1) *Aër frigidus* quouis modo arceatur, quia liberum salivæ fluxum impedit & graua symptomata excitat, blandus contra calor vniuerso negotio multam commoditatem suppeditat. Vnde in Italia & aliis regionibus calidis salivationem longe felicius, quam apud nos, institui, non est mirandum. Conuenit itaque, vt ægrotans post quamlibet inunctionem in lectum tepidum se recipiat, & hoc modo multis symptomatibus viam præcludat.

2) *Cibus*, ob inafficationis præcipue vitium, ad modum tenuis sit & parcus, ita vt iuscula tantum ex auena, hordeo,



hordeo, carne &c. parata, item oua forbilia, pulmentatenuia &c. porrigantur; abstinendo a cibis solidis, in primis acidis & nimium salitis.

3) Ad *potum* quod attinet, non reiicimus quidem *decodum* illud lignorum, quod *secundarium* vocant, docuit autem experientia, cereuisiam bonam & nutrientem in quibusdam subiectis ei præferendam esse. Quid? quod & vinum generosius modice sumtum conducit. Tantum enim abest, vt globulos mercuriales in spicula pungentia conuertat, vt potius prostratas vires egregie refocillet.

4) *Aluus* vbique aperta conseruetur.

4. *Symptomatum dextram tractationem.*

1) Horum plurima cauentur, si regimen modo indicatum sollicitè obseruatur.

2) *Ori & faucibus* durante ptyalifino prospicitur per frequentem vsum gargarismatis, quod ex resoluentibus, discutientibus, emollientibus & temperantibus præparatur. *Conf. tabul. med. de angina sub method. & caut. 7.* *Adstringens* autem gargarisma, præmature adhibitum, saluationem impedit.

3) Solantur etiam *adrosas fauces* essentia balsamica ex succino & myrrha parata. His adduntur pauca guttae essentia ligni guaiaci, in malo contumaciori olea destillata, e.g. cinnamomi, caryophyllorum. Atque hæc omnia cum oleo ouorum, vel amygdalarum dulcium temperantur.

4) Saliuatio *modum excedens* melius per catharsin, quam diaphoresin in ordinem redigitur.

5) In *alui* autem *fluxum* cum degeneret ptyalifinus, tum clysteres demulcentes, ex lacte, vitellis ouorum & momento theriacæ parati, adplicentur.

6) Restitans post saluationem in corpore mercurius, vti varia minatur incommoda, ita repetitis laxationibus & diaphoresi, per essentiam pimpinellæ albæ instituta, optime eliminatur.



## VII. CAUTELAE ET OBSERVATIONES PRACTICAE.

1. Heroicum salivationis remedium (cuius inuentionem Arabibus, qui in vlceribus sanandis mercurio externe utebantur, debemus) quoniam & laboris & periculi plenum est, præcipue vbi ipsius ægri incontinentia accedit, ea propter, si vnumquam alibi, certe hic iudicium Medici discretium requiritur, vt non solum *contra-indicantia* ab *indicantibus* sollicitè distinguat, sed & prudenter examinet, num consultum sit, illos leuiores morbos, in quibus nil contra indicat, ptyalismo exponere, & non potius tutiorem lenem viam præferre. Valet hoc præcipue de leuiore luis venereæ gradu. *Conferantur, quæ tabula medica de lue venerea sub cauiela quarta & quinta, item tabula chirurgica de vlceribus venereis hac de re diximus.*
2. Illud corpus vt salivationi subiiciatur, quod virium vero defectu *debile & languidum* est, nemo sapiens auctor erit.
3. *Viscerum lesiones* non solum non tolerant salivationem, sed & per eandem in deteriorem statum coniiciuntur.
4. *Grauidas* ptyalismo exponere, rationi nullo modo consentaneum est. Licer enim experientia nos docuerit, hanc curationem, tecto grauiditatis statu susceptam, feliciter successisse, non tamen rarioribus hisce exemplis, sed rationibus in hæerere medica suadet prudentia.
5. *Ætas* vel nimis *tenera*, vel in *summam senectutem* prouecta, heroico huic remedio sine periculis subiici non potest. Quod si vero subiectum in eius modi ætate ita constitutum esset, vt adfectus ipsius hoc remedium directe postularet, tum vniuersum negotium placidissime suscipiendum & sub hoc moderamine tanto diutius continuandum commendamus.
6. Saluatio, quæ *per inunctionem* producitur, ordinarie tutior est, quam quæ per internum mercurii vsum obtinetur. Plerique enim verentur, ne mercurius internus sumtus pro humorum, quos offendit, conditione siue



in primis viis, siue in ipsis visceribus, corrosiuos & noxios edat effectus. Quod periculum ab usu eius externo haud metuendum est, quia in peripheria ab ipsa venerea falsedine corruptus paullo obtusior ad interiora fertur.

7. Cæterum cum pestifera huius modi consecraria frequentius vulgo accusentur, quam liquido e salinis humorum corruptelis existant, ac præter ea facile debita corporum præparatione auertantur; tum in illis malis, quæ placido tantum ptyalifino, eoque diutius continuando, extirpare intendimus, e.g. in vlcere chronicis cancrotheis, tumoribus glandulosis, præstat mercurium dulcem interne propinare, vti fusius infra dicetur.
8. Periculosius autem & sæpe grauissimorum malorum successu ptyalismus tentatur per *mercurium præcipitatum*, *turpethum minerale*, *fumum cinnabaris* &c. quibus omnibus, cum vel inunctio externa, vel mercurius dulcis interne cumulate satis faciant, facile carere possumus. Multo maiori iure *spurias* illas *sputationes* potius, quam saluationes, quas per remedia cuprea non nulli commendant, *tabula medica de lue venerea caut.* 25. reiecimus. Idem sentiendum est *de saturninis & antimonialibus*.
9. Dolorum sub saluatione remissio & vlcere venereorum exsiccatio euentum curationis optimum promittit. Quando autem tribus vel ad summum quatuor hebdomadibus malum per saluationem penitus non potest superari, tum, si robustus sit æger, hoc remedium secunda vice est repetendum.
10. De *abusu* saluationis hic repetenda & firmo animo tenenda commendamus, quæ *caut.* 22. & 23. *tabulæ chirurgicæ de vlcere venereis* diximus. Seges enim damnorum & calamitatum, quæ per sinistram huius methodi institutionem infliguntur, oculis nostris semper obuersari debet; etsi non dissimulemus, dextram & peritam *blandæ saluationis* administrationem quorundam morborum



borum contumaciæ, quæ aliorum remedium vim eludit, superandæ parem reperiri.

## II. MERCURIUS VIVVS.

- 1) Datur vel *currens* e subterraneis locis *virginus* dictus, qui rarior est, vel *vulgaris* e mineris cinnabarinis petrosi per calcem viam aut battituram ferri igne suppressionis destillatus.
- 2) Vt vero tutior & ad medicum usum aptior fiat, variis modis solet purificari; quo pertinent transpressio eius per corium atque ablutio per sal commune & acetum, donec hæc non amplius ullis sordibus infici videantur; item, qui modi præstantiores sunt, abstractio a calce viua, vel reuificatio mercurii ex cinnabari aut mercurio sublimato per sal tartari aut limaturam martis.
- 3) Cum autem *sicco fluore, admirabili pondere & insigni subtilitate* conspicuus sit; tum abstrusa & fugax eius indoles cunctos Chemicorum conatus huc vsque elusifit, vt plerique de intima eius cognitione desperent. Plausibilis tamen præ aliis opinio adparet *Beccheri*, statuentis, mercurium ex substantia quadam metallica & superabundante terra tertia fluida (vt vocat) summæ post aquam tenuitatis confluxisse. Vnde potestatem acquisiuit valentissime penetrantem, resoluentem & colliquantem, speciatim vero non tam in massam sanguinis promiscue, quam in humores lymphales spermaticos glandulosos & saliales agere primum, admirando magis quam cognoscendo effectu obseruatur.
- 4) Perspicimus inde, usum eius certis cautionum terminis sollicite definiendum esse, ne, si nimium aut intempestive, aut in morbis minus congruentibus adhibeatur, periculosa resolutione alios simul quam dictos (labe quadam adfectos humores, ipsasque partes solidas horribiliter inuadat.
- 5) Cæterum mercurius viuus nequaquam venenum est, nisi



nisi igne in subtilissimum vaporem, pulmonibus & nervis &c. inimicissimum, redigatur, vel largiore connubio certorum salium exacuatur. Proinde sine villo nocimenti metu, sed rarius tamen optato cum euentu, in pertinacissimis alui obstructionibus & malo iliaco ad hunc tamquam vltimam sacram ancoram confugiunt; vbi notandum est, pluribus potius quam paucis vnciis dari oportere, vt eo certius penetret, ocysusque, per intestinorum tractum perlabatur, coniuncto motu corporis.

6) Porro tritus cum saccharo pueris verminantibus feliciore successu offertur, quamquam decoctum eius cum simplici aqua ad lumbricos necandos adhuc vtitur sit. Dubie vero mercurius vius ad scrupulum vnum vel drachmam semis datus, ad partum laboriosum & difficilem laudatur.

7) Externe mercurius vius in calamo, vel auellanae nucis putamine cera occlusus & adpensus, multis celebrantibus, vt singulare amuletum gestantes a pestilenti contagio tutari, mulieribus lac amissum reparare, quin & fascinum amoliri perhibetur. Sed hæc perobscura sunt, atque, vti plerique hodie censent, superstitioni quam veritati propiora.

8) Postremo præter vsum in lue venerea, amalgamatus cum plumbo & in vnguentum redactus illinitur ad scabiem simplicem & ferinam, herpetem, lepram, vlcera foetida rebellia & serpentina curanda, denique emplastris resoluentibus admiscetur ad tumores præduros glandulosos & tophos Gallicos discutientes.

9) Infrequentioris & minime necessarii vsus ad ptyalismum, aut resolutionem in dictis malis efficiendam sunt soleæ ex amalgamate mercurii concinnatæ & pedum plantis suppositæ, quamuis, si pedes latere calido foueantur, mercurius ope caloris facile per poros in corpus penetrare & vim suam exercere dicatur. Neque cingulum mercuriale, quod ridicu-



lo sapientiæ titulo superbit, singularem vtilitatem promittit; sed potius, quia tormina acriora aliaque suspecta incommoda identidem machinatur, ad stolidam quam sapientia subsidia pertinet, propterea merito relegandum.

- 10) Quem ad modum autem infinitis tentaminibus subiectus est mercurius, ea spe, ut vi saluandi exutus & ad inuictam igni constantiam perductus, meliorem & diaphoreticam tantum, grauibus aliis morbis propulsandis parem, qualitatem indueret; sic plerumque antiquum obtinuit & ad fugitiuum genium rediit, omnes Chymicorum longos labores & operosa molimina in hoc fere ludificatus. Quapropter omnibus sic dictis *panaceis mercurialibus*, *mercuriis fixis* & *diaphoreticis* tantisper, quoad seuerius examen sustinuerint, diffidendum est. *vid. passim seqq.*

## 12. MERCVRIVS SVBLIMATVS.

- 1) Duplex habetur; est enim vel communis *albus corosivus* e mercurio viuo vitriolo & sale communi, addito interdum paullulo nitri, parari solitus; vel *ruber* priori longe mitior cum *arcano corallino Crollii* conueniens, quem e vitriolo calcinato mercurio viuo & nitro conficere docent. *Vid. Kunkel, laborat. experimmentale.*
- 2) Communis albus est terribile & penetrantissimum venenum, arsenico par, vel, ut non nulli credunt, adhuc potentius, cuius letiferam vim, si forte velintus, vel extus improvido usu datus sit, aliquantum mitigat lixiuium alcalinum ex templo adhibitum.
- 3) Qua propter nulli autores sumus, ut eorum ausus imitetur, qui ipsum ad tollendas faciei maculas, serpiginem, lichenem, morphæam, carnem laxam & putridam, scabiem, vlcera exedentia & anthracem, vel, ut *Rulandus* laudat, ad podagram leniendam applicare sustinent. Rarissime enim superficialiis consuetis corrigentibus ita domatur, ut innocentem se præbeat, & reuera nobis alia eius modi morbis æque vtilia



lia ne dicam præstantiora suppetunt. Equidem non inficiamur, mira interdum fortuna in his aliisque tentandis animari Chirurgorum audaciam; attamen, si recte calculum ponamus, frequentius noxa vel exitium inferitur, fera poenitentia luendum. Idem censendum est de solutione eius pediluvii salivationem illaturis destinata, nam & hic arrosione pedum aliorumque malorum impressione scævitiā suā testificatur.

- 4) Tutius ergo est, mercurii sublimati usum Chirurgicum prorsus abiicere, ac potius eum vlterioribus chymicis compositionibus, quæ tamen ante medicam adplicationem probe examinandæ sunt, destinare. Ex his notissimus est mercurius dulcis, (de quo paullo post) ambigua vero minusque probata sunt oleum Mercurii, Quinta essentia ex mercurio sublimato, spiritu salis & spiritu vini parata &c.
- 5) Neque mercurius sublimatus ruber violentia atque omni veneni labe carere existimandus est. Nam interne datus graues sæpe vomitus aliaque dira symptomata infligit, quin extus etiam cautissime debet adplicari.

### 13. MERCURIUS DULCIS.

- 1) Conficitur ex mercurio sublimato albo & æquali vel tanta portione mercurii viui, quanta sufficit ad sublimatum plene saturandum & insipidum reddendum; quod nisi iusta cura ac debito sublimationis labore perficiatur, damna eum dedisse exempla testantur.
- 2) Rite autem paratus elegans atque efficax præbet catharticum, seroso-lymphalem mucidam colluviem optime colliquans, vermibus infestum & mortiferum, adeoque in obstructionibus mesenterii, atrophia, lymphæ vitiis, cachexia, scabie simplici & venerea, flore albo, gonorrhœa, omnibusque morbis educationem talium impuritatū deposcentibus (ne infantilibus quidem, nisi plane tenera subiecta sint, exceptis) conueniens. Id modo prospiciendum.



dum est, ne solus detur, sed cum alio laxante sociatus, & ne vsus eius continenter per aliquot dies præscribatur, nam sic turbas dare & saluationem ciere valet, denique ne sicciore biliosi eo frequentius vrantur. Non opus autem est, ipsum, quod aliqui præcipiunt, pluribus admixtum in pilulari forma semper offerre; nam & commodus est eius puluis (modo tenuissime comminutus) cum diagrydii aut radicis ialappæ adminiculo; neque facile timendum, ne ab acido primarum regionum humore ad vim septicam denuo exacuatur, (id quod sæpe fieri, nec a priori, nec a posteriori demonstrari potest) quamquam haud nocuerit in puluere ipsi perpetuum comitem absorbentis cuiusdam adiungere.

3) Porro mercurius dulcis adhybetur ad ptyalismum mouendum; sed tum in maiore, vt solent, dosi crebrius eundem ingerere, nec necessarium, nec vtile putamus; pauca enim illius grana per aliquot dies continenter data sat validum edere effectum deprehenduntur.

4) Placet hic ad illustrationem dictorum & ad declarandum singularem huius mercurii vsus summam attingere eam methodum, qua permultis miseris penitus derelictis ac depositis certum & expectatione nostra maius auxilium afferre licuit. Miscentur duo & dimidium vel tria grana huius mercurii probe trita cum duplo absorbentis cuiusdam ostracodermatis; ac, præmissis sic dictis vniuersalibus, paruula hæc dosis quotidie per triginta dies sine intermissione (nisi quidem interea saluatio subsequatur) porrigitur, interiecto vsu essentiae pimpinellæ albæ. Sic pro naturæ inclinatione, vel morbi necessitate alibi lenem ptyalismum, alibi placidam, sed efficacem resolutionem & mundificationem, interdum laxantem, semel etiam obstructarum hæmorrhoidum fluxum reuocantem effectum vidimus; sæpius autem læti comperimus hoc modo rudimenta incipientis catarractæ



tractæ auferri, tumores glandularum præduros ac refractarios discuti, præcipue vero vlcera horribiliter foetida & exedentia non tantum venerea, sed etiam simplicia & ab omni talis contagii suspitione immunia (haud tamen vere cancroidea) pulcre detergi, mundari & succrescente noua carne, celerius opinione confanuisse. Ac si, quod subinde fit, intra dictum curationis tempus perfectæ sanitati ægri non reddantur; tum protinus ad eandem methodum redire tutissimum fuit, plurimisque salutare.

5) Externe hic mercurius, præsertim cum decocto calcis viuæ, laudatur vulgo ad scabiem ferinam, serpiginem, vlcera in primis venerea (vbi tamen segnior est) itemque cum aliis mixtus ad vsum cosmeticum. Sed, notantibus *Ettmüllero* aliisque, frequens mercurii adplicatio, vt primo cutim nitidiorē reddere videtur; sic deinde dentium cariem, capillorum defluuium, scabritiem, rugas & maiorem cutis foeditatem accelerat.

6) Cæterum alii, repetitis vltra secundam, vel tertiam sublimationibus, mercurii dulcis vim laxantem minui & infringi obseruant; alii eundem, si duos menses asseruatus sit, ante nouum vsum denuo sublimari debere putant, vt sic ab acrioribus salinis particulis ex aëre haustis & noxam ei affricantibus liberetur, quamquam in eo frustra sint; non nulli denique decem & amplius iteratis sublimationibus eum si non figi tamen diaphoreticam qualitatem induere scribunt. Sed hoc quoque adhuc incertum est; quippe *Panacea* sic dicta *mercurialis*, quam tali ratione e mercurio dulci parant, genium suum adeo nondum deposuisse videtur, vt qui ea frequenter & largiuscule vtuntur, citius ptyalismum, quam alium effectum lenem & salutarem deprehendant.

7) Sane *mercurius diaphoreticus* magnum sui desiderium excitauit, postquam multi Chymici grandia quædam de eo elocuti sunt; sed idem latet adhuc in ob-



scuro, & quocunque artificia ipsum conficiendi in lucem data, vel iactata sunt, ea vix tam vtile medicamentum quam mercurius dulcis est, repræsentant. Et *Musiani* quidem mercurius ex mercurio præcipitato, butyro antimonii &c. paratus, magis propter reguli antimonii calcem bezoardico minerali similem, quam ob mercurium diaphoreticum videtur. Quem vero *Barckhusen* ex amalgamate iouis & aqua forti componere docet, eum nemo facile in morbis chronicis, scorbuticis, elephantiacis &c. sudoriferum optimum ac magnis laudibus dignum putabit, nedum animaduertet. Plura, vt sulphur mercurii ex mercurio sublimato per acetum extractum, aliaque de prædicata vulgo arcana reticemus.

#### 14. CINNABARIS.

- 1) Hanc vel natura nobis offert variis in locis, vbi optima censetur Hungarica; vel arse ex mercurio & sulphure siue simplici, siue antimoniali perfecte imitatur.
- 2) Quemadmodum igitur concordibus suffragiis omnes fere Chymici recte statuunt, eadem principia mercurium nempe & sulphur vulgare cuicumque cinnabari inesse; sic nihilo minus ingentem differentiam inter cinnabarin factitiam vulgarem pictorum & alteram in medicum usum receptam intercedere plurimi arbitrantur. Sed si rationes chymico-physicas huius rei exquiramus, vel nullæ adparent, vel mancæ ac ficulneæ; nam neque in mercurio, qui factitiæ additur, singularis malignitas iure argui potest, neque in sulphure vulgato plus arsenicalis veneni inesse credendum est, quam in eo, quod vel nativæ accrescit, vel ex antimonio ad cinnabarim componendam elicitur.
- 3) Dum modo ergo mercurius vulgari modo purificatus, & sulphur commune iterata sublimatione decenter coniungantur; puleram cinnabarim acquirimus minus quidem pretiosam, sed tamen reliquarum, quæ in officinis prostant, principiis & virtutibus simillimam.



mam. Vnde non est, quod ab eius usu vanus quorundam metus nos deterreat, quippe eosdem bonos effectus, quos a nativa vel antimoniali exspectamus, ab huiusmodi factitia edi iam millies & abunde compertum est.

4) Quam ob rem cara illa nativa cinnabari plane non indigere videmur, utpote quæ ob solum nomen, aut forte adhærens aurum embryonale (nulli tamen adhuc satis clare ostensum aut probatum) præstantior haberi nequit. Quin ea sæpe inquinata & suspecta est, ut lotione, vel sublimatione ab heterogeneis & nociuis fordibus repurgari debeat.

5) Neque in cinnabari antimonii quidquam euidenter agnosci potest, quod prædictis ipsi prærogatiuam tribuendam esse persuadeat. Etenim hanc præcellentiam, ut quidam volunt, vel a sulphure solari (quod precario sic vocitant; nam etsi rite paratum bonum præbeat remedium; tamen arsenicalis magis quam aureæ naturæ est) vel a salibus corrosivis mercurii sublimati heic antimonii sulphur exaltantibus, vel a regulinis particulis accedentibus (quæ certe nullæ aut paucissimæ sunt) proficisci, facilius dicitur, quam ita explicatur, ut assensum promereat. *Confer. Rockii diss. de superstitiosa chymiaatria.*

6) Idem ab experientia docemur, quæ palmam cinnabari antimonii deberi in asthmate, convulsionibus, aut aliis morbis superandis, neutiquam confirmat.

7) Adscribuntur alias cinnabari vires resoluentes, nervinæ, sedantes & anodynæ, idque haud iniuria; si notemus tamen, has intra angustiores terminos, quam vulgo extenduntur, subsistere. Nam in epilepsia, cuius magnes a *Cratone* nativa cinnabaris salutatur, sæpius hodie nos deserit, nisi efficaciorum subsidio fulciatur; neque in vertigine, malo hysterico, arthritide aut asthmate dignum pollicitationibus lenimentum affert.



8) Cæterum vice cotis fungitur, quæ aliorum medicamentorum vires acuere potest & intendere; ideoque talibus optime ad sociatur ad motus congestorios & spasticos mitigandos, indeque ortos dolores (vbi opio tutius est) cephalalgiam, coryzam acriorem, asthma spasticum, torminosa infantum mala & imminentes conuulsiones.

9) A maiore dosi æstus augmentum quidam metuunt, unde quidem in feruidis humorum commotionibus & febribus parce adhibenda est; sed notauius, in cephalalgia & imprimis hemicrania pulueres antispasmodicos largius cinnabari ad octo decem vel plura grana imbutos, longe plus effecisse, quam illos, quorum dosis pauciora tantum grana continebat. *Confer. tab. med.*

10) Sicut autem non nulli tradunt, cinnabarim in intestinis remanere & nunquam cum chylo in humores transgredi, sed prout ingesta est, rubicundo colore cum fecibus excerni; ita, vt hoc magna ex parte præcaueatur, valde necessarium est eam in subtilissimum, quantum fieri potest, puluerem redigere. Sic enim nullam stomachi grauationem & meliorem vtique effectum spondere possumus.

11) Atque hæc de probato vsu cinnabaris. An vero vel natiua, vel antimonialis in corde roborando & febribus malignis illustres dotes obtineat, vt aliqui putant; magis dubitatur. Neque in lue venerea aut scabie parem aliis bonis mercurialibus virtutem ostendit; multo minus cinnabaris natiua selectior extus ad penfa, gestantes ab epilepsia, vel pestilentia & febribus malignis defendere potest.

12) Denique non comperimus etiam eas vires, quas multi variis e cinnabari vltius confectis pharmacis adsignant. Neque a priori magna quædam adparet verisimilitudo. Nam panacæa Anhaldina quidem, in qua cinnabaris spiritu vitrioli & vini crebrius imbuitur



tur & exsiccat, ab his vltimis tantum nomen sibi arrogare nequit; neque Mætsii panacæa, quæ fit per lotionem cinnabaris, exsiccationem & desuper accensionem spiritus vini tantam præstantiam tuetur; neque frequentes sublimationes cinnabaris, quæ fiunt in parando mercurio diaphoretico *Tilingii*; neque longinqua digestio & circulatio, quam suadet *Clauderus*, spem adhuc dum impleuerunt. Tincturæ itidem volatiles & balsama cinnabarina, quæ per spiritum vini & olea destillata parantur, superflua sunt minimeque vtiliora vulgaribus sulphureis, vel antimonialibus tincturis, aut balsamis, quibuscum concordant. *Confer. Ludouici & Ettmüllerus.*

#### 14. AETHIOPS MINERALIS.

- 1) A colore nomen accepit & fit ex mercurio viuo & sulphure ei incorporato, atque ex parte deflagrato, aut diutius contrito.
- 2) Non multum igitur differt a cinnabari, nisi quod principia eius (ob defectum sublimationis) non ita arcte connexa sint, ideoque singula facultatem suam paullo liberius exercere queant. Maior tamen sulphuris copia etiam huic inest, in primis si diuturniore flamma non abigatur.
- 3) Laudatur maxime ad lumbricos, vbi tamen (nisi probe trita) largior eius dosis onerosa est; porro ad scabiem inueteratam, itemque scirrhus glandulosos & parotides interno longiore vsu discutiendos; id quod circumspiciæ experientiæ commendamus.
- 4) Cæterum mirum est, plerosque Chymiatros hunc æthiopem non æque noxium aut venenatum ac cinnabarin vulgarem pictorum pronunciaffe; cum eadem vtriusque principia sint, aliqua tantum, vt modo innuimus, intercedente mixtionis differentia; a qua singulare virus hic existere posse nemo credet.

#### 15. MERCURIUS PRÆCIPITATUS.

- 1) Plurifariam confici solet, & primo quidem *per se* in puluerem rubicundum conuerti dicitur, si in pecu-



- liari vitro positus calore suppressorio, igne supra vitrum struendo, diu tractetur, vt monet *Ettmüllerus*; quanquam alii id fieri posse negent, plurimi vero laborem eiusmodi periculosum, nec, si succedat, ad magnos effectus obtinendos idoneum esse fateantur.
- 2) Certius itaque per menstrua fit; vbi si mercurium viuum aqua forti soluamus atque hanc recentem sæpius inde cohobemus, acquiritur mercurius *præcipitatus ruber* & vulgaris officinarum specioso, arcani corallini titulo a quibusdam insignitus. Hic autem adhuc sat acri vi septica pollet; quapropter, licet edulcoratione per spiritum vini desuper sæpe deflagrantem paullulum mitescat, intro suntus feralia subinde mala infligit, nunquam ideo, quicquid etiam non nulli suadeant, porrigendus. Externe tutus & parciore dosi egregius est in vlceribus fordidis ac fungosis excrecentiis, venereis absumendis & coniunctis spasms mitigandis. In faucium vero vlceribus cautissime illini, imo vbique sub iustis cautionibus & congruente formula, de quibus in *tab. chirurg.* exposuimus, adplicari debet. Cæterum ab eo cauendum est in cancro, adrosione narium & carie ossium, quæ ab hoc præcipitato perinde atque ab aliis mercurialibus exasperantur.
- 3) Lenior est *præcipitatus* albus, seu cosmeticus, quem ex solutione mercurii in aqua forti per muriam salinam ad fundum deiicere docent. Conuenit enim edulcoratus aliquantum cum mercurio dulci & sublimatione in eandem pene formam, redigitur. Destinatur autem vnguentis admixtus potissimum faciei maculis, lichenibus, pruritu &c. eo effectû, quem supra de tali vsu consignauimus.
- 4) Huic consonat, qui ex eadem solutione mercurii per vrinam præcipitatur coloris *incarnati*; dissimilior vero est *præcipitatus luteus Zwelfferi*, qui ex mercurio sublimato albo in aqua soluto per adfusionem li-



xiuii alcalini decidit, a non nullis ad iëterum curandum &c. laudatus.

5) Porro elaboratur *præcipitatus viridis* ex mercurio & venere in aqua forti solutis, confusis & abstractis, quem mitem prædicant & vtilissimum in gonorrhœa virulenta. Sed præsto sunt certiora, ita vt hoc minime egeamus.

6) Denique *Turpethum minerale*, quod ex mercurio viuo & oleo vitrioli itemque aliis viis paratur, ob vim purgantem & saluantem commendatum prostat ad luem Gallicam, gonorrhœam, hydropem &c. At vero hic quoque satius est cauere sibi, quam temerario ausu quicquam periclitari.

7) Superfunt *præcipitati solares*, oleum fragrans seu *astrum mercurii*, plurimæque alia pro eximiis diaphoreticis venditata, quæ tamen, cum adhuc minus perquisita sint, consultius prætermitti posse videntur.

#### 16. SAPONARIA.

1) Nomen huic herbæ inditum est a detergendi facultate, (qua saponis ritu in aqua spumescit & pannos eluit, vnde & herba fullonum audit) licet etiam potentem vim fudoriferam habere iudicetur.

2) Rarius autem eam interne præscribunt medici, & perpauci solum commendant, præcipue radicem in pilita lenta & vlceribus pulmonum, fluxu mensium imminuto, variolis. At in vltimis his potius excludenda erit.

3) Certiore effectu confert ad venereos morbos, vsumque mercurii in his aliisque malis adhibitum quodam modo suffulcit, si cum rad. pimpinell. alb. in decocto porrigatur.

4) Extus cum farina hordeacea in vino decocta præduros tumores discutere dicitur; frequentius vero in balneo vsurpatur ad mundandam cutem in scabie, iëtero, scorbuto. Cæterum semen saponariæ epilepticis forte mederi, quia herba in aqua cocta bullas agit

epi-



epilepticorum spumam ante os æmulantes, ad nã-  
nias apinis viliores pertinet.



## TABVLA IX.

DE

## EXPECTORATIONE.

## I. DEFINITIO.

Expectoratio est euacuatorius naturæ actus, quo illa, siue sola, siue congruis auxiliis suffulta & excitata, materiam quamdam mucidam, circa tracheam & vesiculosam pulmonum substantiam hærentem, ope tussis per os eliminat. Vnde remedia, hunc actum promouentia, dicuntur *bechica* a βήχω vel βήσσω, tussio.

## II. DIFFERENTIA.

## I. Expectoratio est

1) vel *naturalis*, quæ quo magis placida est, eo magis solo screatu sine notabili tussi, absoluitur, & in nonnullis per totam vitam sine periculo durare potest & solet. Quæ vero cum tussi fit, illa *ordinariis* actibus vitalibus minus respondet.

2) Vel *artificialis*, quæ specialibus remediis excitatur & angustissimis limitibus ac cautelis circumscripta est.

## 2. Materia illa mucida, quæ in pulmonibus hæret, est

1) vel *spissa, tenax, viscida* eaque plerumque *copiosa*.

2) Vel *tenuis, acris, paucior*.

3. Conuenit quidem hæc euacuatio cum *saluatione particulari & vniuersali* ratione termini, vt dicunt, *per quem*, dum excretio vbique per os contingit; at ratione termini *a quo* multum ab iisdem differt. Quem ad modum enim saluatio particularis interiorum oris regionem præcise respicit, vniuersalis autem per totum corpus



pus vires suas exferit; ita expectoratio ad pulmonum tantum viscus dirigi solet.

### III. INDICANTIA.

1. Generatim expectorationem indicat vera præsentia eiusmodi materiæ, quam *sub differentia* descripsimus, nempe quæ, vel visciditate, vel acredine sua pulmones infectat.
2. Talis autem materia speciatim offenditur
  - 1) in asthma humido & tussi acri catarrhali.
  - 2) In broncho & aliis catarrhalibus pulmonum infarctibus, a congestionibus simpliciter sanguineis sollicitudine distinguendis. Huc etiam spectant mucidæ pectoris oppletiones, infantibus familiares.
  - 3) In scirrhusa & ulcerosa pulmonum constitutione, nisi quidem abstersio & expectoratio naturalis sufficiat.
  - 4) Quam circumspecte in prægressa hæmoptysi, vomica pulmonum & catarrho suffocatiuo expectoratio institui debeat, infra dicetur.

### IV. INDICATA seu REMEDIA.

1. *Incrassando* præparant & partim *specificè* expectorant

Rad. Althææ	Fruct. Amygdalarum dulcium
Liquiritiæ	Ficuum
Maluæ	Iuiubarum
Flor. Violarum	Passularum maiorum & minorum
Papaveris erratici	Pini
Sem. Althææ	Pistaciæ
Auenæ	Sebesten, seu mixæ
Fœnu græci	Siliquarum dulcium
Frigida quatuor maiora	Gumm. Arabicum
Hordei	Cerasi
Hyosciami	Tragacanthæ.
Papaveris	Lac
Lini	Mel
Maluæ	LI
	Sper-



Sperma ceti  
Nitrosa  
Absorbentia  
Emulsiones  
Gelatinæ.

Olea, emollientia interne &  
externe  
Pinguedines, interne & ex-  
terne.

2. Resoluendo & discutiendo præparant

Rad. Angelicæ

Aprii

Ari

Bardanæ

Fœniculi

Helenii

Imperatoricæ

Iridis Florentinæ

Leuistici

Petasitidis

Petroselinii

Pimpinellæ albæ

Sarsaparillæ

Squillæ

Trifolii fibrini

Vincetoxici

Vrticæ

Herb. Bellidis

Cherefolii

Capilli veneris

Erysimi

Fœniculi

Hederæ terrestris

Hyssopti

Marrubii albi

Pilosellæ

Pulmonariæ maculo-  
sæ

Rorellæ

Scordii

Tussilaginis

Flor. Croci

Sambuci

Scabiosæ

Spicæ

Stæchadis Arabicæ

Bacc. Juniperi

Lauri

Sem. Anisi

Cardui benedicti

- Mariæ

Fœniculi

Cort. Cascarillæ

Lign. Juniperi

Sanctum

Sassafras

Gumm. Ammoniacum

Bdellii

Benzoës

Myrrhæ

Sagapeni

Succini

Flores Sulphuris.

3. Tussim excitantia sunt spiritus acidi e. g. sulphuris, salis  
communis, vitrioli.



## V. MODVS OPERANDI.

1. Cum in omni omnino ætate spontanea expectoratio obseruetur, & contra in multis, neque tussis, neque materiæ euacuatio sequatur, licet pulmones, vel mucidis, vel acris humoribus obsessi sint, optimo hinc iure concludimus, expectorationis actum non adscribendum esse nudæ materiæ, quæ modo vellicando, modo ratione molis suæ distendendo talem excretionem præstet, sed potius rationali cuidam principio interno, eiusdemque consultæ promotioni.

2. Sociam autem & exhortantem porrigunt manum remedia prædicta.

1) *Interne* enim oblata

a) alia pro particularum suarum, vel tenuitate, vel lubricitate crassiorem mucum ibi incidendo hic emolliendo ac lubricando resoluunt & ad euacuationem aptum reddunt.

b) Alia principiis suis, vel mucilaginosi, vel qualibuscumque aliis ad edulcorandum aptis, serum tenue & acre iam incrassant, inuoluunt, & ad debitam consistentiam redigunt, iam obtundunt & demulcent.

c) Alia acredine & austeritate sua tussim excitant, qua natura tam medicamentum aduersum, quam materiam noxiam præparatam eliminare intendit.

d) Alia qualitate sua tonica & discutiente adfluxum copiosorem impediunt.

e) Alia specifico quodam effectû expectorationem promouent, & materiam directe ad pectus, præcipue si hoc iam labe quadam adfectum sit, quasi conuehant, e. g. iuiubæ, sebesten, violæ, ficus &c.

2) *Externe* vero adplicata pinguibus suis & oleosis particulis poros cutis obstruunt, atque hac ratione naturæ anîam præbent, vt serum, quod alias per diapnoën excernitur, ad ipsos pulmones reducat, per illud mucum tenaciorem in illis hærentem diluat, eoque ipso ipsius excretionem promoueat.



VI. *MODVS PROPINANDI.*

1. Ante omnia blandum quoddam catharticum exhibeatur, atque hoc sub ipsa curatione, si visum fuerit, repetatur. Hac enim ratione non tantum primæ viæ a fordibus suis expurgantur, sed & reuulsio humorum a pectore ad inferiores partes obtinetur.
2. Deinde tam plethoræ, quam congestioni sanguinis versus superiora & thoracem prospiciatur per venæ sectionem in pede, vel in adfuetis per scarificationem in partibus inferioribus institutam.
3. Postea ad ipsum expectorationis actum debita cum circumspectione pergere & remedia, quorum diuersitatem superius indicauimus, pro subiecti & materiæ conditione exhibere licebit.
4. His ad humorum vberiore adfluxum auertendum discutientia interponantur, & ad blandam diaphoresin obtinendam potus calidus e. g. thée, coffée, coniungatur.
5. Præparata hac ratione materia eliminatur illa per tussim, quæ, vel sponte natura, vel si deficiat, parca dosi acidi cuiusdam remedii excitatur.
6. Denique si, vel expectoratio, vel tussiculosa commotio iustum modum excederet, sedanda est vtraque per temperantia & probata anodyna; in quem finem præcipue commendamus corticem cascarillæ cum MP. de cynoglossa.

VII. *CAVTELAE ET OBSERVATIONES PRACTICAE.*

1. Expectorantia cum non tantum mucum in pulmonibus præsentem euacuent, sed etiam, si diutius continuentur (trachææ & pulmonum substantiam relaxando) perpetuo eius modi materiæ adfluxui viam sternant atque hac ratione naturam huic euacuationis generi adfuefaciant, non possumus non abusu, qui hac in re familiarissime committitur, periculi notam inurere. Cum enim diuturnior horum remediorum vsus efficiat, vt non tantum *e pectore*, sed etiam *per pectus* noxiæ materiæ expurgentur, hæc via vtique periculosa vide-



ri debet prudentibus, qui partium harum teneritudinem & exquisitum sensum, irritabilem facile & grauioris noxæ inferendæ compotem, expendunt, præsertim cum ordinarie naturam, nisi vehementer inuitatam, non huc, sed aliorum materiam mucidam sibi onerosam amandare & e corpore proscribere cernamus.

2. Vnde non conuenit expectorantia stricte dicta e. g. iuiubas, sebesten &c. ultra duos, vel tres dies continuare, sed tum ad discutientia & tonica pectoralia transitum facere.

3. Quoniam autem in ipsis adeo *indicantibus* facile hic errorem committimus, hinc *contra indicantia*, quæ sequuntur, tanto exactius notanda & euitanda sunt.

1) Grauius impingunt illi, qui expectorationis actum in illis instituere adlaborant, qui nulla muciditate in pulmonibus obfessi, sed congestionibus *simpliciter sanguineis* occupati sunt. Hoc enim modo congestiones augentur & variæ noxiæ materiæ, violenta quasi manu versus pectus ducuntur.

2) Speciatim ingens error committitur, quando in tussi sicca & asthmatica, præcipue foeminis ataxia mensium laborantibus, expectorantia, eaque insuper sine præmissa venæ sectione, propinantur. Hoc enim modo saburram pro stasi inflammatoria atque vlcerascente ad pulmones, pessimo plerumque euentu, coaceruamus. *Legatur notabilis hac de re casus in Stahl's theoria pag. 1007. seq.*

3) Huc etiam pertinent cardialgicæ illæ pectoris angustiae, quæ hypochondriacis & hystericis familiares sunt.

4) In *peripneumonia* expectorantia inutilia sunt, nisi quidem sputum cruentum die tertio vel quarto impeditè succedens pectoralis cuiusdam potionis modicum usum indicaret. Quando autem in *pleuritide* expectorantia & quidem largiter adhibemus, tum facile peripneumoniam simul inuitamus.



5) In ipsi *hæmoptysi* nemo facile tam rudis erit, ut expectorantia commendet. At in spasticis illis & tussiculosis motibus, qui hæmoptysin, vel præcedunt, vel excipiunt, sæpe sæpius magno ægrotantium damno in hoc euacuationis genere solamen quæritur. Hinc adfectus pectoris sanguineos a simpliciter mucidis & catarrhalibus sollicite distinguere debemus, ne in eandem periculofam viam deducamur. Et licet in prægressu hæmoptysi resistentes sanguinis grumi euacuandi sint, non tamen *sola* expectorantia, sed cum resoluentibus & discutientibus iuncta, sunt adhibenda.

6) Qui *tussim stomachalem humidam* cum *pectorali humida* confundunt, atque in hoc errore expectorantia propinant, non quidem præsentia damna, turbas autem in primis viis producant. Hac enim ratione alui contumax obstipatio sequitur, & mucus, qui per tractum intestinorum euacuandus esset, non in enoxa ad thoracem dirigitur.

7) Idem obseruare conuenit, quando *vermicæ ruptæ* apostema mundificare per expectorantia intendimus.

4. Si dicendum, quod res est, expectoratione artificiali rarissime indigemus, & licet non nulli adfectus pectorales, quos superius nominauimus, eandem subinde indicent & tolerant, commodius tamen & tutius per laxantia, diuretica & diaphoretica succurrimus, atque soli naturæ expectorationis actum relinquimus.

5. *Vnguentis & oleis*, externe adhibitis, expectoratio quidem promouetur; ast quia pectoris regio hac ratione nimis laxa redditur & maior humorum congestio ad eandem inuitatur, rarissime omnium ad hæc subsidia confugiendum esse censemus.

6. Rarior hic expectorantium vsus disuasit, ut per plura illa composita, quæ in officinis venalia prostant, e. g. *pectorales pulueres, species, sirupos, conseruas, trochiscos* &c. indicaremus, cum primis quia plurima ita comparata sunt,



sunt, ut usus eorum plus detrimenti, quam utilitatis adferat. De simplicibus autem sequentes notas ideo subnectere debuimus, ut materia medica completior redderetur.

## 7. RADIX ALTHÆÆ.

- 1) In hac refidet copiosa & paucis tantum nitrosis ac rarioribus sulphureis particulis interfusa mucilago, quæ protinus extrahitur & in conspectum se dat, si aquæ calidæ imponatur. Unde fere primaria est inter ea, quæ emolliunt, lubricant, demulcent, incrassant & iuuandæ suppurationi ancillantur.
- 2) Multiplici itaque usu se commendat in lenienda intestinorum acrimonia biliosa (& ut multi volunt) dysenterica, stranguria, ardore urinæ & doloribus spasticis impacto viis calculo accedentibus, itemque mucotussientium tenaciore, quem volubilem & egestionem aptum reddit.
- 3) Dubiæ autem virtutis est in pleuritide, hæmorrhoidum doloribus & asthmate; neque calculi concretionem antevertere aut eum expellere, nisi generali quadam relaxandi & leniendi efficacia, potest, neque extus spasmos, podagram, dentium dolores adeo mitigat.
- 4) Utilior existit ad emolliendos tumores & inflammationes maturandas, itemque, ut quidam tradunt, ad fissuras cutis & papillarum, dentium dealbationem &c.
- 5) Ad usum prostant *syrupus de althæa Fernelii* & *unguentum althææ*. Possunt etiam exinde mucilago, cataplasmata, de cocta, clysteres &c. adhiberi.

## 8. RADIX LIQVIRITIÆ.

- 1) Hæc pariter largam habet mucilaginem, intercedente parciore salinarum temperate acidiuscularum molecularum portione, atque adeo læto & vbere proveniunt crescit circa Bambergam, ut peregrina non indigeamus.
- 2) Quem ad modum ergo emolliendi, acrimoniam quodam modo leniendi, vias lubricandi & abstergendi, denique etiam incrassandi virtutibus potita est; sic  
fin-



singulariter ad mobilitatem tenaci muco, præcipue in thorace hærenti, conciliandam, adeoque ad expectorandum, si opus sit, conducit.

3) Proinde adhibetur in asperitate faucium, tussi humida viscida, rheumate acriore, biliosis morbis, soda, renum vitiis (nam diuresin quoque aliquantulum adiuuat) ardore urinæ, exulceratione, ischuria, calculo, tandem etiam decoctis antiuenericis cum fructu additur.

4) Neutiquam autem ad eam dignitatem euehenda est, ut tamquam panacea calculi vel tussis siccæ, hæmoptyses, tabis, pleuritidis, asthmatis &c. medela suscipiatur. Nam tantum abest, ut hic satisfaciat, ut potius eiusmodi pectoris malis magna circumspeditione, non secus ac alia expectorantia consecrari debeat.

5) Sunt porro, qui illam inter traumatica numerant, & alii, qui ipsam ad faciliorem dentitionem infantibus præbendam esse præcipiunt.

6) Extus commendatur ad inflammationes, erysipelas, anginam, dolores podagricos, aliis nempe discutientibus admixta; item ad scirrhos emolliendos.

7) Vñus eius est in decocto, succo inspissato, syrupo, essentia, quæ per alcalinum sal paratur. Cæterum *Ioannes Raius* confirmat, ex hac radice cum pauxillo cinnamomi potum fieri, cereuisiæ virtutibus haud inferiorem.

#### 9. RADIX MALVÆ.

1) A radice althææ parum discrepat, eundem propterea locum inter sic dictas emollientes adeptæ, & ad eosdem morbos, sed præcipue tamen herba, destinari consueta.

2) Videas etiam hanc radicem ad hæmorrhagiam narium, item ad roborandum & conseruandum foetum, itemque ad ophthalmiam, ut amuletum commendari; sed desunt probati effectus.

3) Fre-



3) Frequentioris vsus herba est, qua veteres ad molliendam aluum saepe utebantur; licet de cætero non impleat laudes, quas ei in difficultate partus, mensium & secundinarum retentione, phthisi, apium vesparumque ictibus curandis, adsignatas legimus.

4) Habetur quoque *malua hortensis* (quam & *roseam*, *fratricosam*, seu *arboream* dicimus) cuius flores rubicundi & varii coloris ex subadstringente qualitate ad vulnera & faucium morbos; porro, sed magis dubie, ad mensium obstructionem, phthisin &c. valere laudantur.

5) Semen maluæ pariter atque althææ parem herbæ facultatem obtinet.

#### 10. FLORES PAPAVERIS ERRHATICI.

1) Virtutem habent temperantem, lenientem & parumper anodynam ex particulis eorum acidulis & mucilaginosi, quibus sulphureæ subtiliter latissimeque expansæ iunguntur, deriuandam.

2) Conueniunt igitur nonnihil ad acres catarrhos, asperitatem faucium, congestiones anginodes, orgasmum humorum, dolores spasticos motusque inflammatorios demulcendos: sed neque tanta vi, quanta alioquin adlegatur, neque specifica efficacia in puncturis pleuriticiis (quamuis hi flores rubore acteneritudine pleuram aliqua sub specie referant) pollere deprehenduntur.

3) Incertius adhuc illorum præstantia celebratur in febribus acutis, tussi phthisica, hæmorrhagiis, dysenteria, sanguine coagulato.

4) *Externe* flores recentes fronti & temporibus adplicatos ad mitigandam cephalalgiam laudat *Ettmüllerus*; cæterum etiam ipsos ad quoscumque ardores, erysipelas, oculorum inflammationem, peruigilium, vulnera (at dubie) commendatos legimus.

5) Optime vsurpantur in *decocto*, vel *syrupo*; licet & *aqua destillata* proftet & *conserua* & *tinctura*, quæ vltima minime laudibus satisfacit.



## II. AVENA.

1) Hæc tum alba, tum nigra occurrit. Prima ad vsum  
selegitur, & quoniam e larga mucilagine, mitioribus,  
pinguibus & paucissimis sulphureo-vaporosis parti-  
culis contexta est, temperat, acrioresque humores  
inuoluendo lenit & aliquantum abstergit.

2) Salubriter ergo decoctum eius præbetur in vitiis bilio-  
sis, rheumaticis, tussi acriore, raucedine, faucium  
inflammatione, vlcerationibus internis præcipue  
renum, scabie, scorbuto; neque iis inutile est, qui  
spasmodis, febribus, inprimis acutis & exanthematicis,  
purpura, variolis, morbillis &c. affliguntur.

3) In talem vsum auena excorticata decoctione extrahi-  
tur, vulgo Haber-Grûß-Brûhe. Cæterum etiam  
simplicis auenæ decoctum, adiectis radice cichorii  
paullulo nitri antimoniatum & sacchari, constituit ce-  
lebre illud potulentum remedii genus, den Haber-  
Trancé, quod non modo dictis plerisque morbis ad-  
huc conuenientius esse, verum etiam arthriticis &  
podagricis insigne leuamen adferre per totam fere  
Europam celebratur. Quam famam vt egregiis ef-  
fectibus porro tueatur, opportunus præcipue vsus  
efficiet.

4) A largo autem auenæ ingestione, ne aut flatulentia  
exoriatur, aut caput tentetur, quidam metuunt;  
quamquam his incommodis facile occurri queat, &  
potius diligenter cauendum fit, ne syluestris illa &  
capiti noxia auena, quam *sterilem Virgilius* adpellat,  
eduli nostræ forte intermixta existat.

5) Externe decoctum ad clysteres, item farina eius ad tu-  
mores duros ardentes & dolentes leniendos vsurpa-  
tur.

## II. SEMEN FOENICVLLI.

1) Eandem classem, paremque facultatem tenet, quam  
semen anisi, nisi quod lenius temperamentum habe-  
at, ac propterea variis morbis, quos anisum mitigat  
aut



aut deuincit, paullo maiore proportionē destinari possit.

2) Itaque superflua dictorum effectuum repetitione nemini molestiam facessemus, sed notabimus duntaxat, *radicem* æque ac *semen* foeniculi in vsum recepta esse, & sigillatim ad oculorum morbos (vbi, vel *vapor* decoctionis feminis, vel *succus* herbæ, vel *aqua destillata* adplicantur) lactis defectum itemque, tum ad alias contusiones, tum mammarum tumores commendari.

3) Cæterum etiam in obstructionibus viscerum, abortus periculo, difficultate pariendi, hæmorrhagia narium, febribus, lue venerea, venenis, præcipue mercurio eiusque adniso fuino & inunctione, multum adiumenti adferre perhibentur; quibus laudibus vt hodierna experientia calculum adiiciat, merito omnium Practicorum vota sunt.

4) Eadem præparata & formulæ ex foeniculi femine & radice, vti ex aniso præscribuntur.

### 13. SEMEN FOENI GRÆCI.

1) Abundat mucilagine, lenientem, emollientem ac temperantem ei qualitatem impertiente; vnde ad althææ feminis indolem propius accedit.

2) Itaque similiter eo vtuntur Medici in pectoralibus malis (sub debita tamen cautione) in renum vitiis & spasinodico calculi dolore.

3) *Externe* adhibetur ad clysteres paregoricos, tenesmum, tumores emolliendos, acrem oculorum inflammationem permulcendam, alendos capillos prolixiores. Cæterum non pollet ea virtute, vt spasmos podagricos, ischiadicos &c. singulari vi mittere compellat.

4) Parantur ex illo & in vfu sunt *decoctum*, *cataplasma*, *mucilago*, *syrupus*.

### 14. SEMINA FRIGIDA quatuor MAIORA.

1) In horum censum a veteribus relata sunt semina *citrulli*, *cucurbitæ*, *cucumeris* & *melonum*, quæ quidem ma-



gnis laudibus, in febre quacumque, nimio æstu & siti, inflammatione, in primis pleuritide & nephritide, immo & phthisi, hæmorrhagiis, vitiis cholericis adfecerunt.

2) Hodie vero mira speratorum eius modi effectuum inconstantia deprehenditur, quapropter, maxima dignitatis parte amissa, merito rarius sub emulsionum forma præscribuntur. Profecto enim, licet larga mucilagine sua tenuitatem humorum non nihil incrassare & acrimoniam inuoluere possint; tamen ut extractiones eorum prompte mucidæ, vapidæ, rancidæ fiunt; sic facile nauseam creant & flatulentiam, præcipueque in hæctica & biliosis malis anxietatem cardialgicam, spasmos &c. sæpius tum inducunt, tum minantur.

3) Consultius ergo erit hæc semina ægrotis non ingerere, præsertim cum nobis hodie meliora suppetant, a quibus non incommoda dicta, sed pulcriorem successum expectare possimus.

4) Eandem fere censuram merentur *semina quatuor frigida minora*, ad quæ pertinent semina *cichorii, endiviæ, lactucæ, portulacæ*. Priora ex his præter temperantem etiam discussoriam qualitatem habere, inflammationibus morbisque hepatis congruentem; posteriora vero magis mucida terrestria, incrassantia videntur. Cæterum nulli, singularium virtutum laudes, uti passim decantantur, competunt.

#### 15. HORDEVM.

1) Seminis huius principia & virtutes non dispares sunt illis, quæ de auenaceo supra notauimus, eiusdemque vsus adhuc frequentior est.

2) Etenim quotidie illud ad crepaturam vsque decoctum præscribunt Medici in morbis cholericis, rheumaticis, catarrhalibus, renalibus & vlcerosis, quin & in qualibet humorum acrimonia & feruentiore orgasmo. Quapropter etiam febricitantibus saluberrimum iudicatur, præsertim additamento cornu cerui, radi;



radicis scorzonerae & succi citrei paullo melius iucundiusque redditum.

3) Veteres imprimis *prisanam* seu hordeum excorticatum decoctum, eiusque colaturam seu cremorem hordei tanti fecerunt, ut in acutis morbis nihil fere praestantius duxerint. Neque ea hodie frustra rheumaticis, acriter tussientibus, immo ipsis phthisicis & hecticis forbillanda propinantur, quippe tum leniente, tum nutriente effectu tabidis aliquantum profutura.

4) Vilis habetur *panis hordeaceus* (qui an podagricis praefecalino utilis sit, ambigitur) aestimabilis autem est *potus* ex hoc semine primum ab Aegyptiis, tum Germanis, praecipue diu ante *Taciti* tempora iam confectus. Sed non est huius loci de hoc *Cereris vino*, seu *cereuisia* plura subiicere.

5) *Externe* farina hordei adplicatur tumoribus molliendis & maturandis, item erysipelati, membris laxatis & podagrico dolore pressis, sed his ultimis nullo fere cum successu.

#### 16. SEMEN HYOSCYAMI.

1) Datur & nigrum & album. Hoc postremum, quod apud nos magis in hortis colitur, quam in sylvis crescit, usitatius est: atque uti pingues sulphureas vaporosas valde particulas fouet; sic narcoticam, soporiferam, idenique cum aliqua verborum altercatione, ut *Scribonius Largus* iam notat, infatuantem qualiter inde consequitur.

2) Qua de causa, licet a quibusdam in variis congestionibus & doloribus, tussi, epilepsia, haemorrhagiis, mensibus nimis, vomitu cruento, praecipue vero haemoptysi, tamquam singulare experimentum, commendetur; tamen ubiuis circumspice & parcissime praebendum est. Periculum enim multasque noxas inde exsistere, tum alii auctores obseruarunt, tum ipsi nouimus semen hoc aliquando largius datum ischiadico cuidam ridiculam primo insaniam induxisse, ac dolores quidem paulisper sopisse, sed ita,



vt post modum maiore contumacia eruperint, insequente eius cruris atrophiam & letali post annum catastrophe.

- 3) Itaque vt cautio necessaria est; sic eadem non solum in interno, sed etiam externo vsu adhibenda. Varia enim narrantur experimenta, quibus *suffitum ex semine* ad odantalgiam ac vermiculos dentium & aurium necandos; *semen* cum vino contusum ad cephalalgiam; *folia* herbæ ad tumores duros, carbunculos, arthritidem, podagram, dolores hæmorrhoidum, *radicem* ad colicam, aliosque cruciatus aliquando profuisse legimus. Sed omnia hæc partim minus adhuc probata, partim adeo ambigua & intuta sunt, vt ab imitatione merito quiuis non temerarius abhorreat.

- 4) Prostat ad vsum *oleum hyoscyami*, vel expressum e semine, vel ex tota herba per decoctionem paratum, quod quidam ad inflammationes genitalium & pollutiones nocturnas laudant; porro *emplastrum* de hyoscyamo &c.

#### 17. SEMEN LINI.

- 1) Turget oleo & mucilagine, indeque in leniendo, emolliendo, lubricando & abstergendo suum præstat officium, idque non Chirurgis modo, qui illud frequentissime adplicant, sed etiam Medicis.
- 2) Referuntur enim plurima exempla, e quibus idem pectoris morbis variis, vrinæ suppressioni, acribus doloribus, partui difficili & foetui mortuo pellendo, itemque noxæ a cantharidibus suntis opem quamdam attulisse dilucescit.
- 3) Inprimis vero *oleum lini expressum* non mediocres vires habere censetur in tussi, asthmate, catarrho suffocatiuo, hæmoptysi, apostemate pectoris, maximeque in pleuritide. Præterealaudatur in dysenteria, colica, obstructione alui, malo iliaco, doloribus calculosis, hæmorrhoidibus cœcis, ficibus ani & fissuris. Quibus elogiis fidem equidem non plane derogamus,



rogamus, sed tamen plerarumque harum virtutum perpetuitatem hodie paucissimi experiuntur. Unde solerti & circumspectæ vltiori indagationi hæc relinquimus.

4) Cæterum meliorem fructum pollicetur, si ideam recens ac purum (nam vetustum acrius est & graueolens) semper ad vsum deligamus.

5) *Externe* leues ambustiones, non æque valenter spasticos, ne dicam podagricos dolores permulcet; adhibetur autem semen in *balneis, cataplasmate, unguento, oleo* &c.

### 18. SEMEN PAPAVERIS.

1) Est pariter somniferum, vti semen hyosciami, sed quoniam longe pauciores sulphureo-vaporosas particulas, easdemque largæ mucilagini immerfas habet; multo minorem quoque narcotin exserit, ideoque tutius, præcipue *album*, potest vsurpari.

2) Nam præterquam quod sopiat, temperantem etiam & lenientem vim tenere creditur, atque ea propter raucedini, tussi acri, phthisi, calori febrili (sed male) vigiliis, diarrhœæ, hæmorrhagiis, a quibusdam destinatur.

3) Notandum vero est, hoc semen raro meliorem vsum, quam alia soporifera (de quibus infra) adferre & parcius, præsertim ea, quæ inde parata sunt, *syrupum, diacodium, oleum papaveris*, esse adhibenda. Ac decet utique meminisse damni, quod a mulierculis paritur, quæ, cum infantibus inquietis & eiulantibus semine aut syrupo papaveris ingesto, seminum sæpe conciliare gestiunt, tum misellos in catarrhum suffocatum, epilepsiam, imo dementiam, vt a Medicis animaduersum est, interdum præcipitant.

### 19. AMYGDALÆ DULCES.

1) Hæ præcipue molliendi, demulcendi, temperandi & probe alendi facultatem ostendunt e leuibus oleosis & mucilaginosi ac paucis terreis, e quibus concreuerunt, partibus prodeuntem.

2) Ita.



- 2) Itaque non iners, nec spernenda eorum virtus quotidiana experimentis adparet in thoracis morbis, vbi & suauiter leniunt & expectorationem leuant, raucedine, tussi, asthmate, pleuritide, ipsaque phthisi, quibus mitigandis, tum emulsio, tum oleum amygdalinum præscribitur.
- 3) Idem oleum valet in colica spasmodica, aluo sicca, torminoso ventris fluxu, atrocibus spasmis calculum subinde stipantibus, ardore vrinæ, doloribus post partum; denique etiam mature datum veneni vim, si quis id improuide hauserit, oblinendo ventriculum & acrimoniam inuoluendo, infringit.
- 4) Non minus creber est *emulsionum* vsus, præsertim in febribus, vbi, dummodo satis dilutæ aliisque congruentibus & saccharo permixtæ exhibeantur, egregium sæpe effectum edunt temperantem nimiasque vigilias &c. minuentem.
- 5) Præterea sex vel octo amygdalas decorticatas, si comedantur, præsentissimo sæpe auxilio fuisse in *soda* meminimus. Et licet id in omnibus subiectis non tam efficax reperiat, præ aliis tamen hoc simplex remedium commendandum videtur, quod *cito tuto & iuncunde* auxilium suppeditet.
- 6) *Externe* oleum quoque vtile ducitur in tumoribus duris, doloribus maxime nephriticis, cute scabra, partu difficili, immo conuulsionibus, si *Platero* credimus. Cæterum tenendum est illud, in primis si intro sumatur, recens & e recentibus non rancidis amygdalis expressum ac pellucidum esse debere. Nonnulli id quoque sine vlla amygdalarum tostione parcius extorquent, quale in Magnatum mensis ad acetaria præcipue expetitur.

#### 20. FICVS.

- 1) Recentibus multum aquei humoris inest, reliquis partibus salinis acidulis & mucilagini adhærentis; quare, etsi parcius sumtæ acrimoniam bilis æstumque sanguinis aliquantum temperare possint; tamen  
prom.



promte fermentescunt, & largiore usu varias primis regionibus turbas, ac denique corruptelas minantur; quem ad modum inde flatus, colicam, diarrhœam, exulcerationem intestinorum, scabiem &c. quibusdam accidisse auctores litteris mandarunt.

2) *Exsuccatæ* vero, quas *caricas* dicimus, longe meliores sunt, & ob qualitatem emollientem, demulcentem & expectorantem multis commendabiles.

3) Sicut ergo acrimoniam in pectore & alibi leniunt, aut spissos heic insidentes humores ad mobilitatem, expectationi aptam, perducunt; ita & renes quoque ac interna vlcera & fauces fordidæ paulum repurgare, porro urinæ iuxta ac bilis vitiis & orgasmo sanguinis subuenire celebrantur.

4) Non comperimus autem, ipsas tam vehementer ad exteriorem superficiem propellere exanthemata, variolas &c. neque etiam sanguini congruato resolvendo, neque malignitati & venenis perdomandis sufficiunt, quamvis Mithridatem ex iis paucisque aliis singulare antidotum confarcinasse legamus.

5) Pariter incerte secundinarum accretionem impedire & partum faciliorem reddere dicuntur.

6) Evidentior earum externa efficacia est ad tumores emolliendos, pus mouendum & euocandum; itemque, ut quidam volunt, ad pestilentes bubones & carbunculos, fici ani dolentes & odontalgiam. Sed in his quidem peculiarem earum vim raro vel nunquam experimur.

## 21. IVIVBÆ.

1) Arbor horum fructuum, seu prunecolorum ferax, pariter ac ficus, colitur præcipue in Hispania, Italia & Gallia Narbonensi. Subdulces autem sunt, & principiis, ac qualitate non absimiles caricis.

2) Vnde ad eadem pectoris & renum mala conueniunt, illa tamen circumspeditione, ne vsui earum expectoranti diutius insistamus.

N n

3) Dan.



3) Dantur etiam stranguria & ardore urinae laborantibus & hæmoptycis, quos tamen ut a ficum esu noxam sibi contrahere non nulli obseruauerunt; sic his quoque fructibus parcius uti decebit.

4) *Externus* vsus nullus est. De reliquo *syrupus*, & quod præstantius est, *decoctum iuiubarum* exhibetur.

## 22. PASSVLÆ seu VVÆ PASSÆ.

1) Sunt vel *maiores*, vel *minores*, *Corinthiacæ* dictæ. Primæ sunt baccae grandiorum vuarum paulatim calore solis exsiccatae ex Turcia, Hispania, Italia & Gallia ad nos exportari solitæ, quæ ut bonitatis gradu sic & nominibus differunt; nam & vulgares una cum petiolis corbibus vimineis inclusæ (gemeine oder Korb-Rosinen) & *zibebæ* longiores item *Damascenæ*, *Bellevedere*, *Massilioticæ*, admodum sapidae (blaue Zibeben) habentur. Alteræ *minores* hodie non tam Corintho, quam ex Zazyntho, Cephalonia, Patris &c. aduehuntur, apyrenæ seu nucleis destitutæ, cæterum viti, quæ paullo maiora aliis folia ostendit, innatæ, post maturitatem decerptæ, siccatae & doliis commissæ. *Vid. Langius.*

2) Vtræque propter acidum vinosum cum mucilagine & sulphureis partibus copulatum temperant, leniunt, vias lubricant, denique nonnihil incrassant & absterguunt, adeoque proficuas multis ægrotantibus dotes consecutæ sunt.

3) Quamquam enim grauiorum malorum, ut hæcticæ, phthiseos, hepaticæ obstructionis &c. curatio ab illis frustra expectetur; tamen & his & aliis morbis cholericis, hæmorrhagicis, & vehementiore organo comitatis solatium quoddam passularum subsidio obtingit.

4) Inprimis pectori dicantur & raucos, tussientes, asthmaticos, itemque renum vitiis obsessos adleuareprehendantur.

5) Et quoniam simul aluum promouent, neque facile fastidi-



untur, commodum præbent remedium grauidis & infantibus, quibus a tardiore aluo sæpius molestiæ creantur. Sunt autem heic eo vtiliores, quod vna bilis acrimoniam hebetare & spasms demulcendis aliquantum inferuire possint.

6) Multi quoque passulas aduersus sitim commendant, & suauiter simul nutrientem, alii etiam anthelminticam vim ipsis tribuunt. *Acini* vero, qui maioribus insunt, adstrictoria polleant qualitate, ideoque ut passularum effectus melior sit, eximendi sunt.

7) Cæterum constituunt mustum concentratum, ex quo, adfuso fermentationis instrumento, sub debita enchiresi & patientia vinum fit generosum & salubre, ut iam innuit *Ettmüllerus*.

8) Prostant *passula laxatiua* & *palpa passularum*. Alioquin immiscentur etiam infusis, decoctis & interdum vinis medicatis laxantibus.

### 23. PINEÆ.

1) Sunt nuclei oblongi albicantes, qui sub tunica rutila crassa latitant intra squamas strobilorum, seu conorum pini satiuæ, prope Rauennam copiose crescentis, vnde sic enucleatæ ad nos transuehuntur.

2) Ab arbore resinofum quiddam sapere videntur; cæterum principiis & viribus non abluunt ab amygdalis, quarum effectus cum paullo ante exposuimus, non placet hic eadem chorda oberrare.

3) Speciatim autem *nucis pineæ decoctum* cum *visci queru*ni portione ad fluorem muliebrem, *oleum expressum* ad arthritidem, surditatem, paralyfin (sed dubie) commendatur.

### 24. PISTACIÆ.

1) Arbor quædam Syriæ has nuces largius profert, quæ ut sub tenui rugoso putamine nucleum recondunt viridantem; sic de reliquo oleosis partibus & mucilagine, quæ scatent, amygdalarum & pinearum naturam æmulantur.



- 2) Vnde & iisdem viribus imbutæ sunt, indignæ autem illis laudibus, quibus aliqui ad excitandam cibi adpetentiam, nauseam & vomitum sedandum itemque hepar aperiendum speciatim has nuces condecorarunt.
- 3) Neque in alendo & roborando, adeo præcellentiores sunt amygdalis, quas proinde, quia propius nostris regionibus crescunt & parabiliores existunt, commodè substituere possumus.
- 4) Cæterum in diuitum mensis frequentius adponi, quam ex officinis præscribi solent.

25. SEBESTEN seu MYXÆ.

- 1) Hi fructus sub pulpa carnea dulci officulum cauernosum continent ac proprie pruna sunt domesticis similia & nigricantia, quæ ex arbore quadam Aegypti & Asiæ colliguntur, atque inde Venetias transfretantur.
- 2) Principia salina acida, & quæ hæc sibi implicuit, spissa mucilago, eam ipsis indolem dederunt, vt leniendo, incrassando & expectorando satisfacere medentibus possint.
- 3) Nam & in acriori catarrho, indeque ortis raucedine, tussi, & in lento pulmonum muco, quem liquant & ad exitum præparant, vtilis habentur, præsertim si opportune, neque nimis diu eos propines.
- 4) Parem demulcendi efficaciam præstant in ardore vrinæ, vitiis biliosis, renalibus, vlcerosis, internis, simplicibus & venereis, gonorrhœa, etsi de cætero heic non multum profuturi videantur.
- 5) Cum autem aliquot auctores confirment, lumbricos myxis summopere delectari; tum *Solenander* decoctum sebesten pro clystere laudat ad hæc animalia adlicienda & euocanda.
- 6) Ad vsum sæpe præscribuntur cum iuiubis, quibuscum admodum conueniunt, & vel *decoctum*, vel *electuarium diasebesten* vsurpatur.



## 26. SILIQVÆ.

1) Est fructus arboris in Palæstina & Italia quoque crescentis, oblongus & filiquosus, qui pulpam dulcem & rufam continet, multis nucleis ei internitentibus.

2) Quod si qualitatem eius spectes, cum præcedente comparari & peræque ad demulcendum, incrassandum & expectorandum adhiberi potest; quapropter plures ibi modo adlegatos adfectus hic non repetemus.

3) Existit autem paullo magis terrestris, ideoque si in substantia large detur, aluum potius segnem efficit quam molliorem. Cæterum ad sodam, ardorem vrinæ & stranguriam præcipue commendatur.

## 27. GUMMI ARABICVM.

1) Sincerum hoc, quod rarius ad nos peruenire scribit *Ettmüllerus*, pellucet candidum limpidumque, & cito in aqua solubile est. Funditur autem ab arbore acaciæ veræ seu spinæ Aegyptiacæ; atque vt parcissimas sulphureas particulas, tanto vero adfluentiorem mucilaginem & terram in se recepit; sic mixtione gaudet ad inuoluendum, incrassandum & glutinandum aptissima.

2) Proinde ad tussim acrem, hæmoptysin, mictum cruentum & dysenteriam (vbi rite datum præsentissime mitigat) crebro adhibetur. Quod vero etiam fluorem album, gonorrhœam benignam & virulentam, pleuritidem &c. curare dicatur, id minus opinabile & expertum est.

3) Extus liquido effectum suum testatur in conglutinandis vulneribus & vlceribus, cruentatione gingivarum & hæmorrhagiis partium spongiosarum.

4) Eiusdem virtutis, sed inertioris tamen est *gummi cerasorum*, quo Arabicum sæpe adulteratur.

## 28. GUMMI TRAGACANTHÆ.

1) In Sicilia & Prouincia Gallica fluit e vulneratis radicibus arboris spinosæ, quæ tragacantha dicitur. Hoc deinde solutum aqua & percolatum vermicularem,



qua conspicitur, figuram induit; atque id quidem, quod primo colum transit, splendescit candidius & purius, ideoque electa adpellatur; quod vero ultimo transinittitur, magis feculentum est, aliterque coloratum; qualis est tragacantha communis.

2) Tota vera & sincera existit mucilago, sulphurearum partium inanis, ex qua proinde manant perspicuæ eius incrassandi, inuoluendi & temperandi facultates.

3) Vbi ergo feri subtilis acrimoniam, vel rodentem tenuis bilis causin obtundere nos decet, ibi salubriter hoc gummi in subsidium vocamus; itemque in tenuibus asperioribus catarrhis, raucedine, tussi acri, in ardore vrinæ, exulcerationibus internis, diarrhœa ac dysenteria non sine fructu propinamus.

4) Neque contemnendum plane vsum præstat in hæmoptysi, mictu sanguinis, diabete, gingivarum cruentatione; licet æquum vbiuis moderamen seruari necesse sit.

5) *Externe* nonnihil subinde solatur ardorem linguæ & faucium, acrem ophthalmiam & dolentes papillarum fissuras. Vbique vero, vel mucilagine tragacanthæ per aquas destillatas extracta vtimur, vel diatragacantho frigido, seu speciebus de tragacantha officinalibus.

#### 29. LAC.

1) Est chylus animalium nonnihil purificatus, qui, vt ex oleosa pingui, mucida terrestri & salina acidiuscula diluta substantia compositus est, adeoque nonnulla vegetabilis mixtionis indicia adhuc ostendit; sic leniendi, relaxandi, alendi, lubricandi &c. virtutibus foecundus habetur.

2) Pro animalium varietate paulo diuersam crasin adsumit, cuius intimam subtiliorem differentiam non adsequimur; generatim vero notamus, quod aliud alio tenerius, temperatius & ad vsum medicum internum salutaris sit. Præstantissimum censetur asinum, deinde caprillum, tum vaccinum, quibus omnibus



in omnibus tamen nonnulli, præcipue in tabe præferunt humanum.

3) Commendatur ergo ad temperandam quamvis acrimoniam, ad scorbutum, tussim acrem, ardorem vrinæ & stranguriam, mictum cruentum, dysenteriam (in qua, vt & alibi aqua satis dilutum porrigi debet) morbos spasticos, vlcerationes internas, phthisin, hecticam, venenorum mineralium & emeticorum fortium, item cantharidum vim causticam & intercinam, vbi quidem mature & copiosius hauriendum est.

4) At licet prudens eius & moderatus vsus leuamen aliquod adferre possit, tamen grauioribus malis extirpandis non sufficere animaduertitur. Neque enim cura, vt vocant, lactea, quæ multorum oculos in se conuertit, veram tabem cum vlcere interno coniungit, etiam, neque arthritidem, aut podagram, neque acriorem labem scorbuticam (nisi per accidens forte) præ aliis leuare, ne dicam per sanare potest; quin & nocet, nisi debitis cautionibus & regimine definia- tur. Multis enim infirmis angores & flatulentiam infert, etiam si circumspicte agamus. Cæterum lac quotidie largius bibitum magnam sanguinis vbertatem, & nisi hæc laboribus consumatur, inde variorum morborum fomentum fuggerit.

5) *Externe* lac vsus habet in balneis & clysteribus lenientibus & paregoricis, item in cataplasmate ad emolliendos tumores, spasmos nephriticos parumper demulcendos.

6) De reliquo alii lac fermentationem subire cogunt vario artificio; alii saccharum lactis parant, & magnam inde spem medicorum effectuum proponunt, quæ an feliciore euentu secundetur, latet, aut saltem minus digne exploratum est.

7) Certiores sunt earum partium vires, quæ simplici viam antiquitus plebs & rustici a lacte segregant. Atque inter hæc *butyrum* præter lubricantem, paregoricam aliasque dotes lacti proprias etiam diureticas &



& aluinas excretiones ipsamque expectorationem promouet, & externe ad maturandum inseruit.

8) Præstabilius aliis est butyrum maiale, quod *Helmontius* herbarum magisterium nuncupat, idque variis vnguentis neruinis, emollientibus, discutientibus ophthalmicis &c., dum efficaciora huius generis remedia ei immiscentur, basin subministrat.

9) Prostant & ad internum vsum, *butyrum rubrum* & *viride potabile* vulgo magni æstimata in læsionibus internis, casu ab alto &c. Eidem scopo, vti & phthisi ac renum vlcerationibus consecrant butyrum cum cancris fluuiatilibus contusis liquatum coctumque, quod quidem, vt vota impleret, vehementer optandum esset.

10) Longe alius indolis est *serum lactis*, quod ob virtutem temperandi, abstergendi & aluum paululum laxandi &c. iam vetusti artis nostræ principes celebrarunt, & in variis morbis frequenter sorbillandum præceperunt.

11) Fit autem, vel per se e lacte sensim acescente, vel citius, si succo quodam acido v.g. citreo in lac calore bulliens injecto pingues & caseosæ partes præcipitentur. Cæterum rarius hodie adhibetur, quam a multis in febre biliosa, acuta quacunque, orgasmo sanguinis, malo hypochondriaco, scorbutico, incipiente hectica prædicatum legatur.

12) Male audit *caseus*, utpote cuius nequitiam plurimi accusarunt, quidam etiam vsum diætetico plane abrogandum & prohibendum esse censuerunt; sed, vt alii rectius existimant, iniuria. Nam a famelico laboriosorum opificum & rusticorum ventriculo probe concoquitur, iisque sat bonum validumque præbet nutrimentum, neutiquam vero eas calamitates arthriticas, podagricas, calculosas machinatur, aut infligit, quæ vulgo inde per se existere finguntur.

13) Vti-



13) Vtique tamen discrimen habendum est inter macrorem durum e meris terreis & mucidis partibus constantem, & alterum fauiorem ac pinguiorem, in quo cremor lactis cum dictis partibus permixtus & coagulatus residet. Hic enim vt melius alit, sic etiam facilius a stomacho non plane languido subigitur; contra primus vrbano, tenero, otioso, insuetos facile offendit, agricolis propterea aliisque operariis relinquendus.

14) *Externe* vis leniens & spasmus demulcens caseo præsertim vetusto adscribitur. Neque ea plane irrita est aut commentitia; quippe podagricos & arthriticos dolores non nimium exasperatos, sed paululum remittentes interdum leuat; non æque vero inflammationibus aut hystericis pathematibus opitulatur.

### 30. MEL.

1) Est vel *vulgare* e fauis eliquatum diuersæ bonitatis vel *virgineum* priore sincerius sola exstillatione paratum vel arte *despumatum*. De elaborationis modo & artificio discrepant adhuc autores; de principiis autem eius & facultatibus certius adfirmatur, quod cum præcipue e floribus optimis exsuctum & in aluearia congestum sit, partibus sulphureo-oleoso-falinis larga mucilagine temperatis exuberet, ideoque abstergendo, expectorando, temperando, emolliendo, maturando non inutile existat.

2) Quod si ergo primæ viæ saburra mucida onerata, aut acrimonia humorum & vlcera interna præsto sint; huius concreti vsus conueniens putatur. In primis autem pulmonum & renum vitiis corrigendis addicitur, vbi potiones mellitas cum herbis pectoralibus frequenter præscribunt Practici, idque eo feliciore successu, si iustum moderamen & opportunitatem attendant; alioquin largiorem inde expectorationem non leuamen, sed maior debilitatio insequitur.

3) Eas quoque præceptiones nonnulli addunt, vt, quando ob fermentescentem vim mel facile turbas dat,



biliosi, melancholici & pueri illo abstineant aut parcissime vtantur. Pituitosis autem & maxime senibus adeo fructuosum prædicatur, vt eorum nutritionem, robur ac vigorem deficientem restaurare valeat; vnde & veteres philosophi intus melle, extus oleo vitam sibi incolumem ac longam præstare conabantur. Profecto, si *Helmontium* audiamus, mel erit gloria roris, in quo collecta sit plantarum quinta essentia, itemque, vt alii volunt, vel cibus cœlestis, vel balsamus florum, spiritus mundi aut salis vniuersalis conseruantis connubio tinctus; sed tamen quomodocunque honestetur, eximias præ aliis & cœlestissimas eius vires medicas nondum expertas habemus.

4) *Externe* amplior eius vsus est in emolliendis tumoribus, iisque ad maturationem & puris eruptionem perducendis, nec non in vulneribus & vlceribus emundandis, vbi frequentissime vnguentis digestiuis immiscetur; quanquam cauendum sit, ne pro vulgari abusu nimis diu aut immoderate adplicetur, vel læsarum partium debita discretio negligatur, quippe in partibus magis exsanguibus ligamentosis, tendinosiis &c. mel fermentescente sua acrimonia facile sensum exacerbat, maioremque adfluxum laceffit penitiori arrosione, synouia, vlcere denique putrido & rebelli subsequens. Præterea mel, præcipue mercurialis enematibus inditur ad mucum crassiores detergendum, vti & speciatim mel anthosatum ad colicos dolores & paresin e colica; at vero, vbi inflammationes internæ, aut biliosa causis adsunt, omittendum est. Mel rosatum ordinarium Chirurgorum remedium est ad faucium & oris exulcerationes. Cæterum, vt hodie varia adhuc vegetabilia hoc succo condiuntur; ita constat etiam, veteres cadauera melle oblita conseruasse.

5) Inter præparata mellis enitescit mulsum, liquor nempe fermentatione mellis ad eam generositatem euectus,



vt vino, aut fortiori cereuifiæ vi inebriandi nihil concedat, quo præcipue Lithuauia & Ruffia, mellis nemorensis fuauiffimi copia adfluentes, delectantur. Ex eodem paratur forte acetum. Medicatum autem fieri docetur mulsum, additis sub fermentatione herbis pectoralibus.

6) Exsistunt hinc & hydromel, melicrata &c. Quicquid autem destillatione e melle prodit, vix tantam, quantam creditur, vtilitatem habiturum videtur. Sic aqua mellis alba & flaua acrior commendata prostant, in morbis oculorum, delendis maculis & cicatricibus; spiritus acidus, quocum aliqui corallia soluunt & tincturam inde conficere volunt, vt diureticus in calculo, item in capillorum defluuio; oleum mellis, quod instar aquæ vitæ ardet, cum spiritu vini iunctum in internis & externis vlceribus &c. *Confer. Ettmüller.*

7) *Hartmannus* quoque oleum mellis compositum concinnare docet ad leniendos dolores podagricos, sed incerto effectû. Num autem spiritus mellis fermentatione reclusi in pectoris malis singularem laudem promereat, experientiæ relinquitur.

8) Tandem & de *cera*, quam pariter admirabili solertia apes legunt & confingunt, quædam hoc loco subnectenda sunt. Cohæret autem e resinoso - oleosis & mucilaginosi particulis tenaciter coniugatis, indeque ad leniendum, abstergendum, & consolidandum habile existimatur.

9) Intro id sumere nemo fere suadet; extus autem crebro adhibetur in clauis pedum, tumoribus symptomatiscis &c. ac modo dictum in vsum variis vnguentis, linimentis, emplastris illiquatur.

10) Celebrius est oleum ceræ, quod interne, vt diureticum in nephritide, calculo (sed caute) item in dysenteria, (sed magis in clysteribus) conducere perhibent. Extus conuenit in vlceribus, sordibus cutis serpiginosi, fissuris papillarum, quas demulcet & mundat, & cicatrice obducit; porro, vt multi laudant, in pro-



lapsu ani, ambustionibus, nephritide, dysuria, punctura neruorum. Et *Mindererus* oleum inde cum terbinth. gummi Eleini, hyperic. compositum tumoribus, nodis podagricis & gummatibus venereis resoluendis destinat.

II) *Cera alba*, quæ, vel insolationis, vel spiritus vini colorem extrahentis beneficio fit, interdum basin aut corpus balsamorum constituit. Propolis seu *cera virginea*, quam præ foribus aluei apes ædificant, magis flauescens, aut nigricans, viscosius gluten habet odoremque suauem styracis æmulum. Hæc accensa veterem tussim mitigare dicitur; cæterum singularis eius vsus præ vulgari nondum inclaruit.

III) SPERMA CETI.

1) Non est semen balæne, vt diu ea vixit opinio, sed a recentioribus naturalium rerum consultis e capite cuiusdam belluæ marinæ borealis prouenire, ac vel cerebrum esse, vel saltem intracerebrum talis ceti recondi traditur. Hoc autem deinde excoqui solet & adiectione lixiuii alcalini in eiusmodi saponiforme concretum, quale vulgo venditur, redigi.

2) Sicut igitur potissimum ex oleosa pinguedine piscosa conflatum est; ita qualitatem lenientem, inuoluentem, expectorantem, atque etiam (vt nonnulli volunt, propter salis accessum) resoluentem hinc adsumit.

3) Quapropter speciatim illo Medici vtuntur in acrioribus pectoris catarrhis, tussi, asthmate, porro in ardore vrinæ, nephritide calculosa & superuenientibus huic spasmis demulcendis. Neque infructuosum plane est, si in pleuritide & peripneumonia opportune & moderate adhibeatur.

4) Neque desunt, qui idem aduersus puerulorum tormina acria biliosa & catarrhum suffocatum, quin etiam contra omnem colicam, malum hystericum, sanguinem grumosum & in stasim delapsum atque lac coagulatum valere perhibent; sed dubium, maiore fiducia,



ducia, an certis & crebriore usu spectatis tentamini-  
bus nitantur.

5) Cum autem cito propter abundantiorē pinguedinem in foetorem rancidum transeat plurimisque nauseosum sit; tum recens semper eligendum, idemque aliis congruentibus temperandum & gratius efficiendum est. Atque ita sæpe præscribitur cum oleo amygdalar. dulcium &c.

6) Externe laudatur ad inflammationes (sed caute & aliis admixtum) ruborem faciei, pernioles, cicatrices variolarum & usum cosmeticum. Frequentius emplastrum de spermate ceti mammarum duritiei præcauendæ, aut emolliendæ & resoluendæ famulatur.

### 32. GELATINÆ.

1) Diuturna coctione ex omnibus ossibus mollioribus præcipue, vitulinis, agninis, C. C. ebore aliisque partibus animalium parantur; & propter teneram mucilaginem cum pinguedine aliqua deuinctam leniunt, temperant, inuoluunt ac deficientem alimenti materiam restaurant.

2) Commendabiles ergo & efficaces habentur in quauis acrimonia, graui humorum commotione & orgasmo, tussi acri phthifica, vlceribus internis, febribus præsertim acutis, vbi tamen cauendum est, ne nimium nutrimenti suppedietur.

3) Frustra autem veram malignitatem febrilem, speciatim a gelatina C. C. superatum iri speramus, quod nunquam per se futurum est, etiamsi quoque essentia per spiritum sambuci, vel iuniperi, addito sale volatili, inde confecta (quam *Ettmüllerus* laudat) porrigatur.  
*Vid. supra sub C. C.*

4) Constantius gelatinæ viribus exhaustos, aut largis hæmorrhagiis aliisque euacuationibus nimis eneruatos reficiunt, adeoque tum in huiusmodi casibus, tum in diabete, dysenteria, hectica magnum sæpe solatium præbent; vbi pro circumstantiarum ratione illas, vel succo citri temperatiores reddere, vel variis aroma-



ticis suauioribus, aut aliis præfenti morbo conuenientibus remediis imbuere expediet.

### 33. HERBA ERYSIMI.

- 1) Vocatur etiam *sinapi syluestre*, nec immerito, quippe cum hortensi qualitate & viribus conueniens; de quo cum supra latius egimus, hic tanto breuioribus esse licebit.
- 2) Satis autem incidendo humorum tenacitatem corrigit & expectorat, ideoque prodesse celebratur in tussi inueterata, asthmate & præcipue in rauedine ac voce amissa.
- 3) *Extus* pro secreto habetur ad scirrhum mammarum, si folia eius cum hydromelle cocta adplicentur.
- 4) Eiusdem facultatis semen eius acre est, quod, vt diureticum, ad calculum & menses pellendos, itemque ad gonorrhœam (sed ambigue) valere quidam perhibent. Cæterum *syrupus de erysimo Lobelii* supra dictis morbis internis congruit.

### 34. HYSSOPVS.

- 1) Diuersis floribus, cœruleo, purpureo & albo insignis conspicitur, & principiis scatet paululum amaris, acriusculis, semiaromaticis, munerantibus ei virtutem maxime attenuandi, resoluendi, discutiendi, paullulum roborandi & diuresin adiuuandi.
- 2) Singulari autem proprietate pectoris morbos leuare traditur, ideoque gloriam habet in tussi humida, viscida & asthmate chronico, laterum doloribus longinquis & empyemate; quamquam etiam alibi, præcipue in intestinis, tenacem mucum incidat ac detergat & inde cardialgiæ flatulentæ &c. commode opponatur.
- 3) Permulti quoque vsum illius profecturum narrant in mensibus & secundinis promouendis, obstructione viscerum, hydrope, ictero, vermibus, calculo, visus obscuritate; quæ quidem vberiori indagationi relinquimus, cæterum in epilepsia nullam eius peculiarem utilitatem experimur.

4) Præ-



4) Præsentius *externe* vino decoctus sugillationes discutit & suffusos sanguine oculos solatur, licet non ea hyperbolica vi, quam vulgaris grandiloquentia deprædicat. Faucium quoque inflammationibus & vlceribus aliquantum subuenit, ac dentium doloribus catarrhalibus auriumque susurro destinatur.

5) Vtimur præcipue eius *decocto*, *infuso*, *aqua destillata*, *syrupo* (qui satis euidenter expectorat) & *oleo destillato*.

### 35. MARRUBIUM ALBUM.

1) Huic subamaræ, nec insuaueolenti herbæ tribuitur excellens incidendi, resoluendi, aperiendi & vrinam mouendi potestas.

2) Vnde quidem magno consensu Medici ipsam dilaudant ad viscidam, vbicumque resideat, pituitam attenuandam, oppilationes viscerum, mensium retentionem, chlorosin, morbosque vterinos.

3) Inprimis vero, vt tussim & asthma inueteratum leuat; sic hepaticum peculiare & specificum expertum in iecoris obstructione, ictero & quadantenus hydrope censetur.

4) Quamuis autem præter hæc nonnulli magnum in eo præsidium quærant aduersus nephritidem & calculum; tamen potius auscultandus esse videtur *Forestus*, qui vsum eius renum vitiis magis infestum, quam amicum esse ex ipsa praxi animaduertit. Quapropter in talium malorum præsentia ab hac herba cauendum est, neque de reliquo temere fidendum laudibus, quibus ad phthisin, podagram & morsum canis rabidi conducere perhibetur.

5) *Extus* laudatur ad vlcera fordida & aurium morbos. Cæterum proficua ad vsum sunt eius *decoctum*, *extractum*, *aqua destillata* & *syrupus*, sub nomine *de præsis* haud ignotus.

### 36. PILOSELLA.

1) Vocatur etiam *auricula muris*, atque vti in *maiorem* (dictam *pulmonariam Gallicam* seu *phthisicam*) & *minorem*



*norem* vulgarem diuiditur; sic prior maxime resolvens & subadstringens pectoralis, altera validioris stringendi qualitatibus particeps esse iudicatur.

2) *Maiorem* ergo tabidis, hæmoptycis & interno vel externo ulcere laborantibus opem ferre tradunt; quamquam pauciora felicitis successus constant documenta & verendum sit, ne singularem præ aliis traumaticis fructum non adferat.

3) *Minor* vulneraria est, & læsionibus continui quidem orisque ulceribus satis accommoda; sed in diarrhœa, dysenteria, hæmorrhagiis internis, phthisi, ictero, calculo, ramicibus, ad quæ vulgo eam conducere aiunt, cautissime usurpanda; utpote cum nimia vi adstrictoria facilius noxam, quam solidum adiuumentum importatura videatur.

4) *Æque* incertum præsidium est aduersus lienis tumorem & scabiem ferinam, quibus curandis aptiora habemus remedia.

### 37. PVLMONARIA MACVLOSA.

1) Huic æqualem fere præcedentibus indolem, præcipue vero egregiam virtutem omnibus pulmonum morbis ipsique phthisi, si dextre exhibeatur, succurrendi ingenitam esse, quidam testantur.

2) At vero, cum vulneraria sit, provide quoque danda; cæterum in earum herbarum, quæ adhuc inexpertæ vel minus probatæ existunt, classem referenda est, vnde plura addere superfedemus.

### 38. ROSELLA.

1) Plantula hæc, quæ & *ros solis* dicitur, foecunda est salinarum, acrium & sulphurearum particularum cum paucioribus terreis acidiusculis mixtarum, vnde attenuantem, resoluentem & (secundum alios) roborantem, atque, ut quidam notant, etiam causticam qualitatem suscepit.

2) Mira enim est auctorum discordia & hæsitantia in definiendis huius herbulæ viribus; quandoquidem nonnulli efficaciam eius certo restaurantem & vitæ longius



gius producendæ parem, de reliquo insignem in pectoris morbis, phthisi, asthmate, hydrope, epilepsia, apoplexia, calculo, febribus malignis iactant & venerantur; contra alii usu illius interno omnibus prorsus interdiciunt ob vim nimis acrem & vrentem, qua & cuti imposita vesicas interdum euocat, & in omnibus, obseruante *Borrichio*, tussim excitat letiferam.

3) Expectandum itaque est, dum fida & vberior experientia litem omnem ac dubitationem sustulerit. Eo usque ab hac herba cauere consultius erit.

4) *Externe* laudatur ad promouendum partum, profligandos dolores dentium, epilepsiam, maniam, fascinum; præterea humor, qui vel ipso meridiano sole ardente folia eius perpetuo irrigat, oculorum inflammationibus, cephalalgia, quin & cancro, venenatis ictibus & morsui auxiliari dicitur. Sed hæc omnia perinde adhuc ambigua sunt, & partim superstitiosa. Certius hæc herbula pulchram spiritibus destillatis, aquis vitæ &c. tincturam largitur.

### 39. TVSSILAGO.

1) *Herba & flores* magis in usum recepta sunt, quam *radix*, atque emucilagine, salinis alcalinis moleculis intermixta, qualitatem lenientem, abstergentem & expectorantem hauriunt.

2) Quapropter commendata prostant ad morbos thoracis, tussim quamcumque, asthma, tabem, empyema, vomitum pulmonum, quamuis adscriptis encomiis rarius respondeant, multo minus veram phthisin extirpare possint.

3) Conferunt alioquin ad raucedinem, acrimoniam in pectore & renibus mitigandam & stranguriam.

4) *Externe* folia recentia tumoribus influmatis imponuntur. Sed puluerem eorum in vino sumtum dolentibus hæmorrhoidibus subuenire, aut aquam destillatam in epilepsia, vel extus in cephalalgia acutarum



rum februm, vlceribus & pustulis feruidis, ficubus ani vrentibus &c. singulare leuamen adferre, nondum est compertum.

- 5) *Syrupus de farfara* satis, a veteribus maxime, celebratur ad supra dictos internos adfectus. Cæterum & *decoctum* & *conserua* porriguntur. Anglis autem præcipue lubet fumum ex herba & radice siccatis, tabaci instar, ad catarrhos & tussim abigendos haurire.

#### 40. FLORES CROCI.

- 1) *Crocum* verum & satium, impensiore cura in Austria, Anglia, multisque aliis regionibus coli solitum, constituunt stamina florum tenuia, quæ plerumque terrena, interdum plura in medio ipsorum reperiuntur, coloris fului, saporis acriusculi & subamari, odoris penetrantis specifici. Hæc cum sæpe, vel lithargyrio, vel carnis bubulæ salitæ & infumatæ fibrillis, vel cnici floribus adulterentur, bonitatis notas tanto magis perspectas habere conueniet, de quibus *Langius* aliique consulantur.

- 2) Quemadmodum autem crocus principiiis salinis, subacribus & sulphureis vaporosis, aromaticis exuberat; sic præcipue hinc petiisse autumatur facultatem resoluendi, excalescendi, roborandi, ac sopiendi.

- 3) Exinde principatum inter flores tenere & magnifico regis vegetabilium, immo aromatis philosophorum nomine cohonestandus esse multis videtur; quippe cum ipsum præstantissimum esse prædicent in compluribus morbis, vel superandis, vel saltem grata deliniendis; vt: in pectoris quacumque ægritudine, tussi, asthma, pleuresi, catarrho suffocatiuo, raudine, tabe; deinde in motuum vitalium languore, vel defectu, lipothymia, tremore, apoplexia, palpitatione cordis, tristitia & mœrore animi; porro in doloribus colicis, dysenteria, sanguine spisso coagulato, obstructionibus viscerum, ictero, quartana, calculo (nam & vrinam ciet,) mensium retentione,

partu



partu difficili, tandem in venenis, febribusque acutis malignis & pestilentibus.

- 4) At si hæc omnia adhodie næ experientiæ amiffim accuratius exigantur, vsum croci vulgatis laudibus multo inferiorem, magisque angustis cancellis circumdatum esse reperimus.
- 5) Notandum enim est, eum, vt omnes præcipiunt, parcè dari oportere; alias grauior humorum commotio, cephalalgia, temulentia, delirium denique ridiculum, quin & si eo tempore detur, quo æstus & febris morbum comitatur, varia turbulenta & ominosa symptomata identidem succedunt. Quapropter etiam ad febres malignas ambigue valiturus, nec nisi minuta dosi ad mensium ac lochiorum promotionem indulgendus est.
- 6) Cæterum etsi languentes motus non nihil exsuscitare, atque etiam in respirandi difficultate tussique contumaciorè cum aliquo fructu præberi queat; tamen nec stases humorum, aut obturationes viscerum insigniter dissipat, nec tantum efficit, vt titulum *pulmonum animæ* promereat, nedum pleuriticis, phthificis &c. vitam protrahat, aut vere medeatur.
- 7) Firmioribus & magis euidentibus experimentis vsum croci *externus* nititur, vtpote ad erysipelas & quoscunque tumores inflammatos, inprimis ad serosam in iis subsistentem portionem dispellendam, doloresque coniunctos sopiendos idoneus. Quocirca crebro admiscetur epithematibus, sacculis, cataplasmatibus & emplastris discutientibus, aut maturantibus, nec inutiliter cum lacte oculis adplicatur ad eos ab acri inflammatione liberandos, aut in variolis defendendos. Præter ea laudatur ad cruciatus hæmorrhoidum cœcarum, item (sed dubie) e regione ventriculi cum camphora suspensus aduersus melancholiam; sacculo inclusus & ventriculo impositus contra vomitum & morbum nauigantium; insuper



ad pediculos necandos, icterum &c. denique ad cephalalgiam & vigilias, si puluinari supponatur, quamquam hoc vltimum periculofum & non imitandum effe, moneat *Ettmüllerus*.

- 8) Adhibemus crocum potiffimum in *substantia*, vel *essentia*. Alias quoque *extractum*, *trochisci de croco*, variaeque plures prostant compositiones.

#### 41. SEMEN ANISI.

- 1) Copiose colitur in Thuringorum & Bambergensium tractu, atque vt locuples exsistit sulphureis, oleosis acrioribus & aromaticis particulis, sic inde qualitas eius resoluens, excalesfactoria, roborans & carminatiua proficiscitur.

- 2) Veteres ipsum inter quatuor semina calida maiora collocarunt, indubie ob virium, quibus dotatum est, conuenientiam; nam & in lenta pituita, mucofo-vappido-feroso humorum statu, adeoque in a-pepsia, flatulentia & torminibus, a dicta causa exsurgentibus; porro in catarrhis frigidis, tussi & asthma humido, mucidis renum vitiis, cachexia, chlorosi &c. suauitate sua pariter, ac vsu salubri se commendat.

- 3) Non minus halitum iucundiores facit, quamuis varias foetentis oris causas minime auferat; prouentui etiam lactis augendo aptum censetur.

- 4) Ad vertiginem autem, cephalalgiam, oculorum caliginem, morbum comitalem, raucedinem, calculum & fluorem album tollendum cum generali quadam vi non nihil conferre possit; tamen specifics dotes in eo non inuenimus.

- 5) Et cauendum vtique est, ne ab auctoritate laudantium impellamur ad vsum eius indifferentem in pectoralibus (tussi sicca, phthisi &c.) aliisque malis paullo feruidioribus, aut acriore sanguinis motu stipatis. Haec enim facile calore suo exacerbare potest, ideoque promiscue, vel *intestinatorum solamen*, vt *Helmontius* vult, vel *pulmonum anima* saluari non meretur.

6) Ex-



- 6) *Externe* conducit ad tumores frigidos, debilitatem paralyticam, laxitatem viscerum, flatulentam colicam & cardialgiam &c. sanandam. *Forests* in primis oleum eius destillatum extollit ad sugillationes & vibices.
- 7) Adhiberi possunt huius seminis *pulvis*, *decoctum* (etiam in clysteribus carminatiuis) *aqua destillata*, *spiritus*, *oleum destillatum*. Hoc ultimum vero quam frequenter præscribitur, tam parce intro sumendum est, externe tutius & vtilius futurum.
- 8) Prostat quoque hodie *anisum stellatum* ex Indiis & Mofcouia ad nos deferri solitum, quod ob gratum odorem nonnullis sub forma infusi thée expetitur, cæterum quod peculiare præ vulgari aniso virtutes edat, nondum satis peruestigatum est.

## 42. CORTEX CASCARILLÆ.

- 1) A quibusdam *Schacarilla*, ab aliis *cortex Peruvianus gryseus*, ab Hispanis autem *Cascarilla de la oia*, id est, cortex antifebrilis, vocatur, atque ex arbore Indiæ occidentalis, botanicis *Canella laurifolia Magellanica cortice acris* dicta, decerpi traditur.
- 2) Inuentio eius, ut nonnulli volunt, *Wilhelmo Wintero*, equiti Anglico, tribuenda est, vnde & a *Valentino* in *museo museorum* cortex *Winteranus* adpellatur; in nostris autem regionibus ampliorem huius remedii usum & virtutum indagacionem præcipue *Apino* ac *Stahlio* debemus.
- 3) Generatim illi competunt resoluentes, aliquantum diaphoreticæ, tonicæ & sedantes qualitates; quemadmodum partes eius constituentes, tum sulphureas subtilis vaporosas, tum resinosas & terreas adstrictorias odor, sapor & chymia demonstrant.
- 4) Speciatim vero *Stahlius* hunc corticem in pectoris morbis, ubi lenit, discutit & sedat, peripneumonia pleuritide, in primisque in diarrhoea febrium acutarum & dysenteria, quam aliis omnibus efficacius mitigat,



præstantem expertus est; *Apinus* autem præterea singularem illius præcellentiam in febribus malignis & contagiosis celebrat, quam tamen hodie medentium votis non respondere notamus, idque eo magis dolendum, quo clarior est certorum in hisce malis specificorum defectus aut ignoratio.

5) Maiore cum fructu ipsum præbemus in febribus intermittentibus, vtpote quas aliis congruentibus additus aut subiunctus sæpe feliciter persanat, inque eo alteri illi cortici Peruuiano validius adstringenti plurimisque, nisi caute detur, noxio, palmam præripit.

6) Idem hoc simplex remedium confert in omnibus inflammationibus (excepta angina, vbi iusto acrius est) doloribus, spasms hypochondriaco hystericis, turbatione fluxus menstrui & hæmorrhoidalis, hæmorrhagiis internis, vomitu cruento, lochiis nimis, hæmoptysi item in hemicrania, debilitate ventriculi a morbis relicta, vomitu nimio, quouis alui fluxu &c. Et quamuis non vbique præsentem effectum edat, tamen vi sua tonica & leniter anodyna ægros aliquantum solatur, atque ad minimum opiatæ tutius est & conuenientius.

7) Illud modo prouidendum est, vt iusto tempore & decente methodo, neque, quia calefacit, largius aut nimium sæpe hunc corticem offeramus.

8) *Cascarilla* accensa fumum, non insuaue olentem, spargit, quamquam is multis aduersus sit & caput tentare obseruetur: Num vero ad pestilentes febres auertendas proficiat, adhuc minus probatum est. Cæterum vtimur hoc cortice in *pulvere*, *essentia*, *extracto* & *infuso*. Conferantur obseruationes germanicæ ab Anonymo de vsu *Cascarillæ* editæ.

#### 43. GUMMI BENZOES seu ASA DVLCIS.

1) Fluit ex arbore Indica quadam orientali ac præstantissimum ducitur, quod maxime suauissimeque fragrat, e maioribus granis, seu frustis nitentibus conglutinatum



natum, maculis albis, sapore pingui resinoso præditum, *Amygdaloides* vulgo adpellatum.

2) A plurimis autem extus solum adhibetur, vbi resoluentem, roborantem & exsiccantem vim præcipue exercet; atque ideo variis odoriferis compositionibus, pomis ambratis (ad recreandum scilicet) candelis fumalibus, facculis & suffimentis additur ad resolvendos capitis catarrhos, quanquam nonnulli suaueolentia hæc valde auersentur, ac si sola benzoe adoleatur, fumus eius sæpe caput & pulmones grauiter offendat.

3) Inseruit quoque aliquantulum, laxitati partium corrigendæ & discutiendis tumoribus frigidis, inprimis autem ad cosmeticum vsum expetitur; vbi, licet cutis superficiem nonnihil detergat & emendet, tamen vana venustatem adfectantium desideria nunquam exsatiabit.

4) Quibusdam internus vsus placet in tussi inueterata, orthopnoea, asthma, imo phthisi, vt putant, laudatissimus; sed reprobatur ab aliis, & certe magnificentius, quam verius balsamum pulmonum dicitur. Nec salutarem magis, licet sternutantem, effectum edunt flores e benzoe sublimati, sub quorum nomine fumum vendi iudicat *Billichius*.

#### 44. MYRRHA.

1) In Indiis, Arabia, Aegypto &c. ex arbore, quam duplicem *L. Plukenet* depingit, stillare dicitur, verèque electa ac præferenda aliis censetur, quæ recentior est, fragilis, minoribus granis rubicundis & pelucidis conspicua, non æque ponderosa, sed fragrantior & subacrem linguæ amaritudinem imprimens.

2) Ex principiis largiter resinosis sulphureis acris & pauciore mucilagine interiecta potestatem hauset excaustoriam, resoluentem, emundantem, balsamicam & roborantem, atque inter huiusmodi pharmaca præcipuum sibi locum vindicauit.

3) Sed




- 3) Sed vulgo etiam alexipharmacis annumeratur & non modo a pestilentium, ac malignarum febrium inuasionem præmunire hominem, verum & earum præsentium virus superare posse creditur, eo quod putredinem non sinat inualescere; unde & *Helmontius* illi ad vitam longam adipiscendam multum confidit. Ast utique dubia nobis tantarum virtutum specimina offeruntur & myrrham non tam viuo corpori diu præ aliis sano & incorrupto tuendo, quam condien-  
dis cadaueribus parem esse liquet euidentius.
- 4) Nam externe quidem variis corruptelis auferendis pulchre famulatur; at, si interne paulo largius datur, humores grauius commouet & accendit; quapropter tutius est in quouis intensiore orgasmo, spasminis exacerbatis, febrili æstu, tantoque magis in febribus acutis & contagiosis, quibus placidus motuum progressus ad subtile miasma exterminandum conuenit, ab ea penitus abstinere.
- 5) Eadem de causa phthificos & hecticos non leuat, nedum a morte tuetur, sed potius omnia symptomata vehementiora reddit, inprimis in statu magis exacerbato sumta.
- 6) Multo salubriorem se ostendit in diuturnis frigidis morbis cachecticis, catarrhalibus, scabiosis, vlcerosiis, venereis; nec laude caret in imbecillitate ventriculi, diarrhœa, anhelitus foetore & verminosa col-luie; dummodo vbique subiectis calidis & tenerioribus parcius hoc gummi præbeatur; sub qua cautione etiam mensium vitiis & imminutione præcipue laborantibus potest auxiliari.
- 7) Extus polychresta est & excellentis efficacæ mundan-  
tis, corruptionem inhibentis, ac sarcoticæ in vlceri-  
bus putridis, abscessibus malignis pestilentibus, gan-  
græna & aliquantulum sphacelo, cunctis denique vul-  
neribus, præcipue carnosarum & copiosi sanguinis  
aditu & commercio gaudentium partium; nam in  
tendi.



tendinosi, ligamentosi & membranaceis læsionibus quoniam nimium sanguinis adfluxum concitat, par-  
cior esse debet essentia myrrhae usus. Præterea tu-  
moribus frigidis dissoluendis parumper subuenit &  
laudatur ad dentium & gingivarum mala (quamquam  
precario vniuersale remedium odontalgia audiat)  
perniones, fissuras papillarum, cicatrices omnesque  
faciei maculas.

- 8) Prostant trochisci de myrrha, essentia eius & oleum  
myrrhae per deliquium, quæ vtraque ad supra dictos  
effectus plerosque accommodata sunt. Cæterum &  
suffitus adhibetur, tum ad menses euocandos, tum in-  
spersione vini albi in candentem myrrham & vapo-  
ris inde surgentis admissione, ad rugas delendas, vti  
monet *Ettmüllerus*.



## TABULA X.

DE

## SANGVINIS ABVNDANTIS

AVT

## SVBSISTENTIS EVACVATIONE

## PER REMEDIA.

## I. DEFINITIO.

Hæc, vt ex titulo aliquo modo patet, est artificialis legitima-  
rum sanguinis excretionum, naturæ alias consuetarum,  
iam vero, vel plane deficientium, vel impeditius succe-  
dentium, per remedia ex pharmaceutico & chirurgico  
fonte petita, promotio.

## II. DIFFERENTIA.

1. Sermo nobis hic omnino est de promouendis hæmorrhagiis

Q q

giis



giis boni moris, salutaribus & securioribus, vti sunt: narium hæmorrhagia, menses, hæmorrhoides, lochia; non autem de periculosis illis, hæmoptysi scil. vomitu cruento & mictu cruento.

2. Promouetur autem euacuatio hæc

1) *interne*, modo per præparantia & impedimenta remouentia, modo per stimulantia & impellentia, v. g. emmenagoga.

2) *Externe* per pessaria in obstructione mensium, per suppositoria acria in hæmorrhoidum defectu, per balnea, suffitus, vnguenta; item per venæ sectiones, scarificationes, hirudines, de quibus prolixius iam egimus in tab. nostris chirurgicis.

### III. INDICANTIA.

Sunt

1. naturæ, plethoram ægre ferentis, in administrandis salutaribus sanguinis excretionibus defectus.
2. Eiusdem ad hunc actum exercendum consensus & procliuuitas.
3. Totius corporis, quod ad cetera attinet, integrior status.
4. Aetas congruens. Senibus enim narium hæmorrhagiam reuocare velle, incongruum foret.

### IV. INDICATA.

Hæc varii sunt generis & ex variis desumpta fontibus, vt:

1. *emmenagoga*, quæ vel

a) *vegetabilia*, e. g.

Rad. Angelicæ

Afi

Aristolochiæ

Bryoniæ

Carlinæ

Ellebori nigri

Galangæ

Leuistici

Pimpinellæ albæ

Rubiæ tinctorum

Zedoariæ

Herb. Artemisiæ

Calaminthæ

Marrubii albī

Matricariæ

Melissæ

Pulegii

Rorismarini

Rutæ



- Rutæ  
 Sabinæ  
 Serpilli  
 Fol. Lauri  
 Flor. Calendulæ  
 Cheiri  
 Croci Orientalis  
 Schoënanthi  
 Fruct. Cicer. rubr.  
 Bacc. Juniperi  
 Lauri  
 Gumm. Aloës  
 Ammoniacy  
 Myrrhæ  
 Balsamus Péruvianus  
 Arom. Cardamomum  
 Cinnamomum  
 Piper  
 Zingiber.
- b) *Animalia*, e. g.  
 Anguillæ hepar  
 Bouis castrati splen  
 Castoreum eiusque tin-  
 ctura  
 Cornu cerui eiusque spiri-  
 tus volatilis.
- c) *Mineralia*  
 Borax  
 Crocus martis aperitiuus  
*Stablii*  
 Nitrosa cum cinnabari.  
 Succinum eiusque essen-  
 tia.
- d) *Præparata & composita varia*  
 Balsamus sulphuris anisa-  
 tus, vel succinatus

Elixir proprietatis

*Paracelsi*

Olea aromatica acria

- destillata, v. g.

Sabinæ

Pilulæ *Beccheri*, *Stab-*  
*lii*

Salia volatilia.

- e) *Externe* : Pessaria &  
 spiritus volatiles v-  
 rinosi, per instru-  
 mentum *Glauberia-*  
*num*, subtilis vapo-  
 ris forma adplicati.

## II. *Hæmorrhoides proritantia*, eaque

### I. *vegetabilia pro vsu inter-* *no*,

#### a) *simplicia*

- Rad. Armoraciæ  
 Ellebori nigri  
 Zingiberis  
 Herb. Sabinæ  
 Flor. Cheiri  
 Croci orientalis  
 Semen Sinapis  
 Allium  
 Cepæ  
 Gumm. Aloës  
 Ammoniacy  
 Camphoræ  
 Galbani  
 Cinnamomum  
 Hepar anguillæ &c.

Qq 2

b) *Præ-*



b) *Præparata & composita.*

Aqua Artemisiæ

Cinnamomi

Melissæ

Pulegii

Elixir Propr. P.

Essent. Carminatiua

Castorei

Cinnamomi

Croci

Myrrhæ

Succini

Extr. Artemisiæ

Centaurii minoris

Ellebori nigri

Sabinæ

Ol. Cinnamomi

Piperis

Sabinæ

Succini

Pilulæ *Stahlii, Beccheri*

Sal Succini volatile

Spiritus C. C. volatilis

Fuliginis

Salis ammoniaci

Tinct. Antimonii acris

Martis elleborata

*Wedelii, Ludovici*

Salis tartari acris.

Pro vsu externo:

frictio cum fellibus animalium rapacium.

Adplicatio hirudinum ad orificium ani. *Conf. tab. chirurg. de hirudinum adplicatione.*V. *MODVS OPERANDI.*

1. Quædam impedimenta hæmorrhagiæ fluxum cohibentia remouent, vti interne aperientia, incidentia, absorbentia, martialia, externe venæ sectio plethoram imminuendo: item topica, quæ vias ad laxitatem disponunt, e.g. balnea, suffitus, emplastra, vnguenta, clysteres.
2. Nonnulla particulis suis salino-sulphureis M. S. in intestinum motum præcipitant, quæ adeo, ob orgasmum inde concitatum, maius occupando spatium, vasa sua plus solito distendit; ex quo incommodo natura, sensibilis reddita, sanguinem quasi abundantem per consueta sibi loco denuo exterminando, damnum corpori suo imminens auertere viribus omnibus annititur. Faciunt hoc remedia acria, aromatica, myrrhata, crocata, succinata.
3. Alia quasi indirecte, dum ad alias euacuationes diriguntur, naturæ ansam præbent, omissæ olim excretionis sanguinis.



sanguinis eodem iam tempore & opere simul administrandæ. Cuius census sunt aluum liberantia, quæ emmenagogas pariter exferunt vires, vt aloëtica, helleborina, itemque varia diuretica.

4. Quædam virtute sua tonica, si cum *evangelia* adhibeantur, robur solidis partibus conciliando, naturæ causam subministrant, acceptis hisce viribus in præsentia ad commouendam denuo hæmorrhagiam opportune vtendi. Præcipue huc pertinent martialia aperitiua, quæ stricturæ suæ in hisce locis, vbi iam congestoriæ commotiones adsunt, tantum efficiunt, vt eruptio tandem superueniat.

5. De cetero, haud dantur remedia interna sanguinem specialiter ad certum locum dirigentia; sed quicquid tandem operantur, in genere id operari, vero quam simillimum est, vt scil. vel agitent sanguinem & mobilem reddant, vel naturam ad excretionem vicinam diureticam & aluinam stimulent. Vnde extrinsecorum specialiore concursu opus est ad specialem euacuationem obtinendam.

## VI. MODVS PROPINANDI.

Hic consistit:

1. In *sufficiente viarum apertura & laxitate*, vt peruia prius reddita & in aduetudinem deducta iam sint organa, per quæ euacuatio sanguinis promouenda est. His enim rigidius constrictis, aut numquam antea apertis frustra tentabitur promotio.

2. In *debita masse sanguineæ constitutione*, vt scil. illa sufficienter fluxilis sit, nec quantitate sua ad motum inepta. Cui scopo venæ sectio suscipienda, & diluentia interna sunt offerenda.

3. In *opportuni temporis electione*. Vbi enim per salutarem motuum directionem euacuatio, licet in perexigua quantitate, iam iam succedit, adeo vt nil nisi expeditior successus desideretur, ibi pellentia remedia non possunt non faustum largiri exitum. Sin vero hæc ad agendum requisita dispositio adhuc dum deficiat, tunc ma-



gis conuenit adhibere aperientia, absorbentia, martialia teneriora & sic dicta magis aperitiua, eaque in minore potius quam larga dosi, gr. semis, ad j. ij. ad summum iij. interpositis salibus volatilibus, spiritu C.C. præparatis ex succino &c.

4. In *ipsorum medicamentorum adplicatione*, quibus scil. impendentem sanguinis excretionem in actum deducere valeamus, & hoc vel per

1) *interne* adsumta, quorum catalogum modo exhibuimus. Specialissimam vero eorum adplicationem, e g. in hæmorrhagia narium, mensium, hæmorrhoidum, *vide in tab. nostr. med. pract.*

2) *Externe* vsurpata & ad loca excretoria adplicata, qualia sunt pessaria in obstructione mensium, suppositoria acria in hæmorrhoidibus, millefolii, radic. crocodilii, nigellæ adfrictio in hæmorrhag. nar. balnea &c.

## VII. CAUTELAE ET OBSERVATIONES PRACTICAE.

1. Sanguinis sinceri excretionem per pharmaca procurare velle, res est longe delicatior, imo periculosior quam per chirurgica. Priori enim modo, nisi aurea mediocritas adhibeatur, facile orgasmus sanguinis, & ex hoc visceris cuiusdam funestus infarctus gignitur.

2. Contra, vel præter naturæ ipsius intentionem pariter ac dispositionem excretionem eiusmodi propellere conari, temeritatis est. Hac vero præsentē maiori cum efficacia & euphoria agere licet.

3. Adhuc maius periculum inuoluit, talem actum suscipere velle, ubi vel spiritus ægre ducitur, vel tussis frequentior vrget, vel punctorii in pectore dolores adfligunt; id quod sæpius vsu venit apud iuuenulas mensium obstructione laborantes.

4. Nec facile locum inuenit eiusmodi actus, ubi subiectum ad febriles commotiones procliue est, vel dispositio hæreditaria obices ponit.

5. Pari modo res sese habet in fluxus hæmorrhoidalis defectu, si in nephritide, siue simplice, siue calculosa, sanguinis



nis sinceri cum vrina mixtio adpareat, vel plane hæmoptylis prægressa sit.

6. Abstinendum est a volatilibus oleosis, nisi forte subiectis, frigidioris & segnioris temperamento præditis ea concedere, imo commendare velimus.
7. Externa illa stimulantia, pessaria, suppositoria acris, sæpius inflammatorium ancipitem & discissioni non facile obsequentem humorum adfluxum, quam eorumdem salutarem effluxum producant.
8. Non minoris est momenti, excretionem per longius temporis spatium iam subsistentium resuscitationem tentare.
9. In hoc casu, ubi vel leuissima concurrit plethora, imo etiam extra ipsam, pro motu tantum sanguinis dirigendo, conuenit præmittere venæ sectionem in parte aliqua conueniente, & tunc demum remediis, primo quidem lenioribus internis, tum etiam sufficientibus externis, sanguinis fluxum ad illas partes inuitare & incitare.
10. In mensium prouocatione exhibitionem medicamentorum specialioris versus consuetum tempus instituere expedit, & ubi natura conspirat, atque manuuctionem sequitur, tanto magis ipsi momento eruptionis succurrere, durante etiam fluxu congruis eiusmodi medicamentis insistere conuenit. *Conf. tab. med. de suppress. mens.*
11. Hæmorrhoidibus actu adparentibus minus efficaciter per aloëtica largiora ad laxationem exhibita succurritur, sed præsentius per eadem ad alterationem data, quo casu elix. P. P. utile est & pilulæ Stablii.
12. In lochiis prouocandis pellentia minime sunt adhibenda, sanguini enim iisdem orgasmus inducitur & suppressio, præcipue in plethoricis, magis obfirmatur, aut febris excitatur. *Conf. tab. med. de suppressione lochiorum.* Conueniunt hic magis temperantia & refrigerantia, nitrosa cum cinnabarinis, modico tantum myrrhæ, croci, vel borracis adiecto, quod tanto magis necessarium est, si persona, vel calidis medicamentis ad partum, vel post par-



partum abusa sit, vel nimio labore in partu sanguinem turgescerit.

13. Quando remedia sanguinem commouentia, ad inferiora loca deriuantia & stricturem internam prouocantia simul & in vna formula exhibentur, certior hæmorrhagiæ restitutio obtineri potest.

#### 14. RADIX RVBIÆ TINCTORVM.

1) A colore rubro, quo pannos inficit, nomen habet. Colitur in Flandria, Zelandia, Silesia &c. & sicut dulcedinem aliquam cum asperitate præ se fert; ita abstergentis, resoluentis & mediocriter tonicæ virtutis confors, inter quinque aperientes minores vulgo numeratur.

2) Rarius in vsu quidem est, sed tamen a nonnullis commendatur in oppilationibus viscerum præcipue renum, ictero, incipiente hydrope; adeoque penetrabilis esse adseritur, vt mechanicorum, qui eam frequenter sub manibus versant, vrinam, quin & pecoris, ea diutius pasti, carnem & ossa rubore tingat; id quod nisi fabulosum sit, mirandum est.

3) Præcipue vero in subluxatione illa vertebrarum dorsi, vt sæpe ex errore vocant (in dem Wehe-thun) sanguine congrumato a casu ab alto &c. laudatur, quo scopo plebeii massam ex puluere huius radicis, *Crap* dictam; alii radicem in posca, seu aceto & aqua decoctam, alii *unguentum potabile rubrum*, quod hanc radicem recipit, magna fiducia & (si sub initium statim capiatur) effectu certiore ysurpant.

4) Tandem etiam reuocandis mensibus & dysentericiæ ac herniis curandis destinatur; ac successu magis ambiguo.

#### 15. HERBA ARTEMISIÆ.

1) Obuenit *alba* & *rubra*, quæ vltima priori anteponitur, atque inter herbas vterinas tantum gloriæ habet, vt *Februs* ipsam matrum atque omnium passionum muliebrium optatam vocet obstetricem.

2) Pal-



- 2) *Palmaria* igitur virtus ei adscribitur in suppressione mensium, chlorosi, partu difficili, foetu mortuo & secundinis pellendis, vbi monent quidam, a parte superiori deorsum versus decidendam esse herbam, aut si contra fiat, inhibetur in potius esse menstrua, quam promoturam; quæ an ita se habeant, accuratius adhuc rimandum est.
- 3) Insuper diuresin adiuuat & in renum vitiis, ictero, hydrope, utilis (sed a paucis) habetur; futiliter autem & superstitiose dæmonum maleficiis opponitur, neque fatigationem ex itinere præ aliis singulariter leuat, neque radix podagram certo delinit, neque succus herbæ venenorum vim efficaciter retundit.
- 4) Carbonem (quem prope radicem artemisiæ die S. Iohannis effodere solent, & quidam pro radice annosa & exsucca habent) alii explodunt, alii venerantur. Cæterum vires eius antepilepticæ adhuc dubiæ sunt, antiloimicæ vero & antimagicæ prorsus ad anilia pertinent deliramenta.
- 5) *Externe* artemisia etiam vulneraria ducitur. Adhibetur alias in *decocto*, vel *infuso*, item creberrime in *balneis* & *pediluujiis* ad leuandam lassitudinem & placidam a capite reuulsionem perficiendam.

## 116. CALAMINTHA.

- 1) Est vel *vera montana odorifera*, vel *arvensis*, *pulegium agreste* alias dicta, præcipueque mentham qualitate, ac effectu resolvente & carminatiuo imitatur; vnde & vsu stomachico, pectorali &c. cum eo conuenit.
- 2) Quidam autem hanc herbam inter primaria emmenagoga referunt, adeoque potentem pronunciant, vt & in grauidis hæmorrhagiam cieat atque embryoni interitum maturet & foetum, ac secundinas propellat. Sed plurimi de tali effectu silent, nec singularem eius vim resuscitandorum mensium hodie animaduertunt.
- 3) Extus non nihil discutit tumores & adhibetur in balneis, fomentis &c.



## 17. MATRICARIA.

- 1) Herba & flores ex partibus suis salinis & sulphureo-resinosis amaris resoluunt, attenuant, calefaciunt quoque & tonum intendunt.
- 2) Peculiares autem eorum dotes iam nomen innuit & suffragatur experientia, quod in morbis vteris præcipue frigidioribus mucidis & in mensium imminutione, aut obstructione tempestive data sæpe sanitatem restituant. Puerperis quoque adiumento sunt in lochiis & secundinis remanentibus, ac doloribus post partum; sed tamen caute & moderate concedi debent, in primis ubi æstus notatur, aut acriores spasmi hysterici adiunt.
- 3) Sub eadem cautione renum vitiis destinari possunt, nam diuretica quadam vi impuritates calculosas secum foras educunt, neque inutiles sunt in primarum regionum debilitate & colica flatulenta; quin & herba lumbricos interimere & succus eius cum vino absinthite sumtus ad quartanam depellendam conferre Deckero prædicatur.
- 4) Extus ad plicita conducit variis stasibus & tumoribus, nodis mammarum &c. resoluendis, ac spasmis hysteris, colicæ, præcipue vero, ut permulti laudant, doloribus capitis, vertigini, itemque odontalgia mitigandis.
- 5) Prostant eius *aqua, extractum, syrupus, oleum*, quamquam etiam in *decocto*, vel *infuso* possit adhiberi.

## 18. MELISSA.

- 1) Gratissimo, temperato oleo & volatilibus sulphureis particulis foeta suauitatem citream quodammodo redolet, virtutibus resoluentibus, neruinis quasque analepticis imbuta.
- 2) In primis capiti, ventriculo & vtero amica censetur, tantamque præstantiæ opinionem habet, ut Paracelsus aliique arcanum ad vitam longam inde peti, Bagliuius vero moderate & sincere multa in hac herba,



ut in aliis ad citri naturam accedentibus, latere doceat.

- 3) Vtique enim agens internum excitat & supra dictarum præcipue partium atoniam corrigit, sigillatim stillicidio feri putridi ex utero sæpe feliciter ineditur, indeque impeditam fecunditatem restituit, gravidæ debiles & abortus periculo expositas non nihil reficit, colicos denique, ac nothos post partum dolores subinde ad quietem perducere comperitur.
- 4) Alii præterea melissam laudant in apoplexiâ, epilepsia, memoriæ & visus imbecillitate, palpitatione cordis, asthmate, melancholia hypochondriaca (ubi diu in pulvere, vel infuso datur. *Conf. Riverius*) & quavis mœstitia, sterilitate quacunque, virulentibus ictibus & moribus, ac pestilentibus febribus. Sed effecit adhuc experientiorum immaturitas, ut exoptatos fructus ab usu huius herbæ in talibus morbis profligandis paucissimi colligere potuerint.
- 5) Neque propriam & singularem vim emmenagogam exercet, sed generali magis facultate impedimenta mucido-ferosa, vel nimiam laxitatem remouet, & sic menses prodituros, aut iam fluentes blando stimulo incitat.
- 6) Externe pariter discutit & roborat, ideoque in balneis, pediluviis, cataplasmate &c. utilis, licet dubium sit, eam sic arthriticos dolores, cordis palpitationem, strumas, ictus apum, vesparum, scorpionum &c. sanare. Cæterum herba floribus efficacior est.
- 7) Potest in decocto, vel infuso præscribi, nec spernenda est aqua, quæ si cum vino, additis citri corticibus, destilletur & saccharo pro lubitu edulcoretur cuiusvis aquæ vitæ, balsami embryonum &c. vice fungi posse existimatur. Prostant & *conserua*, *syrupus*, *essentia* (quæ per spiritum proprium paratur, in primis ex floribus melissæ *Turcicæ*) & *oleum destillatum*. Le Febvre quoque primum ens melissæ, seu quintam eius essentiam, duce Paracelso confecit, quam in vetula renouasse



se vires & iuuentutem, nouosque dentes, capillos & fluxum menstruum reuocasse, itemque gallo decrepito iuuenilem vigorem, pennas, unguesque nouos reddidisse narrat. Sed dolendum est, tantum arcum, siquidem verissimum habetur, cum auctore intercidisse.

12. SABINA.

- 1) Duplex habetur foliis, vel tamarisci, vel cupressi, ac multis; quæ resoluente acri diuretica & humores grauiter *versus uterum* impellente potestate instructa sunt, præpollet; ideoque, vt infame ac detestabile scortorum refugium est, sic prudenter & moderate adhiberi conuenit.
- 2) Quod si enim scopo emmenagogo detur, antequam viæ & humores rite præparati sint, ac opportunum tempus inciderit, aut vbi magnus sanguinis æstus & commotio, teneritudo, ac debilitas subiecti &c. coniuncta sunt, tum sæpe grauiorem noxam adfert, quam verum emolumentum.
- 3) Eadem cautissime molam gestantibus & præcipue parturientibus ad foetum, aut secundinas, aut lochia promouenda porrigi debet, ac potius quia longe tutiora & præstantiora ad manus sunt, omitti.
- 4) Prætertalem vsum, tum extus inspersa, tum intro parcesumta, laudatur ad vlcerum foetida & verminosa, item ad hydropem, icterum, arthritidem, asthma, sanguinem congrumatum, calculum, lienis vitia, colicam (sed incertius); præcipue vero ad vermem umbilicalem (quem vulgus sæpe in infantibus tabidis arguit) enecandum, vbi puluerem sabinae & sis vitrum Venetum tusum, ac melli immixtum putamini nucis iuglandis dimidio imponi atque hoc umbilico adplicari complures Medici præcipiunt; quippe vermis escamellis allectus prodire & a puluere, ei inuoluto, interfici traditur.
- 5) Externe a quibusdam in subsidium vocatur ad vlcerum, vt dictum est, itemque odontalgiam verminosam, poda-



podagricos dolores, erysipelas, tenesinum, maculas faciei; sed cum pleraque hæc minus digne adhuc experta sint, circumspeditionem suademus. Cæterum adhibetur in *decocto, suffitu, essentia, oleo destillato*, quod uti & *oleum sabinæ crocinum Mynsichti*, potentissimum est & nisi parcissime, ac caute præscribatur, facile nociturum.

## 20. FLORES CHEIRI, seu VIOLÆ LVTEÆ.

1) In cordialium familiam vulgo referuntur, licet non tam vere cardiaca, quam magis resolvente & roborante facultate eos instructos esse deprehendamus.

2) Præter salinas, sulphureis, volatilibus particulis scatent, indeque etiam, tum calefacere, tum caput gravitate quadam tentare obferuantur, in his croco non plane absimiles. Pro specialibus autem vterinis & emmenagogis a multis hodie non habentur; etenim generali magis impulsu humores adficiunt, illoque solum iusto tempore propendenti eo naturæ occasionem præbere possunt, menses, foetum, secundinas aut lochialem sanguinem expellendi. Cæterum quia commouent, utique consultum est, ipsos nec grauidis nec vera mensium obstructione laborantibus temere indulgere.

3) Ampliorem usum nonnulli his floribus adsignant in apoplexia, paralyti, aliisque capitis malis (sed inconuenienter monente *Etmillero*) porro in cordis palpitatione, ictero, pestilentia præcauenda.

4) Sed verius *externe* tenerioribus & nervosis partibus debilitatis roborante, ac resolvente sua vi succurrunt, quanquam *oleum cheirinum infusum* tot laudibus indignum sit, quot vulgo ipsi tribuuntur.

5) Vsurpantur in *infuso* cum aliis ad mensium vitia. Prostant & *aqua destillata, conserva, acetum &c.*

## 21. SCHOENANTHI FLORES.

1) Exiurgunt e iunco odorato, quo cameli, præcipue in Arabia pasci traduntur (vnde planta quoque stramen, seu foenum camelorum audit) & resoluendi, cale-



lesfaciendi, ac roborandi facultate pollent, a particulis, queis turgent, resinosis, acribus & terreis proficiscentem.

2) Ex hac qualitate specialis eorum vsus tentatus legitur in obstructione viscerum, vrinæ retentione, mensium & secundinarum promotione (tum intus, tum externe in *cataplasmate*, vel *pessariis*) præterea in doloribus post partum, flatulentia, vomitu, singultu, foetore anhelitus &c.

3) Sed pauca harum virtutum constant experimenta, & cauendum est, ne, vbi acrior æstus, aut subiecta valde tenera obueniunt, largiuscule offerantur, alioquin caloris & motuum vehementiorum augmentum allaturi; vnde frigidis, cachecticis, chloroticis morbis magis conuenientes, in phthisi autem, sputo sanguinis, dysenteria præcipue maligna, quibus hos flores nonnulli destinare suadent, suspecti videntur. Neque venenorum vim infringere possunt, etsi theriacæ aliisque antidotis eos adiungi notum sit.

4) *Externe* roborant caput, vterum aliasque partes debilitatas in *fomento*, vel *balneo*. *Puluerem* ad fungosam carnem vulnerum, præcipue cerebri absumendam laudat *Marchette*. *Interne* cum aliis præscribuntur in *infuso*.

## 22. CICERES RVBRI.

1) *Albi* & *nigri* quoque coluntur, sed *rubros* præcipue aliqui Medici expetunt ob discutientem, aperientem & diureticam, vt putant, qualitatem; vnde & in compositiones officinales *syrupi de albæa Fernelii* & *decocti Foresti* contra calculum, receptos eosdem habemus.

2) Speciatim hinc manauit eorum commendatio in renum vitiis, ischuria, calculo, morbillis (vbi iusculum eorum laudant) partu iuuando, mensibus & lochiis ciendis, lacte augendo & *externe* in genitalium tumoribus.

3) *Ar*



- 3) At magis ex opinione, quam experientia tanta laudum seges effloruisse videtur, namque hodie adeo sterilis est, ut manifesto quidem incrassantem & paulum obstruentem materiam, sed frequentissime nihil singulare, aut efficax ad medendum in ciceribus reperiatur.
- 4) Quapropter, uti iam olim inter plebeios & vilissimos cibos relati sunt, sic nunc quoque certiore effectu diæticum præbent remedium, quo famem depellere possunt valentes agricolæ atque operarii.

## 23. CINNAMOMVM.

- 1) Genuinum & Zeylanicum est cortex intermedius, primum, ubi rescinditur, albicans & fere inodorus, deinde solis radiis in eum colorem, fragrantiam & contortarum cannularum formam, qua nobis venditur, redactus. Decerpitur autem ex arbore quadam cassiæ in insulis Floris & præcipue Zeylania, ubi lætissimus & copiosissimus eius est prouentus. Reliqua cinnamomi genera in aliis Indiarum regionibus obtinent, huius gratiam & bonitatem non adæquant, neque in officinis adeo usitata sunt, quanquam etiam in vero cinnamomo periodicam vigoris diuersitatem nonnunquam animaduertisse sibi visus sit *Ludouici in A. N. C.*
- 2) Eximiam spirat suauitatem, eademque non minus, quam resoluendi, roborandi & putredinem inhibendi dotibus egregiis plurima alia aromata antecellit, & præcipue ob analepticam facultatem exsplendescit.
- 3) Frequentissimum ergo & excellens præsidium est, ad veram atoniam, virium imbecillitatem, motuum necessariorum languorem & defectum, ubicunque obueniant, lipothymiam, syncopen, paralyin, hemiplexiam &c. leuanda, porro ad varios primarum viarum morbos, foetorem anhelitus, nauseam, ructus, diarrhoeam, hypercatharsin, colicam flatulentam &c. item ad pallidos virginum colores & impeditiorem mensium successum &c.

4) In



- 4) Inprimis autem nobilitatum existit in grauidarum malis & partu difficili; sed multæ hic eo abutuntur, & grauiorem sibi noxam inde contrahunt. Etenim ut alias largius sumtum oleo suo aromatico humores intensius exagitat, variosque ancipites motus palpitationem cordis &c. infert; sic, nisi moderatius capiatur, prægnantibus & parturientibus eo facilius nocere posse dilucescit.
- 5) Commendabilem, quoque virtutem habere quibusdam videtur ad internam sanguinis putredinem refrenandam, roborandam visus aciem & memoriam, venena ictusque virulentos subigendos, atque auram pestilentem corrigendam. At hæc magis ambigua & inexpertæ sunt. Generali effectû fortasse æque heic proderit, ac in mensibus promouendis, nam pro specifico emmenagogo non potest haberi.
- 6) Præsentiore fructu *extus* supra laudatas vires ostendit, ac merito quidem *oleo* eius *destillato* nihil præstantius & efficacius ad progressum diri sphaceli remorandum existimatur. Id vnum dolendum est, ingens pretium obstare, quo minus plerosque miseros hoc subsidio retrahere ab interitu, aut saltem reficere possimus.
- 7) Prostant præter oleum notissima *aqua destillata*, *essentia* (cuius paucae guttæ in aquam simplicem infusæ eam protinus gratam & analepticam efficiunt) *syrupus de canela*.

#### 24. HEPAR ANGVILLÆ.

- 1) Hoc pro piscis magnitudine satis grande adparet, cæterum si cum felle leniter exsiccatum detur, pulchrum & fere incomparabile specificum in partu difficili suggerit, ubi dolores & conatus ad enitendum languent, ac deficiunt. Cum autem præsentem pellit, tum antequam porrigatur, certos nos esse oportet de recto foetus situ ac viarum debita constitutione. *Conf. tab. med. de adfectibus parientium.*

2) In-



- 2) Incertius autem hoc iecur ad nyctalopiam laudatur. At *pellis*, seu *cutis anguillæ* in suffitu sæpe leuat illos, qui hæmorrhoidum & oecarum dolore, aut procidentia vteri laborant.

25. CROCUS MARTIS ANTIMONIALIS STAHLII.

- 1) Præferendus hic est fere omnibus aliis ex Marte vulgo propositis pulueribus, aut crocis, partim ob maiorem teneritudinem, qua *Zwelfserianum* æquat, partim etiam, quia facilius & minori pretio conficitur.
- 2) Fit autem ex scoriis primis reguli antimonii martialis in aëre sensim dilapsis, nempe subtiliore harum parte elutriata & cum triplo nitri detonata. Sic post edulcorationem pulvis habetur, qui dilutissimæ rubricæ colorem repræsentat.
- 3) Sicuti vero omnia e ferro, aut chalybe composita medicamenta proprie, neque aperiunt, neque abstergunt (exceptis magis iis tincturis falsis, paucissima ferri grana continentibus, quæ per leuia acida succi pomorum Borsdorfianorum, citri, cydoniorum, tartari, aceti parantur) sed euidentius adstringunt; ita & eundem genium adhuc retinuit hic crocus, quem tamen, cum leniter operatur & vi sua tonica partes laxas stringendo, factas in hisce stagnationes humorum subinde expedit, pari aut maiori iure, quam alios, aperitium nuncupare possumus.
- 4) Cæterum etsi chloroticas subleuare & opportune datus menses in illis promouere queat; tamen huic scopo, quia efficaciora suppetunt, ipsum non destinamus, neque aliis suademus. Vtilior est in hæmorrhagiis, præcipue vteri & hæmorrhoidum, turbis lochialibus puerperarum & spastica earum flatulentia, itemque in atrophia, residuis febrium intermittentium motibus erroneis, aliisque morbis exeuntibus, qui toni roborationem postulant.
- 5) Plura de chalybe eiusque præparatis alibi dicemus.



## 26. SPLEN BOVIS CASTRATI.

- 1) Maximopere celebratur ad obstructions & duritiem lienis, sed tantum valere, quantum ab aliis extollitur, plerique hodie dubitant.
- 2) *Paracelsus* decoctum huius lienis, minutim concisi, bibendum commendavit, tanquam singulare experimentum ad obstructos menses & natam inde chlorosin; sed nec id vota implere, dolendum est.
- 3) Cæterum & essentiæ & destillata, quæ certe vanissima sunt, hinc parari docentur.



## TABVLA XI.

DE

# EXPVLSIONE RERVM TOTO GENERE PRAETERNATV- RALIVM.

## I. DEFINITIO.

Hæc est particularis euacuationis species, qua natura res plane inutiles, aduersas, immo noxias, e certis corporis sui regionibus proscribere adlaborat. Cuius generis sunt præcipue flatus, vermes, calculi, foetus mortuus, vel viuis, mola, falsus conceptus, secundinæ, &c.

## II. DIFFERENTIA.

Actus hic therapeuticus est

- I. vel *spontaneus*, id est, propria naturæ industria contingens, quod toto die in spontanea multorum ægrorum restitutione, e.g. calculi, vermium, foetus mortui &c. exterminatione cernimus. Quin idem ex stupenda illa naturæ *αὐτοκαταία* cultriorum aliorumque satis superque edocemur.

2. Vel



2. Vel *artificialis*, qui peragitur

1) auxiliis *pharmaceuticis*, quæ sunt vel

a) *interna*, ut sunt:

α) contra flatus *carminatiua*.

β) Contra vermes *anthelmintica*.

γ) Contra calculos *lithonriptica*.

δ) Ad foetus, vel viui, vel mortui, molarum & secundinarum exclusionem eadem remedia, quæ mensibus & lochiis prouocandis ordinantur.

b) Vel *externa* e.g.

α) contra flatulentiam *clysteres* carminatiui & stimulant, *fomenta* carminatiua, linimenta, *scutula* stomachalia, *sacculi*, *balsama*.

β) Contra vermes *cataplasmata* ex radicibus & herbis amaris parata, *linimenta* ex oleo absinthii, *zedoariae*, *colocynthidis*, *unguentum de arthanita*, *fel tauri*, *clysteres* ex lacte & *suppositoria* anthelmintica.

2) *Operationibus chirurgicis*, ut *lithotomia*, *embryulcia*, *extractione rerum peregrinarum*, de quibus *tabulae nostrae chirurgicae* consuli possunt.

### III. INDICANTIA.

1. Certitudo praesentiae eiusmodi rerum naturali oeconomiae plane peregrinarum.
2. Naturae ad earum expulsionem procliuitas & propensio.
3. *Viarum* plana atque facilis dispositio.
4. Virium non omnimoda prostratio.

### IV. INDICATA.

1. *Carminatiua*.

1) *Vegetabilia*.

a) *Simplicia*.

Radix Acori  
Angelicæ  
Ari  
Carlinæ

Caryophyllatae  
Costi dulcis  
Cyperi longi, rotundi



Galangæ	Petrofelini
Gentianæ rubræ	Sileris montani
Helenii	Fructus Baccæ Lauri
Imperatoriz	Juniperi
Leuistici	Caryophylli
Mei	Cinnamomum
Ostrutii	Crocus orientalis
Pimpinellæ albæ	Macis
Vincetoxici	Miua & panis cy-
Zedoariæ	doniorum
Herba Abrotani	Nux moschata
Absinthii	Piper
Calaminthæ	Zingiber
Cardui benedicti	Cort. Aurantiorum
Chamomillæ vulgaris	Citri.
Romanæ	b) Composita & preparata
Centaurii minoris	Aqua Carminatiua
Cochleariæ	Chamomillæ
Hormini	Cinnamomi
Maioranæ	Fœniculi
Melissæ	Melissæ
Menthæ	Condit. Acori
Origani	Carnis citri
Rorismarini	Conserua Melissæ
Rutæ	Pulpæ citri
Flores Anthos	Essentia Alexipharmaca
Centaurii minoris	Carminatiua
Chamomillæ	Cinnamomi
Schoenanthos	Corticum aurant.
Semen Anethi	Extractum Acori
Anisi	Oleum Carminatiuum
Apii	destill. Anethi
Carui	Carui
Citri	Cumini
Cumini	Fœniculi
Dauci	Melissæ
Nigellæ	Pilu.



Pilulæ *Beccheri*

Balsamicæ *Stahlii*

Syrupus acetositatis citri

Cinnamomi

Corticum aurant.  
citri

Vinum cum absinthio & e-  
nula mixtum.

2) *Animalia.*

Castoreum, eius medulla  
tinctura, & ole-  
um coctum  
in clysteri-  
bus.

Equini testiculi  
stercoris succus ex-  
pressus in colica

Lupi stercus

1. *Anthelmintica*, quæ in III. classes vulgo diuiduntur.

1) Vermes *saturantia*,

a) *Vegetabilia*, vt: Mel, vux passæ.

b) *Animalia*, vt: Lac.

2) Vermes *enecantia*. Huc spectant

a) plurima amara, tam vegetabilia, quam mineralia & acria.

b) Mercurialia.

c) Salium varia genera.

Ex vegetabilibus sunt potissimum

Radix Angelicæ

Aristolochiæ

Carlinæ

Caryophyllatæ

Dictamni albi

Galangæ

Gentianæ rubræ

Graminis

Helenii

Imperatoricæ

Zibethum.

3) *Mineralia.*

Aurum fulminans

Antimonii clyffus | sulphu-  
ratus

Mixtura simplex

Nitri spiritus dulcis

Salis spiritus dulcis.

*Externe.*

Emplastrum de baccis lauræ  
de crusta panis  
ceratum fantali-  
num

stomachale e  
tacama-  
haca.

Lapathi acuti

Pimpinellæ albæ

Raphani rustici &  
vulgaris nigri

Rhabarbari

Vincetoxicæ

Zedoariæ.

Herba Abrotani

Absinthii

S s 3

Car.



Cardui benedicti	3) Vermes <i>expelluntia</i> .
Centaurii minoris	a) <i>Vegetabilia</i> .
Cochleariæ	Radix Allii
Fumariæ	Dictamni
Nasturtii	Ellebori nigri
Rutæ	Gentianæ rubræ
Scordii	Rhabarbari
Tanaceti	Turpethi
Flores harum herbarum,	Zedoariæ
Folia persicorum.	Herba Absinthii
Semen Aurantiorum	Agrimoniæ
Cinæ	Cardui benedicti
Citri	Centaurii minoris
Nasturtii	Rutæ
Sinapis	Scordii.
Gummi Aloës	Flores Hyperici
Galbanum	Persicorum
Myrrhæ	Tanaceti
Sagapenum	Semen Portulacæ
Aromata Caryophylli aroma-	Santonici
tici	Succus Dacrydii
Piper	Cortex Aurantiorum
Zingiber	Chinæ chinæ
Allium	Musculus corallinus 3j.
Cepæ	Species Diaturbith cum
Musculus corallinus	Rhabarbaro.
Porrum	b) <i>Animalia</i> .
Squilla.	Cornu Cerui vltum, eius-
<i>Preparata &amp; composita.</i>	que spiritus volatilis
Cornu cerui vltum	Lumbrici ex intestinis
Liquor terræ foliatæ tarta-	propulsi, in pulue-
ri	rem redacti, sed ine-
Mercurius dulcis	pti, vel ob dubium
Sal Anglicanum	effectum respuendi.
Spiritus & salia volatilia	Tauri fel interne & exter-
Tinctura antimonii acris.	ne.
	c) <i>Mine-</i>



c) *Mineralia.*

Acidulæ naturales

Aethiops niger ad gr. xv.

Aqua extinctionis metal-  
lorum

Aurum fulminans

Chalybs præp. ad gr. iv. - v.

Mercurius crudus in aqua

decoctus, cuius aquæ

℥j - iv. vel cum fac-

charo in puluerem

tritum.

= dulcis ter sublimatus

℥ij

Sal Vitrioli ℥β - j.

Vitrioli lunæ gr. iij.

martis gr. iv. - vj.

folis gr. ij.

*Externe Cataplasmata* ex radi-  
cibus & herbis supra re-  
censitis parata.*Linimenta* ex oleis absinthii  
amygdalarum amara-  
rum zedoariæ & aloë  
parata.*Unguentum de arthanita.*3. *Lithonriptica. vid. tab. de diuresi.*V. *MODVS OPERANDI.*

1. Si vñquam in re alia, certe in hoc negotio naturæ energi-  
am extra omne dubium positam cernimus. Dum enim  
illa eiusmodi res alienas in corpore suo hospitantes, in  
se autem sibi corporisque sui mixtioni plane aduersas  
atque heterogeneas, sentit, non potest non in earum-  
dem exturbationem diligenti studio incumbere. Qua-  
re nonnumquam spasmodicos circa hospitium talium  
rerum conatus, immo generaliores etiam, quandoque  
euacuationes exercet, sicutque motus instituit vomi-  
bundos, iam alios alui liberationi dicatos; idque effe-  
ctu non plane vacuo vel sterili. Quem enim latet, cal-  
culos e. g. qualescumque, modo viarum magnitudinii  
quodam modo respondentēs, nec non ipsos foetus, per  
vias ordinarias a natura expelli & posse & solere? Vt  
iam nil dicamus de spontanea illa cultrorum deuorato-  
rum, vel acicularum deglutitarum excretionē, quæ do-  
ctissimos viros habet admiratores.

2. Vbi verò talis naturæ energia deficit, in quibusdā subie-  
ctis, ibi sociam ei atque exhortatricem Medicus ma-  
num porrigat necesse est. Sic exhibemus vermes ene-  
cantia



cantia pharmaca, quorum deinde eiectionem ipsa, hoc modo adiuta, natura promouere solet. Sic euacuantia propinamus, vt natura de expellendo calculo officii sui hoc ipso memor reddatur. Sic denique mortuum eximimus foetum, vt supersedentem huic operi animoque linquentem naturam denuo in integrum restituamus.

3. Ad remedia *carminatiua* quod attinet, illa quidem a plerisque alterantibus adnumerantur, quia deficiens robur & motum tonicum ventriculi atque intestinorum relaxatum tantum restituere existimant; nos autem vi vocis in numerum euacuantium ea referimus, nam a *carminando* hecely propterea denominationem habent, quia flatus, intestinorum tractum turbantes, diducunt, dissecant, dissipant & expellunt. Quamquam alienus plane a nobis sit plumbeus ille conceptus, ac si carminatiua eodem modo disiiciant & explodant flatus, quo puluis pyrius globulos plumbeos e bombardâ emittit atque explodit.
4. Habent autem illa diuersum operandi modum, prout causæ discrepant. Quædam concoctionem promouendo & excretionem aluinas facilitando exhalationes flatulentas præoccupant. Alia immoderatas spasmodicas commotiones, flatus in intestinis coarctantes, immo ad superiora restringentes, multaue pathemata anxia cardialgica inducentes, corrigunt. Hinc temperantia, nitrosa, antispastica carminatiuis merito accensentur, quia inquietudines in abdomine temperant & sedant. Clysmata quoque lenientia, emollientia, aluum strictam expedientia, turbas flatulentas componunt.
5. Denique, quæ carminatiua propriè ad tonum ventriculi & intestinorum roborandum ordinantur, sunt abstergentia, incidentia, absorbentia, amara, resoluentia, collificantia & laxantia, item stomachica, aromatica & tonica, quæ partim impuritates mucidas, biliolas, primas vias debilitantes & necessariam peristalsin perturbantes,



tes, abstergunt & abluunt, partim easdem eliminant, atque educunt, atque his modis ad iustum tonum harum partium restituendum naturam inuitant.

6. *Anthelminticorum* tres constituimus classes, quarum prima continet vermes *saturantia*; quæ quidem remedia dulcia, saccharata, pingua & nutrientia eos magis alerent atque sustentarent, nisi cum aliis remediis *enecantibus* & expellentibus coniungerentur. Hinc illa non ordinamus eum in finem, ut ad crepaturam usque, siue mortiferam satietatem eadem ingerant, sed ut amara *enecantia* cum his dulcibus & pinguibus inuoluta & obducta eo magis adpetant & ita mortem comedant. Hæc est causa, cur clysteres ex lacte parati adplicentur, quo vermes ad inferiora alliciantur & educantur.
7. Vermes *enecantia* acria, amara, salina teneram, ex tenui mucilagine compositam, texturam vermium adficiunt, colliquant, & ita vellicant atque vexant, ut debilitentur, inmo plane destruantur.
8. *Euacuantia* per principia sua, tam acria, salina quam sulphurea & resinosa vermes non solum interficiunt, sed etiam excretionem alui potenter excitant.
9. *Mercurialia* uti per colliquantem qualitatem, siue a principio salino, siue a sulphureo aliove illa proveniat, humores mucidos seroso-lymphales penetrant & dissolunt, ita per illa vermes discerpti & dissoluti euacuantur.
10. Quæ *externæ* adhibentur, e. g. amara ex absinthio, zedoaria, colocynthide, aloë parata & abdomini adplicata, non aliter quam *cathartica* operantur.

## VI. MODVS PROPINANDI.

vbiratio habenda

1. *Temperis*, quo natura ipsa opem desiderat, quod integram adhuc virium ostendit panopliam. Ossicula, spinæ, aculei, tela, plumbei &c. quantocius sunt extrahendi, ne inflammatio accedat, quæ extractionem impedit. *Conf. tab. chirurgic. de extractione rerum peregrinarum.*



2. *Loci*, quo res eiusmodi peregrinae hospitantur, an. v. g. calculus sit in renibus, an in vesica; num foetus in ipso utero, an vero (quod saepius contingit) extra eundem iam dum sit positus. *Confer. tab. medic. de calculo & tab. chirurgic. de lithotomia & embryulcia.*
3. *Symptomatum* aliorumue accidentium,
  - 1) vel *praesentium* ab inhaesione eiusmodi rerum pendentium, vel
  - 2) *imminentium*, ab operatione, vel medicatione expectandorum.

## VII. CAUTELAE ET OBSERVATIONES PRACTICAE.

1. Quo maturius rei peregrinae extractio fit, eo promptius symptomata cessare solent.
2. Vbi vero iam per longius temporis spatium eadem in loco subsistit, ibi non possunt non grauiora symptomata, ob firmiores redditas naturae circa hostilem rem ideas, etiam materia ablata durare.
3. Stupendam experientia docet in non nullis esse naturae sensibilitatem pariter & agendi promptitudinem, ubi v. g. per globulum auribus intrusum mox diros epilepticos insultus obortos esse legimus.
4. Sediucunda est visu cultri uororum spontanea restitutio.
5. Specialiora circa flatum vermium, calculorum, secundinarum &c. expulsionem tabulae nostrae Medico-Practicae docent.
6. *ABROTANVM.*
  - 1) Datur, vel *mas*, seu *angustifolium maris*, quod vltatius est, vel *femina* foliis teretibus, seu *herba cupressus*, aut *chamaecyperissus*. Vtraque in hortis apud nos coluntur, & primum quidem licet odorem fere camphoratum spiret, amaritudine & reliquis facultatibus cum absinthio maxime conuenire existimatur.
  - 2) Prostant inde eius commendationes in asthma humido viscerum obstructione, indeque ortis vitiis serofolymphalibus, ictero, quartana & praecipue vermibus; porro, cum diureticum sit, cum sale nitri iunctum ischu-



ischuriam & calculi dolores leuasse legitur. Neque indignum est, vt, quid in vterinis morbis, præsertim fluore albo, valeat, vberius exploretur; saltem *Etmüllerus* hanc herbam plus in recessu habere putat, quam vulgo notum est, doletque, eam, cum veteres frequentissime dederint, hodie rarius in vsum vocari.

3) Dubie laudatur in febribus malignis, epilepsia & erubescenda plane superstitione ad libidinis irritamentum, aut fascini solutionem, aut ad lemures fugandos puluinari supponitur. Certius *semen* huius herbæ lumbricos necabit.

4) Externe in vfu est ad regenerationem, atque incrementum capillorum. Cæterum adhiberi potest in *infuso, decocto, extracto, oleo infuso & destillato.*

#### 7. PORRVM.

1) Culinis notissimum est, tam *capitatum latifolium*, quam *schæno prasum*, seu *porrum iuncum* foliis cauis tenuioribus, & cum odore, sapore & qualitate cæpas & allium, de quibus supra egimus, æmulatur, non attinet hic multa de viribus eius subiungi.

2) Laudatur alias ad asthma & tussim humidam tenacem, inprimis, ad claram vocem obtinendam, porro ad sterilitatem auferendam, (sed incerte) & extus ad hæmorrhagiam narium, morsus, venenatos & vlcera. Officit autem, interne datum, nephriticis, non æque oculis, vt fert vulgaris opinio.

#### 8. TANACETVM.

1) Herba & flores & semen in vfu sunt, atque sapore subamaro penetrant & odore forti acidas particulas cum oleosis & sulphureis tenuibus vaporosis coniunctas sibi inesse, non plane obscure significant; sic ad resoluendum & roborandum, speciatim vero ad extinguendos vermes efficacia reperiuntur.

2) Scopo itaque anthelmintico planta hæc tum intro sumi, tum extus adplicari (præcipue *oleum* eius *destillatum*) potest, dum modo subiecta non plane tenera sint, nec



ad commotiones orgasticas procliuia; vbi parce aliis admiscendum est.

- 3) Apprime quoque conuenit (non fecus ac *matricaria*) in frigidis flatulentis vteri morbis, colica mucida flatulenta, & a quibusdam celebratur ad calculum, mens & foetum mortuum pellendum, itemque in hydrope & febre quotidiana, id quod experientiae vltiori commendari meretur.
- 4) Probator est effectus eius *externus* in tumoribus frigidis, oedemate pedum, quin etiam in paralyfi & aridura artuum mirabilis, & *succus* in fissuris manuum, vlceribus antiquis &c. utilis dicitur.
- 5) *Semen* in locum *verisantonici* ordinarie substituitur, vt *Etmüllerus* monet, nec tantum ad intestinorum sed & praecordiorum vermes conducit ex sententia *Sennerti*.
- 6) Vsurpantur *infusum*, *aqua destillata*, *essentia*, *oleum destillaum* &c.

#### 9. SEMEN SANTONICI seu CINÆ.

- 1) Olim Alexandria delatum e peregrino absinthio aut abrotano colligi credebatur, nunc e Gallia ad nos peruenit, quod an genuinum sit, an vero ex tanaceto desumptum, disputant auctores.
- 2) Est autem vulgare hoc semen satis acre & amarum, vnde non modo ad lumbricos interficiendos confert, sed & vi sua resolvente & diuretica chloroticas itemque stomacho imbecilli ictero & morbis frigidis serosis laborantes non nihil alleuare potest.
- 3) *Zwingerus* obseruasse sibi visus est, pueros, qui non verminabant, ab usu huius seminis male habuisse, & cauendum vtique est, ne nimis larga dosi teneris infantibus obtrudatur.
- 4) Datur, vel *decoctum* cum *lacte*, vel *melli immersum*, vel in *confectione*, ac nisi primis diebus vermes prodeant, ad expellendos illos laxans subiungere conueniet.



## IO. MVSCVS CORALLINVS.

- 1) Non solum coralliis, sed & aliis conchis marinis, & rupibus adnasci traditur, & ob virtutem præcipue anthelminticam plurimis celebratur.
- 2) Præterea, cum ex subtilibus terreo - salinis particulis, quas habet, qualitatem absorbentem, temperantem, leniter abstergentem & sub adstrictoriam hauserit, nonnulli hodie ipsum commendant in immodico alui profluvio, diarrhœa infantum acri torminosa & confusiones minante, itemque in dysenteria.

## II. AGRIMONIA.

- 1) Resoluit hæc aliquantum & subadstringit, nec anthelminticis adnumerari potest, nisi forte ex eo, quod in vlceribus verminosis curandis præstans celebretur.
- 2) Nobilitata est, præcipue in morbis iecinoris (nam singulare hepaticum audit) oppilatione eiusdem, ictero, fluxu hepatico, cachexia; deinde & utilis esse legitur in catarrhis pectoris, febribus chronicis, dysenteria, fluore albo, gonorrhœa, calculo, imprimisque in exulceratione renum, mictu cruento & urinæ incontinentia; quamquam salutare hæc vires nec dum abunde expertas esse doleamus.
- 3) Non tamen poenitebit huius aliorumque simplicium indolem paullo solertius examinare, præsertim cum aquam ex hac herba & *taraxaco*, congruenter destillatam, in multis tumores pedum frigidos & œdemata hydropica per diaphoresin & diuresin sustulisse compererimus.
- 4) *Externe* proficit in vlceribus putridis, & ut aliqui volunt, in inflammatione testium & ani, scabie, statu pediculoso; iusto autem magnificentius ad gangrænam & cancrum efferri videtur. Neque facile credi potest, capiti suppositam perpetuum fere somnum inducere, vel a *cataplasmate* ex eo clauos pedum absumi, vel ab eius gestamine strumas discuti.
- 5) Vsurpantur agrimonix *decoctum*, *aqua destillata*, *syrupus*, *extractum*.



## 12. CHALYBS PRÆPARATA.

- 1) Hæc fit ex limatura crebrius aceto acri madefacienda, exsiccanda, terenda. Supplet autem croci martis simplicis vicem & adhiberi quidem cum fructu potest loco aliorum operosius ex ferro eliciendorum puluerum, sed ad scopum anthelminticum rarius & incommodè vsurpatur.
- 2) Cum semel de chalybe mentio iniecta sit, iuuat de martialium medicamentorum virtutibus, quas hodierni plerisque chymiatrī immensis pene encomiis concelebrant, paullo plura attexere.
- 3) Tribuuntur ferro aperiendi, absorbendi, adstringendi, alibi & fundendi, colliquandi facultates; quæ cum pugnantia & contraria esse viderentur, varia dissidia & speculationes pepererunt; at si Chymiam & manifestius in sensus incurrentem experientiam consulere libeat, vix aliter fieri potest, quin adstrictoria qualitas, gradum tantum in diuersis ferri productis discrepans, marti præcipue adiudicetur.
- 4) Hanc enim & principia ferri, nempe abundans terra limosa, styptica, acidis quibusdam particulis interspersa, ac numero multis, sed mole paucis inflammabilibus atomis coniuncta, & sapor omnium martialium austerus ac ponticus, & denique effectus in corpore humano plerumque alui adstrictorius, cum pulsu citiore, colore faciei rubicundo &c. demonstrant.
- 5) Cum itaque ferrum potissimum partes solidas adficiat, easque stringendo solum crassos stagnantes humores interdum promoueat, tum sane magna cautio adhibenda est, ne ipsum in iis casibus, quibus adstringentia ominosa & inimica sunt, temere præbeamus, idque eo magis, quo frequentius, eius vsus ad præstandam apertionem commendatur.
- 6) Certe si absorbendo scopo propinetur (vbi omnino ad dispersum per humores acidum fortuito arripiendum & inuoluendum secundum vulgarem opinionem largius dari debet) sæpe non mediocrem detrimentum infert



fert v. g. hypochondriacis, lienosis, melancholicis & scorbuticis, quos præsertim teneriores in anxietatem, contractiones spasticas & tormina coniicit, tantum abest, ut vitiosum, quod supponitur, acidum imbibere nedum fundamentum morbi subruere valeat.

- 7) Ex eodem erroris fonte, quo tum pulcre abforbere, tum aperire finguntur, fluxit martialium laus in obstructionibus viscerum, cachexia, chlorosi, suppressione mensium, morbis arthritico spasticis, quin & hectica; sed quam ambigue operentur, quam sæpe damnosa sint, immo hecticis letifera, non potest fugere attentiores.
- 8) Pariter intempestivus eorum & præmaturus usus antequam alia præmissa sint, nocet in hæmorrhagiis, ictero & atrophia, & generatim tenendum est, crocos martis, nisi sub declinatione, aut exitu chronicorum malorum ad tonum denique roborandum exhibeantur, plerumque nihil boni promittere.
- 9) Illud tamen notare convenit, vim adstrictoriam, quam martialia obtinent, pro diuersa eorum præparatione magnopere, vel intendi, vel imminui atque aliquas ferri tincturas sic dictas, quæ cum certis salibus largius confectæ sunt, mitiores & abstergentis simul virtutis esse participes; unde & effectus variat. *vid. infra.*
- 10) Multi & inter eos *Sydenhamius* simplicem limaturam, aliis productis præoptant, & hæc reuera quoque solubilior & ad abforbendum aptior est crocis, (quos ut notum est, acida difficillime solvunt) adeoque dum tota facilius solutionem subit, in hac noua concreta textura, a vi sua adstringente plus remittit multisque aliis martialibus temperatius operatur. De minera ferri cruda vero, quam similiter dictus auctor extollit, idem adfirmare non licebit.
- 11) Cæterum non frustra chalybs ferro mitior existimatur; quippe in priore maior abundantia *φλογισ*, & par-cior styptica crassa materia, huiusque etiam intimi-



or attenuatio obueniunt. *Confer. Stablii opusc. chymicum.*

- 12) *Aqua exstinctionis fabrorum* a quibusdam laudatur ad lienis tumorem & externe in scabie, pedum oedemate; vti lac, in quo chalybs ignita sæpe restincta est, in clysteribus ad dysenterium vulgo præscribitur. Sed vel parum efficit, vel in caute datum adstringendi scopo nocumentum sæpe minatur.
- 13) In vulgaribus crocis martis, illud maxime desideratur, quod nulla partium separatio fiat, sed crassiores stypticæ simul cum aliis confusæ relinquantur, a quibus & adstrictio fortior & præsentius damnum existunt. Exempli horum sunt *crocus martis sulphuratus*, siue per simplex sulphur, siue tenerius & copiosius per hepar sulphuris paretur, *crocus adstringens simplex* per vitionem, seu reuerberium confectus, *crocus e vitrioli martialis destillatione* relictus & probe edulcoratus, *crocus e præcipitatione* eiusdem vitrioli per alcali; (qui tamen specialem plane & in igne volatilem genium e sale recepit, & nisi e puro martiali paretur, in tenerioribus partibus rosiones & ardores concitat, etsi vulgo terra vitrioli dulcis dicatur) *Crocus martis solubilis* quoque, vt vocant, e ferro cum sale ammoniaco tractato restans magna ex parte huc referri debet, itemque *antimonium diaphoreticum martiale Ludouici*, quamquam hoc (ob intertextum regulum & factam cum nitro detonationem) prioribus multo lenius, ideoque præferendum sit.
- 14) Vnde *Stablio* gratiam debemus, quod elutriatione subtiles ferri particulas, in tutiorem vsum colligere, vnoque labore, tum tenuem mitiusque adstringentem rubellum, tum crassiorem stypticum crocum nigriorem (qui vsui externo inferuire potest) parare docuerit in confectioe *croci martis antimonialis*, vid. *supra*.
- 15) Cum *teneriore Stabliano* conuenit *Zwelfferianus* ex limatura



tura ferri cum nitro detonata exurgens, cuius tamen prouentus inde longe parcius est.

¶ 16) Dictos crocos magis adstringentes *Paracelsus* vlceribus glandulosis aliisque perenniter manantibus inspergit, idque felici desiccante & consolidante effectu, si ante penitus emundata fuerint. In hæmorrhagiis autem externis eosdem crocos, præsertim vbi ossa, adrosionem facile subeuntia, proxime adiacent, solos, aut largius adhibere non consultum est.

¶ 17) Iam supra diximus, *salsa martis præparata*, variæ indolis esse. Sic temperata vegetabilium acida ferro copulata abstergentem & aperientem efficaciam conciliant, vt adstringens leuissime sentiat; quo pertinent *tincturæ martiales* cum diuersis vegetabilium succis paratæ, *sal martis subdulce*, aceti ope confectum &c. Contra *spiritus salis* enormem adstringendi potestatem ferro superaddit, quod ex tractatione martis, vel hæmatitæ (vnde *liquor stypticus Barckhusii*) cum *sale ammoniaco*, aliisque experimentis intelligimus; neque multo minorem stypticam vim ea producta martis offerunt, quæ *spiritus nitri* interuentu componuntur.

¶ 18) *Acidum sulphuris* mitigat magis, quam intendit adstrictoriam qualitatem, testimonio *vitrioli martialis*, quod ad obstructions viscerum, cachexiam, chlorosin, mictum cruentum (vbitemperantibus subiunctum suauis adstrictione confert) vermes necandos &c. commendatur, & omnino aloëticis additum laxantem effectum potius promouet, quam villo modo sufflammat. Neque hoc, si purum & ab omni venere prorsus liberum sit, quale e *minera martis Hassiaca* educitur, emesin ciere solet, dummodo bene dilutum aut gratiore quodam subsidio temperatum propinetur. Si vero e ferro vulgari aut plane e limatura fabrorum, aut cum spiritu, e vitriolo venereo destillato, confectum sit, tum vomitorium in sensibili-



ribus sæpe euadere, non est mirandum, *confer. Stab-  
lius lococitato.*

19) E *tincturis*, aut solutionibus, præcipue *Ludouici tin-  
ctura vitrioli martis tartarificata* probatur ad vsum  
non æque adeo aperientem, ac tonicum in hypo-  
chondriacis & aliis chronicis morbis remittentibus,  
aut exeuntibus, vbi & adpetitum resuscitat. Ne-  
que contemnenda, licet pretiosior, est *Zwelferiana*  
ex vitriolo martiali & terra foliata tartari &c. parari  
solita.

20) Consulto autem plura e ferro producta, quæ partim  
superflua sunt, partim inepta fere sedulitate extor-  
quentur, præterimus, cum generatim fatendum  
sit, pauca martialia nobis sufficere posse, & in simpli-  
ci croco teneriore aut tinctura non minores  
virtutes, quam in aliis magno sumtu & adparatu quæ-  
sitis deprehendi.

### 13. VITRIOLUM SOLIS & LVNÆ

1) De *crystallis lunæ* super iam quædam monuimus, heic  
autem nemini suademus, vt scopo anthelminthico  
eas exhibeat. Quid per se, pilulis aliis inuolutæ,  
aut in tincturam redactæ, valeant in aberratione  
phantasiæ, mania &c. cum multi prælici optatam  
efficaciam celebrent, vltcrius adhuc experiundum  
est.

2) *Vitriolum solis*, quod ex auri solutione, ad dimidium  
fere euaporata, aut abstracta per spiritus vini instil-  
lationem denique componitur, catharticam, an-  
thelminthicam & roborantem vim (ferme vt *vitriolum  
martiale*) habere prædicatur, sed rarius in vfu est,  
tam ob pretium, quam successum concepta spe ple-  
rumque inferiorem.

3) Pertinet huc *Fr. Burri* experimentum, qui aurum op-  
pido candens in vino aliisque potulentis frequenter  
restinxit & liquores illos palpitationi cordis aliis-  
que malis feliciter opposuisse dicitur. *Confer. Borri-  
shius.*



## 14. FEL TAVRI

- 1) Penetrantius hoc ducitur bile ex aliis animalibus defuncta, cæterum acriore stimulo irritat, abstergit & lumbricos enecat.
- 2) In vsum proinde illud vocant ad clysteres stimulantés & phœnigmos in apoplexia, paralyfi, lethargo. Vbi autem scopus anthelminticus animo obuersatur, cum aloë emplastri seu vnguenti forma vmbilico adplicant, cui si stricte adhæreat, aiunt certo vermes adesse. Additur sæpe myrrha & oleum colocynthidis, vnde aluum laxat.
- 3) Cum vero valde acre sit, tum interne cautissime & parce dandum est, quamuis nonnulli id hepaticis morbis inprimisque ictero conducere prædicent. Eadem cautio necessaria est, vbi oculis, deterfione nebulæ, vngulæ &c. indigentibus, vel auribus in statu surdaestro adinouetur.
- 4) De reliquo sunt, qui hoc fel cæteris elixiris proprietatis ingredientibus addunt, indeque adfuso certo menstruo debitaque enchirefi adhibita elixir prorsus dulce concinnant, multis chronicis morbis tollendis, vt celebrant, accommodatum.

## 15. COSTI DULCIS RADIX.

- 1) *Costus dulcis* & *amarus* ex vna eademque planta Arabica depromti & maturitatis gradu solum differre traduntur. Prior autem magis vsitatus est & *cinnamonum album*, seu *canela alba* quoque ob saporis quamdam conuenientiam nuncupatur, propterea cum *Winterano cortice*, qui & idem cognomen gerit, non confundendus.
- 2) Optima & ab adulteratione, cui subiacet, magis libera hæc radix habetur, si sit recens, densa, non cariosa, suaueolentis odoris & mediocris acrimoniæ; e qua descriptione principia eius non obscure coniecere licet; facultates autem nonnulli adeo efferunt, vt in costo omnium aromatum virtutes collectas esse arbitrentur.



- 3) Manifestius resoluit, roborat, flatus dispellit & diaphoresin pariter, ac diuresin modice adiuuat; vnde in morbis frigidis serosis catarrhalibus languidis, ictero, vrinæ vitiis laudatur, præcipueque stomacho debili, cruditati, ructibus, indeque natæ colicæ suauiter succurrit.
- 4) Vterina quoque censetur, & quamquam menses suppressos reuocare nequeat, tamen cum fructu datur chloroticis, imminutione fluxus, aut dolore spurio, flatulento ante & post partum laborantibus.
- 5) Non minus hanc commendatam legimus in cephalæa, paralyfi, apoplexia, epilepsia (sed hic perquam dubie) morfu viperino; multique costum mandere præcipiunt, cum in febribus malignis visitantur decumbentes.
- 6) Adhibetur in *substantia, infuso, essentia*, quam pro analeptica habet *Ettmüllerus*, nec ignota sunt *extractum maro costinum Mindereri* ad vsum internum, & *oleum costinum* extus in atonia partium vtilius, quam in rigoribus febrium intermittentium compescendis.

#### 16. CYPERI LONGI & ROTVNDI RADIX.

- 1) Protrudit plantam arundinaceam seu iuncum odoratum & præstantissima in palustribus Asiæ & Aegyptii locis crescit; vtque rotunda vulgo præfertur, sic pariter aromaticam indolem spirat & vires præcedenti non absimiles possidet.
- 2) Aequali igitur laude adficitur in vitiis lymphæ & ferimucidis, atonia stomachi, intestinorum, vteri, aliorumque viscerum, &c. quamquam rarius eam hodie vsurpari moneat *Ettmüllerus*.
- 3) *Palmarius* hanc aduersus pestilentiam valere prædicat. Sed externe certius proficit in relaxatione partium, tumoribus frigidis, debilitate paralytode diuturna rheumatica, luxatione &c. Cæterum ad pulueres odoriferos expetitur.
- 4) Vtendi modus cum præcedente conuenit. Extus in *sacculis, fomentis vinosis* &c. applicatur.



## 17. MEV seu MEI RADIX.

- 1) Dicitur a *Tournefortio fœniculum Alpinum*, ac licet in montosis Germaniæ locis passim sponte proueniat, tamen & in hortis colitur ob virtutes, quas principia sulphurea fragrantiora & semi aromatica eidem ingenerant.
- 2) Resoluit enim satis valde, roborat & carminatiuis adnumeratur, indeque ad pectorales mucidos catarrhos, deprauationem lymphæ & feri cachecticam & anasarcodem, icterum, inflationes, atoniam viscerum corrigenda utilis habetur.
- 3) Porro diuresin promouet & præcipue frigidis vteri morbis leuamentum adfert, vti vulgo in vsu est ad menses prouocandos, suffocationes vteri, dolores post partum &c. An vero & laudes impleat in fluore albo tollendo, dubitare nos iubet experientiæ frequentioris defectus.
- 4) Externe in tumoribus frigidis, nodis mammarum &c. itemque in doloribus calculi & vteri (in *balneo* vel *fomentis*) laudatur; cæterum ea ratione & formula, qua *costi* & *cyper*i radix, adhiberi potest.

## 18. CHAMOMILLA.

- 1) *Flores* præcipue in vsum vocantur, & sunt, vel vulgares aruenses, vel Romani in hortis colendi, qui ob largius principium sulphureum prioribus magis odorati penetrantes & acres, existunt.
- 2) Vulgaribus insunt partes oleosæ suauis sulphureæ mucilaginis non pauca interfusæ, a qua compositione facultas eorum leniendi, emolliendi, mitius resol- uendi & roborandi generatim deducitur.
- 3) Plerique etiam hinc merito carminatiuam virtutem illis tribuunt, & in flatibus potenter discutiendis, indeque natis torminibus, doloribus post partum, quin & in colica conuulsua summum in eis præsidium quærunt.
- 4) Nec minima virtute hi flores leniunt pectoris morbos, inprimis vero & præsentius tumorem stomachi &



cardialgiam, ac spasticos dolores calculum comitantes.

- 5) Incertius laudantur in febribus intermittentibus (quamquam febris fugæ eorum præstantiæ plurimi auctores adplaudant) in pica & malacia, obstructione viscerum, scorbuto, malo hypochondriaco, mensibus suppressis, vermibus, præterea in cephalalgia, memoriæ & sensuum debilitate &c. Licet enim ex supra dicta qualitate ad leuandum nonnihil conferre possint, tamen insignem quamdam & laudibus parem efficaciam edere in talibus malis raro, aut numquamprehenduntur.
- 6) Externe egregie prorsus emolliunt, discutiunt & mitigant, tum in plerisque dictis adfectibus, tum in contusionibus, sanguine coagulato, tumore vteri flatulento, itemque in tumore genitalium post partum, unde frequenter adduntur sacculis, fomentis, cataplasmatibus resoluentibus, maturantibus, paregoricis clysteribus, iniectionibus vterinis carminatiuis & balneis.
- 7) Interne dari potest eorum *decoctum*, *aqua destillata*, *syrupus*, itemque *elæosaccharum* ex *oleo chamomillæ destillato saphirino*; quod quidem oleum etiam externe in doloribus colicis, cardialgia, statu surdastro &c. adplicatur. Crebriori vsui extus inseruit *oleum coctum*, quod, tamen an paralytica & atrophica membra restituat, dolorem ischiadicum, anginam &c. adeo leuet, aut febres intermittentes depellat, ambigitur. Illud credibilius est, idem rectificatum conuenire ad resolutionem & roborationem membranacearum partium efficacius præstandam.
- 8) Cæterum chamomilla *Romana* ab aliis vulgari præponitur, ab aliis vero ob penetrantior vim magisque calefacientem ad externos solum vsus neruinos, resoluentes &c. adhibetur.



## 19. HORMINVM.

- 1) Præ cæteris in officinas recipitur *horminum*, seu *sclarea sativa maior*, quam & ob convenientiam foliorum ac virium Germani adpellant Römische Salbey. Acris hæc est citrati odoris ac maxime resolventem & roborantem qualitatem habere censetur.
- 2) Speciatim vero complures hanc herbam vterinis adfectibus consecrant, eandemque in malo hyfterico, partu promouendo, & apprime in fluore albo singulares dotes ostendere monent, quibus vt frequentior experientia maiorem fidem & ad sensum præbeat, valde optamus.
- 3) Pariter leuamen, aut auxilium quoddam promittit in morbis catarrhalibus mucosis, debili ventriculo, colica. Nec semen illaudentum est ad oculorum mala acriora, quæ mucilago inde extracta lenit, item granum huius feminis oculo inditur ad extraneas res illapsas educendas.
- 4) Extus folia sternutamentum cient, alias & fugillationibus & vulneribus, vlceribus, dentium vacillationibus, mensibus suppressis (in balneo) & fluori albo (in unguento) conuenire dicuntur.
- 5) Adhibetur horminum in infuso, decocto, aqua destillata, essentia, spiritu; cæterum & œnopolis inferuit ad vinum ope eius & florum sambuci moschatellino sapore inbuendum.

## 20. NUX MOSCHATA.

- 1) Duplex habetur, *oblonga*, quæ *mas* vocatur, & *rotunda*, *fœmina* dicta. Illa maior est, vilior, mace fragranti destituta, & ab Indis contempta, quamquam vulgus nostras eam pluris æstimet in sterilitate fœminarum & perperam Mutter-Moschaten adpellet. *Vulgaris rotunda* vero merito nobilior reputatur, quam arbor quædam in insulis Moluccis, præcipue in Banda profert, extus crusta viridi & villosa primum, deinde sub maturitatis tempus luteis, aut purpureis punctis interstincta obductam, sub qua sponde rupta latet hæc

NUX,



nux, seu nucleus siccandus solis calore & a mace, cui adhuc inuolutus est, segregandus, & calce ab imminenti corruptione defendendus.

2) Turget autem largo fragranti oleo (ex cuius copia etiam bonitatem huius nucis, si acu pungatur, cognoscimus) acriusculis & terreis partibus interiacentibus, unde facultate pollet discutiendi, roborandi & subadstringendi.

3) Commendata ideo legitur in catarrhis capitis, vertigine, sensuum ac memoriæ imbecillitate, apoplexia, aphonia, lipothymia, porro in oppilatione hepatis, tumore splenis, dysenteria, ischuria, gonorrhœa, interna exulceratione, præcipueque in vterinis morbis, sterilitate, fluore albo, grauidarum commotionibus & abortus periculo, venenis & virulentis morsibus.

4) Sed omnino plurima hæc nondum adeo clara & explorata, ut fidere liceat, multa obiter tantum & neglecto fere circumstantiarum discrimine ac posthabita aliarum caussarum auxiliatricium, ut videtur, consideratione, obseruata sunt.

5) Manifestius hæc nux stomacho & intestinis suppetias fert in nimio vomitu, diarrhœa, lienteria, colica flatulenta, nec spernenda est in halitu foetido, immodico mensium fluxu, in doloribus post partum, vteri inflatione (ubi & in suffitu laudatur) stranguria, vrinæ incontinentia leuiore. In fluore albo autem si præmature adhibeatur, nihil salutare promittit.

6) Vulgi experimentum est per nucem moschatam, cum alumine mistam, febres intermittentes compescere; at id quoque præpropere tentatum aliorum adstringentium ritu grauiora mala importat, & cum tutiora prostant, iure repudiandum est. Licet enim nux ipsa magis sopiat, quam adstringat, alumen tamen, quod hic in alieno choro pedem ponit, adstringendo nocet.

7) Nimius vsus ebrietatem, somnum, lethargum quin & vitæ discrimen adferre dicitur, uti idem voracibus para-



paradisiacis Indorum auibz exinde contingere auctores tradunt.

- 8) Externe atoniam partium efficaciter emendat & in cardialgia frigida, cephalæa, paralyfi, papillis mammarum excoriatis consolidandis & supradictis morbis crebro adplicatur.
- 9) E præparatis prostant *oleum expressum*, quod maxime vſitatum est & basin balsamorum plerorumque constituit, præterea *oleum destillatum*, quod multo subtilius & potentius existit, & *aqua destillata*. Ex India aduehuntur *nucæ integræ* cortice viridi adhuc instructæ *conditæ*, quæ vt alias ad bellaria, sic etiam a Medicis ad corroborandi vſum expetuntur.
- 10) Præter corticem exteriorē nux myristica matura aliis adhuc filamentis proxime obuoluitur, quæ *MACEM* vocamus. Atque hæc vires nuci haud dispares obtinet, nisi quod tenerior, penetrantior & pretiosior reperiatur; vnde plura de ea adicere superuacuum est.
- 11) Externe *pulvis macis* in vlceribus tibiæ inueteratis ab *Etmullero* commendatur, *oleumque* eius *destillatum* scopo roborante, carminatiuo, vt *oleum destillatum corticis aurantiarum*, adhibetur & subinde ad correctionem purgantibus parcissime additur.
- 12) Ex arbore moschata denique *gummi* sudare narratur, quod rubicundum est & odoris, dum accenditur, longe suauissimi, ad partium debilitatem, arthritidem & podagram a *Montano* celebratum.

## 21. TESTICVLI EQVINI.

Hi quoque laudantur in colica, partu difficili pelendo, foetu mortuo, secundinis & lochiis remanentibus; sed deficit experientiæ perpetuitas.

## 22. STERCVS EQVI.

- 1) Ex pabulo auenaceo discussoriam qualitatem haurire creditur & magnam vulgo gloriam habet in colica spasmodica, passione hysterica, ictero, morbillis & variolis (quas a succo eius expelli perhibent) angina  
X X
& cum



& cum primis in pleuritide; vnde sunt, qui *syrupum B. Lutheri* ex hisce excrementis, paratum esse adfirmant in colica, & malo hyfterico maxime celebratum. Confer. *Etmullerus*. Coquunt autem communiter hæc excrementa cum cereuisia, atque hoc decoctum in catarrhalibus pectoris pathematibus multa cum iucunditate a nonnullis bibitur, vulgo das *Pferde-Bier*.

- 2) *Externe* etiam in angina & stranguria laudatur; at vbi-que non modo remedium est elogiis impar; sed & multis nauseosum, ideoque talibus relinquendum, qui iucunditatem ex ipsius vsu percipiunt.

23. STERCVS LVPI.

De hoc idem iudicium eo magis valet, quo minus adhuc expertum est, nec attinet plura de his sordibus proponi.

24. ZIBETHVM.

- 1) Materia hæc vinctuosa non e testiculis, vt creditum fuit, sed e peculiari folliculo membranaceo, inter anum & genitalia sito, animalis cuiusdam Indici ad caninum potius quam felinum, vt *Langius* autumat, genus pertinentis, depromi, indeque cochleari, licet magno cum animantis cruciatu, identidem eximi narratur.
- 2) Vti autem saporem sebaceum, in recessu acrem, & odorem validissimum præ se fert, ita subtilibus sulphureis fragrantibus & oleosis partibus maxime abundat & roborantis, ac neruinæ virtutis plenum habetur.
- 3) De analeptica facultate digladiantur adhuc auctores, plerique merito dubitant. Quin & in totum internus zibethi vsus nonnullis medentibus suspectus, vt multis ægris molestissimus & aduersissimus est; etsi ab aliis paruula dosi spiritibus odoriferis, aut congruentibus vterinis admixtum præbeatur, in primis hy-stericis.
- 4) *Extrinscus* etiam caute adplicare idem conuenit, nam pauci penetrantem eius & subfoetidum odorem ferunt.



runt & debiliores foeminae sensibiles hystericae aut acrioribus sanguinis commotionibus & haemorrhagiis subiectae grauius saepe inde adficiuntur. Extra hunc casum laudatur in atonia nervosarum partium, praecipue in graui auditu, vbi cum aliis in aurem immittitur, & in excitandis epilepticis, tum in colica umbilico inunctum, & in malo hysterico, si vaginae illinatur.

- 5) Aperte autem fatendum est, nihil magnopere hoc pretioso medicamine effici, quod non parabilioribus & vernaculis praestare liceat; vnde eo carere commodissime possumus. Ceterum haec substantia formulis parce insinuari debet, alioquin totam compositionem zibethi odore nimium infectura.

## 25. SILICES.

- 1) Efferuntur, vt idonei ad calculum frangendum, sed magnas spes vane concipi quotidie docet euentus.
- 2) Destillati omnino suggerunt nonnihil acidi, atque alias igniti & in vino saepius restructi vinum diureticum reddere dicuntur; quamquam hinc maiores virtutes expectantem facile quoque opinio fefellerit.
- 3) Prostat *tinctura silicum*, quae num acriore alcalina praestantior sit, an singularem vim e silicibus, qui cum alcali in igne efferuescunt & sulphureum deinde odorem spirant, imbiberit; certius adhuc explorandum est. Vilior habetur *tinctura nephritica Amelungi*, quam certe neutiquam laudes datas aequare, nec e solaribus, vt volunt, silicibus, praecalam nedum auream facultatem calculum resoluendi, petere, multi sentiunt.



## TABVLA XII.

DE

## ALTERATIONE GENERATIM.

## I. DEFINITIO.

Alteratio est alterum summum genus medicationis, quo præcipue humores, corpori nostro periculum minitantes, variis modis immutantur, corriguntur & præparantur, eum quidem in finem, vt postea tanto commodius & securius possint euacuari.

## II. DIFFERENTIA.

1. *Alterare*, seu in meliorem statum conuertere, dicitur quidem etiam de *motibus*, ac tum quidem vox μεταβολή, quæ actum mutantem & in aliud schema transferentem denotat, significantior est; sed vt omnes motus vitales excretionibus velificantur, ita alteratio de illis magis ambigue, de *materiis* autem eminenti sensu sumitur, atque hic vocabulum ἀλλοίωσις valet, quod rem, aliam indolem induentem, significat.
2. Præterea alteratio præcipue competit partibus *fluidis*, seu *humoribus*, de *solidis* autem quando dicitur, tum peculiarem respectum, siue ad humores, siue ad motus habemus; vbi particulatim ad motus erroneos e. g. conuulsivos placandos inseruiunt *specificæ*, de quibus infra.
3. Eiusmodi autem humorum alteratio non tantum *extrinsecus*, sed sæpiissime etiam *intrinsece* contingit, ita quidem, vt pristina crasis & consistentia non solum in aliam, sed interdum etiam in contrariam mutetur.

## III. INDICANTIA.

Alterationem suscipere conuenit,

1. in eo loco, vbi rem adhuc mutabilem esse ipsa sana ratio persuadet.
2. Quanda materia ad euacuationem est inepta.

3. Cæ-



3. Cæterum vltiorem generalemque indicantium catalogum iam iam sub *indicatis* exhibebimus.

#### IV. INDICATA.

Varia hæc sunt pro varia *indicantium* ratione, sed vti tabula generalis specialem eorum denominationem non concedit; ita *generalia* tantum *indicata* hic ponemus. Sic

1. humores *nimum tenues & fluxiles* exposcunt incrassantia, coagulantia, e. g. gelatinosa, pingua, mucilaginosa, glutinosa, absorbentia, acida, austera.
2. Humores *nimum spissi* postulant resoluentia, incidentia, digestiua, diluentia, colliquantia, & certo respectu abstergentia & discutientia.
3. Humores *cacochymica prauitate* peccantes vti differunt, ita cacochymia
  - 1) *salsa acris* corrigitur per diluentia, mucilaginosa, obtundentia, edulcorantia &c.
  - 2) *Biliofa* per nitrosa, absorbentia, diluentia,
  - 3) *Acida* per absorbentia.
  - 4) *Mucosa* per resoluentia.
  - 5) *Vappida, corrupta, putredinosa* per balsamica.
4. Partium solidarum *nimia strictura*, vel *rigor* indicat relaxantia, humectantia, emollientia, læuigantia, aperientia, demulcentia.
5. *Nimia autem laxitas* requirit adstringentia, roborantia, tonica. De partium solidarum *plenaria continui solutione* in tabulis chirurgicis exposuimus.
6. *Motus generatim aberrantes.*
  - 1) *Excedentes & nimum intensi* requirunt refrigerantia, demulcentia, anodyna, sopientia
  - 2) *Deficientes autem & remissi* postulant neruina, tonica, analeptica, calefacientia &c.
7. *Motus speciatim* plane aberrantes indicant *specificæ* & vulgo sic dicta *archæalia*; vti infra docebimus.

#### V. MODVS OPERANDI.

1. Quamquam multo difficilius sit *alterantium*, quam *euacua-*



*antium*, modum operandi explicare, sequentia tamen practica phænomena, quando iustius perpenduntur, multum lucis hisce tenebris adferre possunt.

- 1) Alterantia licet in quibusdam morbis bono cum effectu adhibeantur, non tamen absolute, semper, ubique & in omnibus subiectis hoc faciunt, sed alio tempore, vel in aliis, vel in iisdem ægrotis, licet in materiam non nihil agant, tamen nihil leuaminis adferunt.
- 2) Hic diuersus effectus tam manifestus est, vt, si alterantia sine habito respectu ad *tempus* morbi promiscue propinentur, non raro noxium effectum & turbas inducant.
- 3) Effectus alterantium variat pro ipsius animi differente constitutione. Sic subiectum, quod in actionibus voluntariis agile est, minorem requirit alterantis remedii quantitatem, quam indiuiduum languidum, ignauium.
- 4) Nulla est proportio physica inter quantitatem remedii alterantis, ad quantitatem humorum alterandorum. Quid enim est exilissima e. g. puluilli cuiusdam absorbentis & edulcorantis portio, quæ interdum vix vnciam adæquat, ad edulcorandam ingentem sanguinis massam, quartam vt plurimum centenarii partem pendentem?
- 5) Toto videmus die, multa remedia in loco quodam adfecto suos exserere effectus, licet illum locum non attingant e. g. pauca grana croci martis adstringentis sistunt hæmoptysin, dum vix primas vias attigerunt, Nonnulla venena letalia statim produnt symptomata, cum tamen post ea substantiam eorum quasi intactam, atque integram in ventriculo reperiamus. Porro suaueolentium rerum naribus perceptio quas non adfert mutationes, licet vix centesima grani pars corporis mixtioni accesserit. Neque suaueolentes solum, sed & foetidæ res pro subiectorum diuersitate similes eisdemque producant effectus. Experientia enim comprobatum est, vnam eandemque rem, ab  
alio



alio nomine gratissimo sensu acceptam, ab alio contra canem peius & angue abhorreri.

6) Quando hemiplectici per vsum quorumcumque balneorum marzialium, vel aliorum tonicorum restituntur, constans docet observatio, non brachium & pedem simul, sed successiue, &, quod consideratione dignissimum, in diuitibus quidem brachium, in pauperibus autem, vtpote famulitio priuatis, pedem prius restitui, licet vtraque læsa pars eidem remedio alteranti tonico eodem tempore immergatur.

2. Ex quibus omnibus iustissime concludimus, alterationes, quas hæc remedia producunt, non solis qualitatibus physicis & materialibus, sed etiam, & præcipue quidem, prudenti naturæ, quæ *per* & *propter*, immo interdum *contra* talia pharmaca operatur, adscribendas esse.

3. Et licet alterantia quædam, præcipue in primis viis, immediato physico contactu operentur e. g. diluentia, temperantia, absorbentia, naturæ tamen officium est, vt hanc alterationem, in materiis factam, recte adplicet, & effectum *physicum*, qui per se nondum salutaris est, in *medicum*, seu *salubrem* dirigat.

4. Neque tam parua remedii quantitas alium effectum, quam simplicem suæ indolis potest adferre impressionem. Hanc impressionem, sensum & perceptionem principium vitale imitatur, atque in eo loco, quo vult, tales effectus prodit, qui cum materiarum oblatarum conditione conueniunt. Notandum autem est quam maxime, naturam interdum erroneas facere adplicationes, quæ potius detrimentum, quam emolumentum vitæ & sanitati adferunt.

5. Restat paucis indicare, quibus modis remedia alterantia effectus suos *physicos*, quos natura in *medicos* deinde conuertit, producant.

1) Ad *fluidas* partes quod attinet, mixtio illarum per talia remedia alteratur, & quidem non tantum dissolutione principiorum, sed etiam admixtione, accessione,



ne, adhæſione, nouarum alterius generis partium, immo nuda interpositio, seu confusa tantum intercessio aliarum materiarum indolem cuiusdam materiæ & libertatem mutare, seu alterare potest, non quidem *mixtum*, tamen *aggregatum*.

- 2) In *solidis* partibus contactu suo phyſico ſenſum excitant, & ſecundum hanc ſenſus perceptionem motus tonicus, vel intenditur, vel relaxatur. Illa autem alteratio, quæ tacite priſtinam in partibus ſolidis texturam deſtruit, ſatis confirmat, quod naturæ magis quam remedio externo effectus eiſmodi admiratione digniſſimus ſit tribuendus. Huc pertinet deſtructio & quaſi deportatio næuorum maternorum, ſarcomatum &c. per contactam manus mortuæ, vel per alia remedia topica.

6. Cæterum conceptus illos & modos, quos de frequentibus in corpore *viuo* alterationibus vulgo ſibi formant & in his *ſexcentos*, ac plures *ſapores* ſapere ſibi videntur, pro typhone ingenii humani cum aliis declaramus e. g. quando fingunt ſpiritus iam effrenes ac immorigeros poros humorum male ordinare loco influxus per lineam rectam, iam ſegnes motibus ſuis alienis oblique flexuoſe, verminoſe, & per anfractus, mæandros, turbines, atque gyros ſumma imis miſcere, tranquillam & æterna lege incedentem contiguitatem corpusculorum, humoribus propriorum, innumeris alienis impulſibus collidere, atque hac ratione nouas ſemper ſpecies ramentorum exterere, quæ totidem nouas mutationes humorum conſtituant &c.

## VI. MODVS PROPINANDI.

In omni alteratione eo reſpiciendum eſt, vt

1. in tempore fiat.
2. Placide inſtituatur.
3. Debita euacuatio ſubordinetur.

## VII. CAUTELE ET OBSERVATIONES PRACTICAE.

1. Quoniam nulla alteratio peccantes humores ita mutare &




& corrigere valet, ut cum reliquis laudabilibus in gratiam redire & in corpore tolerari, vel ordinariis viis & motibus tacite quasi secedere possint, necesse est, conuenientes euacuationes illorum vsui subiungere, nec umquam in alteratione acquiescere.

2. Veteres semper fere euacuantia alterantibus adiunxerunt, & vix vnum sine altero in usum traxere; quam longe autem recentiorum praxis ab iis recedat, encomia alterantium & experientia testantur.
3. Error est fonticus, a solis alterantibus talem effectum, cui fidere liceat, exspectare: sane enim neque acutum, neque chronicum morbum sine concursu euacuantium curant, sed præparandis tantum materiis morbidis & mitigandis symptomatibus inferuiunt.
4. In *acutis* enim quando sine debitorum euacuantium subordinatione propinantur, nihil prærogatiuæ ægrotis præ aliis, qui nullis remediis utuntur, adferunt.
5. In *chronicis* sola alterantia nil constantis auxilii exhibere, quotidiana loquitur experientia in hypochondriacis, hystericis, arthriticis &c. Excipimus nonnulla primarum viarum pathemata, ubi alterantia, dum materiam alterandam immediate attingere possunt, præ aliis quidquam efficiunt.
6. Caute adhibenda sunt eius modi alterantia, quæ non tantum humores alterant, sed etiam simul motus secretorios minuunt, vel turbant, e. g. absorbentia terrea, martialia, salia volatilia vrinosa.
7. Alterantia, quæ præ aliis egregium usum habent & tam humores, quam vias ad meliorem euacuationis successum præparant, sunt sequentia:
  - 1) temperantia nitrosa & absorbentia ab effectu adstringente libera.
  - 2) Emulsiua (non rancida, aut mucida) ad gratum saporum edulcorata, & temperatis aquis carminatiuis, atque analepticis instructa.
  - 3) Acida moderata, præcipue succus citri.



- 4) Tincturæ alcalinæ cum volatilibus mixtæ & moderatis dosibus in chronicis exhibitæ.
- 5) Diluentia, aluum humectantia, urinæ ardorem demulcentia, somnum non stupidum, aut delirum, sed placidum promouentia.



## TABVLA XIII.

DE

## INCRASSATIONE.

## I. DEFINITIO.

*Incrassatio* dicitur ille actus therapeuticus, quo humores ex acredine salino-sulphurea, vel intermixta nimia aquositate plus iusto tenuiores, subtiliores, & orgasticis commotionibus ansam præbentes, in consistentiam crassiorem pulposam, & euacuationi aptiorem, rediguntur. Vnde remedia eiusmodi *incrassantium*, vel *condensantium* titulo efferri solent.

## II. DIFFERENTIA.

1. *Incrassatio* differt ab *adstrictione*; hæc enim vias & partes solidas adficit, illa humores & partes fluidas variat & immutat.
2. *Incrassatio* ipsa bene distinguenda est; alia enim est consistens, pulposa, volubilis, alia magis lenta, tenax, viscosa, mucida. Prior tantum naturæ est conueniens, quam artifex intendere debet; posterior vero penitus aduersa & noxia, hinc a Medico non instituenda.
3. Illa *incrassatio* duplici modo ab artifice perficitur, nempe
  - 1) *positiue*, dum humoribus nimis tenuibus & subtilibus reuera interponuntur res condensantes, vt gummi arabicum, tragacantha, saccharum, glycyrrhiza, amyllum,

2) *Pri-*



- 2) *Privatiue*, dum nimia aquositas diaphoreticorum ope dispergitur; vel acredo sanguinis massæ inhærens eamque colliquans, per acida quasi ligatur, quo nomine etiam absorbentia nonnumquam incrassant. Referenda quoque huc est incrassatio per anodyna.
4. Porro incrassatio dici potest *uniuersalis & particularis*. Illa qualitatem massæ sanguineæ valde fluidam & organicis expansionibus obnoxiam respicit; hæc materias serosas, biliosas, nimis tenues & subtiles seorsim congestas, & modo in capite, modo in pulmonibus, modo in intestinis hærentes inuoluit & ad euacuationem disponit.
5. Denique incrassatio alia instituitur per interna, alia per externa remedia, quæ ad obstipationem fluxus sanguinis, vel feri acris ex vulneribus, aut ulceribus per varia adminicula perficitur.

### III. INDICANTIA.

1. Licet humores ea sint conditione, ut potius in spissiore quam fluidiore consistentiam abeant, occurrunt tamen etiam tales casus, in quibus moderata incrassatio & necessaria & utilis existit. Exigunt vero eam.
2. Humores nimis tenues, volatiles, qui vel leuiter impulsu organicis commotionibus subiecti deprehuntur.
3. Capitis & pectoris affectus catarrhales, acres; præsertim tussis impetuosa, sine excreatione, & quidem pulmonalis, non autem hypochondriaca.
4. Acrimonia biliosa, inflammatorias stimulationes in ventriculo & intestinis produciens, choleramque morbum generans.
5. Alui nimia lubricitas.
6. Modum excedens sudoris excretio.
7. Diabetes, seu hydrops ad matulam, quæ ex nimia humorum resolutione originem sumit.
8. Fluxus sanguinis, vel feri acrioris ex vulneribus aut ulceribus.

### IV. INDICATA.

1. *Vegetabilia.*



1) *Simplicia.*

Rad. Althææ

Liliorum alborum

Liquiritæ

Maluæ

Symphyti

Tussilaginis

Herb. Maluæ

Flor. Liliorum alborum

Maluæ

Verbasci

Violarum

Fructus, nuclei &amp; semina mucilaginosæ, e. g.

Amylum

Auellanæ nuces

Auenæ cremor.

Citri succus

Cydoniorum semen

Dactyli

Ficus

Hordei cremor

Iuglandes nuces.

Iuiubæ

Lini &amp; Milii semen

Oryza

Passulæ maiores &amp; minores

Pineæ nuces

Pistaciæ

Pira exsiccata

Poma exsiccata

Psyllii semen

Sebesten

Sam. quatuor frigida  
maiora & minora

## Gummata e. g.

Ammoniacum

Arabicum

Ceraforum

Elemi

Iuniperi

Mastichis

Tragacanthæ

Terebinthina

2) *Preparata.*Diacodium *Montani.*Massa pilularum de  
cynoglossa.

Ol. Amygdalarum dulcium

Hyperici

Lini

Oliuarum

Nucis

Panis bis coctus simplex &amp; saccharatus.

Rob. Berberum

Ceraforum

Cydoniorum

Diamorum

Dianucum

Granatorum

R. bium

Saccharum hordeatum.

Species de Carabe.

Diatragacanthæ

Syrupus florum papaveris

Tinctura florum bellidis

Rosarum vitriolata

*Externe*

Farina volatilis

Glu-



Gluten opificum.	Sperma Ranarum
2. <i>Animalia</i>	3. <i>Mineralia.</i>
Butyrum	Aborbentia, terrea & mucosa
Caro Anguillæ	Acida, e. g.
Cochlearum	Spiritus Nitri
Ostreorum	Vitrioli simplex & dulcis.
Gelatinæ	Salis
Ichtyocola	Clyffus antimonii.
Lactinia	Cryftallus montana
Medullæ	Nitrum
Mel	Sulphur citrinum
Offa animalium varia.	Sulphuris flores.
Oua ad duritiem cocta.	
Pulmenta.	
Sperma Ceti	

## V. MODVS OPERANDI.

1. Ipsa natura suos habet incrassandi modos, quibus partes fluidas nimium attenuatas & resolutas emendat & spissiores reddit. Modo enim diaphoresin eum in finem instituit, vt subtile organicas particulas cum sero superfluo e corpore eiiciat, ne reliquam massam humorum in eandem fluiditatem & tenuitatem rapiant. Modo humores ad certas corporis regiones congerit, & aliquamdiu in iisdem detinet, vnde euenit, vt sanguis fluiditatem suam amittat & spissum atque nigricantem colorem induat. Modo ex partibus exterioribus ad interiora eosdem restringit & in alueis capacioribus detinet, hinc ob impeditum transitum per partes porosas spissescunt & fluiditate sua priuantur, id quod coctiones in febribus nos docent, quæ materiam febrilem inuoluunt, atque incrassant. Quid? quod frequentes diarrhœæ spissitudinem humorum inducunt, quia substantia fluidior nimis copiose educitur, atque egeritur.
2. Remedia autem quæ condensandi scopo adhibentur, triplicis sunt conditionis. Quædam principiis suis gelatinosis & mucilaginosis, tenuibus & rapacibus particu-



lis se interponunt, easque ligant atque figunt, ut debitum consistentiæ gradum nanciscantur. Hoc faciunt gelatinosa, farinacea, mucilaginosa, gummata, pinguia, lacticina, pulmenta, emulsiva, ova dura cocta.

3. Alia particulas subtiliores acres biliosas causticas coagulant, earumque fluiditatem impediunt. Id maxime faciunt acida, & præcipue nitrum prudenter adhibitum, quod nimiae tenuitati ab acrimonia dependenti admodum efficaciter opitulatur, quæ vero sit ratio cur acida mucilaginosa & pinguia subiecta, quæ vappidam indolem subierunt, inspissent, nondum aperte liquet, atque e chymia ulterius indagandum est.
4. Nonnulla terreis & mucidis substantiis tenuiores materias obuiscant, nimis acres & causticas impuritates absorbent; quorum in numero sunt terræ sigillatæ, testacea, vsta, præparata.
5. Aduvant quoque incrassationem frigus, quies, animi temperies. Quemadmodum enim motus caloris gelatinosas moleculas distrahit & humorum fluxilitatem auget, ita sub motu frigoris eadem moleculæ coalescunt, & reliquæ tenuiores particulæ in idem coagulum transferuntur. Hinc homines multum in frigore degentes sanguinis spissitudinem nanciscuntur. Referimus quoque huc frigida ingesta, remedia refrigerantia, & balnea frigida.
6. Scimus quoque, quod ii, qui vitam sedentariam gerunt, numquam de sanguinis fluiditate, sed potius de eiusdem crassitie conquerantur. Data propterea est homini quies nocturna, ne per vegetiorem & perpetuum motum nimiae corporis resolutiones & attenuationes fiant; culpandi vero sunt ii, qui omnem plane corporis motum respuunt, & nimiam spissitudinem humorum sibi attrahunt.
7. Animi pathemata ætiusiora, gaudium, libido, ira &c. humores nimis exagitant & attenuant, contra animi temperies exagitados humores condensat & spissiores reddit.



8. Sed paullo alia ætiologia formanda est, vbi de incrassatione per anodyna sermonem instituimus. Hæc enim cum humoribus nullum habent commercium sed motus vitales retardant & cohibent, e.g. *Massa pilularum de Cynoglossa*, *Diacodium Montani*. Notum autem est, omnia ea, præsertim anodyna, narcotica, sedativa, quæ motus refrænant, ad spissitudinem humorum inferendam apta esse. Sic motibus retardatis indidem humorum spissitudo incrementa capit. Fluiditas autem est motus intestini auctior gradus, intestinus vero motus progressiui sodalis est. Subiunguntur itaque congrua hæc anodyna reliquis incrassantibus, ad sensum irritationis obtundendum & ad fluxum minuendum seu, ut vocant, catarrhum acrem suspendendum.

## VI. MODVS PROPINANDI.

1. In incrassandis humoribus tenuibus lenia euacuantia semper sunt præmittenda, vbi sic dicta cholagoga conveniunt.
2. Residua tenuiores portiones per diaphoretica, diuretica & proportionatos corporis motus, ad tolerantiam repetitos, euaporentur & educantur.
3. Optimum ferme solatium ad corrigendos tenues humores ex fonte diætetico petendum est. Hic primas tenent nutrientia iuscula pingua, gelatinosa, carnes frixæ & assæ, farinacea, panis bis coctus, dulcia, saccharata, passulata. His ex pharmaceutico fonte iunguntur emulsiva cum gummi tragacanthæ.
4. Inspissationem denique inferunt tam acida, quam absorbentia. Si orgasmus sit coniunctus, incrassatio etiam perpetratur per acidum vitrioli, nitri, optime vero per nitrum purum crySTALLISATUM, aut regeneratum.
5. Materia acris incrassata in corpore relinquenda non est, ne vias impediat & stasibus magis ansam præbeat; quare præparata quantocyus educenda est.

## VII. CAUTELÆ ET OBSERVATIONES PRACTICÆ.

1. In hoc actu præcipue attendendum est, ne methodus per-



peruertatur, & humoribus adhuc acredine inquinatis incrassantia fortiora statim ab initio opponantur, aut viis adhuc impeditis incrassatione materiæ noxiæ stasibus simul ansa præbeatur. Semper itaque lenia euacuantia sunt præmittenda, sic reliqua humorum correctio eo melius succedet.

2. Hoc eo magis in catarrhalibus pectoris adfectibus, sedulo obseruandum est, ne partes acres in pulmonibus remaneant & exulcerationis labem iisdem affricent.
3. Sic eandem ob causam materia correctæ stimulo euacuatorio indiget, ne nouis morbis aditus aperiatur.
4. In tussi contumaciori sicca attendendum, an re vera a materia acri circa pectus hærente, & irritante illa proueniat, an vero hypochondriaca sit. In casu enim posteriori vulgaria illa becchica, spissiusculam substantiam inferentia, plus damni, quam emolumenti adferrent.
5. Dulcia, quæ nulla insigni acrimonia coniuncta prædita sunt, vti passulæ, glycyrrhiza, ficus, siliqua ceratonia, magis profunt, quam saccharum, quod facile tenacitatem importat.
6. Nitrum temperat acrimoniam feri & aliquam muciditatem inducit; idem præstat crySTALLUS montana.
7. Acida magis sanguinem & lympham inspissant, & commodè adhibentur, vbi horum exæstuationi occurrendum est. Prospiciendum autem est, ne in rheumate, acriore, aut pectoris vitio dentur, nec alioquin largius concedantur, nec facile cum absorbentibus & pinguius coniungantur, quia celerrime incrassant, & tenacitatem viscidam inducunt. Idem de terreis tenendum est.
8. Et quia pulposa illa & mobilis incrassatio facile in tenacitatem abit, aut euacuatio mox subiungenda, aut correctio adiicienda.
9. Humores nimis tenues vix vmquam pure aquosi, sed plerumque simul acriores sunt. Tanto magis in incrassatione humorum ab acribus, attenuantibus & stimulantibus



tibus abstinendum est. Absint itaque omnia falsa, aromatizata, vinum, alique potus spirituosi, ira, ventus, motus fortior.

10. Dyscrasia, vel praua humorum mixtio, omnino incrassationem respuit.

11. Primarum viarum impuritas prius educenda est, quam incrassatio suscipiatur.

12. Nulla fieri potest incrassatio, quin simul motus obtundatur.

13. Hoc memori mente tenendum, quod humores spissiores redditi, difficilius moueantur, impeditius quoque se & excretiones subeant.

13. RADIX LILIORVM ALBORVM.

1) Ad hanc constituendam larga mucilago paucis sulphureis & nitrosis particulis interpolata concreuit, e qua vires eius malacticae, lenientes & maturantes scaturiunt.

2) Quapropter quotidie a chirurgis additur cataplasmatibus, tumores duros mollientibus & ad suppurationem perducentibus; nec plane inutilis est in clauis pedum & ambustionibus.

3) Incertius laudatur ad dolores haemorrhoidum demulcendos, neque faciei maculas pro vana puellarum cupiditate tam pulcre detergit, neque haemorrhoides aperire, neque sanguinem coagulatum resolvere, neque menses & foetum, vt quidam tradunt, expellere reperitur.

4) Interne frequentius dantur *flores liliorum alborum*, qui praecipue in aquam destillati prodesse referuntur in partu difficili, hysterica passione, fluore albo, item in raucedine & pectoralibus morbis, catarrhis capitis & aphonia, *externae* in oculorum malis cutisque foeditate; *stamina* florum crocea, seu *antherae* ictero & pellendis mensibus destinantur. Sed notandum est, non absimilem radici facultatem in esse floribus, tot tantisque effectibus, vt experientia hodie consentit, fere vacuam.



- 5) Neque folia lili tusa & imposita cancerum mirifice leniunt. Cæterum prostat & *oleum liliaceum*, seu *lirinum* ad clysteres emollientes paregoricos & illitu vterinæ regionis ante & post partum, aliosque memoratos vsus adhiberi solitum.

IS. RAD. SYMPHYTI seu CONSOLIDÆ MAIORIS.

- 1) Mucilago cum copiosiore terra & acidulis quibusdam particulis, connexa viscidam huic radici consistentiam subministrat, indeque satis nagnam incrassandi, coagulandi & adstringendi potestatem.
- 2) Non probamus autem eius vsum internum, incrassandi, aut alio scopo, quamquam encomia eius in fluxu aluino, dysenteria, hæmoptysi aliisque sanguinis profusionibus, vlceratione interna, phthysi, calculo, diabete, gonorrhœa non raro audiantur.
- 3) Profecto, valida constrictione & oppilatione varias turbas inferre potest, sæpiusque infestiora morbo confectaria minatur, nisi quis illam cautissime & parce aliis interiungere norit.
- 4) Vnde tutior est *externa* saltem huius radicis applicatio, qua utique laudabile præsidium suggerit in relaxatione partium, luxatione, fractura, contusione, punctura neruorum, sanguine congrumato, tum alibi tum post venæ sectionem existente. Sed hic quidem sub initio staseos mature admouenda est, antequam humores plane extra circuitum substiterint, alioquin factam stasim grauius stringet & pertinaciorrem efficiet.
- 5) Confert etiam herniosis, & infantibus præcipue compluries optatum tulit auxilium, non item adultis, quibus diu indorso cubandi, aut quiescendi necessitas sæpe intolerabilis, interdum etiam noxia & periculosa est.
- 6) Cæterum & in vlceribus ac vulneribus conglutinandis laudatur; ancipiti vero retrocessionis euentu imponitur membris podagricis & ischiadicis, nec innocentius locis hæmorrhoidalibus ad dolorem, aut fluxum nimium reprimendum.
- 7) Opti-



- 7) Optime adplicatur in *cataplasmate*, deinde in *emplastro*. Prostant alias & *aqua destillata* & *syrupus* & *conserua* florum in prænotatis adfectibus vulgo interne commendata.

#### 16. FLORES VERBASCI.

- 1) Hi pariter ac herba in vsu sunt, præcipue latifolia vulgaris lutea, quæ & *thapsus barbatus* dicitur, atque e tenui mucilagine temperatis sulphureis & nonnihil oleosis partibus intexta, ad effectum lenientem, paregoricum, emollientem & aliquantum resoluentem inclinat.
- 2) *Interne* autem rarius hodie adhibentur, ex quo fit, vt allegata passim experimenta de vtilitate huius herbæ & partim radicis in pectoralibus morbis, catarrhis dysenteria, ictero, tympanitide, mensum promotione, quartana, pestilentia, hæmorrhagiis, admodum ambigua & obscura sint, a frequentiore proinde vsu lucem acceptura.
- 3) *Extus* (& secundum nonnullos *interne* etiam) magna his auctoritas est in doloribus hæmorrhoidum cæcarum & tenesmo, vbi aptissime effectui leni quidem, sed tamen egregio neruino admouetur *liquor*, in quem flores verbasci, in vitro conditi, æstu solis, vel in vitro massa panaria obuoluto, clibani calore fatiscunt. Hoc liquamen leuissime euaporatum per se in tenesmo, alias cum oleo ouorum illinitur.
- 4) Idem valet in procidentia ani non plane desperata & fordibus cutis serpigiosis, & aliquantulum in contusione tendinum ac neruorum; non æque in doloribus podagræ & dentium, aut in tympanitide; etsi huius morbi specificum esse celebretur.
- 5) Dubie tandem hæc herba *extus* laudatur ad stases sanguinis, vlcera, fistulas, strumas, morsus serpentum &c. Cæterum ad vsum prostant *aqua destillata*, *spiritus*, *oleum ex floribus*, quod præcipue ad clysteres emollientes, itemque ad defluuium capillorum inhihendum & flauum his colorem concilandum adhibetur.



## 17. MILIVM.

- 1) Siccius habetur hordeo, cæterum & inuoluere, increffare, temperare, fatisque eupeptum & bonum nutrimentum adfuetis præbere deprehenditur, præsertim si cum lacte, vel iusculo carnis in pultem decoquatur.
- 2) Sigillatim hæc pulmenta quidem destinant aciculis, frustulis vitri &c. deglutitis inuoluendis, vt sine noxa intestina transeant.
- 3) Celebratur alias decoctum milii sub nomine *syrupi S. Ambrosii* ad sudorem in febribus intermittentibus, variolis, immo in arthritide & hydrope salubriter euocandum; quod tamen an hordei decocto palmam hic præripiat, euidentioribus experimentis adhuc euincendum est.
- 4) *Externe* sacculi ex milio, cum sale tosto, laudantur in catarrhis capitis, cephalalgia sceminarum, tinnitu aurium, surditate, torminibus ventris & pedum tumoribus.

## 18. ORYZA.

- 1) Qualitate & principiis parum abhorret a nostratibus auena, vel hordeo, nisi quod nonnulli effectum alui paullulo magis stipandæ ei adscribant.
- 2) Inferuire igitur potest diæteticæ ad acrimoniam rheumaticam, biliosam, phlogoses, ardorem vrinæ &c. corrigenda, & commendatur præcipue dysentericis, fluxu coeliaco, lienteria, nimia hæmorrhoidum profusione, mictu cruento debilitatis; porro aliis hæmorrhagicis, hæmoptycis & phthificis, quos pulmenta eius probo temperatoque alimento reficiunt.
- 3) *Externe* farina oryzæ cum lacte detergit fordes in superficie cutis hærentes, & subinde clysteribus antidyntericis incoquitur.
- 4) Indi ex oryza *potum vinosum* parant, vti Tartari e milio eundem sibi conficere traduntur.

## 19. PANIS.

- 1) Cum panis biscoctus etiam ad increffantia diætetica vul-



vulgo referatur, placet hac occasione de panis indole & vsu medico quædam subiicere.

- 2) Enimuero vt principiis abundat ad nutritionem necessariam sufficientibus; sic probe fermentatus, non tantum principalem cibum præbet diuino testimonio probatum, concoctu facilem, naturæ acceptum, minimeque omnium fastidium parientem, sed & ad roborationem & analepsin quamdam ægris offertur.
- 3) Quo scopo laudatur panis similagineus tostus, & vino generoso imbutus, ad vires vbique propemodum recreandas, & abortum præcauendum. Ac testantur auctores, vltimum hoc periculum in feminis iam sæpius abortum perpeffis, solo hoc euporisto, quotidie mane sumto, irritis aliis interdum fuisse auersum. Sic & *Boerhaue* decoctum ex pane triticeo cum furfuribus fermentato bis cocto & aqua, additis vino Rhenano, paullulo succi citri, aquæ cinnamoni & sacchari, vt analepticum in febribus, & alii ientaculum ex pane butyro illito in stomachi malis, vertigine, cephalalgia, debilitate virium, febrium epidemicarum pestilentium grassante contagio commendant.
- 4) Neque *externe* inefficax est, nam & lipothymicos odore suo refocillare & e philosophis *Democritus*, instantem vitæ finem sentiens, in gratiam sororis suæ odore panis recenter cocti mortem ad triduum remoratus celebratur. Certe *Beccherus spiritum*, e clibano, dum coquitur panis, auolantem perlatis aquis omnibus analeptica virtute anteposit.
- 5) Porro inter domestica panis cum carui semine coctus & e furno recenter extractus dissectusque, ac auri calide adplicatus, habetur præstantissimus ad surditatem. Eiusdemque crusta additis vino & aromatis, in vomitu, terminoso alui fluxu, abortu præcauendo non minimam laudem meretur; neque ignotum est, quod tali vsui destinatur, *emplastrum de crusta panis* itemque *panis mellitus*, *Pfefferkuchen*;



quamquam satis adpareat hic soli pani tantum effectum non esse tribuendum.

- 6) Cæterum panis primarius seu candidus e flore farinæ confectus leuissimus, alendoque aptissimus; alter plebeius, seu secundarius (quem athletarum cibum olim *coliphium* vocabant) ob admixtam partem furfurum simul aluum magis abstergere & aperire censetur; tertius furfureus ater eodem simul effectum minus alit, sed tamen adfuetis insigne robur addit, ut in Westphalis videmus.
- 7) Illud ubique tenendum est, panem optime fermentari & percoqui debere; alioquin facile ventriculum grauat, tenerisque pueris obstructionem glandularum iniecerit, & otiosis fœminis mensium vitia infert, præsertim si largius & calide adsumatur.
- 8) Sunt qui *panes medicatos* efficere docent, additis depressendæ massæ, vel laxantibus, vel carminatiuis discutientibus &c. pro scopo, quem sibi quisque proposuit, etsi plerique hos auersentur.
- 9) Ampliorem gloriam habet *aqua* panis cum vino destillata in virium languore, atonia stomachi, flatulentia, vomitu, diarrhœa immo & in dysenteria, oculorum morbis & in epilepsia, si nonnullis credimus. Alii quoque *essentiam* panis cum vino maluatico paratam, alii & *oleum destillatum*, *spiritum* &c. laudant.
- 10) *Farina secalina* probe siccata cum sale tosto & floribus sambuci erysipelati conducere, cæterum emolli-re & maturare tumores notatur. *Flos secalis*, qui amaricat, in febribus tertianis nothis, vermibus & colica a quibusdam adhibitus legitur.

## 20. TRITICVM.

- 1) Est pariter nobilissimum semen, quod optimum nutrimentum præbere censetur, etsi panis inde factus ocyus fecali exarescere & gratum saporem citius amittere quidam animaduertant.

2) In-



- 2) Inferuit autem farina medicis ad eundem usum, quem præcedens adfert, sed an in carbunculis pestilentibus & doloribus podagricis tam mirifice valeat, quam prædicatur, item an pulres inde coctæ arthriticis & nephriticis adeo noceant, dubitamus. *Furfures* similiter abstergunt varias sordes imprimis capitis, & in balneo sæpe vsurpantur.
- 3) Cæterum e tritico per aliquot dies madefacto & emolito exprimitur medulla, quam siccata vocamus *amylum*, ex quo cocta pulmenta leniunt & incrassant, ideoque a multis commendantur in rheumate acri, raucedine, tussi sicca, hæmoptysi, diarrhæa dysenteria, immo in quavis ulceratione interna, gonorrhæa, malacia.
- 4) *Externe* amyllum ad intertrigines infantum, fissuras cutis, clysteres lenientes in acrimonia & vlceribus intestinorum subinde adhibetur.
- 5) *Oleum* e tritico, inter duas candentes laminas extortum, in tumore malæ, rimis manuum a frigore excitationis, erysipellate, maculis faciei, impetigine, vlceribus malignis, cancro satis amplas laudes habet, quarum fides esto penes experientiam.

#### IO. AVELLANA NVX.

- 1) Ex oleosis mucilaginosi & paucis acrisculis partibus nuclei inuoluunt quidem, nutriunt & incrassant aliquantum, sed & in faucibus & pectore irritationem efficiunt (in primis vetusti) & ad medicum usum rarissime expetuntur. Recentes præcipue immaturores diarrhææ, ac dysentericæ ansam præbere posse, obseruantur.
- 2) *Oleum* vero ex his *expressum* a quibusdam magni æstimatorum in renum vitiis & calculo pellendo; sed in his amygdalino haud præcellit, neque vi anodyna dolores arthriticos tollere potest. Neque maior fiducia collocanda est in *præaminibus* cum cuticula pulueris-



fatis, quæ in pleuritide, diarrhœa & fluore albo proficere nonnulli referunt.

3) De *ligno* huius nucis, seu *corylino* multæ fabulæ narrantur. Nec procul absunt a ridenda superstitione, qui *viscum* eius aduersus paralyfin, epilepsiam & veneficia collo adpendunt.

4) *Spiritus* huius ligni *acidus*, quem volatilem & spiritus vini instar ardere perhibet *Ettmüllerus*, vires cephalicas, antiparalyticas, antepilepticas, anthelminticas & anodynas habere narratur. Quas magnas dotes *oleo* ligni destillato & rectificato, vtpote quod pro decantato illo *Heraclyno Rulandi* reputatur, adhuc magis adsignant, sed vtique maiore spe, quam fidelis experientiæ suffragio. Pariter *sulphuris vegetabilis*, in iulis coryli, non secus, ac in musco clauato, reperiundi incerta est commendatio ad epilepsiam, atrophiam, febres &c.

## 22. BERBERES.

1) Hi fructus oxyacanthæ satis valenter acidi sunt & qualitate, ac effectû non abhorrent a succo citri, nisi quod hic paullo gratior & naturæ acceptior habeatur.

2) Itaque plura de iis non persequemur, contenti monuisse, *syrupum* de berberibus frequenter in febribus acutis, iulapiis immisceri; cæterum *acinos*, seu semen fructus ex adstrictoria vi diarrhœis vulgo etiam opponi.

3) *Cortex* ligni *intermedius* flauescens in vino, vel aqua decoctus ad stomacacen, dentiumque dolorem, ac vacillationem laudatur.

## 23. CERASA.

1) Ex innumeris pene generibus ad medicum vsum deliguntur *nigricantia acida & dulcia*.

2) Pri-



- 2) Prima præcipue ad hanc classem pertinent, utpote ad incrassandum, ac temperandum, non inepta; quocirca illos, qui siccitate oris, siti & æstu immodico, vitiis biliosis, indeque orto languore ventriculi, aut virium fatigantur, ac de reliquo acida bene ferunt, salubriter reficiunt. Quo scopo vsurpantur hæc cerasa, vel *condita*, vel *siccata & decocta*, vel in *syrupum* redacta.
- 3) E *dulcibus nigris* parantur *aqua & spiritus* cerasorum, ob gratiam & egregiam virtutem analepticam, ac neruinam, ab omnibus merito laudata, & pluris adhuc pendenda, si in apoplexia, conuulsionibus, vertigine, maximeque in paralyfi & loquela amissa celebratas vires constanter ostenderent.

#### 24. CYDONIA MALA.

- 1) Habentur pyra & mala. Vtraque incrassant moderateque adstringunt & iisdem morbis, quibus cerasa acida conueniunt, cum fructu subinde destinantur. Maiorem tamen laudem habent in ventriculi debilitate & fluxu aluino, atque analepsi præstanda.
- 2) Dubie vero prædicantur in venenis & pestilentia, & qui grauidis ea ad singularem vsum maximeque ad embryonis ingenium & pulcritudinem augendam conferre aiunt, proiicere ampullas videntur.
- 3) In officinis prostant, *rob, miua*, seu *panis cydoniatus, syrupus, vinum cydoniorum*.
- 4) *Semen* ex mucilagine sua terrestri & cum paullulo acidi permista eandem petit qualitatem, ac præterea ad leniendum inuoluendumque vtile est. Quapropter haud vane *mucilago* eius, aqua quadam destillata extracta, præbetur in ardore linguæ, inflammatione faucium, gingiuvis laxis, fluxu aluino, ardore vrinæ, acri inflammatione oculorum, ambustione, fissuris cutis & papillarum, a quibusdam etiam in dysenteria & sudore nimio laudatur. Ce-



terum dolentibus hæmorrhoidibus ea cautione applicanda est, ne adstrictione, quam simul aliquatenus infert, damni quidpiam adportemus.

### 25. DACTYLI.

1) Palma, quæ hos fructus profert, arbor per totum orbem celebratissima fronde perenni, & in tertium vsque sæculum viuax, in regionibus Asiæ maxime aliisque palmiferis tot vtilia fundit, vt ad victum tectumque & alias commoditates ibi sufficiat, meritoque omnes diuinam benignitatem venerari compellat. De quo pluribus inter recentiores *vid. D. Kæmpfer. amenit exotic.*

2) Ad vsum medicum autem inferuiunt *palmulae*, seu *da-ctyli*, qui e partibus mucilaginosi, sulphureis & salinis acidis conflati indeque sub dulcedine adstrictionem quamdam fouentes & ad inuoluendum coagulandumque apti censentur.

3) Proinde eos ad cohibendum alui fluxum & hæmorrhagiam commendatos legimus, quamquam liberalius dati ventriculum simul grauare, aut flatibus distendere soleant. Moderato autem vfu conueniunt præcipue hæmoptycis, & in tussi acri, tenui, catarrho faucium, stranguria & venereo alioque vrinæ ardore leniendo.

4) Incerte laudantur ad fluorem album, arthritidem & roborationem foetus, ne præmature elabatur; quin Persæ vsum eorum immodicum oculis nocere asserunt, quamquam alii vitia horum sensuum ibidem frequentia aliis potius causis, quam dactylorum victui, adscribere malint.

5) *Extus* Indi *pulpam* eorum inponunt extrahendis e pede festucis, aut aculeis; *Ioël* autem *oleo* dactylorum partes excoriatas & procidentem anum oblinere iubet.

6) Os-



- 6) *Osficulum sulcatum*, quod palmulæ in est, *Forestus* ad partum, alii ad calculum pellendum (sed dubie) prodesse referunt.
- 7) Cæterum veteres hodieque Natoliæ incolæ, sed clanculum ob Muhammedis interdictum, vinum e dactylis aqua perfusis fermentant; itemque spiritum ex iis parant ad cruditates & tormina laudatum.

## 26. GRANATA MALA.

- 1) Sic dicuntur a granis, quibus referta sunt, alioquin etiam punica adpellantur & in *acida vinosâ*, ac *dulcia* dispescuntur. Primorum succus citreo, reliquorum indoles aurantiis magis accedere videtur, quorum vsum cum supra latius indicauimus, quidquid ibidem diximus, non opus erit hic repetere.
- 2) Etenim nullam hæc in æstu sanguinis, dysenteria, feminis profluvio, febribus malignis &c. prærogatiuam mereri confirmat experientia.
- 3) *Grana*, seu *acini* fluxum aluinum & vterinum sistere, cæterum & calculum pellere & dentes firmare dicuntur. De *cortice* vero granati & balauistiis alibi loquemur.
- 4) In officinis prostant *syrupus granatorum*, acidorum & dulcium itemque *vinum granatorum*.

## 27. IVGLANS NVX.

- 1) Arbor horum fructuum ferax præstantissima habetur, cuius nulla fere pars est, quin ad subsidia medica traducatur; quæ tamen an tantum commodi inde ferant, quantum pollicentur auctores, non pauci hodie ambigunt.
- 2) Certe *nuclei* nucis, etsi inuoluant, temperent, nu-



triant ; magis ob saporem expetuntur , quam vtile & necessarium pharmacum præbent , quid ? quod vetustiores imprimis ob acrimoniam , quam fouent , pectori & capiti sæpe nocere deprehenduntur. Alexipharma autem eorum efficaciam , quam veteres mirum in modum deprædicarunt , iam *Casp. Hofmannus* redarguit. Nec minus sperantem fallit adscripta vis emmenagoga.

3) *Septum* , quod crucis forma nucleum distinguit , laudatur passim in colica , epilepsia , pleuritide , fluore albo , tumore vuulæ ; sed nondum satis expertum est , & a multis pro nomine suo nauci fit.

4) *Viridis cortex* , qui acido adstringente quasi vitriolico scatet , emeticus & succo suo capillos denigrare censetur ; *aqua* autem eius destillata in venenis , pestilentia , lumbricis , sanguine congrumato , hydrope , calculo , epilepsia vertigine & externe in vlceribus , pustulis oris , synouia , aurium susurro , pilorum auferendorum casu , magnam vtilitatis famam consecuta est , quæ quidem pluribus experimentis inclarescet. *Succus inspissatus* cum melle , seu *rob nucum* ex hoc cortice pari vsu frequentatur in inflammatione colli , tonsillarum , vlceribus oris , catarrhis , quin & in asthmate alicubi laudatum prostat.

5) Pertinent huc *nucæ* recentes immaturæ conditæ , quas ad analepsin & roborationem præstandam itemque ad venena commendatas legimus. Sed quidquid efficiunt additis magis aromatibus , quam nucibustribuendum est.

6) Incertius *iuli* , vim emeticam non raro edentes , laudantur in dysenteria , malo hysterico , mensibus



bus nimis, colica. Idem iudicandum videtur de *succo radice* mense februario post incisionem effluente, quem dolores dentium, nephriticos, podagricos, cephalalgicos mirifice placare quidam perhibent.

- 7) Cæterum & *cortex intermedius arboris* vomitum cingere, *cortex radice* vesicam euocare pulsui febrientium impositus; & *oleum* ex aridis nucibus *expressum* in fissuris manuum, ambustione, scabie, fugillatione, colica, vermibus, fusurro aurium &c. conferre dicitur.

## 28. MORA.

- 1) Habemus *alba* & *nigra*. Hæc magis nota & usitata atque ob leues acidas & subtiliter terreas partes temperandi, ac paullulum adstringendi facultate instructa sunt. Quo præcociora autem existunt, eo magis adstringunt, præcipue exsiccata. Matura dulciora sunt & facile, si largius comedantur, ob fermentescentem vim primis regionibus molesta; sed præ aliis neutiquam, ut nonnulli credunt, podagricis & arthriticis utilia.

- 2) Maxime autem in usu est *rob diamoron* in faucium & oris malis, idque sæpe cum *rob dianuncum* præscribitur in gargarismatibus, sed tamen notare expediet; hoc ultimum in mucofo statu, *rob diamoron* autem in calidiore inflammatorio v. g. angina sanguinea esse conuenientius.

- 3) *Cortex radice* mori aduersus diarrhoeam, fluorem album, menses nimios, præcipue vero ad lumbricum latum interficiendum valere prædicatur. *Folia etiam* (bombycum alias pabulum) in morfu



venenato, dentium dolore, calculo frangendo laudem habent, sed huc vsque ambiguam.

### 29. POMA seu MALA.

- 1) Varia horum genera sunt, insipida magis succulenta, acida, dulcia, vinosa, e quibus ad medicum vsum hæc vltima seliguntur, in primis *Borsdorfiana* & alia horum naturæ acido vinosæ, leui simul mucilage interfusæ, propiora. Huiusmodi enim poma abstergere, lenire, inuoluere & temperare deprehenduntur.
- 2) His ergo cum solatio, inter cibos frui possunt, qui bilis acrimonia, phlogosi & congestionibus sanguinis, obstructione alui, motibus hypochondriacis, glandularum mesaraicarum vitiis, ictero, imo & hectica, ac phthisi conflictantur. *Ettmullerus* quoque succum eorum & syrupum in melancholia, lipothymia & palpitatione cordis præcipueque in phlogosi & aluina infantum obstructione commendabilem existimat.
- 3) Poma putrida in cataplasmate, vel aqua eorum destillata in inflammationibus, ophthalmia, gangræna, excrescentiis & fordibus cutaneis, pernionibus, ambustione, vlceribus non minimum momenti habere censentur. Hyperbolice vero illorum vires ad fistulas, cancrum, lupum, carbunculos pestilentes nimis vulgo ampliari nemo fere expertus negabit.
- 4) Cæterum prostant ex pomis *syrupus simplex* & *compositus*, *aqua destillata*, *unguentum pomatum*. Neque incogniti sunt præsertim in Gallia atque Anglia *liquores vinosi* fermentatione e pomis producti, quos *Cidre* vocant. Certe nuper eiusmodi vinum  
e so-



e folis Borsdorfianis a perito quodam œconomo paratum fuisse generositate & gratia singulari Nicri-  
no æmulum recordamur.

- 5) *Malis sylvestribus* paruis magna austeritas inest & vis constringendi, usus autem rarior, nisi quod a nonnullis ad varos & ionthos, diarrhœam, dysenteriam, spasmos, bubones pestilentes (sed perquam dubie) conferre adlegendur.
- 6) *Mala*, seu *poma* sic dicta *Adami* aurantia magnitudine multum superant, qualitate acida limoniis propiora, sed minus vsitata.
- 7) *Melanzana*, seu *mala insana* iam ex nomine suo suspecta & noxia habentur, quamquam alii ab Italis ea non refugi, sed fungorum more cocta sine nocu-mento manducari referant.

### 30. PYRA.

- 1) Pomis proxime accedunt, sed tamen pleraque acerbiora magisque adstringentia existunt. Inprimis exsiccata sine humido comesta alium vehementer constipare reperiuntur. Mitissima vero sunt & ob suauitatem primas ferunt *Muscattellina*, quæ propterea condita ægrotantibus ad analepsin quamdam offerri subinde videas.
- 2) Cæterum pyra *cocta* crudis præferuntur & *succus* eorum cum saccharo probe inspissatus utilis ad plebem reficiendam, decoctum e pyris siccatis alibi ad febrilem æstum mitigandum conueniens iudicatur.
- 3) Galli quoque e pyrorum iuxta ac pomorum succo acetum forte itemque spiritum cum vinoso certantem, & Heluetii in Turgouia mustum durabile, & liquorem nobilem, vinum maluaticum simulantem, inde parare dicuntur.

4) De-



4) Denique pyra *patrida* nodis mammarum calide imposita, nec non sphacelo adhibita legitur. *Pyrastra* etiam, seu syluestria pyra cum austeris illis syluestribus malis conueniunt.

## 21. RIBES seu GROSSVLARIA NON SPINOSA.

1) Ribesia sunt, vel *alba*, vel *rubra*, vel *nigra*. Priora duos satus concordant, & rubra præcipue, ut vſitiora, succo acido acinis adstringentibus paucisque sulphureis particulis referta, incrassantibus haud iniuria adnumerantur.

2) Ad specialem autem vſum inferuiunt, ut alia huius generis e. g. berberes, cerasa acida, de quibus paullo ante diximus, cæterum in febribus, hæmorrhagiis, feminis profluvio nullam merentur prærogatiuam.

3) Componuntur ex his venalia *rob*, *baccæ conditæ*, *syrupus*; iulapiis, electuariis &c. æstus sitimque leuaturis admisceri solita.

4) *Nigra* ribesia, eorumque *folia*, valde olentia, ad calculum, ischuriam, stranguriam; superstitiosius autem ad arthritidem, conuulsiones, paralyſin curandam in vſum transferuntur.

5) Hyemali tempore frutex purpureas *gemmas*, *sclaream*, aut sambucum redolentes, protrudere narratur, quibus œnopolas ut aiunt, ad vina sapore moschato suauissimo imbuenda.

## 22. GUMMI ELEMI.

1) Est magis resina inflammabilis, quam gummi, ac hodie ex Americana quadam arbore stillare dicitur, cum tamen veteres suum Elemi lacrimam oleæ Aethiopicæ esse tradiderint, quæ an cum hodierno nostro Elemi consonet, viderint, quorum interest.

2) De-



- 2) Devehitur ad nos in massis cylindraceis, & albicans, clarum, aut paullo flavescent, pingue & fragrans, odoris pene fœniculi, aliis præoptatur. Quamquam autem nonnulli efficaciam illi sarcoticam adiudicent; tamen nescio quomodo ad incrassantia relatum sit, cum vires eius roborantes & resolventes magis perspicue eluceant.
- 3) Interne nullum, quantum huc usque innotuit, usum, *extus* vero præclaram opem fert partibus teneris & exquisitiore sensu gaudentibus, præcipueque capitis & cranii læsionibus, vulneribus punctim inflictis, vulneribus & tumoribus articulorum, tendinum, nervosarum partium &c. destinatur.
- 4) Aliis laudantibus, prodest etiam in contusionibus, sanguine congrumato, ulceribus, dentium dolore, ac destillatum per retortam *oleum* eius in paralyti, contractura & tremoribus.

## 32. GLUTEN

- 1) Quod scriniarii habent, non est in usu medico, sed ab opificibus tantum ad hæmorrhagiam leuiorum vulnorum compescendam adhibetur.
- 2) Aptior ad usum est ICHTHYOCOLLA seu glutinosa illa & mucida, tenax materia, quam ex cute, interaneis, pinnis & cauda piscis cuiusdam, *Huso* dicti, aqua excoqui, in spiras denique cogi & e Moscovia adportari auctores memorant.
- 3) Hæc maxime incrassat, inuoluit & conglutinat, quapropter in tenuibus catarrhis, hæmoptysi, acrioribus vitiis bilis, indeque orta diarrhœa & torminibus, statu sanguinis nimium volatili & in ebullitiones prono, gingivarum cruentatione utilis prædicatur. Nec minus in fractis ossibus commodam præbet materiam, quam ad necessariam calli genesin natura impendere possit. Apposite vero hoc gluten gelatinis aliis immixtum porrigimus.
- 4) *Externe* in vulneribus & ulceribus eo moderatius adhibendum est, quo magis subinde ob viscidam naturam



turam, nondum perfecta debita repurgatione, infidam consolidationem accelerare potest.

### 33. MEDVLLA ANIMALIVM

1) Quod si accuratius loqui velimus, hæc eius indolis est, ut potius emolliat, demulceat, nutriat & aliquantum expectoret, quam ut vere incrassantium familiæ inferi mereatur.

2) Ex prædictis igitur qualitatibus intelligi potest, medullam alium siccam lubriciorem reddere & acrioribus malis pectus eiusque viciniam, ac vrinarias vias obsidentibus cuidam esse lenimento, etsi hædici & phthiſici frustra hinc efficax solamen expectent, cum potius largius adsumta subtili sua pinguedine humores nimium commouere possit & temperata nutriendi virtute gelatinis multum concedat.

3) *Externe* medulla cum aliis mista ad mitigandos dolores & tumores molliendos, ac maturandos uti possumus.

### 34. OVA GALLINACEA

1) De horum testis supra diximus. *Interiora* vero uti alimentum suaue, simplex & cito reficiens suppeditant; ita de reliquo ad incrassandum, leniendum, temperandum variosque vsus externos accommodatam materiam continere reperiuntur.

2) Benigna igitur eorum efficacia subleuantur illi, qui nimis excretionibus aliisque de causis exhausti languent, aut qui tenui catarrho, tussi acriore, tabe, phthiſi, nephritide calculosa, bilioso acri & sanguinolento alvi profluvio laborant.

3) *Ouum crudum* etiam mane *sorbillatum*, ad claritatem vocis, *durum* & paucò aceto subactum ad diarrhoeam sedandam, *sorbile* ad molliendam aluum subinde vsurpatur.

4) *Vitellus* oui magis nutrit & *albumine* pinguior est, atque e gallina macerata exfectus in fluxu mensium rebellis a *Lentilio* commendatur. Neque *pellicula exterior*, inter testam & albumen sita contemnendum plane subsidium est ad contusiones infantum & aciores



res oculorum congestiones; licet albuminis in spumam probe agitati virtutem adhuc certiore esse plures adfirment. Frustra autem quis sperauerit, a *cicatricula*, prima pulli rudimenta in ovo constituyente, sublatum iri sterilitatem, aut pariendi difficultatem.

5) *Externe* ouorum interiora pariter demulcentem & paragoricum effectum edunt. *Vitellus* etiam abstergit & suppurationem nonnihil promouet, frequenter ideo digestiuis unguentis admisceri solitus, vbi fermentescens & in acetosam corruptelam proclivis mellis indoles ab eo non multo minus quam a terebinthina temperatur. Eodem scopo leniendi &c. balsamis vulnerariis adiungitur, & sæpe clysteribus inditur. *Albumen* quod & refrigerare & quasi glutinare quibusdam censetur, vti dictum, in inflammatione præcipue oculorum vtile est. Vtraque cum oleo lini permista in ambustione & pernionibus probantur.

6) Inter ouorum præparata eminet *oleum* post aliquam coctionem vitellorum expressum, quod & dysentericis intus dari & fructuose fissuris papillarum aliarumque teneriorum partium, serpiginosis sordibus, achoribus, vsu demultente, atque vlcerosam secessionem leniter promouente, adeoque ad consolidandum & cicatricem denique læsionibus obducendam adplicari potest. *Etmullerus* hoc oleum per colaturam, lotionem, adiecto prius pauxillo ceræ liquefactæ, & digestionem in sole purificare docet, idque ad foueas & variolis relictas, vsu cosmeticum, ambusta, imprimisque herniam egregie valere prædicat.

7) Inusitatum est *oleum ex albumine* per retortam destillatum, quod solis instar fulgere & dolores hæmorrhoidalis &c. sedare, eodem auctore discimus; Neque tanti est limpidus, albumini suppar liquor, qui ex ouis ad duritiem coctis & perforatis in frigore exstillat, ad fucum cum aliis adhiberi consuetus; neque



*aqua destillata*, nedum *sal volatile*, & *oleum fetidum* singulares vires obtinent.

### 35. ANGVILLÆ

1) Harum vsus ad incrassandum minus innotuit, ne dicam ineptus est, certe multis aduersus, & cum tot meliora prostant, superuacuis.

2) De *iecinoris* vero & *pellis anguillæ* viribus iam alibi mentionem fecimus. Illud heic adiciamus, tentari posse pinguedinis huius piscis vsum, quem nonnulli in auditu difficili, capillorum genesi iuuanda, & cum *oleo momordicæ* in doloribus hæmorrhoidum commendant.

### 36. COCHLEÆ

1) Conquiruntur ad vsum præcipue cochleæ testaceæ maiores iuxta vites reperiundæ, nec non *rubræ*, quas *limaces* dicimus, *rothe Wege-Schnecken*.

2) Harum *caro* & *inscula* inde cocta (inprimis si ante per aliquod tempus saccharo & farina pastæ sint cochleæ), a quibusdam censentur optime solari tabidos, hecticos & phthisicos; sed quia concoctu difficiles sunt, multisque fastidium, nec de cetero insigne leuamen pariunt, merito his anteponuntur gelatinæ.

3) *Domuncula* congeneres putantur *cancrorum* fluuiatilium testis, atque, vt diureticæ, in hydrope & nephritide vtilis.

4) *Externe* liquori, e contusis cochleis adiecto sale emergenti, tribuitur vis refrigerandi & abstergendi, vnde cutem paullulum nitidam reddit, & podagricos aliosue dolores ardentes sopire quin & tumores hydropicos resolvere prædicatur. At cauendum est, ne forte subitanea repulsione noceamus.

### 37. OSTREÆ.

1) Præ cochleis habentur in deliciis; ac temperate alendi restaurandique viribus, vt multorum sententia est, refertæ, ad medicum vsum quoque interdum deo-cantur. Inprimis autem quidam eas consecrant *hectico* & *phthisico* ardori, ac *masiei* reficiendæ; id quod

salu-



fabrilitate factum esse *Lindanus & Tulpus* exemplis illustrant quidem, sed imitatores tantæ utilitatis testes paucos omnino habuisse videntur. Neque hodie magna illarum efficacia in hisce malis reperitur, præsertim si vera ulceratio præsto sit & stomachus ad ostreas (alioquin non ita eupeptas) bene subigendas infirmior.

(2) De testarum usu supra diximus.



## TABVLA XIV.

DE

# RESOLUTIONE.

## I. DEFINITIO.

Resolutio est species therapie alterantis, qua humores spissi, tenaces & lentescentes, ad motum liberiores ineptiores, & varias oppletiones mucidas, stagnationes, infarctus & scirrhus inducentes, per convenientia remedia attenuantur, dissoluntur, & mobiliiores, atque fluidiores redduntur, ut & motui progressivo facilius obediunt, & si necesse fuerit, euacuari possint.

## II. DIFFERENTIA.

I. Actus hic resolutorius omnino discernendus est ab *apertione*, hæc enim partium *solidarum* adstrictioni & occlusioni, resolutio vero *fluidarum* spissescentiæ & incrassationi opponi solet. Si vero, quorum animos theoria de *obstructionibus* nimium occupavit, sub apertientibus remediis resolventia & alia eius generis comprehendunt, & ita hos diuersos actus pro vno habent. Quamquam autem negari non possit, resolutionem apertioni inservire, & ipsam apertionem per modum



resolutionis tum contingere, cum humores spissi vias occludant: tamen hi actus inter se diversi sunt.

2. Comprehenduntur autem sub hac therapie specie remedia sic dicta *incidentia*, *colliquantia*, *resoluentia*, *discutientia*: immo quodammodo *præparantia*, *digestiva*, *abstergentia*, *absorbentia*, *lenientia*, quæ omnia in certum finem pro vitiata humorum conditione ordinantur & sibi invicem inseruiunt. Nam

1) *incidentia* potentioris sunt efficacie, & offeruntur humoribus mucido-viscosis, primis viis & pulmonibus tenaciter adhærentibus, qui simplici resolutione, aut dilutione attenuari non possunt.

2) *Colliquantia* eiusdem cum incidentibus sunt efficacie; quando enim hæc salina remedia cum aliquali humiditate solvuntur, tum ope huius vehiculi aquosi humores mucidos efficacius penetrant, attenuant, eliquant.

3) *Resoluentia* mitioris sunt indolis, & sanguini coagulato, ac lymphæ coherenti proprie destinata; *diluentia* autem adpellantur, quæ spissiores humores simplici *humectatione* reddunt tenues.

4) *Discutientia* magis opponuntur stagnationibus, stasibus, obstructionibus & inflammationibus internis, deinde etiam ad *topicum* usum sese extendunt.

5) *Præparantium* hic quoque mentionem facimus, sunt autem illa potius remedia generaliora, quæ non tantum ad humores spissos volubiliores reddendos; sed etiam fluidiores coagulandos & præparandos apta sunt.

6) *Digestiva* audiunt, quæ mucum & saburram primarum viarum, febres intermittentes, anorexiam & diarrhœas generantem, digerunt, præparant & resolvunt.

7) *Abstergentia* interna spissiores & simul impuras materias a partibus sanis & integris, aut etiam ex ulceratis, e.g. pulmonibus, renibus, remouent & vias simul exstimulant, vnde clysteribus quoque adduntur. Exter-



na adhibentur in ulceribus, ab inquinamentis foetidis mundificandis.

8) *Absorbentia*, præcipue testacea, ad spissitudinem sanguinis ab acido profunt, dum tenacitatem materiæ in pulposam, ac volubilem consistentiam redigunt, non tamen vlllo modo absorbendo, quam potius accrescendo.

9) *Lenientia* pro scopo emolliente & elubricante ordinantur, quæ pinguibus & oleosis suis substantiis effectum resolutioni æmulum post se relinquunt.

3. Dein huic actui therapeutico multum est commercii cum diaphoreticis, diureticis, antiscorbuticis, antiuenericis.

4. Disperscitur vero resolutio

1) in *generaliorē*, quæ toti humorum massæ, spissitudine nimia laboranti, prospicit.

2) in *specialiorē*, quæ iterum duplex est, dum nempe

a) vel partem quamdam sanguinis, e.g. lympham, vel rubicundam substantiam plus iusto spissiorē, corrigit.

b) Vel sanguinem in certo quodam corporis loco stantem atque coagulatum pristinae fluidiori consistentiæ restituit.

### III. INDICANTIA.

1. Resolutionem in genere indicat omnis humorum spissitudo, tenacitas & visciditas ad motum progressivum & intestinum inepta.

2. In specie vero indicantur resoluentia

1) In crassitie sanguinis hypochondriaca, melancholica,

2) In stasibus sanguinis inflammatoriis internis & externis.

3) In mala mixtione sanguinis corruptiva scorbutica, item in venereis inquinamentis requiruntur quidem etiam resoluentia, sed de hac resolutionis indole sequente tabula, quæ de *cacochymiae correctione* agit, dicemus.

4) In obstructionibus & scirrhis glandularum viscerumque lymphalibus, cachecticis, hydropicis.



2. Particulariter resoluentia indicantur,  
 1) in vitio primarum viarum.  
 2) In congestionibus catarrhalibus mucosis ad caput, pe-  
 ctus, stases lymphales grauedinosas, asthmaticas ge-  
 nerantibus.  
 3) In stasibus mucosis in & circa partes vrinarias, ad cal-  
 culi genesin procliuius.

#### IV. INDICATA seu REMEDIA.

##### I. Resoluentia.

- 1) Sanguinis grumositatem resoluunt.  
 a) Vegetabilia.  
 a) Interna.

Radix Angelicae

Apii

Ari

Aristolochiae

rotundae

Bardanae

Bryoniae

Carlinae

Caryophyllatae

Cichorei

Dictamni albi

Doronici

Galangae

Gentianae vtri-

usque

Helenii

Imperatoriae

Leuistici

Mei

Petasitidis

Pimpinellae al-

bæ

Rhabarbari

Rubiae tinctorum

Taraxaci

Valerianae

Vincetoxici

Zedoariae.

Herba Abrotani

Absinthii Pontici

Beccabungae

Bellidis hortensis

Betonicae

Calaminthae

Cardui benedicti

Centaurii minoris

Ceterach.

Chærefolii

Cochleariae

Fumariae

Geranii maioris

Hepaticae nobilis

Hyssopi

Maioranae

Marrubii albi

Matricariae

Melissae

Morsus



Morfus Diaboli  
 Nasturtii  
 Origani  
 Pulegii  
 Rorismarini  
 Saluiae  
 Satureiae  
 Scabiosae  
 Scordii  
 Serpilli  
 Teuerii veri  
 Flores Anthos  
 Arnicae  
 Bellidis  
 Calendulae  
 Centaurii minoris  
 Chamomillae  
 Cheiri  
 Croci  
 Cyani  
 Galegae  
 Matricariae  
 Meliloti  
 Origani  
 Saluiae  
 Sambuci  
 Stoechados Arabicae  
 Ulmariae.  
 Semina calida maiora & mi-  
 nora  
 Cardui benedicti  
 Mariae  
 Carthami  
 Dauci  
 Sinapios  
 Cortices Aurantiorum  
 Citri

Cinnamomi  
 Fructus Piper, &c.  
 Gummata Ammoniacy  
 Galbani  
 Myrrhae  
 Sagapeni  
 β) *Externa.*  
 Radix Bryoniae  
 Iridis Florentinae  
 Sigilli Salomonis  
 Herba Chærefolii  
 Hedera arborescens  
 Flores Calcatrippæ ad oculos  
 Lignum Fraxini circa solstitia  
 Gummi Camphoræ  
 b) *Mineralia.*  
 Lapis Bezoardicus  
 Oleum Succini  
 Spiritus fuliginis  
 Nitri & Salis dulcis  
 tartari.  
 2) *Lympham & serum corrigunt,*  
 a) *Vegetabilia.*  
 α) *Interna.*  
 Radices supra iam notatae  
 Acori  
 Asari  
 Asparagi  
 Brusci  
 Calami aromatici  
 Costi dulcis  
 Cyperi rotundi  
 Galangæ  
 Iridis  
 Petroselini  
 Sarsaparillæ  
 Squillæ

C c c

Zing-



Zingiberis  
 Herbae Capilli veneris  
 Calaminthæ  
 Cuscutæ  
 Mari veri  
 Menthae  
 Ruthæ  
 Scolopendriæ  
 Tanacetæ  
 Thymi  
 Supra iam allegatæ  
 Folia Lauri  
 Flores Anthos  
 Lauendulæ  
 Matricariæ  
 Tanacetæ  
 Thymi  
 Baccæ Lauri  
 Iuniperi  
 Semina Anisi  
 Apii  
 Cumini  
 Dauci  
 Fœniculi  
 Nigellæ  
 Petroselinæ  
 Lignum Guaiaci  
 Sassafras  
 Cort. Cinnamomum  
 Fructus Iuiubæ  
 Manna  
 Myrobalani  
 Piper  
 Tamarindi  
 Gummata Ammoniacum  
 Animæ  
 Bdellium

Carannæ  
 Elemi  
 Galbani  
 Iuniperi  
 Opoponacis  
 Sagapenum  
 Sarcocolla  
 Tacamahacæ  
 Succinum  
 Mastix  
 Balsamus Copaiuæ  
 Peruuianus  
 Oleum Baccarum Iuniperi  
 Terebinthinæ  
 Salia Alcalia, e. g.  
 Absinthii  
 Cardui benedicti  
 Centaurii min.  
 Genistæ  
 Ononidis  
 b) *Animalia.*  
 Cantharides  
 Bufones  
 Lacertarum oleum  
 Mumia  
 Sanguis hirci  
 leporinus, præcipue  
 mense Martio col-  
 lectus  
 Serpentes & Viperæ  
 Spiritus C. C. succinatus  
 c) *Mineralia.*  
 Antimonium diaphoreticum  
 eius Clyffus  
 Tinctura  
 Arcanum duplicatum  
 Bezoardicum minerale  
 Mercur-



Mercurius dulcis  
 Nitrum vitriolatum  
 Antimoniatum  
 Sal commune  
 Digestivum Syluii  
 Epsomienſe  
 Egranum  
 Gemmæ, in clyſteri-  
 bus  
 Salis ammoniaci ſpiritus  
 Succini tinctura  
 Sulphur.  
 Tartari Spiritus  
 Tinctura  
 Terra foliata  
 β) *Externa.*  
 Radix Raphani  
 Symphyti  
 Herba Bardanæ it. Rad.  
 Folia Betonice  
 Geranii Robertiani  
 Origani  
 Piperis murarii  
 Salvia  
 Serpilli  
 Spica  
 Emplaſtr. de Ammoniaco  
 Cicuta  
 Galbano  
 Meliloto  
 Tacamahaca  
 Oleum Chærefolii  
 Pulvis Viperarum  
 2. *Diluentia.*  
 Potus aquæ calidæ  
 Thé  
 Coffée

Veronica  
 Decoctum Hordei  
 Avena  
 Serum lactis  
 Thermæ  
 3. *Discutientia*, interna & externa  
 Radices Alexipharmacæ, dia-  
 phoreticæ & diure-  
 ticæ, e.g.  
 Angelicæ  
 Ari  
 Carlinæ  
 Diſtamni albi  
 Gentianæ utriusque  
 Helenii  
 Imperatoriæ  
 Leuistici  
 Petasitidis  
 Pimpinellæ albæ  
 Rubiæ tinctorum  
 Valerianæ  
 Zedoariæ  
 Herbæ plerarumque harum  
 radicum  
 Bellidis  
 Cardui benedicti  
 Chærefolii  
 Geranii maioris  
 Hyſſopi  
 Morſus Diaboli  
 Scabioſæ  
 Scordii  
 Serpilli  
 Flores Chamomillæ  
 Galegæ  
 Matricariæ  
 Meliloti

Ccc 2

Stoecha-



Stœchados Arabicæ	Magneticum <i>Angel</i>
Verbasci	<i>Salæ</i>
Vlmariæ	Spiritus vini camphoratus
Auena	Salis ammoniaci
Furfures	Vinum calidum
Semina 4. calida	4. <i>Abstergentia.</i>
Lini	1) <i>Interna.</i>
Baccæ Juniperi	Radix Althææ
Lauri	Apii
Lignum sassafras	Aristolochiæ rotundæ
Sal commune	Bryoniæ
Oleum Amygdalarum amar.	Glycyrrhizæ
Anethi	Oxylapathi.
Anisi	Sarsaparillæ
Chamomillæ destillatum	Scrophulariæ
Laurinum	Herba Fœniculi
Petræ	Hederæ terrestris
Scorpionis	Veronicæ
Castoreum	Gummata, & Salia media largius data
Zibeth	Pruna
Moschus	Passulæ
Gummi Ammomiacum	Manna
Animæ	Iuiubæ
Bdellium	Mel
Carannæ	Saccharum
Copal	Iuscula auenacea
Juniperi	Decocta raparum
Tacamahaca	hordei
Pix	C. C.
Sulphur	Serum lactis
Vnguentum anodynum	Lac
Emplastrum de baccis Lauri	Acidulæ
Diaphoreticum Mynsichi.	Thermæ
de ranis Vigonis cum	2) <i>Externa.</i>
Mercurio	Radix Aristolochiæ rotundæ
	Herba



Herba Absinthii	Thus
Agrimoniæ	Mel
Alchimillæ	Oleum ouorum
Hederæ terestris	Vitellus oui
Hyssopi	Serum lactis
Plantaginis	Terebinthina
Prunellæ	Vrina
Pyrolæ	Saliva
Saniculæ	Sal commune
Symphyti	gemmæ
Tabaci	Succi herbarum acriorum
Gummata Aloes	Succus Apii &c.
Elemi	Vnguentum Aegyptiacum
Myrrha	Apostolorum
Opopanax	de Apio
Sarcocolla	enulatum
Succinum	purpureum Wurzi

## V. MODVS OPERANDI.

1. Simplicior modus resolutionis fit per *humida*, quæ massam sanguineam & reliquos humores spissos attenuant, diluunt & fluidiores reddunt, atque hoc modo progressuum motum subleuant. Eximie id perficiunt, ac promouent *potiones temperatæ calidæ*, *decocta* & *infusa calida, thermæ*, quæ mediante calore intimius penetrant & mucilaginosas substantias a se inuicem detinent.
2. Quædam remedia resoluentia subtilibus suis *sulphureo-resinosis* principiis valde *mobilibus* motum sanguinis augent & reliquam massam penetrant ac crassiores humores dissoluunt, atque attenuant. Hanc resoluentem qualitatem exserunt remedia *calida*, sanguinem *discutientia*, *alexipharmaea*, *diaphoretica* &c.
3. Alia particulis *salino sulphureis* humorum tenacitatem incidunt, & dirimendo fluxiliores reddunt. Crassi enim & tenaces humores quasi scindi supponuntur a spiculis salinis, vt ita connexio tenacitatis discontinuetur; vnde *incidentia* adpellantur.



4. Tenacem huiusmodi spissitudinem satis potenter etiam adgrediuntur *acria*, aromatica, *antiscorbutica*, item *ligna antiuenerica*, quæ particulis suis salinis acris humoribus intime resolunt, fluxilitatemque restitunt.
5. Nonnulla *fermentatiua* commotione materias mucido seroso-lymphaticas dissoluunt, colliquant, attenuant hasque impuritates a partibus abstergunt & repurgant; qualia sunt *dulcia*, ex melle, *prunis*, *passulis*, *manna*, *tamarindis* & similibus parata. In partibus autem glandulosis & porosis *salia* incidentia hanc *deterfionem* perficiunt, dum soluta viscositates facilius ingrediuntur, hasque eluunt & mobiles reddunt.
6. Alia, uti *absorbentia*, *terrea*, materias, acres, acidas, per massam humorum diffusas eamque coagulantes, in poros suos recipiunt; ut ita perniciosus earum effectus extinguatur.
7. *Lenientibus* vero vim resoluentem ex nulla alia ratione adiudicamus, quam quod particulis suis *pinguibus*, *gelatinosis* massæ humorum sese insinuant, eamque, ob innatam particularum suarum lubricitatem, volubilem reddunt, vias quoque strictas referant, relaxant atque elubricant, ut hoc modo resolutio eo facilius contingat.
8. Resoluentibus remediis *acida* quoque a nonnullis adnumerantur, quæ vero per se hunc effectum non exserunt, quum potius adstringant & incrassent; quidquid autem in hoc actu efficiunt; fit, vel *reprimendo*, dum subtili strictura stagnantes humores repelluntur, vel cum aliis remediis, sanguinem *commouentibus*, sunt coniuncta, quæ resolutionem faciilitant & inducunt. Mittimus itaque conceptum illorum, qui aceto spirituosi, sulphurea principia, resolutionem promouentia, adscribunt.
9. Ad *externa* quod attinet, illa principiis suis sulphureis, spirituosis, salinis, vel per poros adfectarum partium penetrant, & humores stagnantes resoluunt, vel tonum harum partium roborant, ut humores efficacius transprimi, dissolui & discuti possint. *Abstergentia* vero externa agunt, vel resoluendo, vel colliquando, vel corro-

dendo



dendo viscidiores spissas fordes, easque a partibus viceratis separant.

## VI. MODVS PROPINANDI.

1. In hoc actu therapeutico sedulo obseruandus est iustus motuum gradus, debitaque horum motuum relatio ad humores & vice versa. Et quemadmodum ipsa natura, dum sponte sua humorum stases & occlusiones recludit, id non violento impetu, sed singulari plerumque moderamine suscipit, ita artifex eo potissimum respiciat, ut horum spissiorum resolutionem eiusmodi blandis remediis obtinere intendat, quæ cuilibet humorum statui sunt accommodata.

2. Ante omnia humorum resoluendorum conditio, & causa spissescentiæ probe dignoscatur. Non enim vbiuis quoduis succedit. Simplex spissitudo, vbi dilutio deficit, commode corrigitur per sufficientem *potum*, in plurimis enim foeminis, virginibus, & alterius sexus sedentariis, pensitabundis sola parcitas potus turbas dat, ut spissior chylus & inde consistentior lymphæ & sanguis oriuntur. Spissitudo a frigidiore corporis constitutione procedens medicamentis *calidis*, acriusculis, maxime vero concurrente moderato corporis *motu* emendatur. Serosa, salina materia & substantia biliosa cum muciditate inuoluta per *incidentia* & *abstergentia* curanda est. Sic alia crassitiem in sanguine, alia in lymphæ resoluunt.

3. Deinde temperamentorum diuersitas est respicienda, ut in subiectis calidis temperatiora, in frigidis vero penetrantiora aromatica, acria, amara exhibeantur.

4. Semper vero initium resolutionis cum mitioribus fiat, fortiora enim nimium humores commouent & insignes turbas excitant.

5. His resoluentibus euacuantia sæpius interponantur in primis talia, quæ simul resoluendi virtute prædita sunt, ut sunt mercurius dulcis, & pilulæ ex guminatibus & extractis amaris paratæ.

6. Artifex resolutioni intentus non nimium festinet, sed debiti temporis rationem habeat, ac prius ægro prospiciat



ciat, vel sanguinis quantitatem imminuendo, vel laxationibus crassiores sordes abstergendo.

7. Diæta quoque conueniens est obseruanda: nocent enim cibi fumo indurati, omnia cruda semicocta. Aromatizata vero, atque vinosa diæta maximopere frugi est. Vita sedentaria est fugienda, salutares corporis motiones, itinera, cœlique mutationes, si necessitas id exigat, suscipienda, vberior potus, præcipue litteratis atque fœminis iniungendus est.
8. *Externe* non paruum promouent tam resolutionem, quam discussionem modestæ *frictiones*, siue pannis & linteis calidis, siue excutia.

## VII. CAUTELÆ ET OBSERVATIONES PRACTICÆ.

1. Res est notatu dignissima, quod natura humana, sibi relicta, resolutiones humorum stagnantium non tam per materias, quam per motus absoluat.
2. Errant, qui spiritui vini, aliisque aquis ardentibus virtutem adscribunt resoluentem, magis enim inspissant, atque increassant humores. Sed si aliquem produnt effectum resoluentem, faciunt hoc secundario, dum acredine sua partes solidas stimulant. Quia itaque ancipitis & effectus & euentus sunt omni circumspectione adhibeantur.
3. Multa vulgo censentur resoluentia, quæ per se talia minime sunt; sicut *spodium*, *sperma ceti*, *fuligo tenuis*, & *sanguinis hirci* vulgi quasi sacra anchora sunt, re vera tamen minus efficacia deprehenduntur, & quidquid præstant, id a regimine violento sudorifero, vel ab additis alexipharmacis & sanguinem commouentibus habent. Idem iudicium esto de remedium superius nominatorum distributione in peculiare classes, e.g. incidentium, discutientium, abstergentium, licet enim auctorum receptum ordinem consulto retinuerimus, nonnulla tamen, si ad lapidem lydium reuocarentur, in aliam, quam in qua posita sunt, classem collocari deberent.

4. Reso-



4. Resoluentibus fortioribus & sanguinis motum potenter augentibus caute vtendum, præsertim vbi plethora vrget, vel morbus febrilis, acutus, malignus imminet. Nulla enim resolutio maiori circumspeditione indiget quam sanguinis.

5. *Spiritus tartari, fuliginis, cornu cerui* rubicundior, & *oleum succini* personis frigidioribus *spiritus vero nitri*, vel *salis dulcificati* magis calidioribus inseruiunt.

6. *Mumia* non nisi in sensibilibus cum efficacia exhibetur.

7. In humorum spissitudine nequaquam solam aciditatem subesse, innotescit ex eo, quod non modo a frigore humores spissescant, sed etiam a motus progressiui defectu & sufficientis dilutionis inopia. Itaque suspecta res est, resolutionem humorum crassorum cum *absorbentibus* præcipue *terreis* suscipere velle, vt acidum illud absorbent; nam contrarius plerumque effectus sequitur. Si vero spissitudo ab acido orta sit, tum absorbentia ostracodermata leni acido semisaturata profunt.

8. *Tincturae alcalinae acriores* resolvente effectû ceteris fere omnibus palmam præripiunt, nam sine vlla commotione incidunt & resoluunt: sed opus est ad feliciorum effectum, vt aliquamdiu continuentur.

#### 9. THEA.

1) Sunt folia fruticis cuiusdam Chinensis, vel Iaponici, tostione supra laminam ferream & manuali volutatione crispata. Differunt autem pro collectione & teneritudine, ex qua bonitas eorum æstimatur. Omnium maxime tenella & nondum integre explicata, quæ primo carpuntur, sunt pretiosissima & vocantur *thea Cesarea*, seu *flos theæ*, qui vulgo pro floribus, aut staminibus florum perperam habetur, Sinensibus *Theebuu* dictus. Reliqua variis gradibus nobilitatis & pretii, prout magis minusque tenera sunt, hæc insequuntur. Confer D. Kæmpfer, *amœnit. exot.*

2) Partes, seu principia (vt vocant) horum foliorum sunt pauca sulphurea volatiles, tum amaricantes & subad-



stringentes terreæ; in qualitatibus autem *infusi* designandis discordant auctores. Manifestius autem hoc diluit, temperat, relaxat & excretionem promouet, adeoque multiplicem usum quibusdam adferre potest; sed an vulgo celebratas singulares aliisque leniorum herbarum infusis multo præstantiores virtutes obtineat, non pauci ambigunt.

- 3) Illud ipsi proprium esse plurimi consentiunt, quod præ aliis plantis, tanta copia in decocto, vel infuso adsumtis, ventriculum minus grauet, facile secedat, aut saltem rarius pariat fastidium; etsi plerique Europæi idem, nisi saccharo imbutum bibere recusent.
- 4) Cæterum, ut quotidianus Chinesium potus est, & in cælum usque ibidem extollitur, modo herba per anni spatium adseruata sit; sic a multis nostratibus laudatur ad cruditates stomachi, cephalalgiam, vertiginem, immo conuulsiones depellendas, memoriam omnesque animæ facultates roborandas, somnolentiam arcendam & lucubrationes sustinendas; porro ad dolores spasmodicos, febres, omnes pectoris morbos, crapulam, biliosam dyscrasiam, colicam, obstructions viscerum, scabiem, grauidarum mala &c. Quæ omnia quousque vera sint, & magis ab aqua calida, quam specificis herbæ thée viribus pendeant, iudicent prudentiores.
- 5) Inprimis nobile censetur nephriticum & podagricum, tam spasmos leniendi, quam potissimum præcauendi usu. Et narrant Medici Chineses & Iaponenses, qui perpetuo hoc infuso vtuntur, raro, aut numquam a podagra, vel calculo infestari; contra eos, qui cereuiciam vernaculam, ex oryza coctam, ibidem potant, ab his malis non plane liberos viuere.
- 6) Relinquimus hæc suo loco & monemus tantum, infuso thée salubriter sibi eos consulere posse, qui, vel fani alia temperata potulenta auersantur, aut nimis parce adsumunt, vel languidi & ægri diluente, temperante &c. ut supra diximus, remedio indigent.



7) Postremo notandum est, quosdam in locum th  e indigenas herbas sic infundendas substituere, eundemque, vel etiam meliorem inde effectum polliceri; cui scopo, alii *veronicam*, alii *betonicam*, *agrimoniam*, vel *rorem marinum*, vel *saluiam*, vel *teucrium verum* destinant. Neque hoc consilium inutile est, at, quoniam delicatorem palato, vulgari persuasioni & moriam inueterascenti non arridet, plerisque repudiatur.

#### 10. COFF  E.

1) Bacc  , qu   hoc nomine insignimus, proferuntur ab arbore quadam Arabica parv   ceraso, seu Euonymo simili, utque e sulphureis, vaporosis & oleosis paucioribus larga vero mucilagine & terra context   sunt, sic magis perspicue ad incrassandum & temperandum apt   solum videntur.

2) Longe vero illustrioribus dotibus imbutum censetur *decoctum* e fabis hisce tostis, confectum, utpote quod multi potui the     quiparant, nonnulli etiam anteponunt; rati, omnes eas virtutes, quas modo de thea pr  dicatas esse adlegauimus, pr  tereaque maiorem stomacho imbecilli & naus   succurrendi facultatem huic potui deberi.

3) Euenit inde, ut, cum Turc   se quotidie in id ingurgitare soleant, reliqui etiam Europ  i ditiores magis magisque forbillandi consuetudini se adstringant, multique vitam sibi acerbam putent, nisi semel, aut bis per diem hasce delicias liberalius degustandi locus sit.

4) C  terum idem, quod de *thea* propositum est, hic quoque iudicium valet; nam sine *decocto calido*, quod vtiq   multis proficuum est, parum leuaminis hauriretur ex hisce fabis, quarum virtutes luxuriosus peregrinarum rerum appetitus indeque nata persuasio & credulitas exaggerasse videntur.

5) Illud satis perspicuum est, *coff  e* grana per se magis obstruere, quam aperire, decoctumque illorum saturatius



tius minorem vsum adferre, quam probe dilutum & quamquam pro consuetudine iam magis solemni frequenter, ac saturate bibitum, non adeo, vt quidam metuunt, nervosum genus adoriri, ac violare, neque viscera oppilata relinquere comperiat, tamen idem hypochondriacos & fœminas otiosas subinde in angores quosdam internos, palpitationem cordis, vel tremorem artuum, præcipue si in conclavi frigido hoc decocto vtantur, coniicere.

- 6) Certior adhuc valetudinis offensa puellis imminet, quæ *pulverem* decoctarum fabarum cupide vorant ad *pallorem* faciei scilicet venustiores sibi gignendum. Hic sane, si inde reportetur, deformior erit naturali rubore, & vecordix iuxta, ac lasæ sanitatis argumentum.

### III. RADIX CICHORII

- 1) Habetur cichorium *hortense* & *sylvestre*, quod priori amarior est; eiusque radix valde vñitata abstergere, aliquantum resolvere, ac temperare notatur, id quod succo eius nitroso, quo abundat & paucis sulphureis partibus intermixtis, adscribendum est.

- 2) Cum ergo lenem utique temperiem accepit, tum teneris debilibus, quos validiore medicatione adgredi intutum est, commodum in variis morbis præbet auxilium, aut leuamentum; præcipue in obstructionibus viscerum incipientibus, vitiis hepaticis, biliosis, ictero, atrophia, catarrhalibus acribus serosis malis, ulceratione interna, hæctica, aut phthisica, quam non valde prouectam detergente suauiter, ac temperante qualitate sua radix, vel decocta, vel destillata cum lacte caprillo optime identidem solatur.

- 3) Tantam autem huius radicis virtutem non animaduertimus, vt confirmatiorem talium morborum statum corrigere possit, nisi efficaciorum adiniculo suffulta porrigatur. Neque etsi specificum hepaticum adpellatur, votis respondet celebrata vulgo efficacia in inflammatione iecoris, fluxu hepatico, maculis illis in



in cute efflorescentibus, quas veteres ex hepate calido deriuant, quartana, hydrope, malo hypochondriaco.

4) Multo minus cruditate, aut infirmitate stomachi, ver-  
mibus, gonorrhœa, spasnis, caligine oculorum &c.  
laborantibus singularem opem promittit; & anilis  
plane fabula est, hac radice corpus inuulnerabile red-  
di.

5) *Flores albi* (vti & radix certo tempore collecta) ad hæ-  
morrhagiam narium & sputum sanguinis, vt secre-  
tum, *flores vulgares* destillati ad oculorum adfectus,  
*semen* ad febres (sed prorsus incerte) laudantur.

6) Adhibetur radix in *substantia*, *succo*, vel *decocto*. Cæte-  
rum prostant illius *aqua destillata*, *conditura*, *extra-  
ctum*, *syrupus simplex* & *de cichorio cum rhabarbaro*,  
qui tum alibi, tum vtilissime infantibus obstructis &  
acri biliosa in puritate grauatis præscribitur.

## 12. RADIX TARAXACI.

1) Exuberat succo lacteo amaro, atque vt ob externam for-  
mam *cichorium sylvestre luteum* quibusdam vocatur;  
sic propter conuenientiam virium dicatur iisdem  
morbis, quos a cichorio leuari diximus. Merito ta-  
men adhuc validior censetur, magisque diuretica,  
vnde *Lobelio herba trinararia* audit.

2) De speciali itaque vsu non multa addemus, optantes,  
vt laudata eius facultas in malis hepaticis, hypochon-  
driacis, scorbuticis, cachecticis, hydropicis felici ex-  
perimentorum successu secundetur. Id supra iam  
notauimus aquam ex integra hac planta & agrimonia  
certo modo rite euocatam in tumoribus frigidis mi-  
rabiliter interdum profuisse.

3) Cæterum primarum viarum vitiis quidem nonnihil  
succurrit, sed non æque febribus intermittentibus  
mederi solet. Nec probatior existit eius aquæ vsus  
in febribus pestilentibus, aut dentitione infantum  
ad conuulsiones præcauendas. Quid vero in oculo-



rum morbis & maculis faciei rubris valeat, vltcrius adhuc experiundum est.

13. HERBA HEPATICÆ NOBILIS.

- 1) Odorem non insuauem spirat, magnamque gloriam ex virtutibus resoluendi, aperiendi, confortandi, quas nonnulli in ea se comperisse putarunt, sibi comparauit. Verum hæc quidem ab aliis non agnoscitur, qualitatem abstergentem præcipue & paullulum roborantem huic herbæ adinetientibus.
- 2) Quamuis igitur in viribus deperditis restaurandis, & hypochondriacis, scorbuticis, ictericis restituendis vota non impleat, neque ex nomine suo *specifici hepatici* honorem mereatur; tamen haud contemni, sed in talibus morbis necnon in pectoralibus, tussiculosis & asthmaticis cum aliis remediis vtiliter coniungi potest. Frustra autem difficultati pariendi, aut spasinis plerumque opponitur.
- 3) *Externe* vulneraria habetur a *Solenandro* & in vlceribus, herniis, stomacace, inflammatione faucium vtilis existimatur. *Aqua* e floribus *destillata* oculorum inflammationem solari creditur, sed superflua est, cum tot alia certiora suppetant.
- 4) Frequentius præscribitur *conserua* e floribus, licet *infuso* etiam, aut *decocto* herbæ commode vti possimus.

14. SATVREIA.

- 1) Ob indolem aromaticam in culinis expetitur, cæterum resoluentem & roborantem effectum edit, hyssopo & serpillo non plane absimilis; sed raro a Medicis adhibetur, ideoque speciales eius vires *interne*, vti passim decantantur, in morbis capitis, pectoris, vteri non satis perspectæ habentur.
- 2) *Externe* cum vino decocta laudem meruit in atonia, motuum defectu, tumoribus frigidis, in primis etiam in statu soporoso, aurium dolore & tinnitu, denique in vlceribus, aphthis, faucium adfectibus.

15. TEVCRIVM VERVM.

1) A



- 1) *A Ludouico* vocatur chamædrys fæmina, a *Tournefortio* veronica chamædryos folio frutescens, atque tum in ficcioribus montanis tum etiam pratensibus locis vltra semicubitalem altitudinem assurgit flosculis innumeris cœruleis monopetalis in erectam densamque spicam congestis, id quod ideo præmittere volumus, quia vulgo minus cognita & tamen ex fide *actorum Berolinensium* multis viribus dotata videtur.
- 2) Decerpta enim folia & flores mense Iulio & in vmbra exsiccata, vti spirant odorem Theæ, eamque & figura inprimis sub inferiore stipite referunt; sic quoque in formam *infusi Theæ* præparata eadem gratia plerorumque gustum adficiunt.
- 3) Præstantior autem hæc censetur Thea ob virtutes magis diaphoreticas & diureticas, ideoque morbis rheumaticis, arthriticis, scorbuticis, quin etiam, vt veronica, læsis visceribus conuenientior existimatur. *Vid. Acta Berolinensia.*
- 4) Et certe dignissima hæc plantula est, vt vberiori culturæ & inquisitioni subiiciatur, meritoque optamus, vt cum tam suauitate quam virtutibus se commendet, Europæis placeat eam, aut aliam congenere in locum Theæ surrogare, vtpote cui tantum pretium magis raritas & peregrinorum admiratio, quam vera vtilitas statuisse videtur.

## 16. FLORES MELILOTI.

- 1) Creberrimo in vsu sunt ob qualitatem emollientem, lenientem & paregoricam, e temperata largiore mucilagine, qua scatent, cum subtilibus terreis paucisque sulphureis partibus arcessi solitam. Quotidie enim his scopis Chirurgi eos emplastris, clysteribus, fomentis, cataplasmatibus cum fructu admiscunt, neque incommode etiam in balneis vsurpantur.
- 2) Rarius dantur *interne*, etsi flores præcipue *albos* cum vino decoctos in fluore albo (sed incerte) item in diar-

ar-



arrhœa & *aquam destillatam* in capitis & memoriæ debilitate, ac renum vitiis, *extus*, vbi probatior est, in oculorum doloribus, intestini recti tumore inflammatorio &c. commendari legamus.

- 3) E præparatis magnam existimationem adeptum est *emplastrum de meliloto* in tumoribus viscerum obstructorum, colli, genarum aliisque dolentibus utile, dummodo, alia efficacius discutientia ei adsocientur, aut interponantur.

#### 17. STOECHAS ARABICA.

- 1) Quæ hodie in officinis prostat, non amplius ex Arabia, sed e Gallia, vel Italia, vbi abundanter crescit, ad nos defertur, atque ob similitudinem quamdam Germ. etiam *welscher Lavendel* cognominatur.
- 2) Præstans autem floribus eius qualitas aromatica, nervina & resoluens tribuitur, unde auctores illorum usum passim commendant in vertigine, tremore, paralyfi, quin & in melancholia, ac epilepsia (sed in his ultimis dubie) porro in viscerum & mensium obstructione, ac pectoralibus catarrhis. Sed nisi subiectorum discrimen habeatur & parciore dosi præbeantur, ob calefacientem vim maiora subinde incommoda pariunt.
- 3) *Externe* utiliores sunt in dictis capitis morbis, atonia, luxatione, tumoribus serosis & catarrhis frigidis, vbi fomenta, vel similia ex iis adplicantur. *Interno* vsui subseruire potest *syrupus de stœchade simplex & compositus*.

#### 18. STOECHAS CITRINA.

- 1) Tam sponte apud nos provenit quam in hortis colitur, ac de salinis magis, quam sulphureis principiis participat, indeque resoluentem sceneratur facultatem.
- 2) Etsi autem flores, qui in usu sunt, a quibusdam laudatos videas in catarrhis, ictero, renum vitiis & præcipue in lumbricis occidendis; tamen *internus* eorum



rum vsus rariore est, longeque adhuc iacet infra præconiorum vbertatem.

- 3) Certius eos in *suffitu* adhibemus ad spasmos mitigandos. Cæterum etiam ad tineas e vestimentis, & pediculos fugandos, itemque ad capillos flauo colore tingendos, & (in *emplastro*, vel *amuleto*) ad necandos vermes interdum adplicantur.

#### 19. MUMIA.

- 1) Officinalis ex Aegypto aduehi dicitur e cadaueribus ibidem aloë, myrrha, pice cedrina, aut pissisphalto conditis desumpta. Hanc autem cum parum in recessu habere iudicet *Ettmüllerus*, suadet idem mumiam patibuli, e strangulatis corporibus, fumo siccandis, & aloë, myrrha, croco, cinnamomo, opobalsamo, camphora &c. condiendis, præeunte *Paracelso*, præparare.
- 2) Sed dubitamus, tanti interesse ad vsum medicum, nam ex conseruato (vt putant) spiritu vitali mumiali magnas vires alexipharmacas, balsamicas, antepilepticas, antiparalyticas &c. proficisci facilius creditur, quam demonstratur.
- 3) Euidentiùs patet, mumiam vulgarem ex additis balsamis suscepisse discutientem & roborantem qualitatem; vnde extus in contusione, stasi humorum superficiali circa vulnera, leuiore partium atonia & languore adhiberi potest; etsi aliis huius generis parabilioribus pharmacis neutiquam præcellat.
- 4) Neque *tinctura*, vel *essentia mumie* palmam mereri deprehenditur in sanguine congrumato, obstructione lienis dissoluenda, aut mensibus reuocandis. Commouet enim sanguinem, sed rarius optato cum successu. Quapropter multi eam aliis postponunt, *Paræus* etiam mumiam, vt horridum & subinde infidum medicamentum, e tabernis pharmaceuticis plane relegendam esse autumat.



## 20. HERBA GERANII.

- 1) E plurimis Geranii speciebus in officinas tantummodo receptum est Robertianum flore magis purpureo insigne, quod sicut austero & adstringenti sapore traumaticam suam indolem prodit, ita vulneribus maxime, vlceribus & fractis ossibus consolidandis adminiculatur.
- 2) Idem nonnullis in vsu est in mammis inflammatis, tumoribus pedum, & cum butyro frixum in fauis & achoribus infantum; sed cauendum est, ne subitanea repulsione maius periculum intenteamus.
- 3) De reliquo dubie adhibetur in oppilationibus vteri, ischuria, calculo, cancro &c.

## 21. RADIX SCROPHVLARIÆ.

- 1) Facultatem quandam resoluentem & abstergentem edit e coniunctione salino-sulphureorum principiorum, quæ tenet, sibi ingentam, vnde pariter ad vlcera inueteratorum, fistulosorum, scabiei simplicis & ferinæ, tumorum, paronychiæ itemque lentiginum curationem subinde traduci cœpit.
- 2) Sigillatim vero ob signaturam nodosam & tuberosam multi hanc radicem in omnibus nodosis tumoribus, strumis, scrophulis (vnde nomen accepit) glandulis induratis, hæmorrhoidibus cœcis, ficibus & mariscis (ex quo etiam ficaria audit) plurimum valere putarunt, neque deficiunt experimenta, quibus id euictum dare conati sint.
- 3) Merito autem dolemus, eadem hæc rarius hodie magno ægrotantium solatio confirmari. Haud tamen indigna hæc radix est, vt frequentiore in vsum vocetur & solerti magis indagationi subiiciatur, vbi eam interne in decocto, extus autem vt amuletum, vel in fomentis & cataplasmate adplicare conueniet.

## 22. PRVNA.

- 1) Ingentem prunorum domesticorum turbam esse iam *Plinius* notat. Ad vsum medicum vero, præcipue seligun-



liguntur sic dicta Damascena valde cœrulea, olim Damasco, iam vero ex Hungaria adferri solita, quorum vicem interdum quoque nostratia explere poterunt.

2) Quemadmodum autem hæc salinis subacidis, cum tenui suauisque mucilagine temperatis partibus, exuberant & mustaceam pene indolem referunt, inprimis a copioso aqueo humore liberata, seu exsiccata; ita vtilia omnino ad abstersionem & lenitionem præstandam reperiuntur.

3) Quapropter, vt salubre euporiston, dari queunt in siccitate alui, bilioso ardore, tenui humorum acrimonia volaticos æstus sæpe inferente, internisque exulcerationibus, neque facile periculum est, ne, vt *Sylvius* metuit, si modo exsiccatae adhibeantur, prouentum vermium augeant.

4) In officinis prostant pruna condita laxatiua, pulpa illorum & electuarium; quæ pariter ac decoctum præscribi solent.

5) Cæterum de *albis* & *cereis* prunis, tam maioribus, quam minoribus (*Spillinge*) adhuc monendum est, quod longe peiorem acriter fermentescentem vim in corpore nostro exercere, ideoque largius comesta tempore autumnali diarrhoeas & sæpe dysenterias concitare obseruentur. Tuta vero & ob suauitatem pluris æstimata sunt pruneola illa, quæ enucleata & exsiccata sub nomine *prunellorum* Galli ad nos transmittunt; his enim cholericos, hæcticos, febricitantes, aliosque orgasmis humorum subiectos aliquatenus refici deprehendimus.

### 23. GUMMI ANIME.

1) Pellucet quodammodo, fractu facile, saporemque resinofum, & si accendatur, suauem odorem habet, vulgoque diuiditur in occidentale pallidius & nitidius, ac orientale, quod magis opacum existit.



- 2) Compos autem qualitatis discutientis, resoluentis ac tonicæ censetur e principiis sulphureis, paucis oleosis cum largiori terrea portione deuinctis.
- 3) Proinde haud ineptum est ad laxitatem partium, vbi-  
cumque obueniat, corrigendam, præcipueque in morbis capitis catarrhalibus, contusionibus, tumoribus, paralyfi, aridura, contractura & luxationibus adhibetur.
- 4) Salubritatem quoque eius interdum experiuntur vlceribus & Synouia laborantes, non item arthritici & podagrici, etsi his etiam conducere quidam afferant.
- 5) De reliquo probe notandum est, internum huius gummi vsum nondum innotuisse. Itaque extus duntaxat in prædictis malis adplicatur, vel suffitus, vel lini-  
menti, aut emplastri forma.

#### 24. GUMMI CARANNAE.

- 1) Perperam sic vocatur, cum mera fere resina sit tenax, si recens, friabilis, si vetusta, colore cinereo nigricante, intus splendente, sapore viscido subamaro, fragrantia, si inflammetur, Tacamahacam æmulans.
- 2) Sudat autem ex Americana quadam arbore, vtque ex acris oleosis & acidis, itemque sulphureo - vaporosis partibus coluit, sic generatim non dissimilem antecedenti facultatem corpus nostrum adficiendi sortita est.
- 3) Vnde & tumoribus frigidis, præcipue circa articulos resoluendis inseruit, & partes teneriores neruofas languidas roborat, ideoque iuncturarum vulneribus, catarrhisque oculorum ac dentium dolentibus & recursantibus, vbi forma emplastri temporibus admo-  
uetur, apta iudicatur.
- 4) Plurimi insuper eam cum tacamahaca contendunt, alii etiam præstantiorem censent in vomitu nimio, colica,



lica, cardialgia, spasticis artuum doloribus & contusionibus.

- 5) Dubie vero laudatur in hemicrania & cephalalgia, neque podagricis nedum fascinatis auxiliari potest. Cæterum externe solum hac resina vtimur.

## 25. GUMMI COPAL.

- 1) Itidem minus Gummi est, quam resina candidissima, vel subflaua translucida e moleculis sulphureo-oleosis & terreis coagmentata, tonicæque ac resoluentis qualitatis particeps.
- 2) Rarissime autem a Medicis adhibetur, & satis adhuc incompertum est, ipsius efficaciam virtutibus gummi animæ posse comparari. Quapropter hac resina facile carere possumus, præsertim cum ea sincera & perspicua magno plerumque constet, & certiore vsu artificibus ad nobilem pulcerrimamque vernicem parandam subseruiat.
- 3) Cæterum *Langius* ex *Pisone* refert, omnes resinas odoríferas ab Indis Copal nuncupari.

## 26. OPOPANAX.

- 1) Optimum hoc gummi ducitur, si sit recens, purum, e granulis conglutinatum, extus colore croceo, vel aureo, intus, si frangitur, pallidum, aut subflauum, nitidum, pingue, amarum & graueolens.
- 2) Effluit vero e caule & radicibus fauciatis plantæ Panacis, quod Heracleum dicitur, olim in Syria solum & Archaia, hodie etiam in Sicilia, Apulia & Gallia crescentis; idemque gummofam mucilaginem cum partibus sulphureis coniugatam continet.
- 3) Ex his vires mutuatur resoluentes, lenientes atque detergentes; propterea in euacuanda pituita lentiore, flatulentia, torminibus, tussi & asthmate humido, quin & in viscerum oppilatione, mensium retentione, hydrope, nephritide calculosa, epilepsia & venenis passim commendatum.



- 4) Sed alii tardam agendi vim, alii internum eius vsum plane nondum rite peruestigatum & expertum arguunt, quare merito ipsi gummi ammoniacum præferendum esse arbitramur.
- 5) Externe probatiorem efficaciam ostendit in tumoribus frigidis emolliendis ac dissipandis, itemque in spasticis doloribus interdum nonnihil permulcendis. Sunt etiam, qui idem vlceribus antiquis & virulentis moribus, at incerto effectu adplicant.

#### 27. PIX NAVALIS.

- 1) Sic vocatur ob vsum, quem præstat in nauibus pican-  
dis. Alias prouenit ex arboribus resiniferis abiete,  
picea & pinastro, vtpote quarum e corticibus, vel ar-  
te incisis, vel sponte manat *resina* seu *tæda* postmo-  
dum destillanda; quod si fiat, per alembicum inde  
euehitur oleum tædæ, seu templinum, per descensum  
vero ex ollis figulinis tæda repletis & in fundo per-  
foratis pix eliquatur.
- 2) Ad vires medicas quod attinet, pix digerere, mollire &  
discutere dicitur, ideoque variis emplastris & ceratis  
solet admisceri, ac tumoribus duris, pedumque cla-  
uis imponi. In arthriticis autem doloribus, nedum  
interne in hæmorrhagiis, prociduo ano, sanguine  
concreto, vtilitatem suam minus comprobauit.
- 3) Neque de oleis eius destillatis varii coloris & fortitu-  
dinis pulcrior quidam effectus inclaruit. Paulo ve-  
rosimilius est membra, si pice illinantur, a noxia fri-  
goris asperitate posse defendi.

#### 28. TACAMAHACA.

- 1) Hæc odorem, si fricetur, aut adoleatur, spargit sua uo-  
lentem, gustatu aromatica amariuscule, colore nigri-  
cans & Galbano fere similis, punctulis subflauis, aut  
ruffis passim interstincta; & sicut ex Indiis ad nos  
in cylindris, plerumque foliis inuolutis transuehitur,  
ita præcipue in noua Hispania & Mexico ex arbore  
populi instar assurgente ibidem stillare traditur.

2) Gau-



- 2) Gaudet autem principiis sulphureis & mucidis, tenacibus, quæ ipsi & resoluentem ac tonicam facultatem & maiorem adhuc virtutum famam conciliarunt.
- 3) Celebris enim, nec inefficax est in tumoribus, (sed non adeo duris, multo minus inflammatis) atonia partium, luxatione, dolore ventriculi, flatulentia, colica, nimio vomitu & diarrhœa.
- 4) Præterea vis demulcens & anodyna illi tribuitur in febrili præcordiorum angore, spasticis pathematibus, malo hyfterico, arthritico, ischiadico, cephalalgia, & odontalgia, in qua postrema, tum denti carioso inditur, tum temporibus adplicatur. Sed hæc omnia minus adhuc probata & pluries irrita comperimus.
- 5) Atque hæc de topico vsu. Interne rarissime datur tacamahaca, etsi quidam essentiam illius in pectoralibus dictisque stomachicis morbis collaudent. Vsi-  
tatissimum autem & aptissimum est emplastrum ex ea confectum, nec spernendum plane oleum per retortam destillatum, quod, modo parce illitum, apprime multis conuenire docet *Ettmüllerus*.

## 29. SALIVA.

- 1) Indolem fermentescentem habet, paullulumque resol-  
uere & abstergere obseruatur, vnde eam, præsertim ab homine sano ieiuno reiectam ad vsum cosmeticum, vlcuscula cutis serpiginosa, lichenes, leues tumores & hordeolum in oculo commendari legimus.
- 2) *Zac. Lusitanus* etiam hunc humorem laudat in vulneribus & morsibus venenatis, sed infirmum medicamen præbet & superuacuum, si alia digniora, quæ fere v-  
bilibet facile parantur, ad manus sint.

## 30. VRINA.

- 1) Hæc quoque ob salino-oleosam mixtionem, inprimis si calefiat, idonea est ad discutiendum, resoluendum & abstergendum.
- 2) Exinde, vbi gratiora desunt, vtiliter adplicatur stasibus humorum in superficie magis hærentibus, tumori-  
bus



bus frigidis e causa externa natis, inflammatoriis incipientibus, & sugillationibus, porro ad scabram cutem nitidiorem & molliorem reddendam, emundationem vlcerum & fissuras manuum ac pedum, itemque podagricos dolores in pediluuiis (sed incerte) leniendos adhibetur.

3) Parum autem facit ad viperarum virus arcendum, & fordidus plane minimeque laudibus consentaneus est vrinæ potus in pestilentia, ictero, scirrho lienis, hydrope. Neque vrina mariti hausta parturientes, tam feliciter expedit, vt non sæpius fallat.

4) De magnetica vrinæ recens excretæ virtute magna multorum expectatio est, & negari nequit, per eam transplantationis quodam modo podagricos aliosque morbos abactos fuisse; sed momentosa adhuc quæstio restat, an tutum sit hoc pacto morbosas commotiones vincere, quasi & suspendere.

5) E præparatis vrinæ excellit *sal volatile* & *spiritus* valde penetrans & salutaris, si intra iustos terminos, vt supra diximus, vsurpetur, frustra autem in febribus, inflammationibus, scorbuto, podagra, calculo, ischuria &c. celebratus.

6) Præter hæc *salis fixi*, ex vrina, spiritus volatilis ex vrina & vitriolo destillati, lapidis sic dicti animalis, seu mercurialis ex vrinæ spiritu & alkohol vini, aliorumque ex hoc liquore speratorum arcanorum efficaciam medicam non satis fidam adhuc stabilierunt documenta.



TABVLA XV.

DE

HVMORVM PRAVITATE  
PECCANTIVM,

SEV

CACOCHYMIÆ CORRECTIONE.

I. DEFINITIO.

Correctio humorum prauitate peccantium est species therapie alterantis, qua heterogeneæ & noxiæ materiæ, quæ humoribus intermixtæ sunt, & crasin eorum naturalem, atque temperiem euertunt, certis remediorum generibus ita subiguntur & alterantur, vt non solum noxius illarum effectus præcludatur, sed etiam postmodum eo facilius, ac tutius euacuari possint. Remedia eiusmodi in scholis Medicorum vulgo dicuntur *edulcorantia, absorbentia, obtundentia, præcipitantia, mundificantia, balsamica.*

II. DIFFERENTIA.

1. Cacochymie correctio differt ab *incrassatione*. Licet enim & hæc correctionis humorum species sit, non tamen cum *peregrinis*, sed sanguini *propriis* materiis occupata est, nempe cum aquositate in humoribus excedente. Interea negari non potest, hanc nimiam humorum serosorum quantitatem sine omni vitiosa qualitate raro reperiri.
2. Pari ratione cacochymie correctio distinguenda est a *resolutione*, siquidem nec hæc humoribus alienis & peregrinis, sed sanguini propriis resoluendis & attenuandis, correctio autem cacochymie rebus heterogeneis, ad sanguinis mixtionem plane non spectantibus, ideoque

Fff

que



que noxiis, subigendis & destruendis destinata est. Iterum autem monemus, humores simpliciter spissos non semper esse solos, sed interdum cum heterogeneitatibus complicari.

3. Eiusmodi heterogeneitates commode diuiduntur

1) in *benigniores*, videlicet *seroso-mucidas*, *salsas*, *biliosas*, &

2) in *maligniores*, quas in *lepra*, *lue venerea*, *cancro*, *scorbuto*, offendimus

4. Atque hæ impuritates, vel in corpore nostro generantur, vel per miasma quoddam cum illo communicantur.

5. Pro varietate autem partium heterogenearum ipsa remedia, vti infra dicemus, variant, & pro diuerso respectu diuersis quoque nominibus a schola medica salutantur. Huc pertinent *absorbentia*, *antacida*, *edulcorantia*, *obtundentia*, *antiscorbutica*, *antiuenerica*, *balsamica* &c.

6. Notandum autem est, per edulcorationem medicam non intelligi eiusmodi humorum dulcedinem, quam v. g. in saccharo & melle gustu percipimus, sed consistentiam gelatinosam, lubricam, inspidam & corpori nostro tolerabilem.

7. Denique distinguimus correctionem cacochymiae in

1) *internam*, quæ, vel vniuersæ humorum massæ, vel certo cuidam corporis loco, dyscrasia eiusmodi adfecto, destinatur, &

2) *externam*, ad quam pertinent remedia digestiua, mundificantia, vlceribus abstergendis consecrata. *Conf. tabul. chirurg. de vlceribus.*

### III. INDICANTIA.

Non est, quod de *indicantibus* fusius hic exponamus, cum partim sub *differentia*, partim sub *indicatis* hac de re speciatim dixerimus.

### IV. INDICATA seu REMEDIA.

Hæc, vti sub *differentia* iam diximus, variant pro cacochymiae varietate

1. *Seroso-*



1. *Seroso-mucida & vappida* cacochymia corrigitur *resoluentibus*, de quibus præcedente tabula diximus, & temperate *balsamicis*.

2. *Lymphatico-salsa communis* humorum deprauatio, quæ v. g. in scabie, tussi acri, adfectibus ulcerosis &c. reperitur, exposcit partim *resoluentia catarrhalia*, partim *diluentia*, *gelatinosa*, *mucilaginosa* & *absorbentia*, quæ infra sequuntur.

3. *Lymphatico-salsa venerea* corruptio alteratur per *anti-venerea* e. g.

Rad. Bardanæ  
Chinaë  
Petasitidis  
Pimpinellæ albæ  
Sarsaparillæ  
Vincetoxici  
Herb. Saponariæ

Lign. Fraxini  
Juniperi  
Pini  
Sassafras.  
Tinct. antimonii  
Mercurialia. *Vid. tab. de saluatione.*

4. *Acida*, tam primarum viarum, quam humorum corruptio requirit *absorbentia* & *alcalia*.

1. *Absorbentia*, vel sunt

a) *Animalia*, e. g.

Testæ Cochlearum  
Concharum  
Matris perlarum  
Quorum

Chelæ & lapides cancri  
Cornu cerui vstum & philosophicum

Spodium, seu ebur philosophice præparatum

Dentes variorum animalium

Mandibulæ lucii piscis, vel

b) *Mineralia* v. g.

Corallia

Creta

CrySTALLUS montana

Vnicornu fossile

Terræ bolæres

2) *Alcalia* sunt e. g.

Salia Absinthii

Cardui benedicti

Gentaurii minoris

Cinerum clauellatorum

Tartari

Volatilia ex animalibus destillata

Tinctura antimonii tartari sata

Salis tartari & oleum huius per deliquirum

Spiritus fuliginis

5. *Biliosa acrimonia* & *causus* apte mitigatur & obtunditur *nitrosis*, *absorbentibus*, *mucilaginosis*.

E ff 2

1) Ad



1) *Ad nitrosa* pertinent  
Nitrum crySTALLISATUM, seu de-  
puratum  
regeneratum

Lapis prunellæ

2) *Mucilaginosæ* sunt e. g.  
Ptisanæ

3) *Absorbentia* superius indicata sunt.

6. *Sanguinea semi-putrida*, seu *scorbutica* corruptio corrigitur, par-  
tim per *generaliora resoluentia*, de quibus præcedente ta-  
bula locuti sumus, partim per *antiscorbutica*, e. g.

Rad. Allii  
Armoraciæ, seu ra-  
phani rusticani

Ceparum

Cichorii

Raphani nigri

Herb. Acetosæ

Acetosellæ

Beccabungæ

Chærefolii

Chelidonii minoris

Cochleariæ

Fumariæ

Nasturtii

Piperitidis

Sedi minoris

Trifolii fibrini

Flor. Acaciæ recentes

Succ. Berberum

Citri

Ribium

7. *Sanguinea magis putredinosa* labes emendatur per *balsa-*  
*mica*, quæ sunt vel

1) *Vegetabilia* e. g.

Radices alexipharmacæ omnes

Herb. Basilicæ

Chamædryos

Hyperici

Hyslopi

Maioranæ

Mari veri

Melissæ

Menthæ crispæ

Pulegii

Rorismarini

Satureiæ

Scordii

Serpilli

Teucrii

Thymi & reliquæ,

quæ coronariæ

vocantur

Flor. Caryophyllorum hor-  
tensium

Croci

Lauendulæ

Liliorum conuallium

Pri-



Primulae veris	matibus & semini-
Sambuci	bus destillata, e. g.
Spicae	Caryophyllorum
Tiliae	Cinnamomi
Sem. Anethi	Iuniperi
Anisi	Lauendulae
Carui	Melissae
Foeniculi	Rorismarini
Sileris montani	Serpilli
Baccae Iuniperi	Strobulorum pini
Lauri	Balsamus de Copaiua
Lignum Aloës	Peruvianus, vel
Sassafras &c.	2) <i>Animalia</i> e. g.
Aloë	Tinctura mumiae
Gummi hederæ	Ol. Cerae
Mastiche	Ouorum, vel
Myrrha	3) <i>Mineralia</i> e. g.
Sagapenum	Succinum & illius essentia;
Sandaraca	oleum
Sarcocolla	Rubinus sulphuris ex balsa-
Terebinthina	mo sulphuris pa-
Olea ex balsamicis herbis aro-	ratus.

## V. MODVS OPERANDI.

Vti varii generis sunt remedia, cacochymiam corrigentia, ita variis quoque modis hunc effectum præstant,

1. alia enim sufficiente aquositate acida diluunt, & hac ratione stimulum eorum infringunt, atque ad faciliorem excretionem illa præparant, e. g. potus calidus thee coffee, veronicae &c.

2. Alia, qualia sunt absorbentia, moleculis suis terrestribus acidum coagulans corrigunt, dum humorum massæ adhærendo hanc ex lenta spissitudine in pulpofam, ac volubilem consistentiam permutant, vel porosiore sua substantia partes acidas absorbent, & cum illis in sal medium abstergens abeunt.

3. Alia coagulante sua efficacia biliosam acredinem quasi figunt,



- gunt, nempe acida & nitrofa; alia particulis salinis eandem a partibus solidis abstergunt, e. g. salia media.
4. Alia particulis suis oleosis & pinguibus humores acres obtundunt: alia mucilaginosi suis partibus eosdem inuoluunt & ad naturalem crasin reducunt.
5. Alia qualitatibus suis resinoso - sulphureo - balsamicis corruptionem putredinosam inhibent. At licet horum modus operandi physicus negari non possit, plura tamen phænomena, & præcipue exiguae remediorum portiones satis testantur, quod moralis ratio principatum hic teneat; anima enim gratis balsamicorum remediis excitatur, ut miasmata talia e corpore suo animose proscribat, id quod eo sollicitius tenendum est, quo magis propter vulgarem conceptum error practicus in *calidis* præscribendis facile committitur.
6. Alia, præcipue *absorbentia*, effectum magis physico materias subtiles, agiles, fermentescentes & contagiosas obui-  
fcent, coagulant, irretiunt & inuoluunt.
7. Alia particulis suis acris coagulatos humores, vel genericè, vel specificè resoluunt. Huc spectant *resoluentia* prioritabula enarrata, *antiuenerica* & *antiscorbutica*.
8. De modo operandi *mercurialium* videantur notæ in tab. de *saluatione generali*.

## VI. MODVS PROPINANDI.

1. Ante omnia primæ viæ per blandum aliquod euacuans sunt expurgandæ: hæ enim quando impuritatibus scatent, vel acidis, biliosis, acris, vel mucidis, tum correctio, quæ humorum causa suscipienda est, irrita foret, & remedia ante, quam ad massam sanguineam pertingerent, in primo statim limine virtute sua spoliarentur.
2. Deinde impuritatum species rite peruestigetur, atque ad propriata corrigentia ei opponantur e. g.
  - 1) Mucidis resoluentia
  - 2) Salino - acris & biliosis absorbentia, gelatinosa, mucilaginosa, nitrofa.
  - 3) Scorbuticis antiscorbutica

4) Ve-



- 4) Venereis antiuenerica
- 5) Putridis & vappidis balsamica.
3. His alterantibus euacuantia, vel coniungantur, vel interponantur, alias omnis correctio irrita erit. In hunc finem conueniunt.
  - 1) Laxantia, præcipue per epierasin operantia;
  - 2) Diapnoicæ & diureticæ euacuationes
4. Plethoræ & hæmorrhagiarum naturalium tanto magis ratio habeatur, quanto frequentius præcipuum hoc momentum negligitur. Certissimum enim est, quod plurimorum cacochymia a quantitate humorum nimia originem habeat & per eandem sustentetur.
5. Denique tonus partium roboretur, & diæta conueniens imponatur; præcipue placidus corporis motus illis commendetur, quorum & corporis & morbi indoles illum tolerant. Dantur enim nonnulli, licet paucissimi, morbi chronici, inter quos luem veneream numeramus, qui a motu voluntario plus detrimenti, quam utilitatis reportant.

## VII. CAUTELÆ ET OBSERVATIONES PRACTICÆ.

1. Magni quondam habita fuit, & adhuc dum habetur *pathologia cacochymica*, præcipue *salsa*. Principes nouæ huius æthiologiæ medicæ fuerunt *Tachenius* & *Sylvius*, qui *Hippocratis* effatum de *mille saporibus* sinistre interpretati plus quam sexcenta salium genera, omnium morborum causas, accularunt. *Affectæ* eorum longe pertinacius ipsis præceptoribus huic sententiæ inhæserunt, & diuerfos acres, atque salino-sulphureas acrimonias, genus neruofum diuerso modo adficientes, pro omnium morborum auctoribus strenue venditauerunt,
2. Hæc figmenta auream illam veritatem de humorum *simplici abundantia morbifera*, item de morbis ex *meris commotionibus* & sanguinis *translationibus* ita obscurarunt, ut pauci hodie meliora perspiciant, complures vero adhuc abstrusa illa hypothesi, ex ignotis & obscuris rerum figuris, atque qualitatibus morborum causas arcescente, dele-



delectentur & hisce suppositis remediorum oppositorum operationes per figurarum constitutiones contrarias sibi fingant.

3. Equidem non prorsus inficiamur salina & alia inquinamenta & posse & solere massam sanguineam conspurcare, atque non nullos morbos producere. Vfus enim acidorum, falsorum, dulcium &c. non potest non prauam humorum mixtionem inferre, nisi quidem secretiones & excretiones vegete succedant; hoc autem culpamus, plerosque & tantum non omnes morbos ex hisce salium fontibus deriuari, cum tamen hæc sententia nulli demonstrationi; sed meræ opinioni innitatur, &, quod præcipue dolendum, in methodo medendi, præctice adplicata, plus detrimenti, quam vtilitatis adferat.
4. Vbi autem cacochymia vere peccat, ibi omnino alterantia, supra commendata requiruntur. At quemadmodum alterantes therapie reliquæ omnes exposcunt, vt euacuantia congrua, ad felicem effectum consequendum, mox subiungantur, ita in cacochymie correctione hoc præcipue est obseruandum. Quoniam enim deprauati humores, quocunque modo correcti, cum reliquis in gratiam redire non possunt, necesse est, vt per aluum, diuresin & diaphoresin quantocyus eiiciantur.
5. *Scordium* in prauitate humorum putrida, vt egregium balsamicum *interne* se commendat, id quod *myrrha* in læsionibus prutridis *externe* præstare in dies obseruatur.
6. *Absorbentia* vti præ aliis cacochymiam corrigentibus abusi exposita sunt, ita tanto magis cautelas obseruari necesse est, quas in *conspectu medicine practice* hac de re passim inculcamus.
7. Optime miscentur *absorbentia* cum *salinis digestiuis*; quod si vero *sola*, & in maiore quidem quantitate ingeruntur, tum cum materia peccante in pastam abeunt, & tam in primis viis quam in ipsis humoribus peregrinos plane exserunt effectus. Vbi autem absorbentia acridinem biliosam & acidam immediate attingere possunt, vt in effu-



effusione bilis, & soda; ibi *ut talia* optime se gerunt, id est, materiam peccantem in suos poros resorbent.

8, Contra si acres biliosæ impuritates *massam sanguinis* conspurcarunt, tum *nitrum* omnium est præstantissimum.

#### 9. ACETOSA

1) Est, vel *vulgaris sylvestris*, vel *rotundifolia hortensis*, vel *Hispanica maxima*, pariter apud nos in hortis coli solita, atque ut succo acidulo non insuavi exuberat; ita plurimos ægrotantes reficere potest.

2) Inprimis commode destinatur nimio æstui, tam simplici, quam febrili, bilioso ardori, siti clamosæ, ictero leuiori, inflammationibus, tum aliis, tum præcipue faucium, phlogosis vagis cholerico, hypochondriaco & scorbutico, ubi & primas vias abstergit & diuresin nonnihil promouet.

3) In his ultimis aptissime tota hæc planta cum aliis validioribus antiscorbuticis e.g. cochlearia, armoracia &c. miscetur, quippe quorum acrimoniam, nimiam interdum ebullitionis humorum concitatricem, blande temperat.

4) Veteres *radicem* maxime in omni sanguinis commotione, febribus acutis & malignis, viscerum obstructione & atonia plurimi fecisse frequentissimeque adhibuisse constat. *Herba* tamen ob maiorem teneritudinem radici præferenda videtur.

5) Incerte vero laudantur aduersus morsum canis rabidi, aut strumas; neque *semen* pariter incrassantis & subadstringentis qualitatis consors, tam pulcrum remedium præbet in variis hæmorrhagiis, dysenteria, febrium acutarum diarrhoea &c. quam vulgo celebratur.

6) Prostant ex acetosa *aqua destillata*, *syrupus* & *conserva*. Crebrius autem *decoctum* præscribitur ad iulapia, quod si e radice siccata, additis, vel omissis herbæ foliis, fiat, gratus rubicundus liquor acquiritur.

#### 10. ACETOSELLA

1) Vocatur etiam *trifolium acetosum*, ac præcedentem virtutibus

G g g



tutibus adæquat, tencritudine superat; vnde ad eosdem vñs conuenientissima est (dummodo ægri acida tolerant) Cæterum haud particeps cardiacæ & singularis cuiusdam analepticæ facultatis, quam ipsi ex foliorum, cordis figuram æmulantium, signatura competere quidam opinantur.

2) Prostant hinc eadem præparata nec non *sat essentielle*.

## II. BASILICVM, seu OCYMVVM CITRATVM

1) Variat pro foliorum magnitudine & colorum, quibus hæc picta sunt, diuersitate, rarissimeque, excepto eius *semine*, ad vñum medicum transfertur.

2) Spargit autem suauissimum odorem quasi aromaticum, licet succulentum sit, meritoque vires quasdam roborandi & resoluendi habere censetur. Vnde sunt, qui hanc herbam ad capitis morbos, vertiginem, lithymiam, tristitiam, catarrhos frigidos, diuresin iuuandum, menses obstructos & pariendi difficultatem commendant.

3) *Externe* neruinum quoque effectum edit, & aduersus venenatorum animalium morsus, valere, itemque exsiccata, vt egregium ptarmicum prædicatur.

4) *Semen* veteres speciebus roborantibus quibusdam addiderunt, ac hodie idem aliqui laudant in angina, aphthis, fissuris cutis & papillarum, clavis pedum, pectoris morbis &c. Sed nihil est, quod de virtute illius indubia proferre liceat.

5) Cæterum ex hac herba, lateribus duobus in medio excavatis interiecta, radiisque solaribus aliquamdiu exposita scorpiones gigni multi tradiderunt, hodierni autem plerique physici abnuunt.

## III. CHELIDONIYM MINVS

1) *Et Müllerus* hanc herbam, tum inspidam fere, tum acriorem obuenire monet. Ultima hæc ad vñum capitur & scorbuticis præcipue manducanda præbetur, quamquam promissis satisfacere raro experiantur practici.

2) Inte-



- 2) Integra autem plantula nempe cum radice specificam resoluentem & abstergentem vim habere creditur in hæmorrhoidibus tumentibus, turgentibus, mariscis ani (unde etiam *ficaria* audit.) Sed cautius applicanda est, ne maior inflammatio, ulcerosus denique & fistulosus status subsequatur. Ut amuletum vero minime hæc mala aufert, neque alias, vel sanguinem coagulatum, vel strumas discutit, neque duris tumoribus, ulceribus, nedum cancro insigniter subuenit.

## 13. MARVM VERVM

- 1) Penetrantem odorem atque acrem aromaticum ssporem prodit atque a Gallis *Masticina*, forte ob similem pene fragrantiam & effectum, quo mandendo largiorem mucum elicit, adpellatur.
- 2) Suppar autem maioranæ & neruinarum præcipue virium foecunda habetur, ac licet rarissime a medicis præscribi soleat, tamen a quibusdam magnam ei efficaciam in capitis & uteri morbis tribui legimus, id quod vberior experientia planum faciet.

## 14. FLORES CARYOPHYLLORVM HORTENSIVM

- 1) Ob suaueolentiam & iucundam colorum varietatem exquisitiore cultura digni existimantur, & sature *rubentes* præcipue medicis inseruiunt ad roborandum & moderate incrassandum.
- 2) Speciatiim vero caput debilitatum recreare autumantur; propterea vulgo laudati in epilepsia, apoplexia, vertigine, syncope, oculorum caligine, palpitatione cordis, porro in diarrhoea, dysenteria, vomitu nimio, febribus.
- 3) At, quod dolemus, experientia hodierna tantis encomiis minime assentitur, neque adscriptam virtutem alexipharmacam, neque singularem cephalicam in vulneribus capitis ullo modo confirmat.
- 4) In officinis parantur ex his *aqua*, *spiritus*, *syrupus* & *conserua*, quibus analeptica quædam vis haud derogari potest. Longe vero ieiuniora sunt & *acetum*, & *tinctura* per acidulum vitrioli phlegma confecta,



& *oleum* per infusionem extractum, ad vlcera inueterata & fistulas, vt putant, accommodatum.

5) *Caryophyllus sylvestris*, seu *montanus* (non aliter ac flores hortenses commendante *Theodato*) a rusticis in decocto sumitur ad diuresin promouendam.

#### 15. PRIMVLA VERIS

1) *Flores* huius herbæ etsi leuiter solum fragranti oleo solo principio imbuti sint, tamen magnam virtutis opinionem habent in roborandis neruis, discutiendis stasibus, aut saltem stagnationibus, ac doloribus demulcendis.

2) Quippe cumulatae passim exstant eorum laudes in paulo ante dictis capitis adfectibus, maximeque in paralyti, spasmus, arthritide, podagra, & malis vterinis; at quantopere experientes hodie deferant, non attinet pluribus euinci.

3) *Radix*, quæ amaricat, ad lumbricos infantum, febres, arthritidem, calculum & hernias valere perhibetur, quamquam vix prosperiore euentu.

4) Inter præparata vero e floribus *Spiritus* reliquis præcellit, sed tamen ad aliorum vere neruinorum efficaciam non accedit. In aulis etiam interdum *vinum* ex his floribus paratur suavis & temperatae indolis, quod magnates ad curam, vt loquimur, Maialem seu einer Frühlings-Cur subinde expetunt.

#### 16. SEMEN ANETHI

1) Qualitate & principiis non procul recedit a cumino, magis tamen anodynam & somniferam virtutem accepisse simul creditur.

2) Sicut igitur temperata sua semiaromatica indole resoluit & roborat, ita hoc scopo varia stomachi & mucidorum humorum vitia emendare potest, quamquam cumino aut caruo, frequentius vti soleamus.

3) Speciatim singultum cum dolore coniunctum mire sedare, libidinem vero extinguere & oculis quoque nocere (sed incertius) putatur.

4. Ex.



- 4) *Externe summitates*, quibus iustius anodyna quædam vis competit doloribus capitis tum in cataplasmate, tum in pediluviiis convenire, quidam docent. Cæterum & oleum anethi coctum, itemque destillatum ad supra dictum usum commode possunt adhiberi.

## 17. LIGNVM ALOES.

- 1) An ita dicatur ob odoriamentum, an propter amaritudinem aliasue causas, disputent, quorum interest; nobis scire sufficit, illud haud a planta, quæ aloën suggerit, sed a peculiari arbore Indica provenire, atque a quibusdam adpellari *lignum paradisi*, vel *agallochum*, etsi alii agallochum a ligno aloës distinguant & *Langius* verum agallochum raro ad Europæos exportari, spurium autem frequenter sub huius ligni nomine venundari ex A. N. C. alleget.
- 2) Probatur autem solidum, spadiceæ coloris, striis ferme nigricantibus notatum, saporis subæris & amaricantis, odoris, dum accenditur, aut frictione calefit, fragrantis; indeque principia eius aromatica, resinoso-terrea & qualitates resoluendi, discutiendi, ac roborandi statuuntur.
- 3) Atque has virtutes plerique hodie tantæ æstiment, ut ipsum hoc lignum inter cephalica, cardiaca & stomachica præcipuum quemdam locum mereri videatur. Proinde eius laudes prostant in cerebri, memoriæ, ac visus debilitate, in lipothymia, palpitatione cordis, cruditate, vermibus, colica, cholera, dysenteria, morbis vterinis, cachexia &c.
- 4) Sed, licet haud plane inefficax sit, tamen *interno* usu minime tantis encomiis respondet, & salubrius *externe* adplicatur in catarrhis capitis, suffuro aurium, flatulentia & atonia intestinorum, aut alibi occurrente, itemque ad foetorem oris paullo corrigendum manducatur.
- 5) Hoc scopo satis est idem, vel *vino decoctum cataplasma- tis* instar, vel in *suffitu* adhibere. Alias in officinis prostant *species*, *irochisci*, *essentia*, *extractum*, id



quod nonnulli *confectioni alchermes* conferendum esse viribus duxerunt.

### 18. LIGNVM PINI.

- 1) De domestica arbore, quæ nuces pineas circa Rauennam præcipue profert, hic non loquimur, sed de nostrate syluestri, seu pinastro fructifera, ab abiete & picea distinguenda, cuius *ligno* resolucendi & mundificandi efficaciam scorbuticis & malo Neapolitano delumbatis subuenientem quidam adiudicant.
- 2) Præcipue autem *coni* resinosi, *turiones* & *folia* pini æque ac abietis *decocta* celebrantur in scorbuto, indeque nata paralyti & arthritide vaga, colica &c. ac cum acri oleo turgeant, grauiorem facile humorum ebullitionem & nisi parce vsurpentur, talium malorum exacerbationem inferunt.
- 3) *Externe* certius conferunt ad sordes cutis scabiosas & vlcerum inquinamenta, itemque, ut nonnulli volunt, ad paralyticam & atrophicam membrorum debilitatem, menses ciendos, & (in cataplasmate) ad tenesmum.
- 4) Ad huiusmodi vsum etiam vocatur *oleum tædæ*, seu *templinum* ex hac arbore eductum; aliis quoque placent, vel *rob* ex decocto strobilorum paratum, vel *spiritus* per fermentationem inde confectus, vel *aqua destillata*.
- 5) Cæterum *puluis* ille *flauus*, qui in iunioribus conis subinde reperitur, conuenit cum sulphure vegetabili musci clauati in phthisi, aliisque morbis, sed frustra, laudatus. De *Pice* alibi actum est.

### 19. GUMMI HEDERÆ.

- 1) Mirum plerisque videri posset, hoc gummi reliquis huius familiæ adnumeratum fuisse, cum vulgo tantum *externe* ad capillos erodendos, pediculos eorumque ouula, seu lendes exstinguendos & claritatem oculis adferendam commendetur.
- 2) Sed omnino, si quis genuinum orientale, cuius notas autores obscure admodum tradunt, sibi compareret



ret & prudenti vsui subiiciat, eam nobis haud adeo aduersum fore credimus.

3) Neutiquam autem illud probamus, quod iuxta vulgarem descriptionem saturo virore aut nigredine infectum acrem & adstringentem saporem linguae imprimit, omnis ferme odoris expers; sed sollicite conquirendum est gummi hederæ flavo-rubellum hyacinthino splendore, suaueolens & fragrans, inprimis si conteratur, sapore non ingrato, nec acri valde, nec styptico præditum, baccis & festucis ligneis hederæ passim adhærens, atque hoc ab omnibus impuris moleculis nigricantibus quæ semper & fere copiosius interiacent, segregandum.

4) Tale gummi, resinoso-terreis principiis vber, aliis conuenientibus remediis adsociare in plerisque morbis chronicis vtile compertum fuit; namque egregiam humores fundendi, resoluendi & laxiores fibras roborandi potestatem sæpe ostendit, neque tamen modo iusta dosi exhibitum, orgasmum sanguinis, aut alias turbas vnquam excitasse notatur.

5) Itaque in cacochymica & vappida sanguinis intemperie, morbis frigidis cachecticis, chloroticis, mucidis catarrhalibus &c. commode potest adhiberi, idque in forma vel vino cum aliis soluta, vel pilulari.

## 20. SARCOCOLLA.

1) Adparet in granis spongiosis & friabilibus, colore subrufo interpositis quandoque micis splendentibus, subpallidis, saporis ingrati, odoris per se nullius, si vero accendatur, aduersi, atque ab arbore quadam *Perfica*, quam *Hermannus iubymalum arborescentem spinosum* esse putat, funditur hoc gummi mucidis terreis abundantius, paucioribus salinis & sulphureis partibus repletum; vnde cum inspisset, glutinet, & nonnihil abstergat, tum ad vulnera & vlcera consolidanda, & cicatricem inducendam iam diu, vel ipso nomine teste, vsurpari consuevit.

2) Neque tamen epuloticum solum est, sed etiam luxatis  
aut



aut fractis artubus adplicari, nec non oculorum vulneribus & vitiis frigidioribus albugini, & nubeculae dicari potest, modo hic praecepta autorum teneamus, ut ob acrimoniam in eo simul latentem, qua oculis nocumentum minatur, lacte temperatum modice imponatur.

3) Pauci *suffitum* ex eo & terebinthina in tenesmo laudant, nonnulli quoque *internum* eius usum in diarrhæa, dysenteria, hæmoptysi aliisque sanguinis profluviiis adprobant, sed non est, quod suadeamus imitamentum.

#### 21. FVLIGO.

1) Est substantia e tenui terra, acido & resinoso lignorum principio motu igneo concreta & eleuata, indeque resoluentem, ac sudoriferam præcipue qualitatem habere iudicatur.

2) Itaque alii fuliginem nempe splendentem cum aceto mistam porrigunt in sanguine grumoso, casu ab alto, partu difficili, & febribus, alii ex ea per alcali tincturam extrahunt in malo hysterico commendatam, *Glauberus* etiam decoctum illius rubescens asperrimo frigori exponendum & deinde liquorem salino-oleosum penetrantem, qui in centro aquæ congelatæ residet, ad usum adseruandum esse præcipit.

3) An vero plerisque subiectis aptum ac tam salubre medicamen sit, quam passim extollitur, dubitamus, præsertim cum largius datum facile orgasmos suscitare & vterinos ac febriles motus acriter intendere soleat.

4) Vltiore ignis agitatione ex hoc concreto elicitur *sal volatile* & *spiritus urinosus*, qui utique omnes alios fere subtilitate antecedit, adeoque ad varium usum, ut alia huius generis, idoneus est; sed vulgo prædicatam singularem virtutem in colica, podagra, nedum in pleuritide & febribus malignis neutiquam ruetur. Neque *oleum flavum* & *rubicundum*, quod post spiritum destillatione prodit, fidum se præstat in suffocatione hysterica, pellendo foetu, externe in lepra,



lepra, doloribus podagricis. Idemque ridicula & ultra fesquipedem tumida hyperbole animam agentes mirifice refocillare perhibetur. *Confer. Ettmüllerus.*

## 22. CARBONES TILIÆ.

1) Crudum & incertum remedium suggerunt, licet *Helmontius* & *Hartmannus* eos cum aceto datos lapsis & vulneratis succurrere opinentur.

2) Præstantior est *florum* tiliæ qualitas, ut supra monuimus. *Cortex intermedius* vero perquam leue auxilium promittit in ambustionibus, & ulceribus; neque idem cum, vel sine gemmis & foliis decoctus arthriticos, calculosos, fæminas obstructione laborantes adeo subleuat.

3) Pari modo hæc arbor epilepticos scilicet restituit; certe, nisi alia meliora accedant, neque umbra sua, neque granis, seu baccis subadstringentibus, neque visco, neque succo, neque carbone vix umquam tam optatum effectum editura.

4) Quod si autem tiliacea adhibere, quis hoc scopo cupiat; ille succum e trunco, circa radicem tempore verno fauciato, manantem excipere, ac tentare poterit, ab *Ettmüllero* aliisque cæteris omnibus antelatum.

## 23. CHELÆ CANCROVVM.

Cum aliis ostracodermatis conueniunt, ac tuto eorum vice, si ita necessitas suadeat, fungi possunt, saltem cuncta terrea bolaria & absorbentia ex animalibus terrestribus desumpta, virtutibus suis longe anteire obseruantur. Plura vide supra de *lapillis cancerorum*.

## 24. DENS APRI.

Hic tenuissime comminutus ad absorbentium subtiliorum classem pertinet, meritoque in vsum vocatur in febribus inflammatoriis, hecticis &c. sed tamen generali magis efficacia agit, quam specificam virtutem in pleuritide & angina laudatam demonstrat.

H h h

25. Co-



## 25. CORALLIA.

- 1) Concreta hæc, e mari præcipue mediterraneo piscatione extrahi solita veteres inter vegetabilia marina, alii inter lithodendra, multi recentiores etiam inter mere lapidea referunt & vulgari demollitie illorum sub vndis opinioni contradicunt.
- 2) Proferuntur autem maxime *alba*, *rubra* & *nigra* compluraque alia coloribus ab his plus minusue recedentibus insignia, neque defunt *spuria*, quæ osteocollæ speciem repræsentant, & quoniam veris coralliiis porosiora sunt, a physicis *Poris* varie figurati adpellantur.
- 3) Cæterum Medici inprimis in vsum vocant vera rubicunda, iisque multas virtutes adscribunt. Neque negari potest, ipsa ob crasin terream & limosam multum valere in absorbendo, ac tonum languentem nonnihil restaurando; vnde apta & salubria sunt ægris orgasmo sanguinis, acrimonia bilis, fluxu cholericæ, diarrhoea, dysenteria, spastico artuum dolore correptis, itemque torminosa intestinorum acrimonia cruciatis infantibus.
- 4) Mirificam tamen facultatem medendi nusquam fere præ aliis huius generis probatis edunt, omninoque illos, qui ob *sulphur* scilicet *solare* speciales analepticas, confortatiuas, alexipharmacas & antepilepticas vires a coralliis rubris præstolantur, deludunt. Futilius vero adhuc & superstitiosius adpensa prædicantur in fascinationibus & lemurum terriculamentis abigendis.
- 5) Ad supradictum vsum simplex coralliorum *pulvis* sufficit, vtpote, si cum aliis convenientibus misceatur, satis polychrestus, certe fidelior illis artificialibus *tincturis*, quas inde a *Paracelsi* temporibus summo quidem honore adfectas, acriterque quæsitas, sed, deficiente illo potentissimo Alkah est, a nemine adhuc dum rite inuentas nouimus.

6) Ple-



- 6) Pleræque autem sic dictæ tincturæ coralliorum sunt tantum subtiles corporis integri solutiones, e quibus illæ ad vsum paullo magis roborantem & subadstringentem deligi possunt, quæ blandioribus acidis vegetabilibus v. g. succo citri, berberum, item spiritu mellis &c. perficiuntur. Altius quiddam in recessu habere videtur coralliorum reclusio per menstruum ex mercurio sublimato, ac spiritu salis factum & a *Cnöffelio* commendatum, nec non per longiorem trituram, quam *Langelottus* & *Borrichius* extollunt; sed magna his laboribus eruta vis medica nondum hucusque inclaruit.
- 7) Pariter, vel friuola, vel incerta sunt pleraque *magisteria*, vtpote quæ simplici pulveri cedunt, opera & sumptibus indigna.

## 26. CRETA.

- 1) Terra hæc compacta & valdopere 'macra' copiose in Brabantia aliisque locis effoditur, ac differt præcipue pro vario colore, quippe non albicat solum, sed & ochrea, cinereo-violacea, braune Kreide, coerulea, viridis, nigra, subfusca &c. conspicitur.
- 2) In medico foro famosum eius nomen est inter absorbentia, exsiccantia & incrassantia remedia, ideoque commendatur maxime in foda, ardore vrinæ, bilis acrimonie & vermibus; at profecto crudum medicamen præbet, ostracodermatis crassius & virtute inferius; nam vt alias creta cum acidis in stypticum crama abit, sic in corpore nostro, præcipue intestinis cum talibus humoribus coalescendo noxam inferre potest, quam sane euidenter a largiore cretæ vfu puellæ, formosi (verius deformis) palloris aucupes, experiuntur.
- 3) *Externe* laudem habet in hæmorrhagia narium, vlceribus, quin & in inflammatione & podagra. Sed his ultimis potest inde retrocessio periculosa euenire, & in vniuersum tutiora nobis, ac præstantiora suppetunt,



## TABVLA XVI.

DE

## ADSTRICCIÓN E.

## I. DEFINITIO.

Adstricção est actus therapie alterantis, quo motus tonicus, in partibus solidis relaxatus, per conuenientia remedia ita intenditur, atque augetur, vt fluidarum, quas continent, progressus & æqualis distributio promoueatur, hæmorrhagiæ quoque excedentes refrænentur, immo nonnumquam euacuanda exprimantur. Huc referuntur remedia *repellentia, reprimentia, adstringentia, tonica, traumatica, styptica.*

## II. DIFFERENTIA.

1. *Adstricção* differt ab *incrassatione*; hæc enim solum in humores agit, illa vero cum motu partium tonico, rarius cum humoribus commercium habet.

2. Est autem adstricção, vel

1) *grauior*, quæ repente & fortiter effectum suum exserit, ac distingui potest in

a) *directam*, quæ immediate fibras solidarum partium coarctando & constringendo qualicumque humorum adfluxui & effluxui obices ponit; & in

b) *indirectam*, quæ iterum duplex est, dum vel

a) humores incrassando sese exserit, vel

β) motus peculiariter prouocando, euentum eiusmodi producit.

2) *Leuior*, quæ iustum atque naturalem partibus conciliat tonum; quo lenius vero huius toni augmentum est, eo magis partes roborantur.

3. Deinde adstricção est, vel

1) *interna*, quæ per repellentia, reprimentia, tonica perficitur; vel

2) *externa*, quæ per traumatica, styptica obtinetur.

III. IN-



III. *INDICANTIA.*

Exposcunt vero adstrictionem

1. *Fortiorem,*

- 1) viæ ultra modum patulæ.
- 2) Efferæ sanguinis profusiones, præcipue lochiales, uterinae.
- 3) Humores nimium fluxiles & serosi.
- 4) Alui fluxus enormes, qui aliis euacuantibus & abstergentibus cedere recusant, sed impetu feroci continuant.
- 5) Febres intermittentes, fixam noctæ sedem, & remota materia peccante solis motibus anomalis contumaciam exferentes.
- 6) Violenti externi fluxus a soluta unitate pendentes.
- 7) At quibus cautelis hæc omnia circumscripta sint, infra dicetur.

2. *Leniorem, tonicam*

- 1) cuiusvis partis laxitas, seu atonia, & ex hac proficiscentes sanguinis,
  - a) vel effluxiones,
  - b) Vel stagnationes.
- 2) Diabetes.
- 3) Sudores nimii.
- 4) Debilitas visceris cuiusdam a morbo prægresso ortum trahens.
- 5) Euacuationes per viscus quoddam, e. g. per renes, pulmones &c. factæ.

IV. *INDICATA seu REMEDIA.*A. *Vegetabilia.*

Rad. Bistortæ

Bugulæ

Consolidæ maioris

Filipendulæ

Lapathi

Pentaphylli

Pimpinellæ sangui-

forbæ

Plantaginis

Pseudoacori

Rhabarbari tosta

Rubix tinctorum

Sigilli Salomonis

Tormentillæ.

H h h 3

Herb.



Herb. Agrimonix  
 Alchymillæ  
 Anserinæ  
 Auriculæ muris  
 Bellidis vulgaris  
 Bugulæ  
 Bursæ pastoris  
 Equiseti  
 Gnaphalii variæ spe-  
 cies  
 Hederæ terrestris  
 Herniariæ  
 Hypericonis  
 Matri siluæ  
 Millefolii  
 Nummulariæ  
 Pentaphylli  
 Perfoliatæ  
 Persicariæ  
 Plantaginis  
 Polygoni  
 Pyrolæ  
 Saniculæ  
 Scabiosæ  
 Veronicæ  
 Vincæ per vincæ  
 Virgæ aureæ  
 Vrticæ minoris  
 Vuulariæ.  
 Muscus Cranii humani, seu  
 vsnea  
 Quernus.  
 Semen Acetosæ.  
 Flores Balauftiorum  
 Hyperici  
 Portulacæ

Rosarum rubrarum  
 Sophiæ Chirurgo-  
 rum.  
 Folia querna  
 Lignum quernum  
 Santalinum rubrum  
 Cortices Chin-Chinæ  
 Fraxini  
 Granatorum  
 Tamarisci.  
 Viscum quernum.  
 Fungus Crepitus lupi  
 Cynosbati  
 Fructus Berberes  
 Castanæ  
 Corna  
 Cupulæ glandium  
 Cydonia  
 Gallæ Turcicæ  
 Grana Kermes  
 Mespila  
 Mora  
 Myrtilli  
 Nux Cupressi  
 Pruna &  
 Pyrasyluestria  
 Ribesia  
 Sorba.  
 Gummi Laccæ  
 Mastichis  
 Sanguinis draconis  
 Sarcocollæ  
 Thuris seu Olibani.  
 Succus Hypocistidis  
 Terræ Catechu.



**B. Animalia.**

Cochinella  
Cornu Cerui vſtum  
Ebur vſtum  
Hippopotami dens  
Manati lapis  
Os ſæpiæ  
Pili leporis  
Priapus ceti  
Tela araneorum  
Vnicornu foſſile.

**Gemmæ**

Hæmatites

Hyacinthus

Martialia &amp; præcipue

crocus martis ad-

ſtringens

Minera martis Haſſiaca

Ochra

Saturnina, e. g. ceruſſa, li-

thargyrium, minium,

plumbum vſtum, ſac-

charum ſaturni

Terra Lemnia

Sigillata

Vitriolum.

**C. Mineralia.**

Acida mineralia

Alumen

Bolus armena

Corallia rubra &amp; alba

**V. MODVS OPERANDI.**

1. Motum adſtrictionis a principio vitali interno dependere, tam ex ſtatu hominis ſano, quam præternaturali ſatis ſuperque edocemur. Sicut enim illud leniore ſtrictura gradu, quem toni naturalis augmentum vocamus, omnes euacuationes ordinarias promouet; ita eodem valde intenſo, tantas ſubinde conſtrictiones & occluſiones patrat, quantæ vix vllò pharmaco efficiuntur; vti videre licet, in hæmorrhagiis e terrore &c. ſuppreſſis, itemque in ſpasmis & conuulſionibus vias maximopere coarctantibus.

2. Idem euidenter in oculos quaſi incurrit, vbi languenti naturæ ſubſidiis adſtringentibus ſuccurrere iubet neceſſitas. Quotidiana namque experientia teſtatur, remedia huiusmodi, primo omnium in primas vias delata & dehinc chyli ope per totum corpus diſtributa, non in quouis corporis loco, licet circulationis lege quemuis attingant, ſed plerumque & præcipue in parte læſa, vel relaxata conſtrictoriam ſuam exercere virtutem. Itaque merito concludimus, tam diſtributionem, quam effectum



Etum eiusmodi remedii adscribendum esse principio rationali, tale quid percipienti, ac ad necessarium locum consulto dirigenti.

3. Immo ne quidem semper necessarium est, ut hæc remedia oblata ad illum locum peruehantur, in quo adstrictio fieri debet; sed natura, in aliquo loco cum euacuatorio actu operosa & occupata, effectum adstrictionis per remedium oblatum sentiens excitatur, ut eundem in eum locum transferat & administret.
4. Excitationes autem, quas ipsa remedia adstringentia efficiunt, diuersa ratione fiunt: Alia enim sale suo crasso & austero fibras teneras, ita molestant & offendunt, ut natura ad hunc molestum sensum partium flexilitati maxime infensum, excutiendum, mox fibrillas musculares crispatorio motu contrahat, & adhærentes particulas austeras, ac terrestres amouere adlaboret.
5. Quo vehementioris vero atque magis drasticæ indolis sunt oblata eiusmodi remedia adstringentia, eo validius quoque & obstinatius constrictorium suum motum prosequitur natura. Contra quo temperatioris sunt indolis, eo plus emolumenti adferunt, & suo tempore exquisita temperie adhibita aperientem quoque & exoptatissimum post se relinquunt effectum.
6. Alia certis partibus sensibilibus aliena sunt, & in iisdem citius, quam in aliis operantur; sic quædam magis membranaceas, & tunicaceas, nonnulla musculosas partes citius alterant. Sunt e.g. remedia, quæ in ore detenta narium hæmorrhagias & hæmoptysin adstringente effectui compescunt.
7. Alia dantur remedia, quæ secundario, humorum incrasatione, adstringentem edunt effectum, qualia sunt terrea bolaria & gypseo-calcareæ indolis, quæ humores nimis fluidos inspissando, ad adfluxum & effluxum ineptiores reddunt.
8. Sunt denique alia, quæ externe adplicata, vel humores in superficie cutis coagulant, vel ipsam cutem cum acidofali.



salino principio molestius adficiunt, ut contrahatur. Hunc effectum sulphur externe adpositum præcipue post se relinquit.

## VI. MODVS PROPINANDI.

Vbicumque adstrictione opus est, ibi prospiciendum

1. ne vlllo magno impetu, sed gradu sensim progrediente & incremente tentetur, alias stricture, tam pertinaces inferuntur, ut multa damna inde proueniant.
2. An *vires* & reliqua ægri conditio eam perferre possint; subiecta enim tenera a leuissima adstrictione in motum turbas coniiciuntur.
3. Vt *regimen* aptum subiungatur: quies enim & frigus uti adstrictionem promouent, ita motus corporis & blandus calor nimias quoque stricture moderari possunt.
4. Vt denique suo tempore & loco debita atque congrua materiæ illius, per adstrictionem aliquo modo correctæ, euacuatio contingat. Hinc vbi adstringentia necessaria videntur, conuenit illa modo digestiuis, abstergentibus, discutientibus comitari, modo ipsorum vsui hæc & alia leniora laxantia subiungere.

## VII. CAUTELÆ ET OBSERVATIONES PRACTICÆ.

1. De adstrictione generatim notandum, repentinos effectus & præcipientes motuum alterationes per eandem produci posse, cum nullus actus tam facilis & levis sit, quam hic adstrictorius. Sed loca adstricta denuo referare, vinculaque hac medicatione inducta resoluerè, vel tantum relaxare, magni laboris opus est.
2. Magno enim sæpius cum damno contingit, ut strictoriis motibus semel adsueta natura eosdem quasi mordicus retineat, nec nisi operosa medicatione, longo tempore, imò subinde nunquam ab illis se reuocari patiatur.
3. Posuimus quidem indicata adstrictionis validioris, sed prudente atque circumspecta æstimatione in iis morbis decernenda sunt. Necessitas enim vsus adstringentium admodum circumscripta est, nisi hæc mala summum sui gradum attigerint,



4. *Hæmorrhagiæ* iuniorum, floridorum, plethoricorum, qui de reliquo satis vegeti, alacres & viuidi sunt, licet sæpius, aut affatim eueniant, adstringentibus compescendæ non sunt: nisi quidem per periculosa loca e. g. per pulmones summo cum impetu erumpant, & mortem minentur.
5. Adstrictoria cohibitio sanguinis *hæmorrhoidalis* non audacem, sed prouidum vtique exposcit artificem. Quam cito enim in pertinacem abeat suppressionem, & quædamna huius fluxus adstrictio relinquat quotidiana testatur experientia.
6. Eamdem dexteritatem desiderant nimix hæmorrhagiæ feminarum. Non sufficit enim sanguini congesto *exitum* præcludere, id quod facile potest obtineri; sed artis est, vt etiam *aditus* & *ulteriores congestiones* prudenter reuellantur.
7. Sic e tristibus exemplis frequentius intelligitur *febres intermittentes* famoso illo febrifugo, *cortice Peruviano*, ita coërceri, vt ex intermittente lenta & tandem hectica oriatur.
8. In dysenteria, febribus biliosis, vomitu cruento, asthmate, febre lenta, hectica, phthisi, gonorrhœa maligna, foda, adfectibus spastico-arthriticis, vrinæ incontinentia directus adstringentium fortiorum vsus non est concedendus.
9. Tutioris autem vsus sunt tonica, quæ, vel neruinis maritata, cuius generis est mixtura tonico-neruina *Stæblii*, vel lenibus anodynis conjuncta, in cohibendis sanguinis, præcipue menstrui, fluxibus multum possunt.
10. Adstringentia *externa* æque cautum exposcunt vsus. Præmatura enim vlcerum adstrictio & materiæ ichorosæ in corpus repulsio, scabiei per sulphurata linimenta repercussio, oedematum & vlcerum manantium diuturniorum repressio numquam bona fide & securitate fieri potest.



## II. FILIPENDULA.

- 1) Herba & radix, quam & *saxifragiam rubram* vocant, in usu sunt, atque abstergere pariter ac adstringere dicuntur, a quibusdam exinde laudata in nephritide, ischuria, hæmorrhoidibus dolentibus & dysenteria.
- 2) Sed imitantes plerumque spe sua excidunt, vnde certiora præsidia merito huic plantæ anteponimus.

## 12. PENTAPHYLLUM.

- 1) Hæc planta itidem manifesto obstipat & adstringit, perperam exinde magnis encomiis in tertiana, quartana, hectica, obstructione hepatis, paralyfi, podagra, epilepsia, calculo, a quibusdam onerata; quippe specificum salubrem effectum nusquam edit, generali autem sua vi maius plerumque damnum adportat.
- 2) Neque audiendus est *Tabernæmontanus*, qui radicem huius plantæ comparat radici *Chinæ*. Et cum omnia hæc minus cognita sint, sufficere potest usus *externus*.

## 13. PIMPINELLA SANGVISORBA.

*Maiori minor* præfertur, cuius folia teneriora ad acetaria subinde expeti videas. Cæterum cum hanc præter adstringentem alia singulari medendi facultate donatam esse nondum innotuerit, nihil opus est plura at-  
texere.

## 14. PLANTAGO.

- 1) Hæc (vti & semen eius) ex salino, acido & terrestri principio satis manifesto adstringit, tam interne sumta, quam extus adplicata.
- 2) Vnde intelligi potest, qua circumspectione accipienda sint huius herbæ laudes in hæmorrhagiis, dysenteria, gonorrhœa, fluore albo, morbis hepaticis, quartana, ictero, hydrope, phthisi, singultu &c. Certe nisi parce detur, maiora facilius damna iniunget.
- 3) Neque satis perspecta est vis alexipharmaca, quam multi ex historia illa de *bufone* ab aranæ ictu se foliis plantaginis defendente & curante probare contendunt.



4) Neque *extus*, et si vulnera consolidet, in igne sacro, spasmis, podagrico dolore & tumore conducere animaduertitur.

5) Denique, nec *radix*, quæ ex parco nitroso principio leniter abstergit, celebratam vtilitatem sui in pestilentia, febribus, renum vitiis &c. huc vsque ostendit.

#### 15. PSEUDOACORI RADIX.

1) Est *iris palustris* flore *luteo*, probe discernenda ab *iride*, seu *gladiolo cæruleo*, folia quidem similia, sed longe aliam qualitatem nacti; nam hic ad purgantia pertinet, cum pseudoacorus plane dissonam & sat magnam constringendi potestatem exercere videatur.

2) Quapropter, vel solum de collo suspensa dysenteriam sedare dicitur. Nos certe virtutem huius radice in profusissima narium vetulæ cuiusdam hæmorrhagia, quam detenta in ore, irritis aliis omnibus, præfenter cecit, aliquando vidisse meminimus.

#### 16. SIGILLVM SALOMONIS.

1) Huius radix præcipue in vfu est, facultate sua adstringendi ac detergendi insignis, sed tamen rarissime intro sumitur, cum publicatis eius laudibus in fluore albo, hernia, ischuria nullum fere pondus accedat ab hodiernis experimentis.

2) *Externe* vero cum aliis mista egregie se gerit in congestionibus humorum, stasi recente, tumore adhuc molli, inflammationibus; inprimis in omni contusione & sugillatione, vbi eam, quia acrior est, cum radice *symphiti* admixta temperare suadet *Ettmüllerus*.

3) Dereliquo frustra laudatur ad tenesmum, podagram & malum ischiadicum, neque cosmeticum illum effectum edit, ad quem virgines fuci studiosæ suspirant.

4) Prostat eius *aqua destillata*, alias & in *decocto*, gargarismate, fomento, *sacculis siccis*, vel *cataplasmate* adhiberi potest.

#### 17. ALCHYMILLA.

1) Præter adstringentem, qua pollet, facultatem, etiam motum humorum intestinum augere, & inflammationem,



tionem, si quæ præsto sit, exacerbare notatur, unde cum *interno* eius usu cautius mercandum est, v.g. in vomica pulmonum, exulceratione dysenterica, herniis &c. vbi vulgo commendatur.

- 2) *Extus* autem egregie conuenit eius decoctum cum aliis permixtum in vulneribus & vlceribus; & laxitatem partium quoque corrigit, experimento Italorum in mammis pendulis vsitato.

### 18. ANSERINA.

- 1) Austerum & acrem saporem prodit, ac præter quam, quod vt adstringens in variis fluxibus & vulneribus commendabilis existimetur, specificum hepaticum & anti-ictericum audit, itemque singulare arcanum in nephritide calculosa.

- 2) Major autem experientia requiritur, vt pro nobilibus hisce virtutibus quis spondere possit. Non minus incertum est, hanc herbam in calceamentis gestatam suppressere menses & dysenteriam, planeque intutum tentamen est, illius ope paroxysmos febriles coercere.

- 3) *Externe* laudatur in intertriginibus, vlceribus, mobilitate dentium, hæmorrhagia narium, morbis oculorum, maculis faciei & lentigine &c. quæ omnia an satis firmo talo nitantur, diligentius adhuc excutendum est.

### 19. BURSÆ PASTORIS.

- 1) Satis valide adstringit, ideo caute vsurpanda, tam in internis morbis, quam externe in dysenteria, inflammatione, podagra, tumoribus, febribus, & certe tutius hic omittitur, cum nihil veri leuaminis adferre queat.

- 2) Meliorem efficaciam promittit in vulneribus, vlceribus oris & dentium vacillatione. Cæterum plantis pedum supposita, nec ictericos, nec cephalalgia afflictos percurat.

### 20. EQVISETYM.

- 1) Huius vsus ob adstrictionem, quam efficit, parè indi-



get circumſpectione, ſpecificas autem vires nuſquam adhuc comprobauit.

- 2) In miſtu cruento, præmiſſis aliis, viſa eſt hæc herba ſubinde operæ pretium feciſſe, nec effectum noxiæ adſtrictionis reliquiſſe. De cætero rarius adhibetur.

#### 21. GNAPHALIVM.

Generatim, vt cætera huius classiſ, adſtringit, ſed ſpecialiſſimam & probatam in dyſſenteria efficaciam, vt nomen eius Germanicum vult, non oſtendit; neque oculorum mala inſigniter leuat, neque de collo ſuſpenſa lumbricos infantum interficit.

#### 22. MATRISYLVA.

- 1) Mitioris traumaticæ & abſtergentis etiam qualitatis conſors, inprimis iecinori amica, vlcerumque internorum & icteri medela iudicatur; id quod vltiori experientiæ relinquimus, vehementerque optamus, vt *hepaticæ ſtellatæ* cognomen vere tueatur.
- 2) Dubie vero nonnulli adſerunt, ab hac herba mœrorem animi, palpitationem cordis, & venenorum vim depelli, vel pedibus ſuppoſita partum adiuuari.

#### 23. NYMVLARIA.

- 1) *Centum morbia* etiam adpellatur, quamuis illam præter virtutem vulnerariam magnis aliis dotibus inſtruatam eſſe nondum conſtet.
- 2) *Ettmüllerus* quidem hanc inter antiſcorbutica refert; alii in ſtomacace ſaltem itemque in tuſſi ſicca, ſanguine congrumato, hæmoptyſi valere prædicant; nonnulli denique ipſam in hominibus curare, quibus contra inferre phthiſin opinantur; ſed fidem talis efficaciam nondum firmavit vberior experientia.

#### 24. PERFOLIATA.

Experta ſatis vulneraria eſt, & non magis ad externum vſum, quam internas potiones recipi ſolita. Hæ vltimæ tamen parcius adſumi debent, tum in læſionibus vlcerofiſ, tum etiam in hernia, ad quam ſanandam herba & ſemen vulgo magnopere conducere perhibentur.

25. PER:



## 25. PERSICARIA.

- 1) Piperatam exferit acrimoniam (vnde & *hydropiper* vocatur) & non tam adstringit, quam incidendo, resolviendo & detergendo operatur.
- 2) Quapropter non ingloria (vtinam tam constanter salubris!) existit in morbis frigidis serosis, cachexia, hydrope, ictero, scorbuto, asthma humido, lue Gallica, quin & in arthritide vaga & malo hypochondriaco. Sed cum probatiora ad manus sint, non est, quod quemquam ad huius herbæ usum, adeo cohortemur. Saltem vbique nos decebit iustum subiectorum discrimen & circumspeditionem adhibere.
- 3) *Externe* cutem rubefacit, ac præcellens habetur in vlceribus malignis & inueteratis, paronychia, clauis pedum & tumoribus frigidis.
- 4) Inprimis vero ad *magneticam* plurimorum malorum curationem transfertur, vbi quidem plantam recentem frigida ablutam parti læsæ imponunt, donec probe incalescat, tum adhuc tepentem in fimo, aut alio loco, vbi cito putrefieri potest, sepeliunt, atque hoc sæpius facto, vulnera quælibet, vlcera, fugillationes, odontalgiam rebellem, podagricos & ischiadicos dolores euanescere pollicentur.
- 5) Cæterum datur eius *decoctum*, vel *aqua destillata*, in calculo & supradictis morbis celebris, in variolis autem & febre petechiali merito excludenda.

## 26. POLYGONVM.

Adstrictoria qualitate gaudet, singularium virium, quantum constat, inops; nam in calculo & vermibus idem valde prodesse adhuc incertum est; quare, hoc relicto, ad alia properamus.

## 27. PRVNELLA.

- 1) Dicitur & *consolida minor flore purpureo*, atque a *Paracelso* internis etiam vulneribus curandis destinata legitur.
- 2) Frequentior autem vsus eius est in angina, consillarum inflam-



inflammatione, vlceribus oris & sphthis, rarior & minus probata in pestilentia, dysenteria, phthisi.

- 3) Crescit & apud nos *prunella cœrulea*, seu *consolida media*, seu *bugula*, pari fere traumatica virtute insignis, sed internis morbis, vt quidam laudant, non æque accommodata.

28. PYROLA.

- 1) Est temperata traumatica & intestinorum aliisque vlcerationibus internis consolidandis subinde destinatur, quin & ab intra e vulneribus varia heterogenea ossa, ligna &c. expellere dicitur.
- 2) Nonnulli eam cum vino albo decoctam & calide admotam commendant in aridura membrorum; sed an sufficiat, dubitamus.
- 3) Ceterum hanc plantulam, vti & præcedentes aliasque vulnerarias adhibemus, vel decoctam, vel melius rite, vti statim monebimus, destillatam.

29. SANICVLA.

- 1) A sanando nomen adquisiuit, atque inter traumatica chorum fere ducit, adeo vt non modo *extus* ad emplastra & iniectiones, sed & ad *internas potiones vulnerarias* sæpissime recipiatur.
- 2) Et docet vtiq̃ue experientia, ab hac herba colliquationem simul promoueri atque, si iusto tempore in phthisi & vomica pulmonum præbeatur, effectum nonnumquam edi plane singularem.
- 3) Quid porro valitura sit, ad meliorem vsum pectoralem, & in vlceribus internis, si vino infusa & macerata, quemadmodum de veronica indicauimus, destilletur, operæ pretium erit diligentius explorare; præsertim cum *Stablius* omnia vulneraria sic potius, quam vulgari modo decocta propinare suadeat.

30. VINCA PER VINCA.

- 1) Vt vim traumaticam possidet, sic præcipue ad anginam & faucium morbos leuandos apta prædicatur.
- 2) Insuper alii ipsam menses prouocare & lactis prouentum



tum augere putant, alii ab externo usu hæmorrhagias compesci, abortum præcaueri, incantamenta propulsari aiunt, sed paucis hodie persuadent.

### 31. VSNEA CRANII HVMANI.

1) Muscus hic, in cranio cadauerum & præcipue hominum rota, vel laqueo interemtorum subinde crescens, ex singulari vegetatione mirum quid fouere & prodigiosis viribus pollere multis existimatur.

2) Præterquam enim, quod adstrictoria sua qualitate fluxus sanguineos inhibeat, *extus* adplicatus internas hæmorrhagias sistere; dysenteriam & synouiam compescere, itemque conuulsiones quascumque, pauciores & inquietudinem infantum, incantamenta &c. propulsare quibusdam visus est; nisi forte, vel credulitas, vel alius error, vt videtur, auctores deceperit.

3) Porro ad corpus impenetrabile reddendum & certum e bombardæ ictum experiendum a venatoribus adhiberi traditur; cæterum ad *unguenti* illius *armarii sympathetici* ingredientia etiam pertinet.

### 32. FLORES BALAVSTIORVM.

1) E *granato sylvestri*, flore pleno, nam *domestica* simplici tantum flore conspicua dicitur, colliguntur, atque e partibus suis acido-terreo-stypticis satis apti sunt ad adstrictionem, vbicumque hæc tuta & salutaris est, perficiendam; vnde hoc scopo frequens eorum usus est in *gargarismatibus*, *injectionibus*, *pulvere dentifricio* ad firmandos dentes, *linimento* ad eundem usum & gingivarum cruentationem inhibendam.

2) Ob congruentiam principiorum & effectuum adponendus his est *cortex granatorum*, seu *malicorium*, vtpote quod adhuc valentius adstringere censetur. Itaque ad eosdem casus referuari potest. Cæterum decoctum eius ad nares & oculos in variolis defendendos, itemque lumbricum latum interficiendum prodesse, quin & a *Bartholino* fluxum menstruum prouocasse citatur, sed ancipiti experimento.



3) Longe alia *fructuum granati* indoles est, vt supra ostendimus.

### 33. SOPHIA CHIRVURGORVM.

Hanc herbam *Paracelsus* maximi quidem fecisse dicitur, sed vsum singularem reticuit. Neque hodie magnæ quædam, egregiæ ac tanto nomine dignæ virtutes eius inclaruerunt, etsi vulnerariam non temnendam esse nemo ignoret.

### 34. CHINÆ CORTEX.

1) Salutatur variis nominibus, inter quæ *cortex Peruanus*, *Iesuiticus* & *China China* vsitatiora sunt, & decerpitur ex arbore quadam Peruviana *Gannonaperide* dicta, distinguendus a cortice *Cascarille*, seu *China*, vt quidam vocant, *spuriæ*, de quo supra diximus.

2) Amaricatautem & austerum saporem offert; ex quo pariter atque ex aliis phænomenis haud difficulter colligitur, principia eius maximam partem acidoterra & pauciora resinosa, indeque qualitatem magis adstringentem existere.

3) Quapropter mirum non est, hoc cortice febres intermittentes cohiberi, vtpote quod & alia adstringentia patrant; sed quæstio mouetur, an specifica virtus antifebrilis huic cortici tribuenda sit, id quod multi expertissimi viri hodie inficiantur.

4) Concidunt ergo magnifica præconia de singulari eius vi, contumacissimæ quartanæ domitricæ, cum ne quidem simplicem tertianam sine aliorum ope solide percurare, immo grauiorem noxam inferre soleat, si præmature & largius ingeratur.

5) Certe e promiscuo illius vfu in febribus, postquam tot auctores ad decantandas eius laudes consenserunt, multiplex damnum fluxisse & adhuc fluere notatur. Alibi enim intermittens in continuam, tertiana in quotidianam, simplex in duplicem inde conuersa est, alibi constrictio alui, recidiva grauior, præcordiorum angores, color iæterodes, oppilationes viscerum, tumores, pallores, obstructions mensium, cachexia,



chexia, hydrops denique, vel hectica subsecuta sunt. Confer, Stahl, *diff. de febr. interm. turbatis atque corruptis.*

6) Tanto minus in febribus acutis continuis porrigendus est, ubi certe grauius periculum & mortem, præcipue pulvis eius, maturat. Hectici quoque citius ab eo intereunt & variolarum reliquiæ, vt nonnullis placet, nequaquam hinc probe subiguntur. Neque tutius tentamen est vermes eodem interficere.

7) Præmissio emetico hic cortex cum aliis datus a febre intermittente, quandoque robustos vere liberat, sed plerumque tamen, nisi materia morbi ante sublata sit, nocet, numquam autem necessarius est, cum sine eius interuentu lenior methodus se satis efficacem præbeat.

8) Cæterum a fautoribus plerumque maiore dosi præscribitur in *pulvere, electuario, extracto, essentia*, quæ reliquis minus adstringit, quin & *clysteres* inde parari docentur.

### 35. CORTEX TAMARISCI.

1) Desumitur ex arbuscula huius nominis in Gallia, prope Rhenum quoque & alibi in Germania crescente; vtque paullum suaueolet & amaricat; sic ex acidoterreis tonicam, ex aliis salinis & nonnihil sulphureo-resinosi partibus suis abstergentem & resoluentem facultatem combibisse creditur.

2) Proinde citant auctores hunc pariter ac *lignum*, tamquam specificum spleneticum, alii quoque *corticem* in malo hypochondriaco, ictero flauo & nigro, quartana, arthritide, cachexia, fluore albo, scabie conducere atque ab Aegyptiis non fecus ac guaiacum ad luem veneream curandam adhiberi referunt.

3) Pleraque autem hæc maiorem speciem grandiloquentiæ habent, quam fidei; vnde accuratius examen subire iubenda sunt. Cæterum hic cortex in decocto dari potest, extractum vero grauius adstringit.



## 36. CREPITVS LVPI.

- 1) Fungus hic ouatus, qui & *bouista* dicitur, puluerem subtilissimum salino-terreum & stypticum continet, oculis adeo infensum, vt si forte iis adfletur, grauem sane inflammationem & noxam adferre possit.
- 2) Inferuit autem Chirurgis ad stypsin, seu ad sanguinis fluxum e vulneribus, præcipue carnosarum partium sistendum, nam in maiorum vasorum læsionibus minime sufficit.
- 3) Cæterum vlceribus manantibus cautissime inspergendus est, quia subito quasi repellit. Eadem de causa hæmorrhoidum fluxui & narium hæmorrhagiæ minus conuenit. Neque etiam pernionibus utilis videtur, neque aptus ad festucas vulneribus infixas extrahendas.

## 37. CASTANÆ.

- 1) Non tam adstringunt, quam ad incrassandum & inuoluendum aptæ sunt, ob spissam mucilaginem, pinguius quibusdam moleculis temperatam; quam, vt texturæ suæ materiam, acceperunt.
- 2) Exinde in laxitate alui & raucedine vsurpari possunt, sed robustiora & laboriosa subiecta desiderant; nam paullo difficiles concoctu sunt, & teneris flatulentiam, obstructions, aliasque molestias pariunt, præsertim immoderatus comestæ.
- 3) *Cortex interior* adstringit & infide in fluore albo sumitur. Cæterum nucleus in defectu panis sanos & valentes probe saturare & famelicos reficere potest.

## 38. CORNA.

- 1) Austera sunt, indeque incrassandi & adstringendi qualitate imbuta, sed rarissime præscribi solita.
- 2) In quibusdam officinis parantur *rob de cornis* & *electuarium cornelinum*, seu *diacornon*, in diarrhœa & variis sanguinis profluuiis passim laudata; sed certe meliora habemus.
- 3) *Flores arboris corni* adstringunt; cæterum *oleum* ex ligno



gno eius durissimo destillatum frustra cancro opponitur.

## 39. GALLÆ.

1) Proprie non sunt fructus quercuum, sed tubercula magis excrementitia, vt *Malpigijs* detexisse visus est, a certa muscarum specie, quarum ouula ad folia roboris deponuntur turbata folii compage sensim quasi formata, quæ in hoc domicilio tamdiu sibi ex arbore alimentum quærunt, donec satis nutritæ aliorum a-uolent, perforato prius hoc hospitio, vnde gallæ semper foramine vno, aut pluribus pertusæ conspiciuntur.

2) Ad vsum autem expetuntur gallæ Turcicæ minores magis nigricantes & multis verrucis obsitæ, quas in calidioribus regionibus ex quercu humiliore, quam nostras est, colligunt. Nostrates enim gallæ ad vsum magis ineptæ habentur.

3) Sicuti vero plenæ sunt acido magis vitriolico & terra styptica; sic validam adstringendi ac repellendi potestatem exercent. Quapropter consultius est eas *externo* solum, quam *interno* vsui destinare.

4) Pertinent huc alia ex quercu desumta, sed omnia magis minusque adstringunt, adeoque intus caute vsurpanda sunt. *Arbor* ipsa ad transplantatorias morborum, vt arthritidis, podagræ, dentium & capillorum casus, ac hecticæ curationes adcommodata quibusdam videtur, sed infide. Frustra quoque *lignum* guaiaci vices supplere posse, aut *decoctum* ex eius *rasura* tumores hydropicos tollere creditur.

5) Dubie item *carbones* ex hoc ligno in ictero & sanguine congrumato, nec non *vermiculi* inter lignum & corticem errantes præparati in tinnitu aurium & surditate laudantur.

6) Neque *folia* conferunt ad pestilentiam amoliendam, aut colicam. Quid vero *tenella* ea valeant in halitu foetido & soda, vltius adhuc experiendum est.



- 7) *Glandes* vulgo commendantur dysentericis, calculosis, pueris lectum permingentibus, aut a venenato animali morsis &c. sed rusticis merito relinquendæ. Neque *calyculi* earum, seu *cupulæ* singulare quidquam præter adstrictionem efficiunt. Idem valet de *cortice, vna quercina, musco* &c.

#### 40. KERMES GRANA.

- 1) Vocantur & *grana infectoria* ob vsum, quem tinctori-  
bus præstant. Proueniunt autem supra fruticem ar-  
boris cuiusdam humilis, *ilicis cocciferæ* dictæ, quæ  
in Hispania & Gallia Narbonensi studiose colitur; &  
maturæ factæ scatent vermiculorum turba (qui post-  
modum auolant & folliculum inanem relinquunt)  
de reliquo tum magnitudine & colore rubro bacculis  
asparagi similes.
- 2) *Cocci*, seu *grana* hæc amaricantem & adstrictorium sa-  
porem linguæ offerunt, ideoque vulgo commendan-  
tur in diarrhœa, dysenteria, sanguinis profluuiis, &  
abortus periculo.
- 3) Præter hæc vero in eorum succo residere putatur exi-  
mia virtus cardiaca, analeptica, exhilarans; vnde  
plurimi ipsum ingentibus elogiis in debilitate capi-  
tis & memoriæ, virium defectu, syncope, palpitatio-  
ne cordis, metu, terrore & tristitia melancholica, ab-  
ortu imminente, iam pridem condecorarunt.
- 4) Sed hodie multi spe, tam optabilis effectus se deludi  
queruntur, & *Ludouici* nostratium rosarum succum  
substituit, magno sane argumento, non tantopere  
fidendum esse pulcerrimo colori.
- 5) Profecto rarius se euidenti vtilitate præ aliis adprobat,  
neque in febribus sanguinem a corruptione vindica-  
re, neque extus hic succus adplicatus cor insigniter  
roborare, aut variolas expellere potest.
- 6) In officinis prostat famosa illa *confectio alkermes* minus  
per se, quam ex aliis additis non nihil analeptica. Ab  
aliis etiam *syrupus*, vel *tinctura* ex his granis confici-  
tur.



## 41. MESPILA.

- 1) Ex mixtione sua acerbiorē salino-terrestri coagulant, incrassant atque adstringunt, inprimis cruda & immaturiora, nam quæ adferuatione per aliquod tempus mollescunt paullo mitiora obseruantur.
- 2) Speciatim iis quidam vtuntur in diarrhœa, (quam valde contumacem *Forestus* se mespilis domuisse testatur) variisque alui, & vteri profluviiis, itemque in vomitu nimio, & pica grauidarum, sed crudum medicamen præbent rarius vtile, teneris vero & debilibus sæpe etiam noxium. Periculosius adhuc est ea dyfenteria *maligna* laborantibus largius indulgere.
- 3) *Officula*, seu *lapilli*, quos figura triquetros, numero quinque in fructu hoc reperimus, vt diuretici laudantur in calculo, vrinæ difficultate, mensibus albis; sed euentu pariter ambiguo. Neque *lignum* mespili adpenfum, vt multis placet, abortum auertit, aut hæmorrhagias præ aliis cohibet; Cæterum in officiniis prostant mespila condita.

## 42. MYRTILLI.

- 1) *Recentes* largius ingurgitatæ fermentescunt & diarrhœas suscitant; vid. A. N. C. *siccata* vero magis coagulare, & adstringereprehenduntur.
- 2) Vnde sunt, qui in hæmorrhagiis, & dyfenteria eosdem propinant, quod tamen in tenerioribus vix tentandum est, nisi plane meliora deficient.
- 3) Pariter stomacacem & pectoris morbos leuare, ac *radix* carnem luxuriantem in vlceribus absumere (sed dubie) prædicatur. Certiore effectu tinctorum succo vtuntur ad lintea obscuro cœruleo colore inficienda.
- 4) Ad vsum passim prostant *syrupus* & *rob myrtillorum*.

## 43. CUPRESSI NVX.

- 1) Cupressus arbor (olim funeribus sacrata) hortorum nostrorum ornamentum, in Italia læte crescit & lignum suaueolens durabile diutissimeque a carie inuictum suppeditat; cuius fumus, sæuiente pestilenti  
con-



contagio, *afferes calidi* in apoplexia & surditate, *spiritus destillatus* in splenis obstructione, vermibus, epilepsia (sed frustra) laudantur.

- 2) *Coni* autem, seu *nucis* adstringunt, cautius ideo sumenda, nec speciatim in vrinæ incontinentia, aut polypo efficaces.

44. SORBA.

- 1) Duplicia, seu triplicia potius obueniunt, nempe *sativa domestica*, seu esculenta, quæ in hortis coluntur, *torminalia*, quæ sponte passim crescunt, & *aucuparia syluestria* colore flauescente rubro, (Bogel-Beeren.) Vltima prioribus posthabentur, minusque vsitata sunt, nisi quod mulieres interdum ex eis succum spissiorum, seu *rob.* conficiant in ventriculi morbis, inflatione & adpetitu deperdito, vt creditur salubrem, itemque a nonnullis in dysenteria sedanda, mensibus & hæmorrhoidibus prouocandis commendatum.

- 2) Præstantiora autem his plerumque censentur *torminalia*, quæ vtique in laxitate alui conferunt, vbi sine insigni obstipatione subsequente plura comedere licet, pauca vero in diarrhœis & dysenteria, facta iam diuturna exoneratione, ad sistendum denique sufficiunt.

- 3) Cæterum mespilis qualitate accedunt; adeoque & in vomitu nimio vsum quemdam adferre possunt. *Fungum* sorbi aucupariæ *Hagendornius* laudat in dysenteria.

45. GUMMI LACCÆ.

- 1) De rubicundi huius splendentis concreti generatione dissentiunt adhuc auctores, cum alii ipsum e poris corticis arboris cuiusdam Indicæ sudare, alii a certis formicis, vt mel ab apibus, elaborari, paratumque arboris ramis circumiici, ibique condensari putent.

- 2) Aduchitur ad nos partim insincerus, ramulis admixtum, quod lacca in *baculis*, vel *sumatri* vocatur partim purius in granis & pulcerrimum pellucidum in *massis*, Lacca *Comberti* nuncupatum: De reliquo hoc gum-



gummi a lacca Florentina, massa nimirum artificiali probe distinguendum est.

- 3) Sicut autem sulphureis eius principiis præponderant salina & terrestria, ita leuius resolvere & abstergere, validius autem roborare deprehenditur; idque frequentissime externo solum usu, quo in primis confert ad mobilitatem dentium, corruptelas gingivarum putridas simplices, ac scorbuticas & earum cruentationem.
- 4) In aliis vlceribus vero non æque vsitatum est, multo minus interno usu veterum medicorum laudes confirmat, quippe nec debili ventriculo, obstructionibus viscerum, hydropi, renum vitiis, nec obesitati tollendæ, nec variolis & morbillis expellendis idoneum; vti recentiorum experientia decidit.

#### 46. SANGVIS DRACONIS.

- 1) Huic nomen impositum est non ab animali, vt quondam creditum fuit, sed ab arbore sic dicta *dracone*, in vtraque India crescente, e cuius cortice sauciato transsudare velut alia lacrima refertur, quam, vel foliis inuolutam, vel in panes formatam, deinde ad nos deuehunt mercatores.
- 2) Quamquam autem scateat multis salinis acidis & terreis particulis, vnde sat strenua vis adstringendi exoritur, tamen resinorum etiam principiorum innexorum præsentiam ostendit illius in ignem iniecti inflammatio, vt *Langius* indicat.
- 3) In usum hinc maxime vocatur in vulneribus, vlceribus, synouia, variis sanguineis & serosis profluuiis; sed quoniam repellit & potenter adstringit, caute hunc succum adhibendum, *internum* vero usum in hæmorrhoidibus nimis, hæmorrhagia vteri, hæmoptysi, dysenteria ancipitem, certe minime necessarium & sæpe noxium fore arbitramur.
- 4) Tutius *externe* adplicatur ad sanguinem recentium vulnerum sistendum, cruentationem gingivarum



dentiumque mobilitatem tollendam, nec non ad effe-  
ram narium hæmorrhagiam, vomitum ac diarrhoe-  
am, vbi cum oui albumine miscetur.

- 5) Cæterum *Ettmüllerus* hunc succum crebris adulteratio-  
nibus obnoxium, incertique & nullius fere vsus me-  
dici esse pronunciat. Erecentioribus vero *Kämpfe-  
rus* dissensum de natalibus huius concreti pluribus  
memorat, & quidem *sanguinem draconis*, quem *ingle-  
bis* officinæ exhibent, ex vtraque India adferri ac sub  
huius nomine frequenter supposititium quendam  
succum arte compositum proftare pro encaustis & pi-  
ctoribus, *alterum* autem, qui *inguttis*, vt aiunt, vendi-  
tur, longe puriorem ex fructibus palmæ coniferæ  
spinosæ orientalis elici, & in folliculos ex arundina-  
ceis foliis complicatos recondi testatur.

#### 47. HYPOCISTIS.

- 1) Hic succus e concremento quodam fungoso, e radici-  
bus cisti Hispanicæ, vel Italicæ succrescente, exprimi  
& deinde inspissatus ad nos transmitti narratur.
- 2) Est autem valde acidus, austerus & adstringens, specia-  
lis vsus, quantum constat, expers; vnde, cum sæpius  
adulteretur, acaciæ nostratis succum in illius locum  
substitui posse merito censet *Ettmüllerus*.

#### 48. TERRA CATECHV.

- 1) Quid proprie sit, controuerfantur inter se naturæ scru-  
tatores; de quo confer *Langium*, qui tandem defi-  
nit, esse succum e *fructibus Areck* (quos alias cum  
foliis eiusdem arboris *Betel* dictis & calce mistos per-  
petuo mandere solent Indi) & corticibus immaturis  
arboris spinosæ Indicæ, *catschu* dictæ, expressum &  
calore ignis in massam redactum.
- 2) Differt autem puritate & sincerior quidem intus, dum  
frangitur, rubet ac supra linguam detenta liquefcit  
sapore primum satis austero, in recessu dulcior-  
re.

3) Sca-



- 3) Scatet hic succus præter acidas terrestres & gummosas, etiam resinosis particulis, vnde & per spiritum vini rectificatum ex eo tinctura styptica elicitur, licet alias quoque soluenti aqueo plane obediat.
- 4) Cæterum omnes facultatem adstringendi ei tribuunt, quæ cum satis valida sit, cauere nos oportet, ne interno eius largiore usu damnum pariamus; id quod facile futurum est, si libere hunc succum phthisicis, hæmoptycis, dysentericis & mictu cruento, fluore albo, gonorrhœa, incontinentia vrinæ &c. afflictis pro laudum vulgarium modulo propinare lubuerit.
- 5) Itaque, licet *internum* usum non plane reprobemus, extus tamen tutior est in vacillatione dentium, repentina faucium aliarumque partium tumore & inflammatione, ubi mature adplicanda est, itemque in hæmorrhagiis.
- 6) In usu est *essentia*; item *gargarismatibus* additur, aut cum saccharo, ambra & mucilagine tragacanthæ in *trochiscos* paruulos cogitur, (vulgo *Caschu*) qui sub lingua detineantur ad stomacacem & grauiorem anhelitum corrigendum.

## 49. HIPPOPOTAMI DENS.

- 1) Bellua, ex qua hic dens desumitur, in boreali oceano & terra, nam amphibia est, versari & capi narratur.
- 2) Simili autem potestate, idem paucis etiam granis, adstringit, adeoque ad varia sanguinis profluvia & hæmorrhoides compescendas laudatur. Sed idem quoque iudicium valet.
- 3) Cæterum annuli ex hoc dente confecti spasmos insigniter haud mitigant; nec pulvis intro sumtus certum auxilium pollicetur. Ipse dens, quia diutius ebore suum alborem retinet, commode aptatur ad inanes edentulorum alueolos replendos, etsi hoc scopo etiam hodie dentes humani recentes & integri adhibeantur.



## 50. MANATHI LAPIS.

- 1) Minus proprie sic vocatur, nam haud lapis, sed os quoddam caluariæ est ex amphibio illo & deformi animali manato, quod Belgæ *vaccam marinam* adpellant, depromptum.
- 2) De effectu autem nihil aliud dicere habemus, quam ipsum antecedenti prorsus conuenire, ac tantum pretio maiorem existere.
- 3) Antispasmodica certe virtus cautius adhuc indaganda, anticolica dubia, lithontriptica nulla est. Hæmorrhoides vero aliosque fluxus præfenter cohibet, magna sæpe valetudinis offensa, vt exempla docuerunt; quapropter iustam vbique circumspeditionem adhibere iterum suademus.

## 51. SEPIÆ OS.

- 1) Sepia est piscis exsanguis cum *polypo* & *loligine* multum conueniens, cuius dorso hoc os innatum reperitur.
- 2) Pertinere autem creditur ad potentissima absorbentia, vnde nonnulli id κατ' ἐξοχήν *præcipitans magnum* salutant, at, quia simul adstringit, hoc scopo cautius idem vsurpandum esse arbitramur.
- 3) Inprimis in gonorrhœa virulenta & fluore albo magnam dignitatis famam obtinuit; sed in posteriore rarius satisfacit & grauiora sæpe mala infert; seminis fluxum autem sæpe citius reprimat, quam par est, vnde, nisi alia conuenientia remedia satis præmissa sint, præmaturo sui vsu non minus periculi minatur.
- 4) Incongruentius ad vitia thoracis & arthriticos morbos leuandos præscribitur, neque extus etiam vlceribus manantibus licentius largiusque inspergi, neque oculorum malis & synouia sine prudenti moderamine destinari debet. Cæterum inseruit dentifriciis.



## 52. CETI PRIAPVS.

- 1) Est fuscus & corneæ texturæ, præcipueque adstringentem edit efficaciam, vnde pro arcano antidysenterico haberi non debet, cum, si febris & materia nondum correctæ adsint, facile maius inferre queat detrimentum.
- 2) Ob eandem vim caute dandus est in hæmorrhagia vteri, inprimis in hæmorrhoidum fluxu immoderatione, vbi vulgo in abusum pertrahitur.

## 53. ALUMEN.

- 1) Excoquitur e variis mineris & lapidibus plerumque prius calcinandis, & sub coctione sæpe vrina adiicitur ad crassiorem terram separandam; vel etiam natrium effoditur.
- 2) Constat autem vulgare & rupeum ex acido vitriolico & terra cretacea, indeque adstringentem repellentem & incrassantem facultatem ostendit, propterea in inflammatione faucium ad gargarisinata adhiberi solitum, nec non ad liquores stypticos ischæmos vsitatum.
- 3) *Vstum* vero absument carnem luxuriantem & sordes vlcium ac stomacaces.
- 4) Cæterum *crudum* infide subuenit scabiæ & tumoribus pedum, nisi ex mera causa externa nati & plura conuenientia remedia præmissa sint; multo minus tuto interne datur, vel ad febres intermittentes, vel ad fluxus serofos & sanguineos cohibendos.
- 5) *Plumosum alumen*, quod ab *amiantho*, seu *asbesto lapide* non nisi gradu differre dicitur, & in filamenta tenuia, igni diu resistentia, separatur, pariter adstringit, sed frustra, aut noxie ad fluorem album, tineam &c. commendatur.
- 6) Eandem vim exercet *alumen scissile*, quod cum priori sæpe confunditur, sed tamen ignem non tam diu sustinet, nec viridiusculum, sed albicantius est. Pa-



rem igitur vsum habere creditur, at palmarium in hæmorrhagiis, dentium mobilitate, fluxu narium, pruritu, pterygio, pernionibus, ambustione, pediculis, sudore foetido pedum & alarum. Quis vero non videt, hic ab adstrictione grauius sæpe periculum existere, saltem Medicum in aluminosis adplicandis bifrontem esse oportere?

7) *Spiritus aluminis* æqualem spiritui vitrioli mixtionem & potestatem tenet, sed, quia longe difficilius per distillationem expellitur, rarius in vfu est. *Spiritus urinosus*, qui, addito alcali fixo, ex alumine exsurgit, præ alio eiusmodi volatili nihil singulare sibi vindicare potest. *Magisterium, saccharum aluminis* aliaque friuola arcana consulto reticemus.

#### 54. HÆMATITES.

1) Terrestrem huius mineralis & ferream indolem color, pondus & chymicum examen demonstrant, stypticam autem vim illi experiuntur, quibus hunc lapidem in hæmorrhagiis & febribus intermittentibus fumere adlubescit.

2) Sed talis *internus* vsus minus probatus, ac sæpe noxius est. Neque *flores hæmatitæ* cum sale ammoniaco sublimati, licet croceum odorem spirent, tam egregiæ virtutis sunt, vt pro *aroph*, seu philosophico *Paracelsi* aromate, aut singulari remedio in cachexia, malo hypochondriaco, phthisi, tertiana, dysenteria &c. venditari mereantur. Euidenter potius exigua dosi adstringunt, ac nisi tali qualitate debitis enchiresibus plurimum exuantur, acriorem plerumque noxam parturiunt. Nec disparem censuram subire debet extracta hinc vulgaris *tinctura*, vtpote styptica & nauseosa; monente iam *Langio*.

3) Tutius est in hæmorrhagiis, præcipue narium sistendis hunc lapidem manu firmiter detinere; qui quidem compescendi effectus adeo decantatus est, vt & nomen



nomen Germanicum, Blutstein ei imposuerit; sed rarissime, nisi in subiectis teneris & credulis, adparet.

#### 55. MINERA MARTIS HASSIACA.

1) *Solaris* nomen huic imposuit quorundam opinio, inde sibi, vel aurum, vel quiddam eo carius, menstruum nempe vniuersale, promittentium; sed coruos deludit hiantes.

2) Est potius minera sulphureo-martialis rotundi lapidis instar compacta, in terra figulina Almerodæ Hassiæ inferioris reperiunda, quæ sub dio fatiscit, & euolante sulphuris phlogisto, in vitriolicam faciem redigitur. Cum autem genuina pure ferrea sit, & proinde ad vsum internum adcommodata, tum cauendum est, ne huius loco forte spuriam, quæ Salfeldiæ & alibi eruitur, ac subinde venereis particulis inquinata est, accipiamus.

3) Ex hac itaque educitur vitriolum martis satis elegans & sincerum, de cuius virtute supra diximus, itemque liquor eiusdem indolis.

4) Cæterum notandum est, post crySTALLISATIONEM vitrioli ex hac minera remanere magma fuscum non crySTALLISABILE, nec dulce, vt vitriolum martis est, sed oppido austerum & adstringens, quæ quidem differentia ex alio acido, atque vt nos putamus, salis marini, aut communis admixto deriuanda est. *Conf. Stablii diff. de vitrioli elogiis.*

#### 56. OCHRA.

1) *Natiua* hæc flauescens terra, ab *artificiali* illa calce saturni flaua, Bleygelb, discernenda est; cæterum & pro locis natalibus pinguiore & sicciore statu, & fortasse etiam pro intimiore sui crasi paullum differt. *Goslariensis* sane ad genium venereum inclinatur, ac proinde, docente *Cramero*, per oleum lini ad metallicam æris Cyprii faciem perducitur.

2) *In-*



- 2) *Internus* autem huius vsus merito reiicitur, cum ne *topicus* quidem satis expertus sit. Quamquam enim siccare, abstergere & reprimere, indeque in vlceribus, vibicibus, carne excrescente, nimio circa ossa fracta exfurgente callo (quem scilicet absumet) utilis a quibusdam censeatur; tamen maioris experientiae suffragium adhuc desiderat, interea aliis notioribus posthabenda.

### §7. PLVMBVM.

- 1) Est, vel *nigrum*, vel *candidum*, quod & *stannum* vocamus. Prius in substantia ad medicum vsus non vocatur, nisi quod *amalgama* eius cum mercurio ad scabiem subinde praescribi, itemque *laminae* ipsius ad castitatem tuendam pubi adplicari a quibusdam soleant, etsi hoc vltimum tuto fieri complures negent.
- 2) Frequentiore in vsu sunt varia e plumbo producta, quo pertinet *minium*, seu *calx plumbi* reuerberatione flammæ rubefacta, qualitatis compos siccantis, reprimentis & adstringentis, quam proinde in emplastris & vnguentis miniatis ostendit.
- 3) Eiusdem virtutis est *lithargyrium*, vnde similiter ad vlcerum manantium, serpiginis, impetiginis &c. curationem cum aliis transfertur; sed prudentia & iusto moderamine opus est, ne in partibus tenerioribus, exquisito sensu praeditis, acrioribus & diu consuetis congestionibus & fluxibus subita quædam repressio &c. tentetur.
- 4) Vix aliter sentiendum est de *cerussæ* effectu, quæ cum alias prospere multis externis malis medetur, tum moderatam & circumspectam sui adplicationem præcipue in inflammationibus &c. deposcit. Neque ad fucandam faciem adeo tuta est, præcipue illa cerussa, seu magisterium, quod per præcipitationem ex saccharo saturni paratur, quin sæpius, notante *Langio*, loco alboris, colorem subfuscum imprimat, perbellum fraudis auctoramentum.

5) Ma-



- 5) Maiorem famam consecutum est *saccharum saturni*, quod & *extus* in oculorum malis, ambustione, vlceribus adhibetur, & *interne* quoque a nonnullis ad gonorrhœam, fluorem album, phrenesin, maniam, melancholicam hypochondriacam, biliosam commendatur. Inprimis autem hic vulgo extolluntur *crystalli saturni*, e minera confectæ, *tinctura* illa *antiphthifica Grammanni*, & *balsamus* ex saccharo saturni & oleo terebinthinæ paratus.
- 6) At vero quicumque solertius expendit dira hinc oriunda symptomata, extinctionem adpetitus præsentissimam, obstructionem, colicam &c. præsertim noxam a lithargyrio, vinis dulcedinem inde combibentibus admisto, illatam & ubique iam diuulgatam; ille ab interno saturninorum usu facile nobiscum abhorrebit. Neque etiam ignota sunt mala, quæ metallurgi & figuli e tractatione plumbi hauriunt, neque spernenda aliorum monita, qui impotentiam, dysenteriam, contracturam, paralytin, vel lentam tabidam consumptionem e saccharo aut aliis e saturno præparentis induci obseruant.
- 7) De *stanno* pauca conficiuntur, & quæ prostant, stypticam plus minusue qualitatem exserere videntur; vnde non facile introsumenta sunt. Certe *sal louiali Mynsichti*, quod multi & inter eos *Bagliuius*, velut antihystericum, prædicant, valde adhuc ambiguum, *antihædicum Poterii* tabidis fatale est, *sudoriferum* vero *maximum Fabri* solo ferme titulo superbit, & fide excidit.



## TABVLA XVII.

DE

## RELAXATIONE.

## I. DEFINITIO.

Relaxatio est actus therapiae alterantis, quo partes solidæ, imprimis fibrosæ, ultra modum strictæ, condensatæ ac rigidæ, remittuntur & relaxantur, ut tam progressus humorum, quam se & excretiones libere succedere possint.

## II. DIFFERENTIA.

1. Relaxatio differt a resolutione; hæc enim cum humoribus plus iusto spissioribus commercium habet, illa vero partes solidas in necessaria sua flexilitate & permeabilitate læsas afficit.
2. Relaxatio est vel
  - 1) *propria*, quæ cum remediorum convenientium operibus & partibus constrictis talem laxitatem & lubricitatem infert, ut postea motus tonicus auctus in iisdem minuatur, & œconomia vitalis sustentetur. Vel
  - 2) *impropria*, alias quoque *emollitio* dicta, qua materias spissas, induratas & siccas delinire, earumque excretionem promovere studemus.
3. Sedationis effectus relaxationem sequitur. Quando enim partes extensæ, distensæ vel compressæ relaxantur, & materiæ acres vellicantes eliminantur, tunc dolores ex his causis exorti, mitigantur, obtunduntur & hebetantur.
4. Denique relaxatio fit vel per remedia interna, quæ *lenientia* quoque audiunt, vel per externa *emollientia*, in chirurgia admodum usitata.

## III. INDICANTIA.

*Relaxantia* requiruntur



1. in omni strictura & densitate partium immodica & contumace.
2. In immoderatis & dolorificis commotionibus spasticis.
3. In infarctibus & scirrhis viscerum.
4. In contracturis & ariduris partium.  
*Emollientia* adhibentur
5. in tumoribus ad maturationem promouendis.
6. In scybalis induratis.
7. In calculo vias vrinarias vel ductum biliarium obsidente.
8. In tenaci muco, pulmones, aut etiam vias vrinarias obstruente.
9. Ad crustas separandas, & verrucosas concretiones emolliendas.

## IV. INDICATA seu REMEDIA.

## Radix Althææ

Liliorum alborum

Liquiritiæ

Maluæ

## Herba Althææ

Atriplicis

Betæ

Brançæ vrsinæ

Chamomillæ simplicis &amp; Romanæ

Hyoscyami

Maluæ

Meliloti

Mercurialis

Paridis

Parietariæ

Verbasci

Violarum

## Flores Chamomillæ

Liliorum alborum

Linariæ

Maluæ

Meliloti

Verbasci

Violarum

Semen Cydoniorum

Foenugræci

Lini

Psyllii

Sesami

Fructus, Amygdalæ dulces

Caricæ pingues

Dactyli

Ficus

Passulæ

Pruna dulcia

Sebesten

Auena

Hordeum

Cepæ

Gummata Ammoniacum

Galbanum

Resina

Terebinthina

Thus

Butyrum

M m m 2

Cera



Cera

Lac

Mel

Pinguedines & medullæ ani-  
maliumSperma ceti  
ranarum

Olea varia e. g.

Amygdalarum dulcium

Chamomillæ

Capparum

Liliorum alborum

Quorum

Scorpionis

Vnguentum Diakthææ.

Emplastra

Diachylon simplex &  
cum Gumma-  
tibus

de Ammoniaco Foresti

Hyoscyamo

Cicuta

Meliloto

Fili Zachææ

## V. MODVS OPERANDI.

1. Hic admodum simplex & intellectu facilis est; pleræque enim remedia gaudent principiis vel oleosis pinguibus, vel mucilaginosi lentescunt, vel denique mere aqueis, humidisque, quæ omnia partes mobiles, flexiles & molles reddunt.
2. Nam cum vitium in nimia constrictione, condensatione, rigidiori intensione, vel etiam induratione hæreat, hæc remedia mobilia, mollia & lenia modo superficiem viarum elubricant, deliniuntque, ut transitus humorum expediatur; modo ipsis membranarum fibrillis sese insinuant, easdemque flexiores mollioresque efficiunt.
3. Hoc modo stricturæ relaxantur & dolores mitigantur; & ita relaxantia atque emollientia, inscula nempe, & ex lacte & amygdalis parata optima sese sistunt anodyna atque sedativa, ubi dolores ex nimia fibrarum tensione oriuntur, quæ hisce remediis relaxatur & remittitur; ut ita causa sublata effectus quoque tollatur. Neque tamen hæc ita interpretanda sunt, quasi agentis vitalis concursus excludendum esse putaremus. Quippe hunc etiam necessario requiri tum ex aliis phænomenis apparet, tum ex eo, quod nisi natura placido sibi que accepto horum remediorum sensu quasi alliciatur ad minuendam toni intensiorem, frustra diu medentes operam



ram nauent relaxationi præstandæ, exemplo peruicacium spasmodorum & contracturæ. Idem euincit frictionum effectus, utpote quarum gratiore sensu natura identidem inuitatur ad stricturas sæpe feliciter sine vlla aliorum ope remittendas, ac toni naturalis temperiem reducendam.

4. Emollicio materiæ induratarum & siccarum facile quoque concipi potest, siquidem pingues & tenues mucilaginosæ substantiæ mucidis & siccis materiis sese insinuant easque læuigant, quo facilius e loco pristino moueri & denique penitus eliminari possint, id quod optime clysterum emollientium vsus demonstrat.
5. Externe applicata oleosa, fluida mucilaginosa emollicionem topicam constituunt, non solum gratam lenitionem conciliando, sed etiam partes rigide constrictas intrando, & relaxando, ut mollietates eueniat.

## VI. MODVS PROPINANDI.

1. Ante quam relaxatio suscipiatur, primæ viæ per lenia laxantia, in successu aliquoties repetenda, expurgentur.
2. Relaxatio ipsa sit placida, nec longius protrahenda ne partes nimis flaccidæ reddantur.
3. Optima iudicamus relaxantia, quæ resolventibus, & pro diuersitate adfectuum, modo alexipharmacis modo carminatiuis iunguntur.
4. Potiones calidæ, infusa calida, e. g. thee, adiecto aliquo roborante, tantillo cinnamomi, optime interdum relaxant.
5. Denique partis roborationem artifex curæ habeat. Maxime enim conuenit, ut, cum natura sæpe languescat aut deficiat, partibus relaxatis pristinum naturale robur per tonica restituatur.

## VII. CAUTELÆ ET OBSERVATIONES PRACTICÆ.

1. Relaxatio licet actus sit simplex, in gradu tamen peccari potest, ut partes nimis flaccidæ reddantur, hinc moderatio est adhibenda, ne vera atonia inferatur & salutares motus tonici aucti effectus turbentur.



2. Inter remedia relaxantia haud postremum locum obtinent *balnea*, ex aqua fluuiatili cum sale alcalino parata, quæ in tæbe, sudore suppresso, doloribus arthriticis laudem suam merentur. In menstruo vero & lochiali fluxu promouendo ancipitis sunt euentus, & summa cum circumspeditione adhibenda, vel, quod consultius, plane omittenda. Facile enim contingit, vt fibræ nimium emolliantur, earumque tonus, ad huius fluxus promotionem admodum necessarius plane deiciatur, & natura in opere suo conturbetur.
3. In mucido pulmonum adfectu copiose nimis exhibita relaxantia & emollientia minus profunt, quia poros relaxando maiori humorum adfluxui ansum præbent.
4. Inflammationes externæ, quam diu adhuc discussioni locus est, emollientibus non sunt tractandæ, nisi per gradus adplicentur, vt discussionem adiuuent. Hæc vero si obtineri non potest, emollientia maturationem faciunt, relaxando poros vt ad præsentem statum sufficiens humorum aditus patefiat.

#### 5. ATRIPLEX

- 1) Est rubra, pallide virens & subnigra, quin & ad vnum genus atriplicis referuntur bonus Henricus, blitum, beta, spinachia & congeneres plantæ.
- 2) Sicut autem largo aqueo humore, blandius nitroso turget, ita molliendi & temperandi scopo a nonnullis ad siccitatem alvi, æstum sanguinis & hypochondriaca pathemata commendatur.
- 3) Rarius tamen in vsu est & externe magis ad clysteres emollientes subinde recipitur. Ceterum hanc herbam ad inflammationes aut dolores podagricos vel aquam eius destillatam ad tineam capitis quicquam valere incompertum est.

#### 6. BETA.

- 1) Alba, rubra & viridis obuenit, ac non multum a qualitate brassicæ recedere & cum atriplici, vt dictum est, maxime concordare putatur, vnde non opus est de eius vsu plura adijcere.

2) Suc-



- 2) Succus betæ recens satis acre errhinum existit, cæterum planta in vlceribus, impetigine & pernionibus vtilitatem suam nondum comprobauit.

7. BRANCA VRSINA.

- 1) Habetur vel Italica sativa, propter spinosum folium acanthus dicta, vel vulgaris sylvestris apud nos magis vsitata, & quia leni præcipue mucilagine gaudet, inter quinque emollientium plantarum familiam posita.
- 2) Inprimis igitur ad clysmata, cataplasmata & balnea emollientia expetitur, ab aliis etiam introsumi ad ischuriam, hepatis obstructionem & scorbutum leuandum (sed inertiore effectu) iubetur.
- 3) Poloni sæpius hac planta vtuntur in plica atque e decocto illius fermentato potum medicatum (Bartsch dictum) sibi in vsum diureticum & antiscorbuticum conficiunt.
- 4) Cæterum radicem adeo folari podagricos, vel amuleti instar gestatam auertere pestilentiam & melancholiam, item semen brancæ vrsinæ epilepticis, hysteriis, ictericis, suspiriosis mederi, ambigitur.

8. MERCVRIALIS.

- 1) A botanicis allegatur mas binis capsulis seminalibus velut testiculis instructa & foemina spicata, quam vt specificum in sterilitate multi honorant.
- 2) Præter emollientem vim detergit etiam succo suo nitroso, atque a veteribus maxime ad soluendam aluum siccam vtilis & fennæ Alexandrinæ viribus non multum inferior habita fuit; hodie autem pluries ad externum vsum in clysteribus & balneis vocatur.
- 3) Etsi autem generali sua facultate etiam vterinas partes afficere possit; tamen adhuc dubium est, hanc herbam speciatim præ aliis congeneribus ad promotionem mensium & fecunditatem conferre. *vid. Etmuller.*
- 4) Succus in verrucis, leptigine, & lurditate (sed frustra)



stra) laudatur. Cæterum in officinis prostant aqua destillata & mel mercuriale.

#### 9. PARIS. HERBA

1) Non pertinet ad emollientes, sed maiori iure ut species solani narcoticis adnumeratur, unde necesse est, ut speciales eius vires caute experiamur, nec grandibus aliorum encomiis nos ad largiorem usum temere impelli sinamus.

2) Quamvis enim planta aconitum salutiferum audiat, & baccarum eius efficacia passim in febribus malignis, mania, epilepsia, nucis vomicæ noxa, fascino, oculorum morbis &c. commendata sit; tamen, quia plura de his verba quam rerum testimonia proferuntur, non adeo fidendum est.

3) Tutius externe tentatur, quid in ulceribus malignis efficere possit, cum alia solana eisdem subuenire plurimi testentur. Cæterum quoque in carbunculis, pestilentibus, inflammatione & tumore scroti, cancro, paronychia, hæmorrhoidibus cæcis laudem habet, sed leuioribus experimentis superstruam.

#### 10. PARIETARIA

1) Optima ducitur, quæ in muris vetustis crescit, nam in locis pinguibus luxuriantem non æque efficacem & diureticam esse putat *Ettmullerus*.

2) Cæterum cum ad emollientia pertineat, eundem cum supradictis fructum in medendo afferre potest, præterea vero abstergentem vim tenere & pectus, utrum aliasque partes a mucō repurgare, nec non acrimoniam & suppressionem yrinæ mire tollere censetur.

3) Nec desunt, qui eandem internis & externis ulceribus, calculo, podagræ, hydropi, inflammationibus dicendam esse arbitrantur, etsi pro fide eius virtutibus in hisce nemo facile sponderit.

4) Parantur aqua & syrupus parietariæ, alibi etiam sal illius, ut obstructionis viscerum remedium (sed exigui usus) citatur.

#### II. SEMEN



## II. SEMEN SESAMI.

- 1) Est, vel peregrinum in Aegypto & Sicilia proueniens, vel nostras vulgare. Ex utroque cataplasmata emollientia & oleum expressum adhibentur.
- 2) Cum vero præ semine fœnugræci, vel lini nullas singulares vires nactum sit, neque oleum eius superet amygdalinum, prorsus hoc semine carere, ac merito hic etiam quærere possumus, cui bono sit tot concretorum qualitate & effectû inter se non dissidentium cumulus.

## 12. RESINA.

- 1) Supra egimus de resina lentiscina, seu mastiche & laricea, seu terebinthina; nunc paucis de abietina dicendum est.
- 2) Nascitur autem intra corticem nouellum arboris, ubi tubercula aliqua erumpunt, & discutientem, roborantem, digerentem ac diureticam potestatem adeptam existimatur.
- 3) Quapropter ipsi quidam vtilitatis laudem in renum vitiis, tumoribus, vulneribus capitis, clavis pedum, quin & doloribus podagræ atque ischiadis tribuunt, sed non eminet supra terebinthinam, nisi quidem vi-  
lior sit; vnde cætera possunt diiudicari.
- 4) Destillatur hinc oleum, quod vocant *Spick-Dehl*. De reliquo etiam *pinaster*, seu pinus sylvestris (*Kiefern*;) fundit *resinam* albescentem, præsertim circa strobilos; at huic quoque non dispar crasis inest, nec vlla, quantum constat, virtutum prærogatiua.



## TABVLA XIIX.

DE

## MOTVVM EXCITATIONE.

## I. DEFINITIO.

Motuum excitatio est therapiae alterantis species, qua principium vitale ad motus conseruationi corporis sui quidem necessarios, iam vero deficientes, per medicamina conuenientia efficaciter excitatur. Remedia excitantia in scholis medicis *analeptica, neruina, roborantia, calefacientia, impellentia, cardiaca, reficientia* &c. vocantur.

## II. DIFFERENTIA.

1. Motuum correctio respicit, vel eorum *excessum*, vel *defectum*. De hoc excitando hac, de illo autem temperando sequente tabula agemus.
2. *Erroneis motibus* peculiarem classem adsignare, necessarium non ducimus: vel enim ad defectum, vel potissimum ad *excessum* referendi sunt.
3. Est autem eiusmodi motuum excitatio, vel
  - 1) *uniuersalis*, quæ uniuerso corpori, debilitate adfecto, prospicit, & hæc proprie vocatur *analepsis*; vel
  - 2) *specialis*, quando certam tantum languentem corporis partem roborare intendimus, per vulgo sic dicta specifica cephalica, pectoralia &c.
4. *Analepsis* distingui quoque potest in
  - 1) *materialem*, qua per remedia *reficientia, nutrientia*, natura in motibus suis alacrior redditur, & in
  - 2) *formalem*, vbi per remedia *calidiora & acriora* principium vitale suscitatur & officii sui admonetur.
5. Motuum excitatio obtinetur, vel per remedia
  - 1) *interna*, quæ variis in formis offerri solent, vel in
  - 2) *ex-*



- 2) *Externa*, atque hæc epithematum, facculorum, cucupharum forma adplicantur.

### III. INDICANTIA.

Analepsin exposcunt

1. vniuersalis virium defectus, in quibuscumque morbis obseruandus.
2. Speciatim partes post vehementes spasmos, vel euacuationes emeticas, catharticas &c. languentes.
3. Adfectus paralytici, hemiplectici, apoplectici.
4. Membra refrigeratione, fatigatione, continui solutione debilitata.
5. Motus tonici relaxatio, quæ in fine morborum motum antea excedentem plerumque sequitur.

### IV. INDICATA.

#### I. Vegetabilia.

Rad. Angelicæ.

Calami aromatici

Caryophyllatæ

Costi

Cyperi rotundi

Galangæ

Ginseng

Ireos Florentinæ

Leuistici

Mei

Pimpinellæ albæ

Zedoariæ

Zingiberis.

Herb. Abrotani

Basilicæ

Betonicæ

Calaminthæ

Chamædryos

Chamæpyctidis

Eryngii

Maioranæ

Mari veri

Melissæ

Menthæ crispæ

Origani

Pulegii

Rorismarini

Rutæ

Saluiæ

Satureiæ

Satyrionis

Serpilli

Thymi

Folia Indum, seu Malabathrum

Lauri.

Flor. Acaciæ

Anthos, seu rorismarini

Aurantiorum

Cheiri

Iasinini

Lauendulæ

N n n 2

Lilio.



Liliorum conuallium  
 Primulæ veris  
 Rosarum  
 Spicæ  
 Tunicæ  
 Violarum.  
 Cort. Aurantiorum  
 Cinnamomi  
 Citri  
 Winteranus.  
 Lign. Aloës  
 Rhodium  
 Santali  
 Sassafras.  
 Bacc. Iuniperi  
 Lauri.  
 Sem. Ammios  
 Anethi  
 Anisi  
 Apii  
 Cardamomi  
 Carui  
 Cubebæ  
 Cumini  
 Dauci  
 Fœniculi  
 Piperis longi & ro-  
 tundi  
 Sileris montani.  
 Balsam. de Copaiia  
 Peruvianum.  
 Boletus ceruinus.  
 Gumm. Animæ  
 Benzoës

Elemi  
 Mastiches  
 Olibani  
 Storacis calamitæ  
 Tacamahacæ  
 Terebinthina  
 Vinum.  
*Ex compositis*  
 Confectio Alkermes  
 de Hyacintho  
 Sapo Venetus.  
 2. *Animalia.*  
 Castorei essentia  
 Cantharides  
 Cochinilla  
 Cornu cerui, ac reliquo-  
 rum animalium salia  
 volatilia & spiritus.  
 Formicarum spiritus  
 Genitalia nonnullorum a-  
 nimalium e. g. pria-  
 bus apri, cerui &c.  
 Lumbricorum spiritus  
 Margaritæ  
 Moschus  
 Stincus marinus  
 Zibethum.  
 3. *Mineralia.*  
 Ambra  
 Aurum  
 Gemmæ  
 Oleum petræ  
 Succini essentia & sal vola-  
 tile.



## V. MODVS OPERANDI.

1. Quem ad modum alterationem *materiarum* non meris physicis remediorum effectibus, sed potissimum principio vitali tribuimus, ita tanto magis *motuum* correctionem pro naturæ opere declaramus.
2. Vnde sane partium debilium & motu tonico destitutarum corroboratio & excitatio optimis quamquam remediis numquam obtinebitur, quam diu natura ad hunc motum suscipiendum abiecta deprehenditur. Vbi autem illa ad corporis sui restorationem ipsamet prona est, ibi ætus hic therapeuticus non sine fructu suscipitur. Conferatur observatio illa notatu dignissima, quam *tabula de alterantibus generatim* continet, quod scilicet hemiplectici omnia quidem laxata membra balneis tonicis eodem tempore immergant, non autem simul, sed successiue, ac plerumque *manus* primum in diuitibus, in pauperibus autem *pedes* restituantur.
3. Nihilo tamen minus remedia [symbolum] suum quoque contribuunt ad motus hosce redintegrandos, & quemadmodum varia eorum genera sunt, ita etiam natura variis modis per illa excitatur.
4. Alia enim *materialiter* concurrunt, dum particulis suis gelatinosis, & pinguibus aptum corpori nutrimentum porrigunt, per quod natura ita reficitur & exhilaratur, vt conseruatorios motus animose subinde readsumat. Atque hæc gelatinosa, emulsiva & alia reficientia remedia ex diætetico fonte potissimum petuntur.
5. Alia eodem *materiali* concursu operantur, suppeditando mixtioni humorum particulas calidiores, acres, putredini, aut veneno resistentes. Vnde fractæ naturæ vires, his armis & auxiliis suffultæ de nouo excitantur, vt aduersus hostilem materiam expugnandam insurgant. Hæc est ratio, quod congrua alexipharmaca in morbis malignis effectum sæpius analepticum edere soleant.



6. Alia *virtualiter*, vt dicunt, in principium vitale agunt, dum particulis *temperate sulphureis*, peculiari sua crasi amicis, *suaueolentibus* illud quasi exhilarant. Et licet intimior hic operandi modus plurimam partem nobis incognitus sit, experientia tamen veritatem toto die loquitur; quid? quod eiusmodi analeptica pro diuersitate naturarum diuerso effectū variare solent: alii enim *suaueolentibus* recreantur, alii his offenduntur & contra *grauēolentibus* ac foetidis reficiuntur.
7. Alia particulis *salinis, acribus, penetrantibus* fibras irritando & stimulando naturam officii sui admonent, ne partis debilioris penitus obliuiscatur, quin potius motibus suis eandem restaurare intendat. Huc pertinent remedia, quæ vt plurimum *neruina* vocantur.
8. Alia, & quidem *gemmata*, particulis terrestribus tenerioribus partium tonum stringendo roborant & motus remissos excidant.
9. At omnia hæc effectum suum numquam directe præstant; alias enim vniformis efficacia semper expectanda esset: sed, vti superius diximus, natura per & propter hæc remedia operatur, atque corporis sui restorationi studet.

## VI MODVS PROPINANDI.

Hic respiciendum est

1. ad *caussarum dignotionem*: multum enim interest scire, num ex *caussa morali*, nempe terrore, tædio &c. natura partem quamdam deseruerit, vel an *materialia* obstacula tonicæ desertioni ansam dederint; præcipue an principium vitale in hac quidem parte motus negligentius exerceat, in altera autem periclitante tanto magis illos augeat.
2. Ad *indiuiduorum varietatem*: nam priori membro diximus, quod analeptica & neruina remedia per diuersa indiuidua diuersum effectum edant. Sic e. g. *moschus* in aliis subiectis motus prouocat, in aliis vero eosdem suppressit, quotidiano hystericarum exemplo.

3. Ad



3. *Ad temporis debiti electionem*: nisi enim hanc *εὐκαιρίαν* obferuemus, facile offendiculo esse possumus. Vnde primarum viarum sordes prius remoueri, plethora imminui & vitium humorum, si adsit, prius corrigi debent, quam ad tonicorum & neruinorum vsum accedamus. Plura de hac materia legantur in *conspectu medicinae practicae tabula generali & specialibus de motibus deficientibus*.

## VII. CAUTELAE ET OBSERVATIONES PRACTICAE.

1. *Motuum* alteratio & directio plus sapientiae medicae, diiudicationis & circumspeditionis requirit, quam *materia-rum* correctio; id quod tanto magis considerandum est, quo minus huius rei ratio vulgo habetur.
2. Vires quidem, quae per laborem, inedia, vel aliam externam causam *amissae* sunt, facile restituntur; sed motus sine tali causa manifesta a principio vitali *omissos* redintegrare, non est in Medici facultate.
3. Remedia sic dicta specifica *cordialia*, seu corroborantia, vti generatim cum grano salis accipienda sunt, ita acriora & calidiora ex illis in palpitatione cordis propinata, re vera nocent.
4. Idem iudicandum est de *neruinis, sulphureis, acrioribus*, quae in paralyti & hemiplexia vulgo adhibentur & nimiam exæstuationem excitando plus nocent, quam iuant.
5. Cum toto die videamus, dari remedia, quae *nimios motus* satis cito sedare & penitus suppressere valeant, vero quidem non absimile videtur, dari etiam posse talem medicinam, quae *motuum defectum* restaurare, & de nouo quasi virium panopliam reddere valeat; sed eius modi efficacia remedia a Practicis plerisque adhuc dum exoptantur, vnde *ars illa Paracelsistica*, senes homines per *quintam* aliquam *essentiam* iuuenili virtuti restituere, cum auctore, si vnumquam cognita ei fuit, certe perit.
6. Quem ad modum in *pane & vino* latent optimae vires restau-



staurandi, ita *exercitium corporis* multum conducit ad naturam alacriorem reddendam & vires excitandas.

7. *Aphrodisiacorum* titulus turpe audit inter christianos : vnde modum eorum operandi & reliquas, quas de iis vulgo habent adnotationes, consulto prætermisimus.

8. RADIX GINSENG.

1) Vocatur & Nindsin, id est, homini similis ob figuram bifurcam & humanæ quodammodo respondentem, atque a *Kæmpfero* planta sisarum montanum laponicum radice non tuberosa designatur.

2) Spirat autem pastinacæ luteæ odorem & dulcedinem sisaro nostrate minorem sed gratiorem offert cum exigua quadam amaritudine, ac radix per totum orientem carissima, celebratissima & vix non ad panacæ fastigium euecta est.

3) Nam præter resolventem & tonicam virtutem singulari prorsus analepsi languentes reficere, iisque & senibus longiorem vitam procurare, speciatim vertiginosis, apoplecticis, melancholicis, lipothymicis, aliisque palpitatione cordis, colica, vomitu nimio, dysenteria, febre, pulmonum & renum læsione conflictatis eximiam opem ferre prædicatur.

4) Merito vero suspicamur plerasque has laudes magis a credulitate, quam vera Europæorum experientia proficisci, & cum nobis alia probatiora (saltem æque ac hæc iuuantia) & minus pretiosa nostra tellus producat, non opus esse videtur hanc radicem tanto pretio e. g. vnciam vnam octo & pluribus aureis, seu ducatis redimere.

9. RADIX SATYRII.

1) Vulgo præcipitur, eligendam esse duobus bulbis instructam, quorum alter plenior & maior, alter rugosus mollior & exilior sit. Priori aphrodisiacam, posteriori contrariam vim quidam adscribunt, vnde & vltima ad ferociam equorum non castratorum retundendam ab equisonibus pabulo admisceri dicitur.

2) Præ-



2) Præterea de potestate huius radicis amuletica, ἀρρενογόνη & θηλυγόνη &c. de salubritate in tabe, dysenteria, pestilentia, hydrope, epilepsia, debilitate memoriæ & extus in podagra tumoribus inflammatis, vlceribus, clavis pedum, oculorum malis, lentiginibus multa passim narrantur, sed partim vanitate portentosa semet ipsa destruunt, partim ab experientibus insignis arguuntur inconstantia.

3) Vnde plura addere, aut celebratorum vulgo præparatorum efficaciam laudare distædet.

#### IO. MALABATHRVM seu FOLIVM INDVM.

1) Suaueolentia hæc folia citreis non plane dissimilia alii ex Syriaca quadam arbore, alii e paludibus Indicis sine radice prouenire aiunt; sed vt virtutibus, sic & origine adhuc incerta videntur.

2) Quippe licet nonnulli cardiacam, exhilarantem, stomachicam & cephalicam illis facultatem deberi putent; tamen recentiores practicos parum fidere & quia sæpe adulterantur, alia magis nota & experta substituere nouimus; vnde hæc quoque superfluis adnumerare haud criminofum fuerit.

#### II. FLORES IASMINI.

1) Fragrant maxime, multis tamen aduersi, raro vsitati, nec ad promouendum partum & secundinas, aut vteri apostemata sananda, tam commodi, quam adlegiti.

2) Neque oleum eorum per infusionem cum oleo been paratum, tam suaue solamen præ aliis adfert in contusionibus, spasmis, membris contractis, nedum in internis morbis, vt intentiore cura elaborari mereatur. Idem enim ab oleo chamomillæ, vel amygdalarum dulcium expectare possumus.

#### 12. CORTEX WINTERANVS.

1) Adpellatur aliter costus corticosus a radice, de qua supra, distinguendus, nec non cinnamomum album, seu Magellanicum & hoc vltimum quidem a loco natali, vbi primum *Winterus* illum inuenit.

2) Extus cinereus, intus ruber acrem aromaticum & quasi



piperarum saporem offert, ad resoluentem, discusso-  
rium & subadstringentem effectum non ineptus.

- 3) Vtiliter ergo eum præscribimus in stomachi vitiis, cru-  
ditate, nausea, diarrhœa, vomitu nimio, colica, fe-  
brium intermittentium decremento & fine, ad ventri-  
culum roborandum; porro valde commendatur scor-  
buticis & obstructione viscerum, cachexia & mensi-  
um ataxia laborantibus.
- 4) Cæterum, nec quartanæ, nec febribus petechizantibus  
medetur, nec magnum paralyticis præstat adiuven-  
tum.

### 13. LIGNVM RHODIVM.

- 1) Ab aliis ad aspalathi ligni speciem refertur, ab aliis ve-  
ro discrepare docetur. Nascitur autem arbor in in-  
sulis Rhodo (vnde nomen) Cypro, multisque aliis et-  
iam Americanis.
- 2) Quod ad vires medicas attinet roborare, præcipue &  
neruosum genus, ut aiunt, reficere creditur; vnde, li-  
cet frequentius solum odorem deoueri soleat,  
salubriter atoniam partium corrigit, ac dissipandis tu-  
moribus serosis, catarrhis capitis ac dentium frigidis  
dolentibus adminiculatur.
- 3) Hoc scopo ex eo, vel fomenta vinosa, vel oleum destilla-  
tum potest adplicari. Cæterum idem interne dare  
non fert consuetudo.

### 14. BOLETVS CERVINVS.

- 1) Hunc fungum e profuso cerui femine nasci fabulosum  
est; non minus quoque vim aphrodisiacam a multis  
laudatam ipsi derogant *Lonicerus*, aliique.
- 2) Vix maiori fide nititur eius commendatio in partu dif-  
ficili, malo hysterico, pestilenti veneno & araneorum  
morfu. Et cum nec alibi constantiorem utilitatem  
adferat, nihil oberit fungi huius vsum plane omitte-  
re.

### 15. STYRAX.

- 1) Occurrit, vel *secca*, seu ita dicta *calamita*, tum in massis  
grandiusculis, tum purior sub granulata figura, quam  
ex



ex arbore quadam orientali styrace dicta (quæ & in Italia iam crescit) fluere tradunt; vel *liquida* paullo spissior terebinthina, de cuius natiua origine, aut artificiosa compositione varia est auctorum sententia.

2) *Calamita* deligitur pinguis, fragmentis rubris flavescentibus, non obscuris, constans, nec furfuraceis moleculis interfusa, suaui fragrantia & sapore subacri prædita; ac sicut potissimum ex oleosis & sulphureis, aromaticis mucilagine quadam ac terra temperatis partibus cohæret, ita hinc vires eius resoluentes, diffusoriæ, tonicæ & lenientes scaturiunt.

3) Quidem inde impulsus sunt ad internum illius usum experiendum, atque hunc acribus catarrhis, tussi longinquæ, asthmæ, mensium obstructioni, immo & phthisi & tristitiæ leuandæ salubrem se reperisse notarunt.

4) Sed hac medela adhuc dubia est & paucis documentis suffulta. Vnde, hac in suspenso relicta, certius hanc gummi resinam externe solum languentis toni vitiis, catarrhis capitis diuturnis, susurro aurium, tumoribus frigidis non adeo profundis, colicis & hystericis doloribus mitigandis, nec non aëri infesto paulum repurgando consecramus.

5) Cæterum, nec articulorum nodos, nec strumas abigit, neque etiam sterilem vterum conceptioni facile idoneum reddit, quamvis hoc scopo emplastra ex styrace & pessaria oleo eius destillato illita passim commendentur. Multos quoque præsertim e sexu sequiore odor styracis offendit & caput turbat.

6) *Liquida* styrax in vulneribus & doloribus membrorum utilitatem suam nondum comprobavit & rarius usurpatur.

7) Parari possunt e styrace emplastra, suffimenta, oleum. Prostant inde candelæ fumales, item pilulæ de styrace, opio aliisque refertæ, sed minus necessariae.

## 16. VINVM.

1) Huius penitiorem indolem & variam bonitatem multis



persequi vetat instituti breuitas. Satis iam erit indicasse, ad medicum scopum alibi vetus Rhenanum generosum, alibi dulciora, vt Canariense & Hispanicum genuinum, aut e Gallicis Burgundiacum, Campaniense &c. posse sufficere.

- 2) Tale enim modice sumtum, quantum in chronicis ple-  
risque morbis cardiacum, roborans, analepticum sit,  
nemo ignorat, omnes maximis fere laudibus conce-  
lebrant. Sigillatim igitur in quouis virium languo-  
re, lipothymia, debilitate stomachi, dysenteria, tabi-  
da corporis consumptione sine acriori febre, terrore,  
metuendo pestilenti contagio, melancholia &c. ex-  
tollitur, quin etiam non magis hilarem & subinde  
confidentiores animum addere, quam docilitatem &  
ingenii acumen conciliare prædicatur.
- 3) In primis vinum frigore concentratum, seu spiritus vi-  
ni Paracelsi non ardens reliqua omnia virtutibus lon-  
ge præcurrit, maximeque ad reficiendum idoneus est;  
si frugaliter capiatur. Cæterum rubra vina plerum-  
que subadstringere, alba tenuiora magis diureticam  
vim tenere, calcarea suspecta & insalubria haberi ob-  
seruamus.
- 4) Externe vinum discussoria & roborante facultate pollet,  
vnde frequenter calidum ad sugillationes, multaque  
fomenta discutientia, itemque balnea ex vino ad laxi-  
tatem partium corrigendam vsurpantur.
- 5) E præparatis in vsum interdum vocari potest essentia vi-  
ni, quam *Beccherus* proponit, multis debilitatis & fe-  
bricitantibus etiam, si parca manu ministretur, pro-  
futura. Phlegmate vini rectificato quidam hæcticos  
recreare conantur.
- 6) Maiori autem dignitate excellit *spiritus vini*, vtpote  
ob eam in subtiliter oleosam particulis salinis acidis la-  
tissime expansam, dotibus polychrestis roborandi,  
resoluendi, excitandi &c. insignis, quibus omnes es-  
sentias, tincturas, aquas cephalicas apoplecticas &c.  
imbuit & ad efficacius agendum velut animat. In-  
primis



primis neruos solari, pituitam corrigere, concoctionem iuuare, intestina roborare, vermes eorumque nidos destruere, flatulentiam & colicam tollere, cachecticis, phlegmaticis senibus &c. prodesse censetur.

7) At quam pulcrum vitæ tutamentum præbent hi liquores modice & tempestiue forbillati, tam plangendus & abominandus est abusus, lerna malorum & pestis mortalium, vti quotidie in oculos incurrit.

8) Nobilissimus de reliquo est etiam externus spiritus vini vsus roborans, discutiens, balsamicus; maxime in vlceribus putridis, vbi corruptelas eneruat, acrimoniam obtundit atque augendo tonum adfluxum discutit, & in hæmorrhagiis, quas præsentem & tutius, quam alia omnia, coagulando sistit; deinde & condiendis, & a putredine vindicandis cadaueribus inferuit, itemque in cerebri & memoriæ imbecillitate, oculorum caligine, doloribus capitis & artuum, loquela amissa, tremore, dentium nigredine & gingivæ laxitate, angina incipiente (in gargarismate) varis & ionthis, lendibus & pediculis necandis, sugillatione, inflammatione vulneribus, ambustione, per-nionibus &c. meruit plurimorum commendationem.

#### 17. COCHINILLA.

1) Defertur ex America, ibique innascitur plantæ opuntii maioris spinosæ, seu ficus Indicæ rubræ, atque ab aliis pro bacca, seu acino huius ficus, ab aliis vero recentioribus pro animalculo, seu insecto adhuc informi habetur, quod ex ouulo ibi deposito prodire, succo coccineo sensim ali ac denique in formam scarabæi minoris transire scribunt.

2) Colligitur autem, dum adhuc succo turget, magna cura, & sicut alias pretiosum illum colorem rubrum elegantissimum, Carmin dictum, suggerit, ita quoque ad medicum vsum cœpit commendari & quibusdam



alexipharmacam, cephalicam & cardiacam virtutem obtinere visa est.

- 3) Vnde ipsam granis kermes compararunt encomiaſtæ & præcipue in febribus malignis peſtilentibus, variolis & morbillis vtilem eſſe duxerunt; alii etiam in calculo, iſchuria & ardore vrinæ venereo, alii ob adſtrictoriam vim in laxitate dentium adhibuere; alii plane diſſiſi ſunt, ei quiddam virulenti in eſſe arbitrati.
- 4) Quomodocunque hæc ſe habeant, certe conſtantem eius vtilitatem medicam nondum perſpectam habemus; & niſi granis kermes præſtantior ſit, facile hunc cariſſimum vermiculum tinctoribus relinquere poſſumus. *vid. Langius.*

#### 18. MOSCHVS.

- 1) Grumofam hanc ſuppinguem, nigro-ferrugineam, acriuſculam, ſubamaram & fragrantiffimam materiam prope vmbilicum folliculo incluſam geſtat quoddam orientale quadrupes mediæ, quaſi inter caprinum & ceruinum genus naturæ; indeque eandem, vel ſpontanea animalis frictione prodire, vel eneſto animali, vna cum folliculo excindi atque ad nos tranſuehi referunt autores.
- 2) Mirum quantum vero nonnullis prædicatur, vt analepticum, cephalicum, confortatium &c. ac proinde excellens præſidium aduerſus neruorum morbos, virium defectum, paralyſin, apoplexiam, conuulſiones, memoriæ debilitatem, viſum hebetem & cataractam, olfactus vitia, foetorem oris atque axillarum, immo & contra febres malignas, impotentiam, ſterilitatem, melancholiam, arthritidem, vermes &c. habetur.
- 3) Sed notandum eſt, internum moſchi uſum, niſi parciffimus ſit, ſæpe noxias humorum commotiones inferre, ceterum non adeo probatum, nedum tam grauib; pleriſque malis ſuperandis parem reperiri; multos etiam præſertim inter feminas delicatiores obuenire,  
vel



vel leuissimi odoris moschati plane impatientes; quibus, si forte moschus offeratur, vehementioribus pathematibus adfici solenne est, tantum abest, vt desiderabilis medela obtingat.

- 4) In externo itaque vfu cautiore quoque nos esse decet; tuto tamen ipsum ferentibus præscribere licet in imbecillitate toni, motuumque necessariorum nimio languore, in multis supra dictis morbis obuio; quippe roborare & interdum bene reficere notatur.
- 5) Cæterum vti præcedens aliaque pretiosa varie adulteratur; alias in puluere, vel essentia cum aliis congruentibus mista potest offerri.

#### 19. STINCVS MARINVS.

- 1) Est quadrupes ouiparum lacertæ simile, in Arabia præcipue reperiundum, atque ab aliis crocodilus terrestris, seu minor vocatur.
- 2) Veteres ipsum antidoti loco venerati theriacæ & mithridatio admiscuerunt, alii deinde laudes eius in calculo, sterilitate quin & in elephantiasi (non secus ac salamandræ) publicarunt.
- 3) Etsi autem diureticam vim satis eminenter teneat, tamen singulares eius dotes in hisce malis subigendis neutiquam hodie confirmat experientia.

#### 20. AMBRA.

- 1) De huius origine in varias opiniones physici scinduntur, e quibus probabilior videtur, ipsam ad bitumina odorata & naphthas in fundo maris pullulantes, ac deinde a sale marino coagulatas a fluctibus ad littora eiici. *Confer. Langius.*
- 2) Colligitur autem in littoribus Africæ & Asiæ, quæ oceanus alluit, & vulgo triplex ostenditur *grysea*, seu cinerea præstantissima, *alba* & *nigra*, quæ valde ignaua est.
- 3) Nihil ipsa suaueolentius est, & nihil ferme aptius creditur ad vsum analepticum & confortantem, vnde speciosa ambra commendatio manauit ad vitam longam & contra plerosque eos morbos, quos modo sub moscho



scho recensuimus, præterea aduersus vim napelli virulentam, pectoralia stomachica & vterina vitia.

- 4) Monet tamen *Ettmüllerus* a diuturno vsu stupiditatem induci, nec fallere potest attentiores, ambram sæpe tenera & vbertate sanguinis oppleta subiecta adeo non leuare, vt potius grauiorem humorum orgasmum concitet; porro non aliter ac moschum spasticos motus magis incendere, quam pacare, ideoque hystericeis parum prodesse, præsertim, si beneuolentia, vt fit, refugiant.
- 5) Cautè ergo & parcius intro danda est. Externe pariter reficit & fatiscentem tonum partium inprimis nervosarum & membranosarum reuocat. Adhibetur autem, vel trita cum saccharo in puluere, vel in essentia; vbi genuinam & ab adulterio, cui æstimationissima hæc materia frequenter subiacet, intactam eligere conueniet.
- 6) Obuenit alias & *ambra liquida*, quam tamen haud subterranei regni sobolem, sed liquorem resinosum ex cortice arboris cuiusdam Americanæ fluentem esse tradunt. Fragrat autem maxime (vnde nomen accepit) & resoluendi, roborandi, consolidandi, quin & sopienti potestatem sortita dicitur; sed cum rarius in vsu sit & crebris fraudibus obnoxia, quid opus est in tanta certiorum abundantia de hoc liquore valde sollicitari?

## 21. AURVM.

- 1) Perfecta huius mixtio, nobilitas, constantia in igne, pretium ciuile indeque nata vulgi persuasio effecisse videntur, vt chymici præcipue illi, qui & singularem solis influxum in hoc metallum demitti, & specifica auri semina, vt poëta loquitur, ipso corpore millies pretiosiora extrahi posse credebant, summum in hoc metallo arcanum & panacæam ab omni propemodum ætate quæsiuerint.
- 2) Nec desuit hoc sæculo studium, sed, cum quibusdam non male cessisse fama est, maiora cepit incrementa & immen-



immenſam pene productorum congeriem excudit; in quibus adhuc vera, vt vocant, quinta quædam auri eſſentia, imo, vel cuiusmodi tantum ſolaris medicina, quæ phthiſin, hydropem, calculum, podagram febres malignas &c. præ aliis radicibus extirpare poſſet, deſideratur.

- 3) Patet quidem, multis ex auro compositis ineſſe roborandi facultatem, quam & vitriolum Solis edit & alia ſubtilius parata adhuc luculentius cum aliis virtutibus oſtendunt; ſed piget audire immodicas laudes, quibus quiſque aurum ſuum potabile in cœlum vsque efferre conſueſcit; cum tamen id poſt aliquot annos eadem fidei ſenſim amiſſæ fata experiatur, quæ alia ſimilis farinæ ſubierunt, atque de cætero vix maiora ſimplici quodam vegetabili patret miracula. Interim ſuo quemuis ſenſu abundare patimur, & ipſi votis omnibus exſpectamus Solaria tantæ in dictis aliisque grauius morbis ſanandis conſtantia, quantam aurum in vulgaribus ignium tormentis diutiſſime tuetur.
- 4) De vitriolo Solis ſupra diximus; plura iam addere temporis anguſtia prohibet.

## 22. PETROLEVM.

- 1) Fontibus quibusdam ſupernatat in Alſatia, Bauaria &c. alibi etiam e rimis montium exſtillat, atque, vel album, ſeu flauum, vel rubicundum adparet; cæterum non longe abit ab indole naphthæ (de cuius multiplici ſcaturigine in peninſula maris Caſpii, vid. *Kæmpferi amœnitat exotic.*) vnde itidem e longinquo illud rapiſſe flammam expertus eſt *Ettmüllerus*.
- 2) A medicis petroleum adhibetur ad reſoluendum & roborandum, raro tamen interne, certe ambigue in febris intermittentibus & menſium retentione.
- 3) Externe longe vtilius eſt in pernionibus, vbi ſatis penetrat, diſcutit & reſuſum anniuerſarium doloris præcauet, ſi mature adplicetur; in grauioribus autem ſtaſibus ſæpe maiorem ſenſum & adfluxum concitat non aliter ac oleum terebinthinæ. Laudatur



quoque in paralyfi, contractura, apoplexia, atque vt vnguentum quasi prophylacticum contra serpentes & certius contra frigoris iniurias. Cautius vero in nephritide illinendum est.

4) Pulcrius adhuc petroleo ducitur *oleum terræ* priori sæculo ex India adlatum, & in arthritide vaga, ligamentorum laxitate & luxatione sigillatim conducere creditum; sed vereor, ne, cum principio sulphureo-oleoso & acido-salino parum discrepet, effectu quoque non multo præstantius futurum sit petroleo.



## TABVLA XIX.

D. E.

# MOTVVM TEMPERATIONE.

## I. DEFINITIO.

Motuum temperatio est therapix alterantis species, qua motus in corpore humano excedentes, in naturalem & æconomix vitali conuenientem tenorem reducuntur. Remedia, quibus hic finis obtinetur, vocantur *temperantia, refrigerantia, antispasmodica, anodyna, sedantia, hypnotica, seu soporifera, narcotica, seu stupefacientia.*

## II. DIFFERENTIA.

I. Motus excedentes perpetuo quidem salutarem finem respiciunt, sed disparibus viis & euentibus

1) modo enim natura viis plane *periculosiss* incedit, e. g. in hæmoptysi, vomitu cruento, & tum euagantes motus nullo modo tolerandi, sed prudente ratione directe sopiendi sunt.

2) Modo *erroneis*, sed non periculosiss in locis finem suum obtinere intendit, e. g. in arthritidis variis speciebus; quibus in casibus artifex ad motus sedandos non adeo festinare debet.

3) Mo-



3) Modo *legitimas* quidem vias natura eligit, e. g. in congestionibus simplicibus hæmorrhagicis, sed quia intensiores & impetuosiores sunt motus, finem salutarem, quem intendit, rarius obtinet. Atque horum motuum excessus omnium circumspectissime placandus est. Licet enim eiusmodi motuum exacerbatio satis molesta sit & dolores inferat, hi tamen, cum nil aliud sint, quam intensiores fibrarum spasmi, in salutarem finem a natura producti, sopitio eorum eiusdem est considerationis.

2. Fit autem eius modi motuum temperatio

1) vel *directe & positive*, quando per remedia satis efficacia & graueolentia naturæ impetum refringimus, & ad finem, quem principium vitale moribus suis respicit, obtinendum eo ipso non cooperamur.

2) Vel *indirecte & remote*, cum materias & quantitate & qualitate peccantes prius remouemus, quam motus sistamus. Huc pertinent venæ sectiones, scarificationes, blandæ catharres, diaphoreses &c. item conuenientes materiæ deprauatarum correctiones; speciatim relaxationes tono nimium stricto oppositæ, de quibus præcedente tabula dictum est.

3. Vterque temperandi modus suos habet *gradus*:

1) *Infimus* porrigit temperantia, nitrofa, & alia refrigerantia.

2) *Medius* propinat, sedatiua, cinnabarina & quæcumque alia secura anodyna.

3) *Summus* offert drastica narcotica opiata, summam circumspeditionem exposcentia.

4. Hæc remedia propinantur, vel *interne*, vel adplicantur *externe*. Huc pertinent *epithemata* ex aquis hypnoticis, emulsiuis anodynis &c. parata; His *proxime* accedunt *pedilunia*, *frictiones* moderatæ & *scalptio* capitis, quæ sane posteriora, si somnum concilient, cutissima sunt hypnotica.



## III. INDICANTIA.

Motus excedentes vti differunt exacerbationis gravitate, ita pro diuersa eorum indole diuersos contemperationis gradus indicant.

1. *Infimum*, nempe *temperantem* & *refrigerantem* gradum, exposcunt

1) Febriles exacerbationes, siue simpliciter intensæ, siue tempore minus congruo, e. g. extra dies criticos, nimio impetu adfligentes.

2) Virium languor, ex præcedenti oriundus.

3) Congestiones humorum impetuosæ.

4) Hæmorrhagiæ largiores & tantum non nimix.

5) Reliquæ euacuationes e. g. diarrhœæ, quæ modum excedere videntur.

2. *Medium* gradum, id est, *anodyna tutiora* indicant

1) varii spastici exacerbati dolores, habita tamen primum eorum ratione.

2) Hæmorrhagiæ re vera nimix & rebelles.

3. *Summum* gradum, nempe *narcotica opiata* casus plane peculiare sibi referuant.

## IV. INDICATA.

1. *Vegetabilia.*

Herb. Acetosæ

Acetofellæ

Cynoglossæ & huius  
radix

Endiuix

Hyoscyami

Lactucæ

Lentis palustris

Mandragoræ

Portulacæ

Semperuiui maioris

Solani, vulgaris

si riosi, seu bel-  
læ donnæ

Tabaci.

Flor. Bellidis

Boraginis

Maluæ arboreæ

Nymphææ

Papaueris

Rosarum

Tunicæ

Valerianæ palustris  
maioris

Violarum.

Nuclei Amygdalarum

Ceraforum

Perficorum.

Fructus Berberum

Ceraforum acidorum

Citri



Citri	Castoreum
Ribium	Gelatinosa
Rubi idæi	Lacticinia & lactis serum
Sem. Auenæ	Oleum ex quacumque ani-
Citrulli	malium parte destil-
Cucumeris	latum rectificatissi-
Endiuia	mum.
Hordei	Vitellus oui.
Hyoscyami	3. <i>Mineralia.</i>
Lactucæ	Cinnabaris quæcumque
Melonum	recte præparata
Papaueris albi & nigri	Clyffus antimonii
Scariolæ	Essentia dulcis Halensis
Violarum	Nitrum depuratum
Opium.	regeneratum
2. <i>Animalia.</i>	antimoniatum
Abforbentia suo loco indi-	Vitriolicum acidum.
cata	

## V. MODVS OPERANDI

1. Temperantia, antispasmodica, refrigerantia motus temperant

1) vel sensu blandiori & gratiori partes strictas adficiendo & contentiones spasticas componendo. Hoc faciunt nitrum, acidum vitrioli, acetositas citri, salina pleraque. In specie *nitro* temperans & refrigerans efficacia attribuitur, quia ardoris sensum qualemcumque egregie obtundit & spasticam partium fibrosarum stricturam relaxat. Sapor ipsius *salinus* sensum præcipue blande adficit, eumque lenit & mitigat. Huc etiam referendæ sunt modestæ frictiones, quibus sensus exacerbatus remittitur & complacatur.

2) Vel acres seroso-salinas, biliosas vellicantes & irritantes materias absorbendo, incrassando, inuoluendo, mitioremque sensum inferendo. Hanc virtutem temperantem exerant nitrosa, quæ etiam humores alterant & incrassant, abforbentia, diluentia, mucila-



- ginosa. Quæ remedia dum materias acres corrigunt, & motus tranquillos reddunt, ingenui & tutioris usus sunt & œconomix vitali admodum subueniunt.
- 3) Vel illas materias subducendo & euacuando, propter quas partes constrictæ & humores repressi sunt, e. g. venæ sectiones sanguinis abundantiam, diaphoreses atque diureses serum orgasticum euacuant, & ardores atque exæstuationes ab his noxiis materiis ortas temperant, refrigerant atque sedant.
2. Sedatiua & alia secura anodyna principio suo sulphureo valde aduerso, & motu caloris magis magisque se per humores expandente, partibus sensibilibus admodum molesta sunt, & principium vitale eo adducunt, vt consuetam agilitatem & sensationem deferat, & organis sensoriiis se subducat, ne inimicum & aduersum sulphur hoc percipiat. Mitissimum ex his est *Cinnabaris* quæ e duplici principio, mercuriali scilicet & sulphureo, partibus neruosis molesto constat, & non modo sensum relaxat, sed etiam motus mitigat. Huc etiam pertinent correctæ anodyna opiata.
3. Narcotica potentioris sunt effectus, & sulphur illud aduersum, graueolens vaporosum in maiori gradu quam sedatiua mitiora possident. Hæc oblata grauiter offendunt animam in corpore, vt non modo eadem valde abhorreat, & somno imo sopori indulgeat, sed interdum etiam plane in confusas & deliras actiones delabatur. Hinc narcotica hæc recte dicuntur *stupefactoria*, torporem enim in animo & corpore relinquunt, & ad sensationis confusionem & abolitionem contribuunt, vt de Opio, Hyoscyamo, Mandragora, Datura multa exempla testantur.
4. Dantur etiam alia remedia, quæ non modo sensus, sed etiam motus mitigant, relaxantia & emollientia, de quorum modo operandi in antecedentibus diximus, quæ vero anodynæ ac narcoticis non adnumerantur.



## VI. MODVS PROPINANDI.

Hic expofcit

1. Vt remedia generaliora præmittantur, & naturæ intentio obferuetur. Vbi nempe natura rei alicuius aduerfæ immo moleftæ ac noxiæ excretionem motibus fuis intentis defiderat, omni ope artifex fuccurrere & quantum pro viribus poteft, irritationes & offenfās remouere debet per modeftas euacuationes catharticas, diaphoreticas, diureticas, fanguinis miffiones. Sæpe enim his folis negotium abfoluitur & motus temperantur.
2. Vt motus erronei & excedentes modefte coërceantur & in naturalem tenorem reducantur. Quando fcilicet animaduertimus, naturam nimis tenaciter propofito fuo inhærere, & modum tenere nescire, in rectum tramitem reuocanda eft, ne corpori periculum & damnum inferat.
3. Vt fecundum remediorum offerendorum varietatem & dofim gradus fedationis obferuentur. Non ftatim enim ad narcotica, opiatæ properandum eft, vbi mitiora, e.g. nitrofa, cinnabarina fpasmos demulcent, doloresque auferunt. Et quemadmodum quod fieri poteft per pauca, non debet fieri per plura; fic fi vnicum granulum remedii anodynî fufficit, cur plura adiiciamus nulla caufa eft.
4. Vt regimen subordinetur. Quies & animi & corporis multum ad rem faciunt; patientia enim optimum eft anodynum. Nocent contra inquietæ corporis ieftigationes, & pathemata animi, præcipue ira.

## VII. CAUTELÆ ET OBSERVATIONES PRACTICÆ.

1. Magna cum cura & prudentia motuum placatio, aut fopitio tentanda eft, falutarem enim intendunt finem: remedia autem fedatiua & narcotica fenfum eneruant & ftupefaciunt, cauffam vero mali intactam relinquunt. Itaque ad falutaris finis directionem operam fuam nauare debet Medicus, nec naturæ arma fuæ manibus eripere.
2. Narcotica fenfum dolorum quidem obftupefaciunt, & cruciatus hebetant, motus vero nec emendant, nec mitigant,



gant, sed eorum perturbationes & confusiones cient, ut natura ex vna angustia in aliam detrudatur.

3. Optima anodyna sunt, nitrosa; diluentia, emulsiones, gelatinæ, decocta ex hordeo, auena; analeptica, quies, patientia.
4. Præsentiora refrigerantia sunt acidum vitrioli, acetositas citri, & princeps eorum est nitrum, quod simul per diuresin ferum organasticum promouet.
5. Refrigerantia positiua in febribus malignis circa criseos tempus oblata, præcipue vbi & vires & coctionum signa deficiunt, noxam inferunt certissimam: conducunt potius hic alexipharmaca, non nihil calefacientia, parcis dosibus exhibenda.
6. Temperantiam, quemadmodum in ipsa motuum exacerbatione non adeo præsentem adferunt medelam, ita præcauendi scopo magno emolumento sunt.
7. Cinnabarina, si eo tempore quo organastica atque febrilis commotio ingruere cœpit, propinantur, æstus sæpe augent, præsertim in maiuscula dosi porrecta.
8. Refrigerantia actiuiora nocent in hæmoptysi, hæmorrhoidibus cæcis, rheumatismis; in inflammationibus corruptioni ansam præbent; in febribus lentis ad tumores œdematosos disponunt, in catarrho pectoris phthisin inducunt.
9. Anodyna in paroxysmo febrili sæpe vsurpata febrî hecticæ viam ancipitem muniunt.
10. Agrypnia in febribus malignis, licet aliquamdiu continuet, opiatis minime infringenda est; non numquam enim æternum soporem inducunt.
11. Narcotica rarissime in vsum trahenda sunt.
12. Dolores podagricorum, vel externis, vel internis, anodynis consopire velle inscitia est, semper enim atrociores redeunt, aut refrænati grauiorum malorum catastrophæ relinquant.
13. In omni naturali excretionē suppressa, opiata non sunt exhibenda, neque etiam vbi materia quædam lenta, aut cacochy-



cochymica excernenda parti inhæret, & vellicat, nam motu sublato in pessimam abit corruptionem.

14. Idem euenit in motibus nimis cum magna humorum turgescencia coniunctis, aut ad excretionem tendentibus.

15. Opiata nisi legitime correctâ sint numquam in vsum vocentur. Pulcra est methodus Starkiana, quæ sapone chymico & aliis correctionem tentat, utilis etiam Willdengansiana, nec plane temnenda Langellottiana, quæ fermentationem cum succo cydoniorum &c. suadet. Ubique videndum est, vt excitantia & naturæ grata atque amica, itemque ea, quæ excretionem ab opio inhiberi solitas promouent, adiungamus.

#### 16. CYNOGLOSSA.

1) Aduersum odorem spargit, quo iam indicium quoddam præbet, tum principii vaporosi, tum facultatis narcoticæ in variis casibus testatæ.

2) Rarius autem vsurpatur, nec magnum pondus habere videntur experimenta, quibus herba ad vlcera foedissima, cancrum, bubones & carbunculos pestilentes, capillorum genesin; radix ad dysenteriam, gonorrhœam, hæmorrhoidum dolores & catarrhos valuisse narratur.

3) Cautissime profecto hæc imitanda sunt, vel potius negligenda, donec certior vsus innotescat. E compositis autem satis lenè & probatum remedium anodynum suggerit massa pilularum de cynoglossa, dummodo iusto tempore ipsam adhibere norimus.

#### 17. ENDIUIA.

1) Nobilis habetur inter refrigerantia & leuiter aperientia atque a veteribus maxime in hepatis morbis, ictero, hectica, inflammationibus pluribusque aliis commendata legitur.

2) Potest omnino, vt diæteticum præsidium, aliis iungi in orgastica sanguinis tenuitate, vitiisque cholericis, sed magnum quendam effectum frustra inde quis expectauerit.

3) Semen herbam virtutibus vix æquat, nedum antecellit.



## 18. LACTVCA.

- 1) Non placet in vulgares huius laudes euagari. Cum enim refrigeret, non mirum est, alia hinc commoda v. g. stomachi æstuosi leuamen, somnum placidum, lactis augmentum &c. in calidiora subiecta redundare.
- 2) Proprie autem humorum ebullitionem, leuiorem æstum & hinc ortam siccitatem, sitim &c. solatur; cæterum sterilitatem non facile inferet.

## 19. LENS PALVSTRIS.

A nonnullis destinatur inflammationibus, impetigini, ficis ani, cephalalgia & podagra; at si id fiat refrigerandi scopo, nec alia meliora simul adplicentur, ad imitandum cohortari possumus neminem.

## 20. MANDRAGORA.

- 1) Apud nos in hortis colitur, sub calidioris Hispania, Italia &c. climate sponte proueniens, & cum ingentem stuporem inducat, vix interne propinanda est, sed, vt *Ludouici* etiam censet, agyrtis relinquenda.
- 2) Cæterum a paucis ad conceptum iuuandum, ac tumores & scirrhus extus discutiendos adlegatur, præcipue radix vino decocta, quam alias quoque soporiferis quibusdam compositis veteres addiderunt.

## 21. PORTVLACA.

- 1) Præter refrigerantem etiam subadstrictoriam vim habere creditur, ea propter vulgo laudata in profluuiobiliofo & sanguineo, omnibus hæmorrhagiis, pollutione nocturna, soda, ardore vrinae, quin & in calculo; vbi licet meliora suppetant, tamen in acetariis adponere hanc herbam haud nocuerit.
- 2) Externe utilis prædicatur ad stomacacem, verrucas, & in primis ad stuporem dentium illico tollendum.

## 22. SEMPERVIVVM MAIUS.

- 1) Dicitur & sedum maius, ac succo turgent pariter refrigerante, quo vulgus interdum in febrili feruore, tum intro sumto, tum extus plantis pedum supposito abutitur.

2) Mo-



2) Modice autem hæc herba vsurpata quadrat ad internum æstum volaticum ex nimia & acri humorum subtilitate exfurgentem, nec non ad ardorem linguæ & anginam, vbi cum cancris fluuiatilibus contusam & expressam plurimi ipsam commendant.

3) Ab aliis quoque cum fructu, vt volunt, adplicata fuit pustulis cutis ardentibus & manantibus, & capiti phreneticis deliriis turbato, itemque gangliis, verrucis, pedumque clauis; incertius vero apium, vesparum aliisque venenatis iclibus, frustra strumis, perperam erysipelati & acribus inflammationibus, quas sæpius deteriores reddit, imponitur.

### 23. SOLANVM.

1) Hortense syluestri temperatius est, sed tamen vim foeniferam adhuc satis exserit, ideoque inter refrigerantia vulgo ponitur.

2) Cautius hinc admouenda est herba tumentibus hæmorrhoidibus & capiti ex feruore febrili dolenti; quamuis enim dolorem sedet, tamen intacto mali fundo, grauiora relinquere potest consecutaria.

3) Idem tenendum est in erysipelate; tutius autem & ex *Etmülleri* aliorumque fide præclaro effectû (licet vix solido) consecratur tumoribus duris, vlceribus exedentibus cancris & ipsi cancro aperto.

4) Maiorem adhuc circumspectionem postulat *solani furiosi*, seu *bellæ donnæ* in opacis syluis passim crescentis vsus, certe in dysenteria & arthritide vaga, vbi nonnullis profuisse citatur, merito excludendus. Alibi succus ad cancrum laudatus exstat; nos autem *folia bellæ donnæ* in cancro vere deplorato certa methodo & parcissima dosi adhibentes admirabilem prorsus eorum virtutem vidimus; sed cum alio exemplo non æque fructuosa reperta, nedum frequentioribus experimentis probata sint, intempestiuum foret de certa illorum salubritate quicquam diuulgare.



- 5) *Stramonium* quoque audit solanum promiferum foetidum fructu spinoso rutundo, sed æquo iure ob vim valde narcoticam exitiabile censetur & propinquum *Daturæ* Indorum, cuius species, pro quorundam sententiam, existit.

24. BORRAGO.

- 1) *Flores* huius ex acidulo principio tenuissimis late extensis sulphureis particulis interpolato, temperantem quandam hauriunt qualitatem, obscurius vero cardiacam, etsi veteres hos inter quinque *florum cordialium* numerum referre voluerint.
- 2) Credebant enim in exhilarando animo, atrabile & tristitia funganda, itemque in venenis & febribus malignis pulcre & singulariter convenire hos flores, quod tamen, nisi quod forte syrupus grato sapore quibusdam placeat & refectionem aliquam præstet, hodie non deprehendimus.
- 3) Incerte quoque conserua laudatur in mensibus secundinis & lochiis promouendis.

25. NYMPHÆÆ FLORES.

- 1) Tribuitur his refrigeratoria virtus, acrem, sanguinis æstum, febrilem cephalalgiam, pollutiones nocturnas, fluorem album, itemque alios fluxus & dysenteriam, ut multi credunt, egregie moderatura.
- 2) Sed fidelis experientia deficit; nec radicis subadstringentis amuleticam vim in depellenda vertigine, nec eiusdem & seminis nymphææ efficaciam in prædictis malis ampliorem vtilioremque demonstrat.

26. SEMEN SCARIOLE.

Minus cognitum est; a nonnullis autem ad intubum minorem pertinere & temperantis facultatis consors iudicatur; ac cum hæc leuiuscula sit & singularibus viribus vacua, dignioribus hoc semen postponendum est.

27. OPIVM.

- 1) Vocatur & *Affium Amphia* &c. atque e capitibus papaueris Turcici, tam albi, quam nigri colligitur.
- Nem-



Nempe antequam maturuerint, vel e sponte ruptis, vel arte incisis effluit succus purior candicantis adhuc aut flauescientis coloris, quem deinde inspissant & κατ' ἐξοχὴν opium dicunt; aut ex capitibus & caulis incisis exprimitur succus, qui condensatus ex viridi nigricat graueolens & variis fordibus inquinatus, & a veteribus *meconium* nuncupabatur, quemque hodie sub nomine opii ad nos ex Asia minore & Aegypto transmitti refert *Langius*; alii vero etiam ex Cambaia & Decan regione orientali plurimum opii mollioris & si puluerifetur, instar aloës flauescientis ac satis puri nunc aduehi memorant.

2) Constat e principiis resinoso - guminosis & sulphureis vaporosis largissimis, indeque vt virosum odorem, sic stupefaciendi potestatem tantam edit, vt inter narcotica ipsa non immerito principatus deferatur.

3) Quotocunque igitur laudum vulgarium splendore niteat opium; tamen id sæpissime temporaria quadam malorum sopitione fucum facere, nec ad vllum morbum solide curandum per se & solum conducere, (cum materiam non rite corrigat, & motus magis supprimat, quam moderetur &c.) plerumque vero salutare naturæ motus valde perturbare quotidiana experientia euincit. Vnde sicut olim multis suspectum fuit, ita hodie quoque nonnulli prudentes medici superbum alienis plumis opium paullulum denudare coeperunt.

4) Certe damna ex opii vlu relinqui solita breui leuamine, quo blanditur, longe maiora sunt, nec facile reconcinnanda. Sic v. g. in hæmorrhagiis, languentes adhuc magis debilitat, in nimis lochiis, &c. plane fluxum supprimit, in doloribus, vel grauem recidiuam, vel stuporem paralytodeum ciet; in spastico-arthritis morbis idem aut contracturas denique, in epilepsia fatuitatem, in colica subinde paresin infert; febribus acutis exacerbationem, deliria grauiora &c. superaddit; asthmaticis, gibbosis respirationis vias



præcludit & angores auget, omnibus vere languidis mortem maturat & phthificis, heceticis, hydropicis, calculosis viaticum est ad vitam æternam.

5) Vnde patet, quo iure dicatur opium symptomatum anchora, diuinum prope vbiuis medicamen, *Nepenthe Homeri*, asylum, mysterium &c.

6) Cæterum etsi cum *Sylvio* aliisque fateri non sit necesse, quod medicus opii vfu supersedere nequeat; tamen in magna dolorum atrocitate, viribus adhuc integris & materia maximam partem rite emendata, præparata ex eo rite correctâ, vt supra iam monuimus, sub exili dosi non plane aspernamur; crudum autem plerique damnant merito, & qui probant, a Turcarum consuetudine & paucis sub nostro climate factis experimentis, argumentum haud satis firmum arcessunt.

7) Externe quoque raro tutum, aut salubre est opium; in capitis enim & dentium aliarumque partium doloribus cerebrum turbidum stupidumque reddit, collyriis frustra inditur, nec clauos pedum sanat, nec papillarum fissuras, nedum maligna vlcera. Clysteribus largius incoctum inducit subinde coma, ac male adplicatur ad impotentia initium depellendum, cum potius idem confirmare valeat.

8) Turcæ se in stupidum furorem pugnandi incendere per opium dicuntur; Indi Nigritæ certe eodem sæpius animos suos efferant ad patratorum homicidiorum audaciam; quamquam alii ab iis non solum opium, sed certam mixturam ex eo & aliis inebriantibus compositam deglutiri adfirment; vti varia, huius generis ad temulentiam facientia, tum ex foliis betel tum ex cannabi Persica, Opio, Datura &c. quæ miris phantasmatis & quasi magica crapula hominem adficiunt, ab Indis vulgo misceri, cupideque deuorari testatur *Kempferus*.



TABVLA XX.

DE

CVRATIONE PER SPECIFICICA.

I. DEFINITIO.

Curatio per specifica est specialissimum medendi genus, quo per peculiaria plane & actiuiora remedia, certis quibusdam morbis exquisitis & vnice adpropriata, pertinaces nonnulli adfectus sed adhuc sanabiles, ita absolute & in solidum tolluntur, vt, vel simul & semel, vel continuo remediorum vfu plenarie eradicentur, aut ad minimum multum coërceantur & impetus eorum refringatur. Eiusmodi medicamenta vocantur, *specificica, sympathetica, magnetica, archealia, mumialia.*

II. DIFFERENTIA.

1. Remedia *specificica* non sunt confundenda, vt vulgo fit, cum *sedantibus*: hæc enim dolores simpliciter mitigant, illa autem motus penitus alterant, atque aliorum dirigunt ac conuertunt.

2. *Specificica* cum *sympatheticis* multum quidem habent conuenientiae, dum ambo specialissimis & præcipue contumacioribus morbis destinantur; differunt autem in eo; quod *specificica* materiali, *sympathetica* vero immateriali &, vt dicunt, ideali concursu effectum suum præstent, immo nonnumquam in longe distantia loca operentur.

3. *Specificica* agunt

1) vel in *motus*, & hoc plerumque,

2) vel in *materialiam*, id quod rarius contingit, e. g. sedum minus in scorbuticam intemperiem.

4. Porro



4. Porro specifica quædam medentur,
  - 1) morbis idiopathicis, quædam
  - 2) adfectibus symptomaticis.
5. Denique alia specifica periculosa sunt & maxime drastica, ideoque multa cum circumspeditione adhibenda, e. g. *bella donna* in cancro; alia tutioris quidem sunt vsus, nihilo tamen minus applicatio eorum certis obseruationibus & cautelis circumscripta est, e. g. *millefolii* vsus in adfectibus hypochondriaco-hystericis.
6. *Sympathetica* pari modo in *drastica periculosiora* & *tutiora* diuidi possunt. Ex numero priorum est *pulvis sympatheticus Dygbæi*, hæmorrhagiis sistendis destinatus, ad posteriorum autem ordinem pertinet verrucarum absumptio per *nodos* in filo sepeliendo.
7. Præterea sympatheticorum alia agunt ægris harum curationum consciis, alia autem iisdem plane insciis.

### III. INDICANTIA &

### IV. INDICATA.

1. Cum ipsa rei indoles postulet, vt cuilibet specialiori adfectui specifica subiungantur remedia, hæc duo membra mox coniungere necesse est.
2. Ante omnia autem monendum est, Medicum rationalem non protinus ad specifica, nedum sympathetica, tamquam ad sacram ancoram confugere debere; nisi quidem peculiare rerum circumstantium conditiones hanc regulam infringant; de quibus sub *modo administrandi* plura dicemus.

#### A. SPECIFICA CEPHALICA vulgo credita.

##### I. Vegetabilia.

Rad. Doronici

Galangæ

Iridis Florentinæ

Rhodia

Valerianæ

Zedoariæ

Herb. Basilicæ, seu ocymi  
medii

Betonicæ

Chamædryos

Chamæpytidis

Maioranæ

Mari

Herb.



Herb. Origani  
 Polii montani  
 Pulegii  
 Rorismarini  
 Rutæ  
 Saluiæ  
 Serpilli  
 Verbenæ.

Flor. Anthos  
 Cheiri  
 Lauendulæ  
 Liliorum conualli-  
 um  
 Primul. veris  
 Rosarum

Spic. Nardi  
 Stœchadis Arabicæ  
 Tiliæ  
 Lign. Aloës  
 Sassafras.  
 Sem. Coriandri  
 Sinapios  
 Aromata e. g. cubebæ  
 cardamomi.

2. *Mineralia.*

Cinnabaris  
 Corallia  
 Gemmata  
 Succinata.

## B. ANTEPILEPTICA.

1. *Vegetabilia.*

Rad. Pœoniæ  
 Valerianæ.  
 Flor. Tiliæ.

Viscus Corylinus.  
 Quernus  
 Tiliaceus.

2. *Animalia.*

Alcis vngula.  
 Castorei medulla.  
 Canis atri bilis recens cum vnicornu fossili subacta.  
 Carpionum os semilunare.  
 Cerui cerebrum.  
 cordis ossa.  
 sanguinis oleum rectificatissimum.  
 Gallinæ, oua incubantis, excretio alba.  
 Hirundinum cor & aqua earumdam.  
 Hominis cranium vstum & philosophice præparatum.  
 officula triquetra ex cranio.  
 sanguis, & huius oleum rectificatissimum.  
 secundinæ.  
 vrinæ spiritus.

Hippomanes.

R r r

Lacer.



Lacertarum hepar.

in aceruo formicarum exesarum spina.

Leonis stercus.

Leporis coagulum.

tali.

Lumbrici terrestres.

Mustelæ viuentis spina.

Pauonis stercus.

Ranarum viridium hepar.

Talparum cor & hepar.

Tetraone ex viuo lingua siccata.

eius stomachus.

Vitulino ex cranio incus & malleus, habito ad sexum respectu.

Vnicornu fossile.

### 3. *Mineralia.*

Hyacinthus præparata.

Lunæ tinctura.

Smaragdus præparata.

## C. OPTHALMICA.

### I. *Vegetabilia.*

Rad. Helenii

Valerianæ

Herb. Chelidonii maioris

Euphrasie

Herniariæ

Hyslopi

Verbenæ

Flor. Calcatrippæ

Cyani

Rosarum.

Sem. Fœniculi

Sileris montani.

Camphora

Saccharum Canariense.

### 2. *Animalia.*

Axungia piscis asciæ, seu  
thymalli

Serpentum

Viperarum.

Fel Lucii piscis.

### 3. *Mineralia.*

Nihilum album, seu pom-  
pholyx.

Saccharum saturni.

Tutia præparata.

Vitriolum album.

D. OTI-



## D. OTICA.

1. *Vegetabilia.*

Rad. Iridis Florentina  
 Reliquæ cephalicæ  
 Herb. Cephalicæ.  
 Flor. Chamomillæ  
 Persicorum  
 Sem. Cumini  
 Bacc. Iuniperi  
 Lauri  
 Terebinthinæ oleum

2. *Animalia*

Castorei medulla  
 Salia volatilia sicca  
 Zibethum  
 Moschus

3. *Mineralia*

Ambrata  
 Succinata.

## E. AD FAVCES ET COLLUM

1. *Vegetabilia.*

Rad. Pimpinellæ albæ  
 Herb. Ceruicaræ  
 Maluæ arboreæ  
 Prunellæ  
 Saluæ  
 Vuulariæ  
 Fung. Sambuci

2. *Animalia.*

Album græcum  
 Nidus hirundinum

3. *Mineralia.*

Alumen  
 Lapis prunellæ

## F. PECTORALIA.

Rad. Althææ  
 Angelicæ  
 Ari  
 Aristolochiæ rotundæ  
 Chinæ  
 Enulæ  
 Glycyrrhizæ  
 Iridis Florentinæ  
 Pimpinellæ albæ  
 Squillæ  
 Symphyti  
 Herb. Bellidis  
 Chærefolii  
 Costæ

Hederæ terrestres  
 Hyssopi  
 Marrubii albi  
 Pulmonariæ  
 Scabiosæ  
 Scordii  
 Tussilaginis  
 Veronicæ  
 Vrticæ vrentis minoris

Sem. Anisi  
 Fæniculi  
 Cortex Cascarillæ

*Plura videantur, tab. de expectoratione.*



## G. STOMACHICA.

Rad. Acori veri seu calami  
aromatici

Ari

Galangæ

Gentianæ rubræ

Pimpinellæ albæ

Zedoariæ

Zingiberis.

Herb. Amaræ pleræque e.g.  
absinthii, Carduibene-  
dicti, centaurii  
minoris.

Aromata

Tunicæ ventriculi  
gallarum interio-  
res.

*Plura videantur tab. de motuum excitatione.*

## H. HEPATICA ET ANTICTERICA.

Rad. Cichorei

Curcumæ

Pimpinellæ albæ

Quinque aperientes

maiores; Apii,

Asparagi, Fœni-

culi, Petroselini,

minores: Cap-

paris, Eryngii,

Graminis, Ruscii

Rubiæ.

Rhabarbari

Scorzoneræ

Taraxaci.

Herb. Absinthii vulgaris &  
Pontici

Agerati

Agrimoniæ

Bellidis

Capilli veneris

Cochleariæ

Cuscutæ

Epithymi

Fragariæ

Hepaticæ nobilis

Lichenis petræi seu he-  
paticæ saxatæ

Matrifiluz

Scolopendrii

Flor. Bellidis

Schœnanthi

Ling. Santali

Cortex capparum

Gumm. Ammoniacum

Galbanum.

Salia media.

## I. SPLENETICA.

Rad. Asparagi

Caryophyllatæ

Filicis

Polypodii

Rubiæ tinctorum

Herb. Capillares quinque,  
nempe

Adiantum album seu  
ruta muraria

Adi-



Herb. Adiantum aureum seu  
polytrichum  
- nigrum f. Capillus  
veneris  
- rubrum f. trichoma-  
nes

Scolopendrium verum f.  
Ceterach.  
Cuscutæ  
Epithymi  
Marubii albi  
Cort. Cascarillæ  
Tamarisci.

## K. ANTICOLICA.

Rad. Cynoglossa inter horam vndecimam & duodecimam  
effossa, ac in substantia cum spiritu frumenti exhi-  
bita.

Herb. Menthæ

Millefolii in colica sanguinea

Cort. Aurantiorum

Caro Lupi in colica sanguinea hysterica.

Tubuli Fistularum oleo nicotianæ ad nigredinem vsque imbuti.

## L. ANTIHYSTERICA ET EMMENAGOGA.

1. *Vegetabilia.*

Rad. Aristolochiæ rotundæ

Bryoniæ

Calami aromatici

Dictamni albi f. fraxi-  
nellæ.

Galangæ

Leuistici

Zedoariæ

Serpilli

Flor. Anthos

Calendulæ

Cheiri

Croci

Lauendulæ

Cort. Aurantiorum essentia.

Antophylli & reliqua aro-  
mata

Herb. Abrotani

Artemisiæ rubræ

Dictamni Cretici

Matricariæ

Melissæ

Millefolii

Pulegii

Rorismarini

Sabinæ

Baccæ lauri

Gumm. Assæ foetidæ

Galbani.

2. *Animalia.*

Anguillæ hepar in partu  
difficili

Castoreum

Equini testiculi præpa-  
rati



<p>Leporis vterus in sterilitate.</p> <p>3. <i>Mineralia.</i></p>	<p>Succinum.</p> <p>Borax Veneta in partu difficili.</p>
<p>M. ANTIMAGICA.</p> <p>1. <i>Vegetabilia.</i></p> <p>Rad. Allii</p> <p>Herb. Absinthii</p> <p>Antirrhini</p> <p>Artemisiæ</p> <p>Hyperici</p> <p>Linariæ</p> <p>Lunariæ</p> <p>Origani</p> <p>Sabinæ</p> <p>Sideritidis</p>	<p>Verbenæ.</p> <p>Lign. Tiliæ.</p> <p>Sem. Nigellæ.</p> <p>Afa foetida.</p> <p>2. <i>Animalia.</i></p> <p>Bruchi maiales.</p> <p>Dentes demortuorum.</p> <p>Excrementa humana.</p> <p>Vestimenta personæ suspectæ suffita.</p>
<p>N. IN VRINÆ INCONTINENTIA.</p> <p>Apri vesica cum lotio combusta.</p> <p>Caponis, vel galli guttur.</p> <p>Erinaceus vstus.</p> <p>Leporis testiculi combusti.</p> <p>Murium cinis.</p> <p>Piscis a Lucio pisce deglutitus.</p> <p>Suis vulua.</p>	
<p>O. IN HÆMORRHOIDIBVS COECIS.</p> <p>Millefolium interne.</p> <p>Anguillæ exuuia } externe in suffitu.</p> <p>Mures marini }</p>	
<p>P. LAC ARGENTIA.</p> <p>Sem. Anisi</p> <p>Carui</p> <p>Cumini</p> <p>Fœnieuli</p>	<p>Nigellæ.</p> <p>Gelatinæ.</p> <p>Lumbrici terrestres.</p> <p>Lac lunæ.</p>
<p>Q. IN MELANCHOLIA.</p> <p>Adiantum album.</p> <p>Anagallis punicea.</p> <p>Iulii Palmarii puluis.</p>	<p>Asini sanguis.</p> <p>Vitriolum lunæ.</p> <p>R. IN</p>



R. IN MORSV ANIMALIVM VENENATORVM,

Hic vt plurimum certissime profunt.

Animalium, quæ morsum, aut ictum inflixerunt, vel corpora integra, vel partes e. g.

Hepar serpentum & viperarum contra morsum horum animalium.

Hepar, aut cor canis & lupi rabidi in morfu harum bestiarum.

Scorpionis oleum in ictu huius insecti venenati.

## V. MODVS OPERANDI.

1. In specificis remediis specialissima latet habilitas, quæ *sensationem* maxime *determinatam* in corpore viuo producere valet, & principium vitale ad has, vel illas commotiones atque alterationes motuum instituendas excitat & disponit.

2. Huic adserto nostro præ aliis fauet frequens & quotidiana fere obseruatio, quod effectus specificorum pro causarum *moralium* varietate variare soleat; e. g. in illis ægrotis, qui sunt tranquillioris animi specifica efficaciam suam longe certius exferunt, quam in ferocibus, impatientibus & turbulentis subiectis.

3. Notatu autem dignum est, plurima specificorum agere in *motus*, quos varie & specialissime modo incitant, modo refrænant, modo aliorsum dirigunt. Atque hæc diuersa motuum temperatio dependet a subtili quadam naturæ relatione & æstimatione ad oblatum & subtilissimo sensuum internorum organo perceptum medicamentum.

4. Hæc *generatiora* tantum proferre possumus de specificorum modo operandi, *specialiora* res ipsa vetat: subtilissimæ enim harum rerum mixtiones, & inde dependentes peculiare temperies non adeo distincte sensibus nostris externis sese ingerunt.

5. Abstrusior adhuc est modus operandi *sympatheticorum*, quæ non, vti alia remedia & iam iam dicta specifica, intus adsumuntur, sed per merum attactum effectus suos exse-



exferunt. Interea tamen ex his sympatheticorum tenebris in reliquum therapiae operandi modum haud parum lucis dispergitur. Cum enim hæc remedia ad corporis nostri missionem non accedant, sed per leuissimum tantum contactum, immo non numquam remotius & in distans operentur, hæc phænomena luculento testimonio sunt, effectum medicamentorum minime omnium provenire ex mere physicis & insitis illorum facultatibus, sed inesse corpori nostro, agens quoddam rationale, per organa sensationis omnia, circa corpus suum contingentia, exquisitissime percipiens, & secundum has perceptiones actiones suas vitales, non tam physicis quam moralibus respectibus, administrans & active dirigens. *Conf. tab. I. de modo operandi.*

6. Facilius quidem est conceptus, quando *consciis* ægris sympathetica adplicantur; tum enim principium vitale intenta animi imaginatione res ingratas & infensas e. g. araneas, bufones, reformidans, multo horrore motus suos aliorum dirigit vel plane suspendit; contra vero per gratæ rei sensum & consensum ad motus resuscitandos excitatur. Ex priorum numero est celebris illa excrescentiarum præter naturalium destructio, quæ attactum rei vel inuisæ & horridæ vel magno cultu prosequendæ, sequitur. Subaudimus depulsionem strumarum per attactum manus mortuæ vel manus Regis, item extirpationem verrucarum per alligationem portionis corii humani. His enim in casibus natura humana, in terrorem coniecta, a contexendis eiusmodi structuris abhorret, ut vel destruat, quæ consulto structa fuerant, vel motus vitales subducendo, hæ excrescentiæ tandem prorsus evanescant vel tamquam emortuæ decidant.

7. Difficilior autem est illorum modus operandi, quæ *insciis* ægrotis adhibentur, & nihilo minus præsentissimi sæpe sunt effectus. Ex horum numero est famosus ille *pulvis sympatheticus*, qui vehementissimas non numquam compescit hæmorrhagias, si inscio etiam ægro & in alio quo-



quodam loco cum sanguine eius profluenti commisceatur. Quæ res vti magna quondam experimentorum farragine a *Dygbæo* stabilita est, ita adhuc dum crebra experientia confirmatur. Licet autem hæc occulta sanguinis cum puluere commixtio in crassiores externos ægri sensus non cadat, a principio tamen vitali substantia illa vitriolico-acida, cum sanguine mixta, valentissime coagulans sensibus internis subtilioribus percipitur; qua de re sanguinem reliquum valida adstrictione in corpore retinere & a molestissima eius modi coagulatione præmunire studet.

## VI. MODVS ADHIBENDI.

Hic requirit

### 1. *generaliorum remediorum præmissionem.*

Specificæ enim præ aliis accuratam & specialissimam ratione determinatam adplicationem exposcunt, utpote quorum energia multum labefactatur, si res peregrinæ obsistant. Vnde, nisi sordes primarum viarum per congrua laxantia expurgatæ, & humorum tam excedens quantitas imminuta, quam vitiosæ crassiores qualitates correctæ fuerint, a natura, excussionibus communium impuritatum implicata & occupata, vix unquam obtinebitur, ut specialissimum quemdam fomitem motibus specialissime adpropriatis expugnare decernat.

### 2. *Temporis debiti electionem.*

Multum hæc circumscriptio valet in adfectibus *periodicis*: tum enim præcipue sedulo perpendendum est, num medicamenta versus paroxysmum, an in declinatione eiusdem, an alio quodam temporis momento exhibenda sint. Hæc vero omnia speciatim indicare, non est huius loci, quia innumeræ fere rerum circumstantium variationes nimiam prolixitatem adferrent.

### 3. *Morbi ipsius exactiorem dignotionem.*

Hic inquirendum est, num adfectus sit idiopathicus, an



symptomaticus. Posterior enim prius non eradicatur, quam causa sublata fuerit; immo ne prior quidem, si in contumacem habitum, peruersis præcipue remediis, degenerauerit, medicamentis facile auscultat.

## VII. CAUTELÆ ET OBSERVATIONES PRACTICÆ.

1. Dari specifica nemo facile Practicorum negabit; qui vero Theoretici effectus remedium per meras physicas qualitates explicare student, illi hic, vel contradicunt, vel confunduntur.
2. Nec ideo specifica non dantur, quia, vel modus eorum operandi difficulter concipitur, vel effectus eorum, posthabita temporis, virium & reliquarum rerum obseruandarum ratione, non semper ex voto succedit.
3. Quem ad modum autem in *definitione* diximus, specifica eius modi esse remedia, quæ determinatæ cuidam morbi speciei proprie, exquisitæ & nonnumquam vnice medentur, ita hic notamus, nonnulla eorum, præter hanc specialissimam energiam, alias quoque generaliores virtutes possidere.
4. *Plebeiorum* traditiones, quæ de specificis circumferuntur vti promiscue non sunt contemnendæ, ita a rationali Medico non adeo auide expeti, multo minus ad superstitionem vsque coli debent.
5. *Specificæ febrilia* magis optanda, quam speranda sunt. Sic e. g. *cortex cascarillæ*, qui pro tali vulgo venditatur, generali tantum ratione, nempe leniter adstringendo & sedando, operationem suam exserit.
6. In *variolis* autem, quæ vulgo specifica domestica iactantur, illa, vel vana, vel prorsus periculosa sunt.
7. *Convulsui* motus a specificis facilius superantur, quam *spastici*.
8. Quicumque specifica in quibuslibet specialis morbi phænomenis vsurpare intendunt, illi satis testantur, se specificorum indolem nondum satis perspexisse, e. g. *Millefolium* est quidem antihystericum, non cuiuslibet autem



tem mali hyſterici ſchemati certiffime ſuccurrit, ſed motibus tantum erroneis, qui adfectum hunc premunt, ſpecialiffime deſtinatum eſt, atque hos, notante iam *Arnoldo, Villanouano & Riuerio* efficaciffime fiſtit.

9. Laudandi quidem ſunt auctores, qui ſpecifica poſteritati reliquerunt, optandum autem eſſet, vt hiftoriam non adeo mancam & mutilam, ſed accuratam & ſpecialioribus circumſtantiis ornatam, exhibuiſſent.
10. Non adeo iniuſta eſt querela, multa quidem ſpecifica paſſim commendari, vix vnicum autem, tamquam vere tale, optato effectui reſpondere. Neque nos negamus, pleraque illorum, quæ ſuperius vt ſpecifica *cephalica, hepatica, ſplenetica* &c. ad normam vulgarem recensui-  
mus, his laudibus deſtitui. Cæterum, quæ vera ſunt ſpecifica, non ob ſui, ſed ob neglectæ ſpecialiſſimæ adminiſtrationis culpam, ſpem artificis fallunt.
11. Cum ſpecificis æque ac ſympatheticis cautiffime procedendum eſt; præcipue in hæmorrhagiis compescendis. Has enim dum præſentiſſime quidem ſupprimunt, adfluxum autem moleſtius vrgentem non alterant, grauiſſima facile pericula machinantur.
12. Tandem deteſtamur non amuleta ſimplicius adpenſa, ſed ſuperſtitioſa & impia illa ſympathetica, quorum in numero fere ſunt, *characteres, electra, numiſmata, adprecatio, deprecatio, exorcismus* &c. commendamus potius horum loco arma ſpiritualia, preces nempe & fiduciam in Deum, quibus & peruicaciſſimi ſubinde morbi & infenſiſſimæ iniquitates poſſunt ſuperari.

### 13. RADIX RHODIA.

- 1) Vocatur & roſea ob ſimilem ferme odorem atque in Italiæ, Styriæ & Vngariæ montibus prouenit, temperatæ diſcutientis ac detergentis, vt nonnulli credunt, facultatis.
- 2) Exinde citatur prodeſſe in dyſenteria, diarrhœa, fluore albo, malo hyſterico; ſed incerto, quantum conſtat, effectū.



- 3) Specificè vero capitis doloribus externe dicatur, vbi nonnunquam operæ pretium fecit, plerosque tamen auxilii indigos dimisit; quapropter necesse est solertius adhuc singulares circumstantias, quibus certo, vel minus conuenit, remotis prius generalioribus caussis inuestigare.

#### 14. HERBA CHAMÆPITYS.

- 1) Nora pariter est sub nomine *Iuæ artheticae*, ac sua sponte in Austria & alibi, apud nos vero in hortis culta efflorescit, qualitatem abstergentem, resoluentem, diureticam & ex quorundam opinione, etiam roborantem consecuta.
- 2) Dari propterea iubetur in calculo, mictu cruento, mensium retentione, foetu mortuo, inprimis in arthritide & podagra, quibus tamen, iudicante *Etzmüllero*, parum adfert solatii.
- 3) Alibi in frigidis capitis adfectibus paralyfi & vertigine, itemque contra virus aconiti, ab antiquis etiam in obstructione hepatis, lienis, ictero & cachexia legitur adhibita, vbi vltèrius eam experiri possumus.
- 4) In nonnullis officinis prostant aqua & conferua, cæterum commode in infuso propinatur.

#### 15. POLIVM MONTANVM.

- 1) Semiaromaticæ indolis est, sed rarissime a medicis præscribitur, quamvis ipsum aliqui catarrhis frigidis, morbis abdominis chronicis, vteri vitiis & retentioni mensium bene conuenire notent.
- 2) Extus fronti & nuchæ adligata oculis inflammatis, quin & epilepticis succurrere dicitur, sed specialem virtutem nusquam adhuc comprobauit.

#### 16. SEMEN CORIANDRI.

- 1) Ad aromata nostratia pertinet; sed, præter resoluentem ac roborantem vim, vaporoso suo principio, inprimis recens, caput nonnihil turbat & obnubilat, vnde veteres ipsum maleficum & aceto corrigendum esse duxerunt.

2) Si.



- 2) Sicut autem salubriter datur illis, quos catarrhi mucidi, cruditas, flatulentia, vermes, cachexia & leuiiores glandularum oppilationes grauant; ita frustra specificè ad menses pellendos, libidinem frangendam, cerebrum & memoriam roborandam commendatur.
- 3) Neque idem, tam potenter, vel phlogoses post partum, vel dysenteriam, nedum quartanam, vel externe scrophulas, carbunculum &c. perfanat.
- 4) Prostant huius feminis confectio & oleum destillatum.

## 17. VISCUS CORYLINVS.

- 1) Singularis planta est fruticans in arboribus; & ab aliis hinc æquiuce germinare, ab aliis contra ex semine, seu granulis, quæ simul cum baccis visci a turdis &c. auide vorari & per aluum passim integra deponi aiunt, prognasci traditur.
- 2) Cum autem variis arboribus viscus innasci soleat, tum ad vsum medicum, præcipue *corylinus quernus* & *tiliaceus* deligitur; e quibus primum & vltimum quidam pro certiore antepileptico venditant, sed an stabili experientia eundem querno præclariorem inuenerint, dubitatur.
- 3) Vsitatior certe *quernus* est, cui præcipue salina acidula & terrea principia, indeque virtutem adstrictoriam & spasmis mitigandis idoneam competere plurimi existimant.
- 4) Quocirca laudatur in arthritide, partu difficili, hæmoptysi, dysenteria, vermibus, quin & in quartana, vertigine, apoplexia. Sed, nec in his valde probatum, nec in pleuritide arcanum est. Meliorem subinde effectum edit in epilepsia, si cum aliis congruentibus mistus præbeatur; per se vero, nec adeo iuuat, nec in tanta copia, quanta vulgo præcipitur, ordinandus est.
- 5) Ex baccis albicantibus maturis vinosi odoris paratur viscus aucuparius (vnde nomen plantæ) qui olim loco terebinthinæ emplastris admiscebatur, hodie vero merito hoc scopo negligitur.



## 18. ALCIS VNGVLA.

- 1) Extollitur vulgo qualitas huius antispastica, malis hysterico-hypochondriacis, podagræ, partui difficili, infantum paucibus & epilepsiæ, vt credunt, subuentura.
- 2) Sed plus fumi inesse reperitur, quam optatæ in tam grauibus morbis efficacix.

## 19. CANIS ATRI BILIS.

Dolores capitis & epilepsiam frangere dicitur, quod an per se, an ex aliis simul admixtis faciat, dubium est.

## 20. CARPIONVM OS.

- 1) Congener hoc percarum lapillis putatur & salubre in hæmorrhagiis, erysipellate & epilepsia, in qua vltima tamen alii minores lapillos lunari forma supra oculos carpionum sitos prioribus anteponunt.
- 2) Sed specifica talis vis nusquam digne stabilita comperitur. *vid. supra.*

## 21. CERVI CORDIS OSSA.

- 1) De his iam supra diximus; heic vero meminimus *olei illius animalis*, quod, tum ex cerui, tum ex aliorum animantium partibus quibuscunque destillatum crebris rectificationibus ad summam vsque puritatem & vim penetrantissimam euehitur.
- 2) Hoc sane *oleum* rite paratum in conuulsionibus, tam idiopathicis quam vterinis, dummodo alia vniuersalia & conuenientia præmissa sint, sæpius admirabile fuit; vtque miseros, siue vlla narcosi in placidam quietem & somnum sæpe per 24. horas durantem delabi suauiter coëgit; sic si paullo ante paroxysmum ingruentem sumtum fuerit permultos plane desperatos felicissime liberauit. *Confer. Disp. inaugural. de hoc oleo & tab. med.*

## 22. HIRVNDINES.

- 1) Notum est, quantopere hæ aues iuniores in hysterico malo, pariendi difficultate, & conuulsionibus celebrantur,



brēntur, sed ignotum, ipsas re vera quicquam adiu-  
menti præstare. Certe aqua hirundinum ex his pul-  
lis nihil archeale, nedum vere salutiferum per alembi-  
cum traducit.

- 2) Cordis efficacia adhuc dubia est, *nidus* in angina neuti-  
quam specificus, etsi discutientem illi vim ob sal ni-  
trosum tribuat *Ettmüllerus*; stercus pariter nitrosum  
est, sed præ aliis non dissipat inflammationes.

23. HOMINIS CRANIVM &c.

- 1) Nonnullos epilepticos hoc releuauit, rarius tamen per  
se operæ pretium fecit. *Sanguis* autem ex homine,  
qui decollatur, calide haustus dirum medicamen est,  
nulli suadendum. *Spiritus* sanguinis tutior est, sed  
specificam suam vim nondum probauit.

- 2) *Secundinarum* effectus in epilepsia valde prædicatur *Ett-  
müllero*, in podagra autem irritus existit. Recen-  
tes secundinæ & sanguis lochialis næuos mater-  
nos non adeo profundos egregie indentidem extin-  
guunt, extus adplicata.

- 3) Præterimus alia, vt sanguinem menstruum & zenith iu-  
uencularum cutem humanam, stercus &c. de quibus  
varia portenta narrantur.

24. HIPPOMANES.

- 1) Describitur, vt caro glandulosa, rubicunda spithamæ  
longitudine, quam pullus equinus recens editus in  
lingua gestat eamque, nisi statim eximatur, hausto aë-  
re protinus deglutit.

- 2) Commendatur autem in puluere epilepticiis, dysenteri-  
cis, coeliacis &c. sed vbique incerto euentu.

25. LACERTARVM HEPAR.

Minus adhuc probatum est in conuulsionibus epilepticiis,  
meritoque ei *hepata* & *corda talparum*, *ranarumque  
viridum* recentiora & opportune data palmam præ-  
ripere censentur.

26. TETRAONIS LINGVA.

An hæc pars quicquam singulare efficiat, vltius adhuc  
firman-



firmandum est; de ventriculo autem vrogalli cum contentis in eo lapillis aliisque fordibus certo quidam venenatores adferunt quod superfusus oleo oliuarum leniterque digestus, oleo virtutem impertiat mirabiliter antepilepticam.

### 27. EUPHRASIA.

- 1) Plurimorum testimonia consonant, magnum in hac herbula præsidium esse aduersus oculorum morbos, sed nescio qui fiat, vt hodie rarissime medentum impleat expectationem. Nihilo minus tamen diligentius eius efficacia perquiri meretur.
- 2) A paucis etiam in vertigine, memoriæ debilitate, itemque in ictero, sed incertius, collaudatur.

### 28. FLORES CALCATRIPPÆ.

- 1) Subadstringunt ex acido quodam principio, indeque repellunt & nonnihil discutunt stases præsertim in teneribus partibus, oculis & alibi subnatas; sed mirabilem specificum effectum nusquam testantur.
- 2) Ex supra dicta vi vomitum quoque compescunt in infuso dati. *Herba* vero adhuc euidentius adstringit in vulneribus proinde, & herniis laudata. An de cætero calculosis, ictericis, obstructis visceribus, sanguini congrumato doloribus post partum &c. conueniat, obscurius est.

### 29. AXVNGIA PISCIS ASCIÆ.

- 1) Recens lenit & emollit, vetusta magis colliquat, ideoque debita cautione in acriore congestione inflammatoria ad oculos vsurpari debet. Vbi autem vera quædam pellicula, vnguis &c. præsto est, ibi vltima congruentior existit.
- 2) Idem tenendum est de *pinguedine serpentum* & viperarum, cui singularem virtutem in oculorum malis alias adsignat *Wedelius*.



## 30. NIHILI ALBUM.

- 1) Ad cadmiam capniten, seu artificialem volatilem refer-  
tur, & ex æris aliorumque metallorum liquefactorum  
fumo euehi & oris fornacum adhærescere traditur.
- 2) Vbi autem ad medicum vsum vocatur, lotura quadam  
præuia ad sui correctionem indiget, ac tum oculo-  
rum morbis præcipue adhibetur, in quibus adstrin-  
gente, repellente & exsiccante facultate defluxiones  
serosas emendat, acriores autem inflammationes fa-  
cile exacerbare potest, vnde æquum discrimen &  
prudencia in adplicatione opus erit. Cæterum in  
vulceribus manantibus haud ita conuenit.
- 3) Vix effectū, nec qualitate a nihilo differt *pompholyx*,  
nisi quod subinde etiam cinereum colorem repræ-  
sentet, & non in oris, sed summitatibus fornacum  
(über den Gar-Heerden und Kupfer-Defen) hære, at-  
que etiam ex antimonialibus & pyritarum mineris  
fufis eleuari memoretur. *Confer. Langius.*
- 4) Itidem huc pertinet *spodium Græcorum*, speciatim a  
quibusdam pro nihili gryseo habitum, ideoque a  
spodio Arabum, quod, vel radix cannarum exusta,  
vel ebur vsum &c. est, probe discernendum.

## 31. TVTIA.

- 1) Olim Alexandria tantum adferebatur, nunc vero &  
Goslariæ, Sneebergæ & alibi ex hastis ferreis supra  
fornaces, in quibus æris & pyritarum mineræ fun-  
duntur, positis colligitur ponderosa, metallica, cor-  
ticis instar circa dictas hastas ex fumo metallico sen-  
sim concreta, & sic pariter pro specie cadmiæ forna-  
cum habetur, quapropter etiam aureum colorem æri  
Cyprio conciliat.
- 2) Vt ergo origine, sic & effectū non longe abit a præce-  
denti



denti, parilemque vtilitatem promittit in humida oculorum afflictione & vlceribus, dummodo acrior æstus & sensus absint, ac ipsa tutia antea rite præparata habeatur. De reliquo in hæmorrhoidibus cœcis hanc commendare non possumus.

### 32. VVVLARIA.

Dicitur & ceruicaria maior, virtutis adstringentis, adeoque faucium malis interdum auxilium spondentis; sed hanc herbam rarissime adhiberi & quantum ad alias vires attinet, plane incognitam esse constat.

### 33. TVNICÆ VENTRICVLI GALLINARVM.

- 1) Ingentem famam consecutæ sunt in roborando stomacho, vt præ aliis hic singularem & specificam plane virtutem edere credantur. Proculdubio autem nata primum hæc opinio est ex eorum cerebro, qui ex similitudine substantiæ animalis ventriculi nostri scilicet stomacho perquam congruente, vel a sublimioribus archealibus reliquiis tantam vim proficisci debere autumant.
- 2) Sed facile hæc cogitata ferri possent, si modo experientia constantius responderet, quæ & hæc, & alia similia speculantium spem sæpenumero frustratur.

### 34. RADIX CYRCVMÆ.

- 1) Ex India orientali aduehitur, ibique etiam ab incolis ad condituram ciborum frequentissime vsurpatur, vtpote subacri, grate amaricante & aromatico sapore prædita.
- 2) Quemadmodum autem hæc flaua radix abstergit, attenuat, & resoluit, sic in frigidis a sero mucido corrupto pendentibus malis, cachexia, hydrope, œdema-

te



te pedum, quartana inueterata non spernendam ostendit utilitatem.

3) Inprimis tamen icterum tollere celebratur, idque non immerito, si debito tempore, absente nimio æstu & acriore sanguinis ad hepar congestione, eandem porrigas; quanquam vere specificam virtutem in ea non reperiamus.

4) Incertius de reliquo ad pariendi difficultatem & calculum laudatur, nam præter generalem & diureticam vim nihil adfert salutare.

### 35. RADICES QVINQUE APERIENTES.

1) Inter *maiores* numerantur radix apii, foeniculi asparagi, petroselini, rusci; da qua vltima adhuc pauca dicenda sunt.

2) Dicitur & *radix brusci*, seu myrti sylvestris acutæ, atque ob nitroso-alcalinam indolem abstergit pariter ac resoluit, idcirco in morbis frigidis serosis utilis. Cæterum præ aliis viscera singulariter haud aperit, neque mensium vitiis, nec gonorrhœæ, nec stru-  
mis certam opem pollicetur.

3) Ad *minores* aperientes pertinent rad. graminis, rubiæ, eryngii, ononidis, capparis, quam posteriorem hic similiter tantum recensebimus.

4) Crescit autem læte in Hispania, aliisque calidis Europæ regionibus & fruticem protrudit, e quo gemmæ florum sale & aceto conditæ, vt notum est, cibis admiscuntur.

5) *Cortex* radicis amarum ac subadstrictorium saporem offert, in oppilationibus viscerum, malo hypochondriaco, quartana & scorbuto commendatus; certe valde diureticus est.

6) Idem de *floribus* traditur, quos nonnulli splenis animam vocant, & cum cortice lienis duritiem certo dispellere referunt; vnde extus & intus adhibentur.



## 36. RADIX CHELIDONII MAIORIS.

- 1) Satis valenter operatur in attenuando, detergendo & resoluendo, ac bilioso mucidos humores simul aliquantum per aluum euacuat.
- 2) Vnde vtiliter propinatur hydropicis, eique cognatis tumoribus, itemque ictericis non adeo teneris, quibus præcipue *Paracelsus* aliique hanc radicem non secus ac curcumam fumere præcipiunt.
- 3) Magis dubiam vero laudem habet in pestilentia, & aliis febribus, malo hypochondriaco, scorbuto, odontalgia, ac infantum dentitione.
- 4) *Herba* etsi nec interne insalubris sit, tamen externe frequentius destinatur ferosis oculorum morbis & panno tollendo, vbi succus eius acrior paullulum temperari debet, porro tumoribus pedum & coagulationi lactis auferendis. A multis quoque tota planta in vulneribus & vlceribus foedis, scabie, imperigine, pustulis faciei, lentigine, verrucis, natis, clavis pedum dilaudatur.
- 5) Prostant inde aqua destillata & extractum. Alias in substantia, infuso, vel decocto potest adhiberi.

## 37. AGERATVM LVTEVM.

- 1) Adpellatur etiam *Eupatorium Mesue*, & apud nos in hortis colitur, vtque aromaticum odorem spargit & amaricat, sic præcedenti non multum absimilem medendi vsum habere iudicatur.
- 2) Plerique tamen hanc herbam magis hepati obstructo succurrere & lumbricos necare referunt; id quod vltior experientia illustrabit.
- 3) Ostenditur & *vulgare Eupatorium*, quod ab *Auicenna* cognomentum accepit, apud nos in paludibus crescens; cui pariter virtus hepatica, anthelminthica, anti-



antifebrilis & externe vulneraria adscribitur, digne tamen huc vsque non peruestigata.

### 38. RADIX FILICIS.

- 1) Abstergit & subadstringit, sed rarius in vsum vocatur, nisi forte in spleneticis morbis, vbi nonnulli eam summopere efferunt, nec non in lumbricis longis & latis, quorum præsentissimam pestem esse hanc radicem *Hoffmannus* innuit.
- 2) Alibi citatur prodesse nephriticis, herniosis, rachiticis, item in ambustione & vlceribus; alibi foetum pellere & sterilitatem inferre dicitur.
- 3) In vniuersum autem nondum satis probata est, ideoque caute vsurpanda.

### 39. HERBÆ CAPILLARES.

- 1) *Quinque* vulgo numerantur: capillus veneris, ruta muraria, adianthum aureum, trichomanes, ceterach, seu scolopendrium.
- 2) De capillo veneris supra diximus. Reliquæ lienosis maxime commendantur, & fere inter illas eminet *rutamuraria* non nihil resoluens & subadstringens atque in turbis venæ portæ indeque oriundis splenis pathematibus haud contemnenda.
- 3) Incertius autem eadem plantula laudatur in pectoris malis, phthisi, ictero, hydrope, febribus, scorbuto, rachitide, herniis, calculo, quem frangere vane perhibetur.

### 40. CARO LVPI.

Hæc an hystericis singulariter medeatur, ab experientia clarius adhuc demonstrari oportet.

### 41. ALBUM GRÆCVM.

- 1) In hoc vtique recondita est abstergens, & discussoria facultas,



cultas, qua in primis faucium morbis haud leue auxilium subinde præstat.

- 2) Idem & interne commendatur, tum in angina, tum in aliis inflammationibus, nec non in dysenteria, colica, malo hyfterico, mensibus nimis, externe quoque in vulneribus & vlceratione.

#### 42. ASA FOETIDA.

- 1) Hic succus resinofus e fauciata radice plantæ cuiusdam Persicæ, quæ a nobis laserpitium dicitur, effluit primum candidissimus & pinguis, flori lactis simillimus, ad solem deinde colorem fuscum & coalescens lentorem induere solitus. Bonitas ex fœtore maxime liquet eo grauiore, quo recentior Asa est. *vid. Kæmpfer.*
- 2) Mordaci autem sapore gaudet & præter resinoso-gummoso-salinas partes multum vaporosi sulphuris, vt loquimur, continet, inde resoluendi & quodam modo stupefaciendi viribus donata.
- 3) Sunt ergo, qui hunc succum valde prædicant in morbis vterinis, strangulatione hyfterica, tumore lienis, colica; alii & in asthmate & tussi humida, peripneumonia, febribus intermittentibus, variolis (sed ancipiti, vel inutili experimento) eundem commendant; Indi illo vtuntur in hydrope & præcipue tympanite, cæterum & adeo delectantur, vt multis ad eduliorum condimentum inseruiat.
- 4) Frequentior apud nos vsus externus est in spasminis hyftericis & post partum, splenis & faucium tumore, item in odontalgia, verrucis, paronychia, veneficiis (sed frustra) certius in vulneribus & vlceribus. At multi graueolentem eius halitum auersantur.
- 5) Cæterum, *Langio* notante, suffitus eius perfectam epilepsię curationem prodit, si scilicet ipsum ferant ægri; alias ex hoc odore nouus suscitatur paroxysmus.

#### 43. TE.



## 43. TESTICVLI EQVINI.

Hos quidam capere suadent in colica, partu difficili, lochiis pellendis, itemque in sterilitate, quam pariter ac *testiculi gallinacci & leporis uterus* tollere posse creduntur. Sed plerumque in his posita magna spes ab euentu refutatur.

## 44. ANTIRRHINVM.

1) Quanta huius herbæ laus est in incantamentis, tanta plerumque superstitione vsus illius innititur. De reliquo virtutes antirrhini singulares in aliis morbis nondum inclaruerunt.

2) Idem valet de *sideritide*. *Lunaria* autem certior vis traumatica adsignatur, qua & hæmorrhagias compescere possit, & herniis aliqua subuenire. Dubie vero eadem in fluore albo, gonorrhœa, epilepsia, memoriæ debilitate laudatur. Extus, vt dictum est, vulneribus conuenit, itemque vlceribus & cancro, si *Carrichterum* audiamus.

## 45. APRI VESICA COMBVSTA.

1) Incertum adhuc specificum est in vrinæ incontinentia, cui præstare creditur *guttur galli* tostum & cum vino datum, quod primum docuit *Solenander*.

2) *Ettmüllerus* autem in eodem hoc malo celebrat *erinaecum vstum & vuluam suis*, in puluere porrigendam.

## 46. MVRES MARINI.

1) Pulcram horum efficaciam sub forma suffitus in delinendis hæmorrhoidum cœcarum doloribus sæpius experti sumus, quanquam, vt solent alia pleraque specifica, nec indifferenter omnia, nec quouis tempore eadem subiecta protinus releuet.

2) In nimio autem hæmorrhoidum fluxu cautissime adhibendi



hibendi sunt. Raro enim huic, vel adstringentia, vel repellentia tale moderamen iniungunt, vt non maius periculum exsistat, aut detrimentum.

47. LAC LVNÆ.

- 1) Vocatur alias fungus, seu agaricus petræus, vtque terra leuis & friabilis candidissima est, margæ, vt videtur, species; sic in altissimis Heluetiorum montium speculuncis reperitur.
- 2) Quamuis autem in aqua fere soluatur, ipsamque lacteo colore tingat; tamen, nec inde patet, nec constantibus documentis euincitur, huic concreto specificam lactis augendi virtutem præ aliis deberi.
- 3) Certius est idem ob desiccandi leuiusque adstringendi vim conuenire vlceribus. In calculo autem & febribus malignis cum pauci illud vtile ducunt, tum adhuc minus consentit fidelior omnium magistra experientia.







# SERIES TABVLARVM.

Tabula I. de Therapia generali generatim	pag. 1
II. Emesi, seu vomitu	21
III. Catharsi, seu purgatione stricte dicta	39
IV. Diaphoresi, seu sudatione	83
V. Diuresi	152
VI. Apophlegmatismo per nares	213
VII. Apophlegmatismo per os	237
VIII. Saluatione generali	243
IX. Expectoratione	264
X. Sanguinis abundantis, aut subsistentis euacuatione per remedia	305
XI. Expulsione rerum toto genere præternaturalium	322
XII. Alteratione generatim	348
XIII. Incrassatione	354
XIV. Resolutione	381
XV. Humorū prauitate peccantium, seu caco-chymix correctione	409
XVI. Adstrictione	428
XVII. Relaxatione	458
XIIX. Motuum excitatione	466
XIX. Motuum temperatione	482
XX. Curatione per specifica	495



# INDEX.

## A.

<b>A</b> Brotanum	230	<i>Aethiops mineralis</i>	244. 261
<i>Absorbentia</i>	409. 411	<i>Affium</i> vid. <i>Opium</i> .	
<i>Abstergentia</i>	388	<i>Agallochum</i> vid. <i>Aloës lign.</i>	
quid sint	382	<i>Agaricus</i>	42. 55
<i>Abstinentia</i> a medicaminibus	14	<i>Ageratum</i> luteum	516
<i>Absinthium</i>	326. 500	<i>Agrimonia</i>	333
sal eius	192	<i>Album</i> græcum	517
<i>Acacie</i> flores	42. 54. 86. 122	<i>Albumen</i> oui	378
<i>Acanthus</i> vid. <i>Branca ursina</i> .		<i>Alchymilla</i>	456
<i>Aceta</i> bezoardica	97	<i>Alcis</i> vngula	510
<i>Acetum</i> squilliticum	35	<i>Alhandal</i> vid. <i>Colocynthis</i> .	
<i>Acetosa</i>	417	<i>Alkekengi</i> baccæ	154. 180
<i>Acetofella</i>	ibid.	<i>Allii</i> rad.	153. 159. 238
<i>Acida</i> , quomodo operentur	390	<i>Alterans</i> methodus	5. 6
<i>Acidi</i> spiritus	266	<i>Alteratio</i> quid sit	348
<i>Acidum</i> sulphuris	337	quando suscipienda	ibid.
<i>Aconitum</i> salutiferum vid. <i>An-</i>		<i>Alterantia</i> remedia	349
<i>thoræ</i> rad.		eorum modus operandi	349.
<i>Acori</i> rad.	238 240		seqq.
<i>Adstrictio</i> , quid sit	428		propinandi 352
quando adhibenda	429	<i>Alnus</i> nigra baccifera, vid. <i>Fran-</i>	
<i>Adstringentia</i> vim amittunt si		<i>gula</i> .	
particulæ nimium disper-		<i>Aloë</i>	42 60
guntur	3	<i>Aloës</i> lign.	421
aliquando hæmorrhagias au-		<i>Althæa</i>	271. 265. 356
gent	3	<i>Alumen</i>	453
vegetabilia	429	<i>Ambra</i>	479
animalia	431	<i>Amianthus</i>	453
mineralia	ibid.	<i>Ammoniacum</i> gummi	154. 183.
<i>Aegrotis</i> conualescentibus, quid			266
incumbat	21	sal	220
<i>Aetas</i> ægroti obseruanda	16	<i>Amphia</i> vid. <i>Opium</i> .	

*Amyg.*



# INDEX.

<i>Amygdalæ dulces</i>	265. 279	- cerussa	87
amaræ	154. 179	- tinctura	194
<i>Amylum</i>	367	<i>Antirrhinum</i>	519
<i>Anagallis purpurea</i>	215. 222	<i>Antiscorbutica</i>	412
<i>Analepsis</i> quid sit	466	<i>Antiuenerea</i>	411
<i>Anetbi</i> sem.	420	<i>Antihæcticum Poterii</i>	457
<i>Angelicæ</i> rad.	86. 97	<i>Antispasmodica</i>	482
<i>Anglicanum</i> sal vid. <i>Epsbhamense</i>		<i>Aphrodisiaca</i>	472
sal.		<i>Aperientes</i> 5 radices	515
<i>Anguilla</i>	380	<i>Apii</i> rad.	153. 161. 266
eius hepar	307. 320	<i>Apophlegmatismus</i> per nares quid sit	213
- cutis	321	per quænam remedia institu-	
<i>Animæ</i> gumm.	403	atur	214
<i>Animale</i> oleum	510	per os quid sit	237
<i>Animalium</i> medulla	378	- eiusdem indicantis ibid.	
<i>Anisum</i>	366. 300	- - modus adplicandi	239
stellatum	301	<i>Apophlegmatizantia</i> quomodo	
<i>Anodyna</i>	482	operentur	239
<i>Anodyna</i> aliquando commouent	2	<i>Apri</i> dens	425
<i>Anserina</i>	437	vesica combusta	519
<i>Antepileptica</i> vegetabilia	497	<i>Apricatio</i> veterum	151
animalia	ibid.	<i>Aqua</i> benedicta Rulandi	24
mineralia	498	extinctionis fabrorum	335
<i>Anthelmintica</i> quæ sint	323	<i>Aquilegiæ</i> sem	86. 124
quomodo operentur	329	<i>Arabicum</i> gumm.	265. 285
<i>Anthophylli</i>	230	<i>Arcanum</i> duplicatum 43. 155	201
<i>Anthos</i> rad.	86. 98	corallinum Croll.	25
flor.	225. 215	<i>Archealia</i>	495
<i>Anticolica</i>	501	<i>Ari</i> rad.	86. 98. 153. 266
<i>Antidæterica</i>	500	<i>Aristi</i> sambuci	37
<i>Antibysterica</i>	501	<i>Aristolochia</i> rotunda	153. 161
<i>Antimagica</i>	502	<i>Armenus</i> lapis	43. 82
<i>Antimonium</i>	155. 194	<i>Armoracia</i>	169
diaphoreticum	87. 133	<i>Arnica</i> flores	154. 173
- martiale <i>Ludou.</i>	316	<i>Aroph</i> Paracelsi	454
eius clyffus	135	<i>Artemisia</i>	306. 32



# INDEX.

<i>Afa dulcis</i> vid. <i>Benzoes gumm.</i>		perpetuum Paracelsi	65
foetida	518	<i>Basiliana tinctura</i>	195
<i>Asarum</i>	23. 32	<i>Basilicum</i>	418
<i>Asbestos lapis</i>	453	<i>Bardanae rad.</i>	86. 99. 153. 154. 266
<i>Asciae piscis axungia</i>	512	<i>Bdellium gumm.</i>	154. 183. 266
<i>Aselli</i>	206. 155	<i>Beccabunga</i>	85. 113
<i>Asparagi rad.</i>	153. 162	<i>Becchica quænam sint</i>	264
<i>Athleticus habitus</i>	14	remedia	ibid.
<i>Atriplex</i>	402	<i>Belladonna</i> vid. <i>Solanum furio-</i>	
<i>Aucuparius viscus</i>	509	sum.	
<i>Auellana nux.</i>	367	<i>Bellidis flor.</i>	154. 174. 266
<i>Aucna</i>	265. 274	<i>Benzoës gumm.</i>	266. 302
<i>Aurantiorum cortices</i>	87. 126.	<i>Berberes</i>	368
	154	<i>Berg-blau</i>	82
<i>Auricula muris</i> vid. <i>Pilosella.</i>		<i>Beta</i>	465
<i>Aurum</i>	480	<i>Betonica</i>	25. 223. 238
fulminans	43. 80	<i>Bezoardicus lapis orientalis &amp;</i>	
vitræ <i>Kegleri</i>	25	occidentalis	87. 143
<i>Autocratia naturæ palmarium</i>		<i>Bezoardicum minerale</i>	134
therapiæ fundamentum	6.	lunare	134. 135
	11	solare	135
multis premitur difficultati-		<i>Bilis canis atri</i>	510
bus	7	<i>Biliofa acrimonia quomodo ob-</i>	
cur multos non superet mor-		tundenda	415
bos	7. seqq.	<i>Bistorta</i>	86. 100
<i>Axungia piscis ascia</i>	512	<i>Blut-Stein</i>	454
<i>Azureum</i>	82	<i>Boletus ceruinus</i>	474
B.		<i>Borax</i>	155. 195
<b>B</b> <i>Alaustiorum flores</i>	441	<i>Borrage</i>	492
<i>Balnea Laconica</i>	96	<i>Bovis castrati splen</i>	307. 322
ex aqua dulci	462	<i>Bovista</i> vid. <i>Crepitus lupi.</i>	
<i>Balsamica vegetabilia</i>	412	<i>Branca vrsina</i>	463
animalia	413	<i>Brassica marina</i> vid. <i>Soldanella.</i>	
mineralia	ibid.	<i>Braun Garin</i>	234
oleosa	216. 237	<i>Brittanica veterum</i>	107
<i>Balsamum de Copaiua</i>	154. 188	<i>Brunnen-Kress</i>	118
<i>Peruvianum</i>	154. 189	<i>Brusci rad.</i> vid. <i>Rusci rad.</i>	
		<i>Brust</i>	



# INDEX.

<b>Brust-Wurtz</b>	97	<b>Canis</b> atri bilis	510
<b>Bryonia</b>	42. 55	<b>Cantharides</b>	155. 208
<b>Bufones</b>	155. 207	eorum essent.	208
eorum officula	207	<b>Capillares</b> herbæ	517
<b>Bufenites</b> lapis	ibid.	<b>Capillus</b> veneris 86. 114. 154.	266
<b>Bugula</b>	440	<b>Capparis</b> rad.	515
<b>Bursa</b> pastoris	437	<b>Carannæ</b> gumm.	404
<b>Buiyrum</b>	287	<b>Carbones</b> tiliæ	425
maiale	287	<b>Cardamine</b> vid. Nasturtium.	
maioranæ	224	<b>Cardamomum</b> maius vid. Paradisi	
rubrum & viride potabile	288	grana.	
<b>C.</b>		<b>Carduus</b> benedictus 86. 113. 125.	
<b>C</b> <b>Acochymia</b> correctio	409		266
<b>C</b> <b>Cacochymiam</b> corrigentia		<b>Marix</b>	86. 125. 266
quænam remedia sub se		<b>Caricæ</b>	281
comprehendant	409	<b>Carlina</b> rad.	86. 102. 153. 238
quando adhibenda	410	<b>Carmin</b>	477
eorum modus operandi	411	<b>Carminatiua</b> quænam sint	323
propinandi	414	vegetabilia simplicia	ibid.
<b>Cadmia</b> artificialis vid. Nihili al-		composita	324
bum.		animalia	375
<b>Calamintha</b>	306. 313	mineralia	ibid.
<b>Calamitba</b> vid. Styrax.		<b>Caro</b> viperarum	86. 146
<b>Calamus</b> aromaticus officin. vid.		<b>Carpionum</b> lapides præparati	155.
<b>Acori</b> rad.			209
peregrinus	240. 238	os	510
<b>Calcutus</b> humanus	155. 207	<b>Carthami</b> sem.	42 56. 215
<b>Calcatrippæ</b> flor.	512	<b>Caryophyllata</b>	86. 101. 153
<b>Calcis</b> viuæ spiritus	155. 196	<b>Caryophyllus</b> aromaticus	216. 230
aqua	196	hortensis	419
<b>Calendula</b> flor.	86. 122. 215	syluestris	420
<b>Camphora</b>	87. 131. 238	<b>Cascarilla</b> cortex	266. 301
<b>Cancrorum</b> chelæ	425	<b>Caseus</b>	288
lapides	155. 209	<b>Cassia</b> extracta	50
acido saturati	210	fistularis	41. 49
<b>Candis-Brod</b>	234	<b>Castanea</b>	444
<b>Canela</b> alba vid. Costi dulcis rad.		<b>Castorei</b> essentia	215. 220
		<b>V V V 3</b>	<b>Ca</b>



# INDEX.

<i>Castorei medulla</i>	221	<i>Chamæcyperissus</i> vid. Abrota-	
<i>Cataputia</i>	42. 67	num.	
minor vid. Ricinus		<i>Chamæpitys</i>	508
<i>Catechu terra</i>	450	<i>Chamædrys</i>	86. 115
<i>Catharsis</i> quid sit	39	foemina vid. Teucrium.	
<i>Cathartica</i> aliquando vomitum		<i>Chamomilla</i>	341
prouocant	3	<i>Cheiri flor.</i> vid. Viola lutea	
eorum modus propinandi	43.	<i>Chelæ</i> cancrorum	425
seqq.		<i>Chelidonium</i> maius	516
operandi	45. seqq.	minus	418
quamnam materiam & vnde		<i>Chinæ</i> cort.	442
eliminent	39	radix	86. 102. 244
<i>Centaurium</i> minus	41. 86. 114	<i>Cholagoga</i> quid sint	41
<i>Centummorbia</i> vid. Nummularia.		<i>Cibi</i> renitente natura ægrotis	
<i>Cepæ</i>	162. 238	non sunt obtrudendi	21
earum radix	153 215	<i>Ciceres rubri</i>	307 318
<i>Cephalica</i> vegetabilia	496	<i>Cichorei</i> rad.	276. 396
mineralia	497	<i>Cinæ</i> sem. vid. fantonici sem.	
<i>Cera</i>	291	<i>Cingulum</i> mercuriale	253
alba	292	<i>Cinnabaris</i>	244. 258
virginea	ibid.	antimonii	259
eius oleum	291	<i>Cinnamomum</i>	307. 319
<i>Cerasa</i>	359	album vid. Winteranus Cor-	
eorum nuclei	154. 182	tex & Costi dulc. rad.	
gummi	285	<i>Citri</i> cort.	87. 127. 154
<i>Ceratum</i> de galbano camphora-		<i>Citrulli</i> sem.	275
tum	185	<i>Cnici</i> semen vid. Carthami sem.	
<i>Cerui</i> cordis ossa	510	<i>Cocci gnidii</i>	477
<i>Ceruicaria</i> vid. vuularia.		<i>Cocculi</i> de leuante	238. 242
<i>Ceti</i> priapus	453	<i>Cochinilla</i>	477
<i>Ceruaria</i> vid. Gentiana alba.		<i>Cochleæ</i>	380
<i>Ceruinus</i> boletus	474	<i>Cochlearia</i>	116
<i>Cerussa</i>	456	<i>Coffée</i>	395
antimonii	134	<i>Coliphium</i>	366
<i>Chærefolium</i>	86. 115. 154. 266	<i>Colliquantia</i> quæ sint	382
<i>Chalybs</i> præparata	334	<i>Collo</i> & faucibus ad propriata re-	
<i>Chameactæ</i> vid. Ebuli rad.		media	499
		<i>Colo-</i>	



# INDEX.

<i>Colocynthis</i>	42.76	<i>fal volatile</i>	87.146
<i>eius semen</i>	69	<i>Crap</i>	312
<i>Calutea vesicaria</i>	66	<i>Cremor tartari</i>	193
<i>Comæ millefolii</i>	118	<i>Crepitus lupi</i>	444
<i>Conchæ præparatæ</i>	87. 139. 155	<i>Creta</i>	427
<i>Condensantia</i>	354	<i>Crocus</i>	266. 298
<i>Confect. alkermes</i>	446	<i>martis antimoniat Stahl.</i>	307
<i>Consolida minor flor. purpureo</i>			321
<i>vid. Prunella.</i>		<i>solubilis</i>	336
<i>media</i>	440	<i>sulphuratus</i>	ibid.
<i>maior vid. Symphytum.</i>		<i>metallorum Ruland.</i>	24
<i>Consuetudines ægrotorum a Me-</i>		<i>Crystallus præparata</i>	155. 197
<i>dico sunt considerandæ</i>	15	<i>Crystalli lunæ</i>	25
<i>morbos inducere possunt</i>	16	<i>Cubebæ</i>	216. 231 238
<i>qua ratione superari possint</i>		<i>Cucumeris sem.</i>	275
<i>ibid.</i>		<i>asinini succus vid. Elaterium.</i>	
<i>Contraierua</i>	86. 103	<i>Cucurbitæ</i>	275
<i>Copal gumm.</i>	405	<i>Cuminum</i>	154. 176
<i>Corallia</i>	426.	<i>Cunctatio in cura maxime eui-</i>	
<i>præparata</i>	87	<i>tanda</i>	14
<i>Corallinus muscus</i>	333	<i>Cupressus vid. Abrotanum</i>	
<i>Cordis cerui ossa</i>	510	<i>Cupressinux</i>	447
<i>Coriandri sem.</i>	508	<i>Curatio vid. Therapia</i>	
<i>Corna</i>	444	<i>per expectationem</i>	13
<i>Cornu cerui vstum philos. præ-</i>		<i>per specifica</i>	6.495
<i>paratum</i>	140. 86	<i>Curæ heroicæ improbantur</i>	9
<i>eius spiritus</i>	155	<i>Curcas vid. Ricinus</i>	
<i>Correctio cacochymia</i>	409	<i>Curcumæ rad.</i>	514
<i>Corylinum lignum</i>	368	<i>Cyani flor.</i>	215. 225
<i>Corylinus viscus</i>	509	<i>Cyclaminis rad.</i>	42. 69
<i>Costus dulcis</i>	339	<i>Cydonia mala</i>	396
<i>corticofus vid. Winteranus</i>		<i>Cynoglossa</i>	489
<i>cortex.</i>		<i>Cynoshati fruct.</i>	154. 182
<i>Cranium humanum</i>	511	<i>Cidre</i>	374
<i>eiusdem vñea</i>	441	<i>Cyperii long. &amp; rotund. rad.</i>	340

D. Da-



# INDEX.

D.		<i>Discussientia interna &amp; externa</i>	
<b>D</b> <i>A&amp;yli</i>	370		387
<i>Daphnoides</i> vid. <i>Mezereum</i> .		quænam sint	382
<i>Dauci</i> rad.	153. 163	<i>Diuresis</i> quid sit	152
fem.	154. 163	quomodo differat	ibid.
<i>Daura</i> Paracelsi	63	quas nam euacuet materias	ibid.
<i>Dei</i> præsidium in omnibus veneretur morbis	II	quando conducatur	153
<i>Dens</i> hippopotami	451	noceat	159
apri	420	eiusdem promotio quomodo	
<i>Diacodium</i>	279	instituenda	158
<i>Diacrydium</i> sulphurat.	79	<i>Diuretica</i> vegetabilia	153. seqq.
<i>Diacydonium</i> pellucidum ialapp.	76	mineralia	155
		animalia	ibid.
<i>Dieta</i> dura in mollem permutata, quæ damna inferat	16	eorum modus operandi	ibid.
in morbis observanda	10. seqq.	applicandi	157
salivationis tempore observanda	248	differentia & classes	156. seqq.
<i>Diaphoresis</i> quid sit	83	<i>Doronici</i> rad.	86. 104
eiusdem differentia	84	<i>Draconis</i> sanguis	449
gradus	90	<i>Dulech</i> Helmontii	208
quasnam eliminet materias	84		
aquosa quando conducatur	ib.	<b>E.</b>	
<i>Diaphoretica</i> vegetabilia	86	<b>E</b> <i>Bur</i> & spiritus eius	155. 209
mineralia	87	<i>Ebulus</i>	37. 57
animalia	ibid.	<i>Edulcorantia</i>	409
quando noceant	93	<i>Egranum</i> sal	43. 83
eorum modus operandi	88	<i>Elaterium</i>	42. 69
propinandi	89	<i>Electuar.</i> de Cassia & manna	50
<i>Diascordium</i> Fracastorei	121. 87	<i>Elemi</i> gumm.	376
<i>Digestiva</i> aliquando emesin ci-		<i>Elixir</i> P. Paracelsi.	62
ent	2	<i>Elleborus</i> vid. <i>Helleborus</i> .	
quænam sint	382	<i>Emesis</i> quid sit	21
<i>Dictamnus</i> albus	86. 153. 103	quænam repurget loca	22
		artificialis ubi locum habeat	22. seqq.
		quando noceat	29
		<i>Eme-</i>	



# INDEX.

<i>Emetica</i>	23	<i>Evacuans methodus</i>	5
eorum modus operandi	26	<i>Eukaspia medendi</i>	13. fqq.
propinandi	27	<i>Eupatorium Mef vid. Ageratum.</i>	
antimoniata	37	luteum vulgare	516
aliquando catharsin promovent	3	<i>Euphorbium</i>	42. 70. 210. 216
<i>Emmenagoga vegetabilia</i>	306. 501	<i>Euphrasia</i>	512
animalia	507	<i>Excitantia remedia quænam sint</i>	466
mineralia	ib.	eorum differentia	ib.
<i>Empl. de spermale ranarum</i>	211	- modus operandi	469
deran's cum Mercurio	211	- propinandi	470
de crusta panis	365	vegetabilia	467
<i>Endivia</i>	276. 489	animalia	468
<i>Engel-Wurz</i>	97	mineralia	ibid.
<i>Enule rad.</i>	86. 104. 153. 238. 266	<i>Expectoratio quid sit</i>	264
<i>Energia naturæ a medico bene pen-</i>		quando conducatur	265
sitanda	II	noceat	269
<i>Epithymum</i>	42. 59. 86	ejus abusus & damna	268
<i>Epsamense sal</i>	43. 83	<i>Expectorantia</i>	265
<i>Equi stercus</i>	345	eorum modus operandi	267
testiculi	345. 519	applicandi	268
<i>Equisitam</i>	437	composita officinalia	270
<i>Errhina quomodo operentur</i>	214.	<i>Expulsio rerum toto genere præter-</i>	
quando conducant	214	narium	322
noceant	217	<i>Extract. diagryd. aromatizat.</i>	80
modus propinandi	216	marocostinum Mindereri	340
vegetabilia	215		
animalia	ibid.	F.	
mineralia	ibid.		
<i>Errhino - ptarmica quomodo agant</i>	214	<b>F</b> <i>Arsana vid. Tussilago.</i>	
<i>Eruca sem.</i>	216. 229. 238	<i>Farina secalina</i>	366
<i>Erysimum</i>	266. 294	<i>Farin-Zucker</i>	234
<i>Eryngii rad.</i>	153. 164	<i>Faucibus &amp; colla adpropriata re-</i>	
<i>Ess. alexipharmaca Stahl.</i>	87. 147	media	499
lignorum	87. 149.	<i>Fel Tauri</i>	339
<i>Esula</i>	42. 71	<i>Ferrum</i>	339
		<i>Fibra Hellebori nigri</i>	63
		Xxx	Fi.



# INDEX.

<i>Ficaria</i> vid. <i>Chelidonium</i> minus.		<i>Granata</i> mala	371
<i>Ficus</i>	265. 280	<i>Granatorum</i> cortex	441
<i>Fieber-Ruchen</i>	203	<i>Gratiola</i> Dei	25. 43. 72
<i>Filicis</i> rad.	517	<i>Geniste</i> fl.	175
<i>Filipendula</i>	435	<i>Gecken-Heyl</i>	222
<i>Flos casfiæ</i> vid. <i>Cassia</i> extracta.		<i>Gelatina</i>	266. 293
<i>Flor. persicorum</i>	42. 58	<i>Gemmae</i>	87. 138
<i>Focculæ</i> ari	99	<i>Geranium</i>	402
<i>Fœniculum</i> alpinum vid. <i>Mei</i> rad.		<i>Gentiana</i> rubra	86. 105. 183
<i>Fœnu</i> græcum	265. 275	<i>Gift-Heyl</i>	98
<i>Folium</i> indum vid. <i>Malabattrum</i> .		<i>Gilla</i> Paracelsi	25. 220
<i>Formice</i>	86. 141	<i>Ginsing</i> rad.	472
earum ova	26	<i>Gluten</i>	377
<i>Fraga</i>	165	<i>Gnaphalium</i>	438
<i>Fragaria</i>	153. 164	<i>Grana</i> gnidii	77
<i>Frangula</i>	42	<i>Tilli</i> vid. <i>Rizinus</i> .	
<i>Fraxinum</i> lign.	87. 154. 190. 244	<i>Grossularia</i> non spinosa vid. <i>Ribes</i> .	
<i>Fraxinella</i> vid. <i>Dictamnus</i> albus		<i>Guajacum</i> vid. <i>Sanctum</i> lign.	
<i>Frigida</i> 4 majora semina	265. 275	<i>Gumm.</i> guttæ	43. 72
minora semina	276	vitriolatum Mindereri	73
<i>Fuligo</i>	424	<i>Gutta</i> cambodia vid. <i>gumm.</i> gutt.	
<i>Fumaria</i>	86. 97. 117	<i>Guttur</i> Galli	519
<i>Fumus</i> Tabaci	36. 37		
<i>Furfures</i> Tritici	367		

## H.

### G.

<i>Galange</i> rad.	86. 105
<i>Galbanum</i> gumm.	154. 184
<i>Galle</i>	445
<i>Galli</i> guttur	519
<i>Gallinacea</i> ova	378
<i>Gallinarum</i> tunicæ ventriculi	514
<i>Galege</i> flor.	123
<i>Garten-Kress</i>	118
<i>Glandes</i>	446
<i>Graminis</i> rad.	165. 173

<i>Saber-Grütz</i> Brühe	274
<i>Francf</i>	ibid.
<i>Hematites</i>	454
<i>Hæmorrhagia</i> quænam sint promo-	
vendæ	205
<i>Hæmorrhagias</i> promoventia reme-	
dia quomodo operentur	308
	seqq.
eorum modus propi-	
nandi	309

He-



# INDEX.

<i>Hæmorrhoides</i> proritantia remedia		<i>Hyperemesis</i>	28
vegetabilia simplicia	307	<i>Hyperici</i> sem.	154. 177
composita	308	<i>Hypnotica</i>	482
<i>Hedera</i> terrestris	154. 170. 266	<i>Hypocistis</i>	450
<i>Hedera</i> gumm.	422	<i>Hyssopus</i>	266
<i>Helenium</i> vid. <i>Enula</i> .			
<i>Helleborus</i> albus	33. 24. 215		
niger	41. 62. 238	I.	
<i>Hepar</i> lacertarum	511		
talparum	ibid.	<i>Ialappa</i>	43. 74. 215
ranarum	ibid.	<i>Iasmini</i> fl.	473
<i>Hepatica</i>	500	<i>Iberis</i> vid. <i>Nasturtium</i>	
<i>Hepatica</i> nobilis	398	<i>Ichthyocolla</i>	377
stellata vid. <i>Matrisylva</i> .		<i>Iesuiticus</i> cortex	442
<i>Herniaria</i>	153. 165	<i>Imperatoria</i>	86. 306. 153. 238.
<i>Heroica</i> curæ improbantur	14		266
<i>Hohl-Holz</i> vid. <i>Wund-Holz</i> .		<i>Incidentia</i> quæ sint	382
<i>Hippolapatum</i>	52	<i>Incrassatio</i> quid sit	354
<i>Hippomanes</i>	511	quando suscipienda	355
<i>Hippopotami</i> dens	451	<i>Incrassantia</i> vegetabilia simplicia	356
<i>Hirci</i> sanguis	87. 142. 155		ib.
<i>Hirundinaria</i> vid. <i>Vincetoxicum</i> .		præparata	ib.
<i>Hirundines</i>	510	animalia	357
<i>Hohl-Wurk</i>	161	mineralia	ib.
<i>Hominis</i> partes &c.	513	eorum modus operandi	357
<i>Hordeum</i>	265. 276	<i>Indicans</i> quid designet	I
<i>Horminum</i>	343	<i>Indicatio</i> quid doceat	ib.
<i>Humorum</i> pravitate peccantium		<i>Indicatum</i> quid denotet	ibid.
correctio	409	<i>Indum folium</i> vid. <i>Malabathrum</i> .	
<i>Huso</i> piscis	377	<i>Insectoria</i> grana	446
<i>Hut-Zucker</i>	234	<i>Insuccatio</i> Aloes	61
<i>Hydragoga</i> quid sint	40	<i>Ipecacuannha</i>	33. 24
<i>Hydromel</i>	291	<i>Iris</i> nostras & Florent	43. 76. 215
<i>Hydropiper</i> vid. <i>persicaria</i> .			238 266
<i>Hyoscyamus</i>	265. 277	palustris fl. luteo vid. <i>Pseudo</i>	
<i>Hypercatharsis</i>	45	acori rad.	



# INDEX.

<i>Iva arthetica</i> vid. <i>Chamaepitys</i> .		<i>Lavendula</i> mas l. <i>latifolia</i> vid. <i>Spi-</i>	
<i>Judaicus lapis</i>	155. 197	<i>ca fl.</i>	
<i>Juglans nux</i>	371	<i>Laureola</i> vid. <i>Mezereum</i> .	
<i>Jujube</i> ,	265. 281	<i>Lauri</i> bacce	86. 154. 181. 266
<i>Juniperi</i> baccae	145. 86.	<i>Laxatio</i> quid sit	40
	180. 266	<i>Laxantia</i> cholagaga	41
gumm.	154. 185	hydragoga	42
lign.	128. 154. 244. 266	melanagoga	ib.
		phlegmagoga	ibid.
K.		<i>Lazuli</i> lap.	43. 82
<i>Keller-Hals</i>	76	<i>Lenitio</i> quid sit	39. 40
<i>Kermes grana</i>	446	<i>Lenientia</i>	41
<i>Kiefern</i>	465	quid sint	383
<i>Korb-Rosinen</i>	282	<i>Lens palustris</i>	490
		<i>Leporis</i> tali	155. 212
		testiculi	519
L.		<i>Levisici</i> rad.	86. 107. 153. 266
<i>Lac</i>	265. 286	<i>Liliorum</i> albor. rad.	361
augentia	502	convallium fl.	227
ejus ferum	288	<i>Limaces</i>	380
<i>Luna</i>	520	<i>Linaria</i>	154. 171
<i>Lacca</i> gumm.	448	<i>Lingua Tetraonis</i>	511
<i>Lactuca</i>	490	<i>Lini</i> semen	265. 278
fem.	276	<i>Liquiritiae</i> rad.	265. 271. 356
<i>Lapathum acutum</i>	107	<i>Liquor CC. succinatus</i>	87. 149. 206
<i>latifolium</i> vid. <i>Hippolapathum</i> .		stypticus Barckhusii	337
<i>Lappa major</i> vid. <i>Bardana</i> .		terrae fol. tartari	193
<i>Lapsus in vitales &amp; morales actio-</i>		<i>Lithargyrium</i>	456
<i>nes corruptionem introduxit</i>	7	<i>Lithontriptica</i> quænam sint	323
<i>Laserpitium</i>	42	<i>Lolium</i> vid. <i>Nigellastrum</i> .	
<i>Lathyrus minor</i> vid. <i>Cataputia</i> .		<i>Lucii</i> piscis mandibula	87. 146
<i>Laub-Frösche</i>	210	<i>Ludus humanus</i> Paracelsi	208
<i>Lavendel-Wasser</i>	400	<i>Lumbrici</i> terrestres	87. 144. 155
<i>Lavendula</i>	226. 215	<i>Luna</i> lac	520
		<i>Lunaria</i>	519
		<i>Luna</i> crystalli	155. 198
		<i>Lu-</i>	



# INDEX.

<i>Lupi caro</i>	517	<i>Medicamenta quomodo efficaciam</i>	
<i>stercus</i>	346	<i>suam edant</i>	2
<i>Lynzis lapis</i>	197. 155	<i>non semper vnum eundemque</i>	
<b>M.</b>		<i>præstant effectum</i>	3
<i>Machine sudatoriæ</i>	96	<i>sæpe effectum præstant licet cor-</i>	
<i>Macis pulvis</i>	335	<i>pus non attingant</i>	3
<i>Magnesia alba</i>	43. 83	<i>operantur excitando sensum vi-</i>	
<i>Magnetica</i>	495	<i>talem</i>	4
<i>Majorana</i>	215. 223. 208	<i>effectus eorum a natura depen-</i>	
<i>Mala vide Poma.</i>		<i>det</i>	12
<i>infana vid. Melanzana.</i>		<i>Medicus morbos non profligat, sed</i>	
<i>Malebatrum</i>	473	<i>manus admouet obstetrican-</i>	
<i>Malicorium</i>	441	<i>tes</i>	6
<i>Malua</i>	265. 272. 356	<i>eius requisita &amp; officia</i>	8
<i>Manati lapis</i>	452	<i>Medulla animalium</i>	378
<i>Mandibula lucii piscis</i>	146	<i>Mei rad.</i>	341
<i>Mandragora</i>	490	<i>Mel</i>	265. 289
<i>Manna</i>	41. 50	<i>rosatum</i>	290
<i>Vitrioli</i>	25	<i>Melanagoga quid sint</i>	40
<i>Margarite</i>	146	<i>Melanzana</i>	375
<i>Martialia quomodo aluum moue-</i>		<i>Melicrata</i>	291
<i>ant</i>	48	<i>Meliloti fl.</i>	399
<i>Martis minera Hassiaca</i>	455	<i>Melissæ Zucker</i>	234
<i>Marubium</i>	266. 295	<i>Melissa</i>	306. 314
<i>Marum verum</i>	419	<i>Melonum sem.</i>	275
<i>Masticatio quid sit</i>	237	<i>Mercurialia emetica</i>	38
<i>Masticatoria quænam sint</i>	237	<i>saluationem excitantia</i>	244
<i>quomodo operentur</i>	238	<i>Mercurius diaphoreticus</i>	87. 257
<i>Mastiche</i>	238. 241	<i>dulcis</i>	43. 244. 255
<i>Mastichina vid. Marum verum.</i>		<i>præcipitatus albus</i>	25. 262
<i>Matalista</i>	42. 58	<i>incarnatus</i>	262
<i>Mater perlarum</i>	87. 145	<i>luteus Zwolfferi</i>	262
<i>Matricaria</i>	306. 314	<i>ruber</i>	25. 262
<i>Matri sylua</i>	438	<i>viridis</i>	263
<i>Mechoacanna</i>	42. 57. 215	<i>sublimatus albus</i>	254
<i>Meconium</i>	471	<i>ruber</i>	255



# INDEX.

<i>Mercurius vitæ</i>	25.36.134	<i>Moschaten</i>	345
<i>Mercurialis</i>	463	<i>Myrobalani</i>	51.41
<i>Mespila</i>	447	<i>Myrtilli</i>	447
<i>Methodus alterans</i>	5.6	<i>Myrrha</i>	266.303
<i>evacuans</i>	5	<i>Myxæ vid. Sebesten.</i>	
<i>moderans</i>	5.6		
<i>Methridatium</i>	149.87	N.	
<i>Mezæreum</i>	43.76		
<i>Milit solis sem.</i>	154.178	<b>N</b> <i>Atura</i> gubernat operationes	
<i>Milium</i>	364	<i>medicamentorum</i>	I
<i>Millefolium</i>	86. 117. 506	<i>indiget Medico ministro</i>	8-12
<i>Millepedes vid. Aselli</i>		<i>ejus errores</i>	12
<i>Minera martis Hassiaca</i>	455	<i>Napi sem.</i>	86. 125
<i>Minium</i>	450	<i>Narcotica</i>	482
<i>Miua vel panis cydoniatus</i>	369	<i>Nasturtii herb.</i>	86. 118
<i>Mixtura simplex</i>	87. 149	<i>rad.</i>	153. 154. 238
<i>Moderans methodus</i>	5.6	<i>Nephriticus lapis</i>	155. 197
<i>Mora</i>	373	<i>Nephriticum lignum</i>	154. 191
<i>Morborum causæ</i>	5	<i>Nervina</i>	470
<i>Morsuli restaurantes</i>	194	<i>Nicotiana</i>	24. 35. 215. 238
<i>Morsus diaboli</i>	86. 107	<i>Nidus hirundinum</i>	511
<i>Motuum temperatio quid sit</i>	482	<i>Nigella sem.</i>	216. 229. 238
<i>Moschus</i>	478	<i>Nigellastrum</i>	230
<i>Motuum alteratio partioribus obti-</i>		<i>Nibili album</i>	513
<i>netur dosibus</i>	10	<i>Nindsin rad.</i>	472
<i>excitatio quid sit</i>	466	<i>Nitrum</i>	417. 485
<i>quando instituenda</i>	467	<i>crystallisatum</i>	200
<i>doctrina lux est cognitionis me-</i>		<i>depuratum</i>	ibid. 155
<i>dicæ</i>	8	<i>tabulatum</i>	200
<i>Mulsam</i>	290	<i>regeneratum</i>	ibid. 155
<i>Mumia</i>	393. 401	<i>fixum</i>	200
<i>Mumialia</i>	495	<i>crudum</i>	43. 155
<i>Mundificantia</i>	409	<i>antimoniatum</i>	43. 155
<i>Mures marini</i>	519	<i>vitriolatum vid. arcanum dupli-</i>	
<i>Muscerda</i>	26	<i>catum.</i>	
<i>Mutter Melcken</i>	230	<i>ejus spiritus dulc.</i>	201
		<i>spi-</i>	



# INDEX.

spiritus	337	Ova gallinacea	378
fulphuratum	201, 202	Ovorum testæ	155, 212
vitriolatum Ludov.	202	Oxysaccharum emetic. Angel, Sal.	25
Nodulus in odontalgia serosa	239		Ludov, 25. 38
Numularia	438		P.
Nux cathartica vid. Rizinus.			
moschata	340		

## O.

<b>O</b> btundentia	409	<b>P</b> nacea Anhaldina	260
Ochra	455	Maetsii	ibid.
Ocymum citratum vid. Basilicum.		Ponchymagoga quid sint	40
Oleum Sabinæ croceum Mynsichti	317	Palma	370
diacolocynthidos Quercetani	69	Panis	364
Olibani gumm.	154, 185	martius	236
Olisniti rad.	86, 107	mellitus	365
Ononidis rad.	153, 166	hordeacius	277
Operatio medicamentorum in ge-		Papaver	265, 279
nere	1	erraticum	295, 273
non pure absolvitur mechani-		Turcicum vid. Opium.	
ce	2	Paradisi lign. vid. Aloes lign.	
pure mechanica refutatur effe-		grana	86, 126, 238
ctu	2	Parcira braua	153, 166
Ophthalmica	498	Parietaria	464
Opium	3, 492	Paris herb.	464
Opoponax	405	Paroxysmorum horæ probe obser-	
Orexis canina quomodo curata	16	vandæ	13
Origani rad.	86, 118, 215	Passula	265, 182
Oryza	364	Pastinaca sylvestris vid. Dauci	
Os sepia	452	rad.	
Ostrea	380	Pathemata animi misere motus	
earum testæ vid. Concha.		confundunt vitales	7
Otica	499	Pectoralia	499
		Pedra de porco vid. Porcinus	
		lapis.	
		Penid-Zucker	234
		Pentaphyllum	435
		Per-	



# INDEX

<i>Percarum lapides</i>	155. 204	<i>Polium montanum</i>	508
<i>Perfoliata</i>	438	<i>Polygonum</i>	439
<i>Persicaria</i>	438	<i>Polypodium</i>	42. 65
<i>Persicorum nuclei</i>	154	<i>Poma</i>	374
<i>flor.</i>	42. 58	<i>Adami</i>	375
<i>Peruvianus cortex</i> vid. <i>China cort.</i>		<i>Pompholyx</i>	513
& <i>Castarilla.</i>		<i>Porcinus lapis</i>	144
<i>Petasitis</i>	86. 108. 153	<i>Porrum</i>	331
<i>Petroleum</i>	481	<i>Portulaca</i>	490
<i>Petroselini rad.</i>	153. 167. 266	<i>femen</i>	276
<i>Pfeffer-Kuchen</i>	365	<i>Potus ægrotis non denegandus</i>	20
<i>Pferde-Bier</i>	346	<i>Præcipitantia</i>	409
<i>Phlegmagoga quid sint</i>	40	<i>Preparantia quænam sint</i>	382
<i>Phlegmatizantia quid sint</i>	237	<i>Praxis general.</i> vid. <i>Therapia gen.</i>	
<i>Pilosella</i>	266. 295	<i>Priapus ceti</i>	453
<i>Pilule aggregatiuæ</i>	54	<i>Primula veris</i>	420
<i>Frankofurtenſes</i>	61. 62	<i>Propolis</i> vid. <i>Cera virginea.</i>	
<i>Mefuæ</i>	54	<i>Proportio quantitatis remediorum</i>	10
<i>peſtilentiales Ruſſi</i>	67		
<i>ſine quibus</i>	54	<i>Pruna</i>	402
<i>de tribus</i>	54	<i>alba</i>	403
<i>Wildeganſii</i>	88	<i>Prunella</i>	439
<i>Pimpinella alba</i> 97. 86. 108. 154. 215.		<i>coerulea</i>	440
266. 238. 244		<i>Prunella lapis</i>	43
<i>ſanguisorba</i>	435	<i>Pſeudoacori rad.</i>	436
<i>Pinaſter</i>	465	<i>Pſyllii ſem.</i>	42. 52
<i>Pinea</i>	265	<i>Ptarmica</i>	215. 224
<i>Pini lign.</i>	422	<i>quomodo agant</i>	214
<i>Piper</i>	216. 232. 238.	<i>quando conducant</i>	ibid.
<i>montanum</i> vid. <i>Mezereum.</i>		<i>eorum modus propinandi</i>	216
<i>Piperitis</i>	238. 240	<i>contraindicantia</i>	217
<i>Piſſacia</i>	265. 283	<i>Ptiſana hordei</i>	277
<i>Pix naualis</i>	406	<i>Ptyaliſmus</i> vid. <i>Saluatio gener.</i>	
<i>Planta Chriſti</i> vid. <i>Rizinus.</i>		<i>Pulegium</i>	238. 241
<i>Plantago</i>	435	<i>agreſte</i> vid. <i>Calamintha.</i>	
<i>Plumbum</i>	456		<i>Pul-</i>



# INDEX.

<i>Pulmonaria</i> Gallica l. phtifica vid.		<i>Regulus</i> antimonii simplex	24
<i>Pilosella.</i>		medicinalis	24. 134
maculosa	266. 296	<i>Relaxatio</i> quid sit	458
<i>Pulvis</i> scammi. polychrestus vege		<i>Relaxantia</i> remedia	459
tabilis	79	quando conducant	458
syrius vid. <i>Scammonium.</i>		eorum modus operandi	460
<i>Purgatio</i> vid. <i>Catharsis.</i>		propinandi ibid.	
strictissime dicta quid sit	40	<i>Remedia</i> in urinæ incontinentia	502
<i>Purgantia</i> hydragoga	42. 43	in hæmorrhoidibus cæcis	502
<i>Pyra</i>	375	in melancholia	502
<i>Pyrethrum</i>	215. 222. 238	in morfu animalium venena-	
sylvestre vid. <i>Ptarmica.</i>		torum	503
<i>Pyrola</i>	440	<i>Remediorum</i> selectus fiat	10
		<i>Repellentia</i>	478
		<i>Reprimentia</i>	428
		<i>Resina</i>	465
		<i>Resolutio</i> quid sit	381
		quænam comprehendat reme-	
		dia	382
		<i>Resoluentia</i> quænam sint	382
		quando conducant	383
		sanguinem grumofum vegetabi-	
		lia	384
		mineralia	385
		lympham & serum vegetabilia	
			385
		animalia	386
		mineralia ibid.	
		eorum modus operandi	389
		propinandi	391
		<i>Rhabarbarum</i>	42. 52
		monachorum	42. 52
		<i>Rhamnus</i> catharticus	42. 58
		<i>Rhaponticum</i>	52
		<i>Rhodia</i> rad.	507
		Y y y	<i>Rho.</i>
<b>Q.</b>			
<i>Quecken-Gras</i>	165		
<i>Quercus</i>	445		
<i>Quernus</i> viscus	509		
<b>R.</b>			
<b>R</b> <i>Ane</i>	155. 210		
earum sperma	211		
<i>Raparum</i> rad.	154. 167		
<i>Raphanus</i>	154. 168		
<i>Refrigerantia</i>	482		
<i>Regimen</i> post adsumptum purgans			
	44		
sub sudatione	91		
post sudorem	92		
nimis calidum nocet	19		
frigidum quod noceat	20		



# INDEX.

<i>Rhodium</i> lignum	474	vegetabilium alcalia fixa	154. 191
<i>Ribes</i>	376	volatil. vrinosa	155. 202. 218
<i>Rizinus</i> americanus	43. 77	Galben Römische vid. <i>Horminum</i> .	
vulgaris	43. 77	<i>Salua</i>	407
<i>Rorella</i>	266. 296	<i>Salualis</i> euacuatio quot modis fiat	214
<i>Rosa</i> mineralis Ang. Sal.	25. 38	<i>Saluatio</i> generalis quid sit	243
<i>Rosarum</i> fl.	215. 227	ejus indicantia	243
<i>Rosinen</i> gemeine	282	symptomata	245
<i>Rosmarinus</i>	215. 224	<i>Saluationem</i> excitantia remedia	244
<i>Ros</i> solis vid. <i>Rorella</i> .		facilitantia	ibid.
<i>Rubia</i> tinctorum	306. 312	eorum modus operandi	245
<i>Rusci</i> rad.	515	adplicandi	246
<i>Ruta</i>	86. 119	<i>Salua</i>	86. 119
sem	216	<i>Sambucus</i>	24. 37. 266
muraria	517	<i>Sanctum</i> lignum	87. 129. 154. 244
		<i>Sanguinis</i> abundantis aut subsisten-	
		tis euacuatio per remedia	305
		quando conducāt	306
		humani sal. volat.	87. 146
<i>S</i> <i>Abina</i>	307. 316	<i>Sanguis</i> draconis	449
<i>Sacharum</i>	216. 233	<i>Sanicula</i>	440
saturni	457	<i>Santalum</i> lignum	87. 131
<i>Cast</i> grūn	59	<i>Santonici</i> semen	332
<i>Sagapenum</i> gumm.	154. 186	<i>Sapo</i> vomitoria Syluii	25
<i>Sal</i> anglicanum vid. <i>Epsamenſe</i> .		<i>Saponaria</i>	244. 265
commune ejusque ppta	155	<i>Sarcocolla</i>	324
CC, vol.	140	<i>Sarsaparilla</i>	86. 108. 244. 266
digestiv. Sylv.	205	<i>Sassafras</i> lign.	87. 130. 154. 244
Ebfamenſe	43. 83	<i>Satureja</i>	398
Egranum	43. 83	<i>Saturni</i> sacchar.	457
joviale Mynſichti	457	<i>Satyrii</i> rad.	472
polychreſt. Glaſeri	102	<i>Saxifragia</i>	154. 169
vitrioli	25. 38	rubra vid. <i>Filipendula</i> .	
volat. viperanam	86. 146		
<i>Salia</i> media digestiva	155. 201		

Sca-



# INDEX.

<i>Scabiosa</i>	86.120.266	<i>Serum lactis</i>	288
<i>Scammonium</i>	43. 78.	tamarindinatum	54
fulphuratum	79	<i>Sesami sem.</i>	465
<i>Scarabæi majales</i>	155. 211	<i>Sexus ratio habenda</i>	16
<i>Scariola sem</i>	492	<i>Sideritis</i>	519
<i>Schacarilla</i> vid. <i>Cascarilla.</i>		<i>Sigillatæ terræ</i>	137
<i>Schœnanthii fl.</i>	307. 317	<i>Sigillam Salomonis</i>	436
<i>Schœnoprasum</i> vid. <i>Porrum.</i>		<i>Sileres montani</i>	154. 178
<i>Sclarea</i> vid. <i>Horminum.</i>		<i>Silices</i>	347
<i>Scordium</i>	86.120. 266. 416	<i>Siliquæ dulces</i>	265. 285
<i>Scorpiones</i>	155. 212	<i>Sinapi sylvestre</i> vid. <i>Erysimum.</i>	
<i>Scorzonera</i>	86.110	sem.	216. 230. 238
<i>Sebesten</i>	265. 284	<i>Sisarum montanum</i>	Iaponicum
<i>Secalis fl.</i>	366	vid. <i>Ginseng rad.</i>	
<i>Secundinae</i>	511	<i>Solanum</i>	491
<i>Sedantia</i>	482	furiosum	491
<i>Sedum maius</i> vid. <i>Sempervivum</i>		Mexicanum vid. <i>Ialapp.</i>	
maius.		<i>Soldanella</i>	43. 77
vermiculare	23. 37. 86	<i>Soleæ ex aaate mercurii</i>	253
<i>Seidelbast</i>	76	<i>Sophia Chirurgorum</i>	442
<i>Sempervivum maius</i>	490	<i>Sopientia</i>	12
<i>Senna</i>	42. 65	foporifera	482
<i>Sennes-Blätter falsche</i>	66	<i>Sorba</i>	448
<i>Sensibilitas</i> indiuidualis magnam		<i>Species de hyazintho</i>	139
in praxi medica meretur con-		hieræ picræ	62
fiderationem	17	diaturbith	59
quantum valeat exemplis illu-		<i>Specificæ</i> 495. eorum modus adhi-	
stratur	17. seq.	bendi	505
<i>Sensibiles</i> prouide tractandi	18	operandi	503
<i>Sensus</i> rerum absentium adfici-		<i>Speichel Wurz</i>	222
unt etiam hominem	4	<i>Speise Zucker</i>	234
<i>Sepiæ os</i>	452	<i>Sperma ceti</i>	266. 292
<i>Serpentaria virginiana</i>	111	<i>Spicæ fl.</i>	216. 228. 266
<i>Serpentes</i> vid. <i>Viperæ.</i>		<i>Spieck-Des</i>	461
<i>Serpillum</i>	86. 215. 225	<i>Spillinge</i>	403
<i>Italicum</i> vid. <i>Thymus.</i>		Yyy 2	<i>Spina</i>



כח

Impre-



# INDEX.

Т у у 3



# INDEX.











Ned Thieraf  
H











